

劉賓客文集卷第一

正議大夫檢校禮部尚書兼太子賓客贈兵部尚書劉禹錫

問大鈞賦 砥石賦 楚望賦

中徬往賦 何卜賦 謫九年賦

望賦 山陽城賦 秋聲賦

問大鈞賦

始予失臺郎為刺史又貶州司馬俟罪朗州三見閏

月人咸曰數之極理當遷焉因作謫九年賦以自廣

是歲臘月詔追明年自闕下重領連山郡印綬人咸

曰美惡周必復第行無恤歲杪其復乎居五年不得



調歲二月有事於社前一日致齋孤居慮靜滯念歎
起伊人理之不可以曉也將質諸神乎謹貢誠馳精
敢問大鈞其夕有遇寤而次第其詞以爲賦

圓方相函兮浩其無垠窅冥翕闢兮走三辰以騰振
孰主張是兮有工其神迎隨不見兮強名之曰大鈞
歌以臨下兮巍兮雄尊天爲獨陽高不可問工居其
中與人差近身執其權心平其運循名想象斯可以
訊曰嘻蒙之未生其猶泥爾落乎埏埴唯鈞所指忽
然爲人爲幸大矣工賦其形七情與俱嗇智不授畀
之以愚坦坦之衢萬人所趨蒙一布武化爲畏途人

或譽平之百說徒虛人或排之半言有餘物壯則老
乃唯其常否終則傾亦不可長老先期而驟至今否
踰數而巨量雖一夫不獲兮亦大化之攸病謹薦誠
上問兮俛伏以聽是夕寢熟夢遊乎無何有之鄉抗
陛級乎重霄兮異人間之景光中有威神巾金甲而
煒煌命之使前兮其音琅琅曰吾大化之一工也居
上臨下廉其不平汝今有辭吾一以聽播形肖貌生
類積億橐籥圜匡鎔練消息我之司智初不爾嗇不
守以愚覆爲汝賊既賦汝形輔之聰明盍求世師資
適攸宜胡然抗志遐想前烈倚梯青冥舉足斯跌宕

爾智斧無為自伐鑿竅太繁天和乃洩利逕前誘多
逢覆轍名腸內煎外火非熱今哀汝窮將厚汝愚剔
去剛健納之柔濡塞前竅之傷痍兮招大和而與居
貫以待人兮急以自拘道存壺奧無示四隅軌物之
勢不作兮見傷之機自無汝不善用吾馬嗇乎且夫
貞而騰氣者臚臚健而垂精者昊昊我居其中猶輪
是蹈以不忍為體以日新為道保鱗蜚走灌莽芭皂
乃牙乃甲乃殛乃剖陽榮陰悴生濡死薨各乘氣化
不以意造賦大運兮無有淑惡彼多方兮自生醜好
爾奚不德余以驟壯姑尤我以速老邪觀汝百為又

或不然赤子哇哇急其能言亦既名物幾時踰躔春
耕其丘投種之日釋耒而歎何時實粟望所未至謂
予舒舒欲其久留謂我譬如我一子二誰之曲歟彼
蒹葭之蒼蒼兮霜霰苦而中堅松竹之皴皺索籜兮
不若櫛笄之可憐納材葦而構明堂兮固容消而力
完揚且之哲兮不可以常然當錫爾以老成蒼眉皓
顛山立時行去敵氣與矜色兮噤危言以端誠俾人
望之侮黷不生爾之所得孰與壯多不善處老問予
而何受教而回遽遽形開嚮之威神孰為來哉乃遽
衣促盥端慮滌想委佩低簪持簿叩顙而言曰楚臣

天問不訓今臣過幸一獻三售始厚以愚終期以壽
忘上問之罪濯已然之咎心憎故術腹飽新授馳神
清玄拜手稽首

砥石賦 時在朗州

南方氣泄而雨淫地慝而傷物媮神噫濕渝色壞味
雖金之堅亦失恒性始余有佩刀甚良至是澀不可
拔剖其室乃出遡陽眇眩傳刃蒙脊鱗然如瘡痂如
黑子如青蠅之惡銳氣中錮猶人被病然客有聞焉
袞窰石以遺余沃之草腴雜以烏膏切磨下上真質
焯見躊躇四顧迫切余周爾謝客微子之貽幾喪吾寶

客曰吾聞諸梅福曰爵祿者天下之砥石也高皇帝
所以礪世磨鈍有是邪余退感其言作砥石賦

我有利金兮以利為佩遭土卑而慝作兮雄芒為之
潛晦如景昏而蝕既兮與肌漆而為癘顧秋蓬之不
可荆兮尚可遊乎髓髀之外利物蒙蔽材人惆悵俾
百汰之至精蟠一檢而多恙豈害氣之獨然兮將久
不試而然彼屠者之刃兮獵者之鋌不灌不淬兮糅
錯銜鉛日鼓月揮兮剗腴擊鮮皖燿燿以耀芒蒼滛
夷而騰羶豈不涉暑而蒙沴兮鼎用之而成妍有客
自東遺余越砥圭形石質蒼色膩理剗其鱗皴滑以

滄瀟如衣澣垢如鼎出否霧盡披天萍開見水拭寒
熖以破皆擊清音而振耳故態復還寶心再起既賦
形而終用一蒙垢焉何耻感利鈍之有時兮寄雄心
于瞪視嗟乎石以砥焉化鈍為利法以砥焉化愚為
智武王得之商俗以厚高帝得之傑材以奏得既有
自失豈無因漢氏以還三光景分隨道闊狹用之得
人五百餘年唐風始振懸此大砥以礪兆民播生在
天成器在君天為物天君為人天安有執礪世之具
而患乎無賢歟

楚望賦

予既謫于武陵其地故郢之裔邑與夜郎諸夷錯雜
繫乎天者陰伏陽驕是已繫乎人者風巫氣窳是已
囂氛浮浮利于樓居城之麗譙實鄰所舍四垂無蔽
萬景全入因道其遠邇所得為楚望賦云

翼軫之野祝融司方陰迫而專專實生沴天濡而霽
土洩而泥氣罕淑清兮淫氣噎噎中人支體兮為瘼
為瘵以曠滌煩兮利居高于物外我卜我居于城之
隅宛在藩落麗譙渠渠四阿垂空洞戶發樞眸子不
運坐陵虛無歲更周流時極慘舒萬象起滅森來既
予櫺軒之外羣山籠從崗陵靡陀勢若相拱出雲見

怪窈蔚森聳露夕霞朝望如飛動簷廡之下大江瀕
洞支流合輸泄入雲夢義和望舒出沒兩涯涵泳之
族聳取歔呀秋水灌盈漩石飄沙流枿軒昂舞于盤
渦逮及收潦澹如綠醞白石磷磷倒景羅生蘋末風
起有文無聲悠遠烟絲與空蒼然湘沅之春先令而
行臘月寒盡溫風發榮土膏如濡言鳥嚶嚶三星嚶
其曉中植物颯以飄英雲歸高唐草蔽洞庭日與天
畫神將化并圓方相涵遊氣杳冥熙熙藹藹藻飾羣
形枿樹童立積空凝青環洲曲塘含景曜明恢台之
氣發于春季涉夏如鑠逮秋愈熾土山焦熬止水漢

沸翔禽跼墮咂味垂翅曦共歆蒸陽極反陰二儀交
精下上相歆雲興天際欵若車蓋凝臚未瞬彌漫靈
靄驚雷出火喬木糜碎殷地藝空萬夫皆廢懸溜便
繩日中見昧移晷而收野無完塊少陰之中景物澄
鮮丹葉星房燭耀川原夕月既望曜于丹泉上鏡下
冰湔塵濯烟宿麗潛芒獨行高躔皓一氣之悠悠潔
有形而溢清玄杳微明而斐亶想遊目于化先夜無
朕以徂征金霞暈乎海壖明星方揚斜漢西懸璿柄
如墮半沈層瀾鷄啁晰而晨明兮日莅苒以滕晶動
植瞭兮已分山川鬱乎不平復人寰之誼卑洵浩浩

以營營追向時之景光不可驟得以再更意華胥之
夢還猶彷彿而馳精日次于房天未降霜百卉猶澤
水泉收脉故道脍音削衍為廣斥水禽嬉戲引吭伸
翮紛驚鳴而決起捨綵翠于沙礫時時北風振槁揚
埃蕭條邊聲與鴈俱來寒氛委積萬竅交激楚雲改
容飛雨凝滴灑林迤响淅瀝捎械飛電照雪以騰光
柔蔬傲霜而秀坼躔次殊氣川谷異宜民生其間俗
鬼言夷招三閭以成謠德伏波而構祠投粃粒反片呂
以鼓檝泰鱣魴而如犧蟠木靚深孽祇憑之祈年去
癘蠲敬祇威擊鼓肆筵河旁水湄荐誠致祝卻略躩

踞

躩 踞 刺 龍 動 見 靈 光 賦

渚居蠱食大掩水物罟張餌啣不可

遁伏顯舉潛緹晝撞夜觸設机沈深如拾于陸波遊
儵之瑣類咸跳脫於窞束雖三趾與六眸時或加乎
一目亦有輕舟軒輕泛浮拖綸徃復馴鷗相逐莫夜
澄寂嘯歌羣族傖音俚態幽怨委曲逗踈柝于江城
引哀猿于山木巢山之徒枰木開田灼龜伺澤兆食
而蟠鬱攸起于巖阿騰絳氣而蔽天熏歇雨濡穎垂
林巔盜天和而藉地勢諒無勞而有年罷士閑人逸
為末作求金渚浹淘汰澆澆流注潰沲繁光熠爚貪
賈未貿發于懷握無翼而飛潤于豐屋晒耕耘之悒

悒徒胼胝以自鞠我處層軒日星回還閱天數而視
民風百態變見乎其間非耳剽以臆說兮固幽求而
縱觀觀物之餘遂觀我生何廣覆與厚載豈有形而
無情高莫高兮九閻遠莫遠兮故園舟有楫兮車有
轄江山坐兮不可越吾又安知其所如悅臨高以觀
物

傷往賦

人之所以取貴于蜚走者情也而誕者以遣情為智
豈至言邪予授室九年而鰥痛苦若人之天關弗遂也
作賦以傷之異夫覽者有以增伉儷之重云

歎獨處之邑邑兮憤伊人之我遺情可殺而猶毒境
當歡而復悲人或朝歎而莫息夫何越月而踰時太
極運乎三辰轉寒暑而下馳有歸於無兮盛復于衰
猶昧爽之必莫又安得而怨咨我今怨夫若人兮曾
旭旦而潛暉飄零日及之萼日及槿也朝生暮落一名玉蒸爾雅倏忽
蜉蝣之衣川走下而不還露迎暘而易晞恩已甚兮

難絕見無期兮永思我行其野農民桑者舉按耒饁
亦在林下我觀于途禰販之夫同荷均挈荆釵布濡
羽毛之蕃鱗介之微和鳴灌叢雙泳漣漪薨薨伊蟲
蠢蠢伊豸遊空穴深兩兩相比何動類之萬殊必雄

雌而與俱物莫失儷以孤處我方踽踽而焉如我復
虛室目淒涼兮心伊鬱心伊鬱兮將語誰坐匡牀兮
撫嬰兒何所丐沐兮何從仰飴襦袴在身兮昔圍差
跌擊囊附臂兮餘馥歲蕤誠天性之潛感顧童心兮
如疑曉然有難繼之慕漠然減好弄之姿指遺桂兮
能認慙空帷兮欲歸我入寢宮痛人已兮物改其容
寶瑟偃兮弦柱絕瑤臺傾兮鏡奩空寒鑪委灰虛幌
多風隙駒晨轉窓蟾夜通步搖昏兮網黏翡翠芳褥
掩兮塵化蛩蛩閱刀尺之餘澤見巾箱之故封玩物
儼兮猶具繁華謝兮焉從想翩躚於是非求僊宰與

冥蒙信奇術之可致嗟此生兮不逢徒注視以寂聽
况神疲而目窮還抱影以獨出紛百哀而攻中系白
龍門風霜苦別鶴夜鳴夜銜羽吳江波浪深雌劍一
去無遺音悲之來兮憤予心洵如行波洊浸淫悵緣
情而莫極思執禮以自箴已焉哉苒苒生死悠悠古
今乘彼一氣兮聚散相尋或鼓而興或罷而沈以無
涯之情愛悼不駐之光陰諒自迷其有分徒然怨于
匪忱彼蒙莊兮何人予獨累歎而長吟

何卜賦

予既幼惑立命之說兮身久放以愈疑心回聿其莫

曉兮將取質夫筮龜楚人俗巫而好術兮叟有鬻卜
而來思乃招而祝之曰嘻人莫不塞有時而通伊我
兮久而愈窮人莫不病有時而間伊我兮久而滋蔓
吾聞人肖五行動止有則四時轉續變于所極一歲
之旱人斯具舟三月之熱人斯具裘極必反焉其猶
合符子首圓而足方予腹陰而背陽故形象之有肖
而變化之殊常經曰剝極則質居賁而未嘗剝者其
誰否極受泰居否而未嘗泰者又其誰鶴胡不截鳧
胡不禪夔何罰而蹠蹕蛇何功而扶持紛紜恣睢交
作舛馳似與似奪似信似欺孰主張之問于子龜卜

者招我以粗問我以微有天下之是非有仁人之是
非在此為笑兮在彼為嗤或昔而成或今而虧君問
曷由主張其時時乎時乎去不可邀來不可逃淹淹
兮孰捨孰操堇喙之毒苓鷄首之賤毛各于其時而
伯音其曹屠龍之伎非曰不偉時無所用莫若履豨
作俑之工非曰可珍時有所用貴于斲輪絡首縻足
兮驥不能踰跬前無所阻兮跛鼈千里同涉于川其
時在風沿者之吉沂者之凶同藝于野其時在澤伊
種之利乃糝之危故曰是邪非邪主者時邪諒淑惡
之同出兮顧所丁之若何夫如是得非我美失非我

恥其去曷思其來曷期姑蹈常而俟之夫何卜為言
訖執龜而起予追而作何卜賦于是蹈道之心一而
俟時之志堅內視羣疑猶冰釋然

謫九年賦

古稱思婦已歷九秋未必有是舉為深愁莫高者天
莫濬者泉推以極數無踰九焉伊我之謫至于數極
長沙之悲三倍其時廷尉不調行當跂而天有寒暑
閏餘三變朝有考績明幽三見顧堯之民兮亦昏墊
而有歎歎息兮倘佯登高高兮望蒼蒼突弁之夫我
來始黃合抱之木我來猶芒山增昔容水改故防童

者鬱鬱兮涸者洋洋天覆地生翁兮無傷彼族而居
鄉之投荒彼軒而遊昨日析楊信及澤濡俄然復常
稽天道與人紀咸一債而一起去無久而不還禁無
久而不理何吾道之一窮兮貫九年而猶爾噫不可
得而知庸詎得而悲苟變化之莫反兮又安用夫肖
天地之形焉

望賦

邈不語兮臨風境自外兮感從中晦明轉續兮八極
鴻蒙上下交氣兮羣生異容發孤照於寸眸驚遐情
乎大空物來化兮多象人過時兮不同嗟乎有目者

必騁望以盡意當望者必緣情而感時有待者瞿瞿
忘懷者熙熙慮深者矐然若喪樂極者冲然無遠外
徒倚其如一中糾紛兮若斯望如何其望最樂晞慶
霄兮遡阿閣如雲兮天顏咫尺如草兮臣心踊躍扇
交翟兮歲旌旗升龍兮蠖略日轉黃道天開碧落凝
瑞景於庭樹掬非烟於殿幕望如何其望且懽登灞
岸兮見長安紛擾擾兮紅塵合鬱葱葱兮佳氣盤池
象漢兮昭回城依斗兮闌干避御史之驄馬逐倖臣
之金丸望如何其望攸好宗萬靈兮越四隩漢帝仙
臺兮秦皇海嶠霓衣躡于河上馬跡窮乎越徼紫氣

度關而斐亶神光屬天而照耀睨眷眷以馳精聳專
專而觀妙望如何其望有形視蠢蠢兮窮冥冥楚塞
氛惡兮蕭關燧明暈籠孤月角奮長庚沙多似雪磧
有疑城烟雲非女子之氣草木盡王者之兵審曳柴
之虛警破來騎之先聲信有得于風鳥示無言于旆
旌望如何其望且慕恩意隔兮年光度雕輦已辭兮
金屋何處長信草生兮長門日暮後翠華之儻來仰
玄天以自訴况復湘水無還漳河空注淚染枝葉香
餘紉素風蕭蕭兮北渚波烟漠漠兮西陵樹夫不歸
兮江上石子不見兮秦原墓拍琴翻朔塞之音挾瑟

指邯鄲之路望如何其望最傷佩環玦兮思帝鄉龍
門不見兮雲霧蒼蒼喬木何許兮山高水長春之氣
兮悅萬族獨含嘔兮千里目秋之景兮懸清光偏結
憤兮九回腸羨環拱于白榆惜馳暉于落棠諒衝斗
兮誰見伊戴盆兮何望釐豈止蘇武在胡管寧浮海
送飛鴻之滅沒附陰火之光彩鶴頸長引烏頭未改
恨已極兮平原空返何時兮燕山在永望如何傷懷
孔多降將有依風之感宮人成憶月之歌歌曰張衡
側身愁思久王粲登樓日回首不作渭濱垂釣臣羞
爲洛陽拜塵友

山陽城賦

山陽故城遺趾數雉四百之運終于此墟裔孫作賦
蓋閔漢也詞曰

我止行車實涕于山陽之墟是何蒼莽與慘悴春陵
之氣兮馬如終昌運于四百辭至尊而伍匹夫有利
器而倒持兮曾何芒刃之足舒懿王迹之聲基暨坤
維之再敷邈汜陽與鄩上悅蛇變而龍攄痛人已而
事替終此地焉忽諸嗟乎積是爲治積非成虐文景
之欲處身以約播其德芽迄武乃獲相靈之欲縱心
于昏然其妖焰逮獻而焚彼伊周不世兮奸雄乘釁

而騰振物象灌以易位被虛號而陽尊終世殫而事
去胡竊揖讓以為文嗚呼維神器之至重兮蓋如山
之不騫使人傳譬乎逐鹿固健步者所先諒人事之
云爾孰云當塗之兆也自天亂日久矣莫可追升彼
墟兮噫嘻獨遺武兮貽後王之元龜

秋聲賦

相國中山公賦秋聲以屬天官太常伯倡和俱絕然
皆得時道行之餘興猶有光陰之歎况伊鬱老病者
乎吟之斐然以寄孤憤

碧天如水兮宵宵悠悠百蟲迎莫兮萬葉吟秋欲辭

林而蕭颯潛命侶以啁啾送將歸兮臨水非吾土兮
登樓晚枝多露蟬之思夕蔓趣寒螢之愁至若松竹
含韻梧楸蚤脫驚綺疏之曉吹墮碧砌之涼月念塞
外之征行顧閨中之騷屑夜蛩鳴兮機杼促朔雁叫
兮音書絕遠杵續兮何泠泠虛窓靜兮空切切如吟
如嘯非竹非絲當自然之宮徵動終歲之別離廢井
苔合荒園露滋草蒼蒼兮人寂寂樹槭槭兮蟲唧唧
則有安石風流巨源多可平六符而佐主施九流而
自我猶復感陰虫之鳴軒歎涼葉之初墮異宋玉之
悲傷覺潘郎之么麼嗟乎驥伏櫪而已老鷹在講而

有情聆朔風而心動
聆天籟而神驚
力將瘳兮足受
紕猶奮迅于秋聲

劉賓客文集卷第一

劉賓客文集卷第二 碑上

代郡開國公王氏先廟碑 彭陽侯令狐氏先廟碑

高陵縣令劉君遺愛碑 故吏部侍郎奚公神道碑

代郡開國公王氏先廟碑

唐制五等有爵服而無山川登于三事得立四廟備
物崇祀以交神明敬先報本以輔孝治有國之令典
也維長慶三年前相國王公始卜廟于西原崇業里
公時鎮劔南東川上章曰臣涯官秩印綬品俱第三
請如式以奉宗廟制曰可是歲仲冬申命長男孟堅
祔其主于三室明年公入爲御史大夫復以十二月

躬行烝祭間歲公出梁州就拜司空祀崇異教廟加
祀室大和二年增新室既成祔顯考于尊位告饗由
祀觀之者以為世程第一室曰上儀同幽州別駕府
君諱元政以妣博陵崔氏配第二室曰湖州安吉縣
令贈尚書刑部員外郎府君諱實以妣贈扶風縣太
君馬氏配第三室曰朝散大夫青州司馬贈戶部侍
郎府君諱祚以妣贈武威郡太夫人賈氏配第四室
曰溫州刺史贈太尉府君諱冕以妣贈魯國太夫人
博陵崔氏配初周靈王太子晉遇浮丘公化為神僊
時人號曰王家其後遂以命氏顯於秦者曰翦三世

將秦師子孫分居晉代間東漢有徵君霸霸孫甲亦
號徵君徙居祁縣為著姓故至于今為太原人自漢
涉魏益以熾昌凡十葉至後魏度支尚書廣陽侯同
廣陽有二子神念神感神念南奔梁神感北仕齊惟
儀同府君廣陽侯五代孫也唐興于太原實從義旗
佐成王業故有開府儀同之寵惟刑部府君以功臣
子理二邑不躋貴仕故有錫羨後大之祥惟戶部府
君幼孤以孝聞於鄉曲未冠以文售于有司由前進
士補延州臨安縣主簿會詔徵賢良策在甲科授瀛
州院陽尉歲滿遷渭南天后在神都而東畿差重遂

由渭南轉河陽適逢建萬象神宮旬內吏分董其役
因上書切諫繇是名益聞開元初以大理司直馳輶
車聯讞大獄閩禺朔漠所至決平蚤以桀棘傷生晚
成劇恙樂就夷曠故不至大官惟太尉府君生于治
平時以文學自奮年十有五貢然從秋試明年春升
名于司徒又一年玄宗御層樓發德音懸文詞政術
科以置髦士府君策最高授太常寺太祝未幾復以
能通道德南華冲虛三真經進齋屋尉天寶中歷左
拾遺左補闕礼部司駕員外郎屬幽陵亂華遣兵南
服因佐閩粵改檢校比部郎中行軍司馬時中原甫

寧江南爲吉地二千石多用名德乃以府君牧溫州
朝廷虛公卿以俟高第及聞訃永嘉人輟春罷社楮
紳間以不淑相弔焉雖位卑于道而邁德垂矩後之
人得以纘承丕揚之其儲休啓祐有自云爾生三子
皆聰明絕人長曰沼以神童仕至檢校礼部郎中次
曰潔以奇文仕至國子司業今代郡公竇季子也蚤
在文士籍射策連中咸世其家貞元中德宗聞其名
自藍田尉召入禁中視草厥後三典書命再參內廷
憲宗器之付以國柄翊贊有道雖冊免常居大僚今
年自梁州請覲上思用舊臣爲羽儀遂領太常其公

府如故以一心事六君顯官重務靡不揚歷且夫起諸生至三公而心愈卑道益廣出授黃鉞以伯諸侯入服華章以謁家廟追崇極大位血食備多室享全榮而奉昭荐嗚呼公侯之孝歟宜書廟器以視橋公之三鼎其辭曰

閔宇神庭邃清而嚴上公之儀四室耽耽以潔牲粢以大糝交神尚敬合魄尚氣子姪宗工駿奔奏事副筭侈袂儼恪居次孝孫兢兢執爵而弁以裸以擗以伏以興水陸具來羶薌畢登列于園方其氣增增乃禴乃嘗敬而追遠二昭二穆孝以尊本瞻瞻几幄

踳踳堂相祀成起慕涕落玄袞濡露踐霜誰無永懷不如達者哀與榮偕逢時奮庸誰不得位不如仁人以道為貴惟公之達分名以顯親惟公之仁分德以澡身六朝之清臣一代之全人宜其世家翼翼振振罔不肅祇于廟之門

彭陽侯令狐氏先廟碑

今上元年七月十三日汴州刺史宣武軍節度副大使知節度事汴宋毫等州觀察處置使銀青光祿大夫檢校禮部尚書兼御史大夫上柱國彭陽縣開國伯令狐公西嚮拜章上言守臣楚蒙被恩澤列為元

侯得立家廟以奉宗祀制書下其奏于有司於是善相考祥得地于京師通濟里居無何新廟成公以守藩故申命季弟監察御史定卜牲練日越八月丁亥祔饗三室塙墉以尚幽設幄以迎精礼無尤違神用寧謚第一室曰秦州上邽縣尉諱濬以妣太原王氏配第二室曰綿州昌明縣令贈吏部尚書諱宗亮以妣贈太原郡夫人河東柳氏配第三室曰太原府功曹參軍贈太子大保諱承簡以妣贈魏國太夫人富春孫氏配明年十月公由浚郊以介圭入覲真拜戶部尚書進爵爲魯侯既辭戎旃得以列侯謁三廟是

歲南至上不視朝又得以時展祭先期致齊栗然以敬既齊盡志歆然永思奉其百順陳以具物始躋而虔恭終獻而汎瀾既卒事顧麗牲之石宜有刊紀乃俾家老授其謀于所知云令狐晉邑也晉大夫魏顓以輔氏之功始封焉其易名曰文國語所謂令狐文子是已其先周文王之昭畢公高之裔畢萬爲晉卿始封于魏自萬至顓蓋四世其後三十七世藍田侯蚪仕魏爲煨煌郡太守子孫因家遂占數爲郡人藍田之孫熙在隋爲納言惟上邽府君納言之玄孫道克肖而位不至惟尚書府君西州之右族光未

耀而德已基惟太保府君志爲君子儒以經明居上
第調補陽安縣主簿歷正平尉汾州司法參軍陝州
大都督府兵曹終于太原府首掾始以顯經進既仕
旁通百家受穀梁子清而婉左丘明國語辨而工司
馬遷史紀文而不華咸手筆朱墨究其微旨愷悌以
肥家信誼以急人德究齒耆獨享天爵故休祐集于
身後徽章流乎佳城凡以子貴承澤降命書告第者
始贈尚書祠部郎中再贈禮部尚書三加右僕射四
爲今稱一作四進太保五爲上公先夫人亦四徙封密印纍纍邦
族聳慕生三子皆才彭陽公爲嗣次子從端實肅給

今爲檢校膳部郎中參河東軍事季子前所謂監察
御史今支柱下方書溫敏而有文綽綽然真令兄弟
唯彭陽以詞筆取科名累參侍從由博士主尚書牋
奏典內外書命遂登樞衡言文章者以爲冠擁節總
戎率身和衆留惠于盟津變風于浚都言方略者以
爲能夫浚師嘆喏難治乘釁竊發寢成習俗莅止五
載飲和萃心束馬來朝熊羆隕涕問公還期必祝
之留爲常伯旋命居守汴人聞公之東近而愈懷翹
翹瞿瞿盡西其首言遺愛者可紀焉貴而率祀老而
能慕怵惕乎霜露齊莊乎廟祧睦其仲季施及鄉黨

言孝弟者歸厚焉勒名于碑以代彝鼎文曰
公孤之孝莫如備物顯顯新廟四阿三室時惟仲月
卜用柔日醴醎必芬牲牲博膾籩在堂簫管在庭
孝孫烝烝躬若奉盈低簪委紳薦俎登鉶彤饗交感
涕流緣纓禮以備儀誠以致美祖考來格錫之丕祉
工祝告訖退循軒所乃授風人作詩以紀猗歟彭陽
之寵光佐憲皇穆皇西省東臺迭為侍郎國之大政
咨爾平章敬宗凝旒俾鎮雖立入為地官令守東周
彭陽之忠厚宜介福以壽東郊既釐可復朝右縣縣
其胄系于周舊由我顯起必昌其後大和紀元作廟

之首刻碑廟門龍集己酉

高陵令劉君遺愛碑

縣內之大夫鮮有遺愛在其土者蓋邑居多豪政出
權近非有卓然異績結于人心浹于骨髓安能久而
愈思大和四年高陵人李士清等六十三人思前令
劉君之德詣縣請金石刻縣令以狀申府府以狀考
于明法吏吏上言謹按寶應詔書凡以政績將立碑
者其具所紀之文上尚書考功有司考其詞宜有紀
者乃奏明年八月庚午詔曰可今書其章明有以結
人心者揭于道周云涇水東行注白渠醜而為三以

沃關中故秦人常得善歲按水部式決洩有時畎澮有度居上游者不得壅泉而顛其腴每歲少尹一人行視之以誅不式兵興已還寢失根本涇陽人果壅而顛之占取全流浸原為畦私開四竇澤不及下涇田獨肥它邑為枯地力既移地征如初人或赴訴泣迎尹馬而占涇之腴皆權倖家榮勢足以破理訴者覆得罪繇是咋舌不敢言吞冤銜忍家視孫子長慶三年高陵令劉君厲精吏治視人之癘如燥疽在身不忘決去乃循故事考式文暨前後詔條又以新意請更水道入于我里請杜私竇使無棄流請遵田令

使無越制別白纖悉列上便宜掾史依違不決居二歲距寶曆元年端士鄭覃為京兆秋九月始具以聞事下丞相御史御史屬元谷實司察視持詔書詣渠上盡得利病還奏青規中上以谷奉使有狀乃俾太常撰日京兆下其符司錄姚康士曹掾李紹實成之縣主簿談孺直實董之冬十月百衆雲奔憤與喜并口謠手運不屑鞶鼓揆功什七八而涇陽人以奇計賂術士上言曰白渠下高祖故墅在焉子孫當恭敬不宜以畚鍤近阡陌上聞命京兆立止絕君馳詣府控告具發其以賂致前事又謁丞相請以顛血汚車

茵丞相彭原公歛容謝曰明府真愛人陛下視元元無所怯第未周知情偽耳即入言上前翌日果有詔許訖役仲冬新渠成涉季冬二日新堰成駛流渾渾如脉宣氣蒿荒漚胃迎耜澤澤釋音開塞分寸皆如詔條有秋之期投鍾前定孺直告已事君率其寮躬勞徠之烝徒謹呼奮襜褕而舞咸曰吞恨六十年明府雪之擿姦犯豪卒就施為嗚呼成功之難也如是請名渠曰劉公而名堰曰彭城按服引而東千七百步其廣四尋而深半之兩涯夾植杞柳萬本下垂根以作固上生材以備用仍歲旱沴而渠下田獨有秋渠

成之明年涇陽三原二邑中又攤其衝為七堰以折水勢使下流不厚君詣京兆牽言之府命從事蘇持至水濱盡撤不當攤者繇是邑人享其長利生子以劉名之君諱仁師字行輿彭城人武德名臣刑部尚書德威之五代孫大曆中詩人商之猶子少時好文學亦以籌畫于東諸侯遂參幕府歷尹劇縣皆以能事見陟率不時而遷既有績于高陵轉昭應令俄兼檢校水曹外郎充渠堰副使且錫朱衣銀章計相愛其能表為檢校屯田郎中兼侍御史幹池監于蒲錫紫衣金章歲餘以課就加司勳正郎中執法理人為

循吏理財為能臣一出於清白故也先是高陵人蒙
彼惠風而惜於捨去發于胃懷播為聲詩今采其旨
而變其詞志于石文曰

噫涇水之逶迤溉我公兮及我私水無心兮人多僻
錮上游兮乾我澤時逢理兮官得材墨綬繫兮劉君
來能愛人兮恤其隱心既公兮言既盡縣申府兮府
聞天積憤刷兮沈疴痊劃新渠兮百畝流行龍蛇兮
止膏油遵水式兮復田制無荒區兮有良歲嗟劉君
兮去翱翔遺我福兮牽我腸紀成功兮鐫美石永信
詞兮昭懿績

唐故朝議郎守尚書吏部侍郎上柱國賜紫
金魚袋贈司空奚公神道碑

嗚呼有唐清臣尚書吏部侍郎奚公貞元十五年十
月甲子薨于位詔贈禮部尚書太常考行謚曰某是
歲臘月丁酉葬于萬年縣之某原後三十有四年子
為諸侯為大夫門戶有煇于是門下生琢石紀德揭
于我阡云公諱涉字殷衡其先在夏為車正以功封
于薛下古以降為譙郡人或因仕適楚復之秦今為
京兆人隋唐之際再世以明經為博士家有賜書曾
祖簡亦以文學為太子司議郎大父乾繹仕至光州

刺史烈考諱某有道而尚晦終徐州司功參軍贈和州刺史由子貴也天以大運生萬物而以正氣鍾賢人至和來宅其德乃具公實有焉幼而擢陵茗之秀長而成清廟之器羣倫月旦咸以第一流處之及從鄉賦暨升名太常果居上第明年詔郡國徵賢良設四科以盡材公居文詞清麗之日授弘文館校書郎時德宗新即位聲怛虜庭西戎畏威底貢內附詔諫議大夫崔河圖持節即虜帳以報之使臣欲盛其賓寮以自大遂嘿表公為介換大理評事除書到門公方為人子不敢許以遠稱病弗果行歸寧壽春養志

盡敬丞相楊炎勇于用材擢公為左拾遺奉安輿而西未幾再集茶蓼居後喪將闋是歲建中四年京師急變黃屋順動狩于巴梁公徒行間道以歸王所既中月而詔授起居郎充翰林學士創鉅愈遲病不拜職改太子司議郎從大駕回入尚書為司金元士且參權筦之務有頃持愍冊宣恩于薊門將行錫銀朱于青蒲上復命稱旨轉吏部外郎是曹在南宮為眉目在選士為司命公執直筆閱簿書紛拏盤錯一瞬而剖時文昌缺左右丞都曹差重遂轉左司郎中尋遷中書舍人執事者繫公識精以斟酌大政非獨用

文飾也會江淮間民被水禍上愍焉特命公宣撫之請以便宜及物赤車所至如東風變枯條其利病復奏咸可轉刑部侍郎時主計臣延齡以險刻貴倖而與京兆尹相惡以危事中之尹坐譴已又逮繫其吏峻繩之事下司寇主奏議者欲文致而甘心焉公侃然持平挫彼嶽嶽君子聞之善其知道不私刑曹既清以餘刃兼領選事居一年授權知吏部侍郎又一年即真是秩言能審官者本朝有斐馬盧李四君子物論以公媿焉時得疾發癰有國醫方直禁中上促遣如第且救之曰某賢臣也悉術以治之及有司以

不起聞上震悼加等公娶瑯琊王氏石泉公之曾孫友壻皆一時彥士長子某蚤不祿第二子敬則歷太僕少卿今為濮州刺史兼御史中丞錫紫金以課最就加貴秩俾視九卿第三子敬玄以詞藝似續登文科歷左補闕今為尚書刑部郎中第四子炅舉進士最小子某咸砥礪纂脩宜為名公家子其邁德垂裕之光也乎公少以名器自任及顯達急于推賢視其所舉則在西省荐權丞相由右史掌訓詞在中銓表揚僕射由地曹郎綜吏部二公後為天下偉人凡執文章權衡以揣量多士一入中禁考策詞三在天官

第章句披沙剖璞由我而顯者落落然居多推是風
鑿移于大冶則鎔範之內無非祥金嗟乎天不遐其
福而孤民望使由庚之什不作于貞元中惜也初公
既考終詔贈大宗伯後以第三子在即位被霈澤再
追褒至司空故昔之葬儀用常伯而今之碑制用三
公云銘曰

仁麟智龍為瑞一辰未若君子瑞于人倫惟唐德宗
道類漢宣責實繩下風稜言言公丁斯時籍在雋賢
從難表節執羈而還帝曰汝器黃流瑟然可為大僚
左右化源乃飾王度乃馳輜軒既執刑柄亦操利權

陽和熙熙貯在顏間守法持正巖如秋山火不侵玉
倖臣畏伏鳳鳴祥烟杲噪低跽帝方倚用天不假年
公寐無寤其名愈遠門人達者赤舄玄袞公居甚卑
其德愈尊兩子朝服駢驅朱輪佳城何在冑貴之里
螭首龜趺德輝是紀嗚呼後人下拜于此

劉賓客文集卷第三 碑中

唐故福建都團練觀察使薛公神道碑

許州文宣王新廟碑

唐故兼御史中丞贈太師崔公神道碑

唐故宣歙池都團練觀察使王公神道碑

唐故邠寧節度使史公神道碑

唐故福建等州都團練觀察處置使福州刺

史兼侍御史中丞贈左散騎常侍薛公神道

碑

薛在三代爲侯國介于鄒魯間傳世三十有一爲齊

所并其公子犇楚錫土田于沛漢末避仇之成都曹
魏平蜀徙家汾陰遂為河東臨晉人自奚仲為夏車
服大夫距今數千年乘軒服冕為奕冠世言氏族者
署為關內甲姓天意若曰始有功于車服錫爾子孫
世世有之公諱審字某曾祖寶胤以名家子且有學
行歷尚書郎鄴州司馬邠州刺史王父繪有雋材刺
三郡金密繇皆以治聞累贈至銀青光祿大夫封龍
門侯烈考承矩以文之害仕至大理丞公幼承前人
之覆露補崇文生歲滿得調主簿書于毫之譙苦二
邑又尉于東畿之河清貞元中上方與丞相調兵食

思得通吏治而習邊事者計相以公為對乃授監察
御史裏行充京兆水運使局居鴈門主穀糶具舟楫
募勇壯且便弓矢者為榜夫千有餘人隸尺籍五符
制如舟師語以中貴人護之聲震塞上每發粟沂河
北行涉戎落以饋緣邊諸軍及乘障者雖河塞回遠
必克期如合符一歲中省費萬計累加侍御史內供
奉賜緋魚袋有司條白其勞入拜殿中內史未幾淮
海節將以戎倅缺聞事下丞相御史擇可者僉曰公
政事已試遂授檢校戶部外郎兼御史淮南軍司馬
尋轉駕部郎中錫以金紫遇府遷申命真相趙國公

帶中書侍郎代之公主行臺留務趙公文茵及境視
置郵供帳及郊視將迎部位下車視簾幃器備乃曰
信竒才也此不足以展驥朝廷知之擢為泗濱守既
報政就加御史中丞俄遷福建都團練觀察使閩有
負海之饒其民悍而俗鬼居洞砦寨音家桴筏者與華
言不通公兼戎索以治之五州民咸說元和十年某
月某日薨于位年六十七贈左散騎常侍夫人趙郡
李氏元兒蚤世繼夫人隴西李氏檢校礼部尚書河
東節度使說之女生子凝為嗣季子茂弘以諸侯礼
儀返葬故里蛾眉原從周也後二十有三年元曰開

成凝為平盧從事謹按甲令礮碑石來乞詞以垂于
悠久初公治粟于朔陸愚方冠惠文冠察行馬外事
聆風相厚謂可妻也以元女歸之明年愚入尚書為
郎職隸計司因白計相召公來會府行有日矣遇內
禪惟新愚以緣坐左貶間關外役竟不克面然而公
之德善灌注心耳孝悌為根柢誠明枝葉之直方為
天質礼讓緣飾之所至藹然繇此道也公初下世故
人丞相李太師誌其墓其略曰弘深莊重幹敏絕人
此與遊者傳信之詞也豈誣也哉故作銘曰
河汾滄淪鼎氣 雲散為昌光凝為賢人常侍之生

其宗孔碩從祖昆弟誥誥三百文館入仕幽龍未光
尺木爲階欬然歡翔司會知材績宣朔方邊師万喉
俟我羸糧沂于黃河路出戎疆募乃勇士早衣挽航
膺索臂孤穹廬在旁虜聞公名憚不敢攘安北以南
列城相望率有儲峙皆成金湯入居殿中分巡輦下
淮海軍大往爲司馬軍中之治可移諸民乃牧于泗
乃廉于閩閩悍而囂夷風脆急恩信綏之安然如蟄
閩方不淑天奪其福公薨于寢玄頰以復天王廢朝
贈之金貂葢葢晉原鬱矣中條大墓舊阡松楸蕭蕭
笳鼓以歸德音孔昭

許州文宣王新廟碑

歲在丙辰元日開成許州牧尚書杜公作文宣王廟
暨學舍于允隅革故而鼎新也前年公受社與鉞且
董淮易汝南之師八月上丁釋菜于宣父之室陋宇
荒階不足回旋已事而歎乃詢黃髮有鄉先生前致
辭曰自盜起幽陵許爲兵衝連戰交梓卒无寧歲耳
說鉦鼓不聞弦歌目不知書不害爲智爾來生聚教
養起居祖習壹出於軍容今幸天子憐許民爲擇賢
侯此人人思治之時也公曰諾吾當先後之于是元
年脩戎津以通衆志次年成郡政以蠲民瘼季年崇

教本以厚民風我言既從乃卜新宮灑水之瀕城池
在東登登其杵坎坎其斧繩之墨之鑿杓枝梧載墜
載塗黜焉陵虛寢廟弘敞齋宮嚴闕軒墀廡儼推
清潔門庭墻仞望之生敬外飾觚稜中設黼幄向明
當宁用王礼也克頭禹身華冠象佩之容取之自鄒
魯及門覩奧偶形畫像之儀取之自太學尊彝籩豆
青黃規矩之器秉周礼也犧牲制幣荐獻陞降之節
遵國章也藏經于重檐斂器于度櫝講筵有位鼓篋
有室授經有博士督課有助教指蹤有役夫灑掃有
廟幹公又割隙地爲廣圃蒔其柔蔬而常菹旨蓄之

禦備捨已俸爲子錢權其孽羸而鹽酪釭膏之用給
濟濟莘莘化行風驅家慕恭儉戶知敬讓父誨其子
兄規其弟不遊學堂與撻市同由是縻勇爵戴鷩冠
者往往弭雄姿而觀習礼矜甲冑者知根于忠信服
縵胡者不敢侮逢掖教化之移人也如置郵焉冬十
一月許人以新儒宮成來告且乞詞欲行乎遠也公
名惊字永裕故丞相岐國公之孫岐公弼諧二帝碩
學冠天下嘗著書二百餘篇言礼樂刑政古今損益
統名曰通典藏在石室副行人間今孝孫聿脩之形
乎事業播于聲詩懿哉能世其家也禹錫昔年忝岐

公門下生四參公府近年牧汝州道許昌躬閱其政
故不得讓遂銘于麗牲之碑銘曰
許介韓魏四征之地兵興已還其鬪嘖嘖亦有儒宮
軋于兵間賢侯戾止思樂泮水俾人嚮學王化之始
便地爰相新規鬱起廟貌斯嚴堂煌有煒秩秩礼物
祁祁胄子入于門墻如造闕里春誦夏弦載颺淑聲
風于閭閻浹于郊坰途讓班白家尊父兄與化而遷
其猶性成昔之委巷相詬交侮今逢親戚不道媒語
昔之連營袴力使酒今遇賓客斂容拱手魯有泮林
鳥革其音許崇學校民說其教鑄于圭石以志新廟

唐故朝散大夫檢校尚書吏部郎中兼御史
中丞賜紫金魚袋清河縣開國男贈太師崔

公神道碑

太師名倓字某清河東武城人太公望既封于營丘
子伋嗣侯伋之孫曰穆伯食邑于崔遂以為氏後十
四世至秦末東萊侯意如東萊之子伯基始居清河
又十五葉生瑛為魏名臣又九葉生休仕後魏為七
兵尚書七兵之弟曰寅為樂安太守公即樂安八代
孫始以門子補鄭州參軍力行好學于子道以孝聞
處伯仲間以友聞讀易至編絕以精義聞至德中戎

羯滑夏王師出征公少有奇志思因時以自奮乃作
伐鯨鯢賦上獻既聞爾矣果器之會第五丞相以善
言利得幸盡付利權始有鹽鐵使之目慎選寮屬表
公爲介轉臨晉縣丞處繁應卒銚刃不頓府罷再遷
至太子司議郎韓晉公時爲戶部侍郎掌邦賦急於
用材薦公爲監察御史主河東租庸之務尋轉侍御
史充京東平糶使建中初德宗始親萬機儲精治本
有漢宣與我共理之歎謂大臣求可當良二千石者
遂以公帶本官權知袁州刺史期月有成詔書顯揚
就加真秩益以金紫居无何韓晉公爲丞相制國用

思公前績乃傳召之抵京師授檢校戶部郎中兼侍
御史幹池監于蒲脩宇益謹衡石煎和既精飴散乃
盈商通而薦至吏懼而循法民不絀網而國用益饒
歲杪會其所入羸羨什百詔下褒其能轉吏部正郎
兼御史中丞且加五等之爵方倚以重任天富其材
而不遐其福享齡六十有五貞元七年某月某日遘
疾終于治所上聞悼之因降愍冊贈鄭州刺史賚錢
三百萬以備飾終之禮明年某月某日返葬于成周
之偃師從世墓也累贈至太師夫人隴西李氏汾州
司倉參軍咸一之女生才子六人長曰邠及公卒時

已爲左拾遺後至太常次日鄴至太府御次日鄴至
外臺尚書次日郇今爲廷尉次日鄩至執金吾季曰
鄴今爲太常卿同中書門下平章事惟夫人姑臧冠
族以蘋蘩組紉輔佐君子爲令妻積三十餘年以慈
儉忠厚訓誡諸子爲賢母二十有三年當永貞初順
宗踐祚澤流自葉長子邠時爲詞臣草冊書以文當
進階遂上疏乞移榮於親優詔允之特封清河郡太
君士林聳慕皆自痛其不及邠爲太常鄴爲大農咸
白髮貴綬以奉膳脩諸季各以簪裾給事左右愉愉
然先意无違言世榮者舉无與比以子貴累封贈至

涼國太夫人元和八年三月十六日捐館舍壽七十
有九是歲十月某日合祔惟太常及尚書暨今相國
皆自中書舍人爲禮部侍郎凡五貢賢能書得士百
四十有八人言兄弟者許爲人瑞崔氏之門六人皆
入文昌宮其間三人歷八侍郎統而論之三大卿兩
連率二翰林學士一執金吾言冠冕者許爲世雄與
姑臧李范陽盧世爲婚媾入于姻黨无第二流言門
閥者許爲時表太常二子亦以才能同入尚書璜爲
吏部郎瓘爲司勳郎其它支孫未登金閨籍者詵詵
然魚貫而進文業甚似而孝謹不哀猗歎君子之澤

其所從來遠而有光乎開成己未歲七月甲辰相君
受詔于明庭始操國柄仲月奉嘗事于家祀成起慕
悄然永懷曰古者卿大夫廟有鼎墓有碑皆銘之以
紀先德也今備位宰相敢不敬前人之耿光乃俾家
老條白事功咨于學士者徵其詞尚信也又命宗祝
卜柔日告于廟盡誠也儀其備而敬有餘斯所謂達
礼之君子遂刊勒如式揭于道周銘曰

奕奕四姓崔為之冠瞻其門墻倬若雲漢善積家肥
子孫多材如彼椽棟必生徂徠太公之後弥二千祀
炯如貫珠焯見圖史顯允太師丕承惠基構于其堂

亦既墜茨生逢艱虞戎夏交師獻賦伐叛忠存乎詞
兵與事業飛輓四馳歷踐劇職視屯如夷乃主平糴
乃分竹使治粟為邦其道一致蒲實近地鹽為利泓
使車來思刻弊立程吏廉商通歲倍其贏奏課連最
惠音褒明就加執法好爵兼榮天賦之才不與壽并
生樹德本沒揚淑聲上聞軫懷侑樂為停贈禭之礼
侔于公卿万石貽訓根於孝友太丘種德乃稔身後
家有令子妻為壽母三十餘年人倫之首六子來侍
如龍如虎衆婦來饋維筐及筥佩玉鳴環交响庭戶
申申秩秩歡不踰矩昔為甲族今為興門天爵人爵

蔚然兩尊先德陰之黯如重雲孕如合粹濯潤本根
景亮之原圖書之川陽陵帝壇旁礪回環世安其神
世嗣其賢聆德風者拜于碑前

唐故宣歙池等州都團練觀察處置使宣州
刺史兼御史中丞贈左散騎常侍王公神道

碑

常侍諱質字華卿始得姓自周靈王太子晉賓天而
仙時人曰王子因去姬為王氏自秦漢以還世多顯
名由今而上十有一代名傑仕元魏為并州刺史子
孫因家遂為太原祁人并州六代孫名通字仲淹在

隋朝諸儒唯通能明王道隱居白牛谿游其門皆天
下雋傑著書行于世既沒謚曰文中子文中生福祚
為蔡州上蔡主簿上蔡生勉舉進士徵賢良皆上第
仕至河中府寶鼎令寶鼎即公之曾祖也祖諱怡淪
州司戶參軍考諱潛揚州天長縣丞贈尚書吏部郎
中公其季子也始文中先生有重名於隋末其弟績
亦以有道顯于國初自號東臯子文章高逸傳乎人
間議者為兄以文中立名弟游方外遂性二百年間
君子稱之雖四夷亦聞其名字公雅有遠志常自忖
度我大名之後不宜无見焉遂力學厚自淬琢於春

秋得其公是於礼得之約僑居淝水上躬督穡事善積於已而淮楚間羣彥多與之游公歎然自少无進取意與游者激之曰卿文儒家子篤志如是盍求蒞聞聲俾家聲不頽今夫以文學芒洋當世者誰如華卿庸自棄邪入謀于閨門咸以外言為是因決策而西上在貢士籍天和內充不以時尚屑意角逐攻取初无此心如梗柎生于深林未始自貴而度材者一眄歆然在懷故以不争而速售既登第東諸侯交辟之從主者書記于嶺南授正字參謀于淮右進協律郎其後佐許下暨梓潼南梁率為上介官至兼監察

御史司憲聞其賢徵入南臺轉殿內歷侍御史改尚書戶部外郎復為知已所荐遷檢校司封郎中攝御史中丞紫衣金章充山南西道節度副使入為尚書戶部郎中以方雅特立除諫議大夫會宋丞相坐指直為飛語所陷抱不測之罪大僚進言无益公率諫官數輩日晏伏閣上為不時開便殿公于旅進中獨感激雪涕居多由是上怒稍解得從輕比公終以言責為憂求為虢州刺史宰相惜去又重違誠請增之以兼御史中丞用示異于人也大凡以智謀而進者有時而衰以朴厚而知者无迹而固公為今揚州

牧贊皇公所知人不見其迹方在號略贊皇入相擢
為左曹給事中凡有大官缺必寵薦居數月遷河南
尹又未幾鎮宛陵是三者中外所注意不歲而周
歷之時論不以為党河南帝之別京其治尚體度風
采而別白區處之宣城國之奧壤其治在束吏惠下
蘇罷羸訾剝輕而勞徠登汰之公兩得其道不由一
檢率身以儉而素風存任人以誠而羣務舉遇中貴
人以礼而故態革內潔其志下盡其忠外无以撓于
理三者具求政之有裨曷由哉在鎮三載開成元年
十二月八日薨于位享年六十三監軍使上言有詔

軫悼不視朝贈左散騎常侍明年八月十一日葬于
河南府永寧縣洛川鄉史原從舊阡也初公娶于滎
陽鄭氏生三女而沒今蓋祔焉一子曰慶存方亂矣
猶子前太原府參軍扶執宗長書來請曰扶也蚤孤
荷世父常侍之覆露今其嗣幼未任克家姑封琴書
司管鑰以俟其長竊惧世父之德音不敬思有以垂
于後者以誠告于從叔大司農復命曰俞謹礱貞石
以乞詞无忽余昔為郎與常侍同列已熟其行實及
讀墓誌即今丞相益州牧趙郡李公之文自稱為忘
形友其在宣州李公再入相議以第一官處之牢讓

不取羔鴈所祀則河東裴夷直天水趙哲隴西李行
方吳郡陸紹梁國劉蕢博陵崔珣人咸曰得士夫揚
州少與也而見器益州寡合也而見親六從事材不
一也而畢樂用是足以觀德庸可勿紀焉銘曰
隋有文中紹敷微言當時偉人咸出其門粹氣紆餘
鍾于後昆常侍恂恂文而來孫發原高麓中泳後大
蘭牙茁然秀出叢蒼善不近名其聲日彰行勇于退
其道愈光哲者知之置于周行以正持憲以文為郎
以和佐我以惠臨邦以直司諫以公駁正守于三川
頑民底定乃鎮于宣先馳淑聲邑中婆娑瞻我旆旌

問誰詢謀濟濟君子問誰出內潔潔廉士道本乎心
暢于四支治本乎正形于百為黜吏斂手齊民揚眉
江淮藪空夜柝弗施公卧于齋邦民悽悽公衣升屋
邦民行哭牙璋斯來柳翼言旋棠樹未老周人慕焉
熊耳之陽泱泱洛川佳城在茲既固且安松楸颯然
石馬矯然過者必敬宛陵之阡

唐故邠寧慶等州節度觀察處置使朝散大
夫檢校戶部尚書兼御史大夫賜紫金魚袋
贈右僕射史公神道碑

僕射名孝章字得仁本北方之強世雄朔野其後因

仕中國遂為靈武建康人曾祖道德贈右散騎常侍
封懷澤郡王祖周洛銀青光祿大夫檢校太常卿兼
御史中丞北海郡王贈太子太保考憲蚤成以武勇
絕人積功至魏博節度使終于河中晉絳慈隰等州
節度觀察使檢校司徒兼侍中河中尹贈太保其薨
也大臣中書令晉國公裴氏為之碑其名益顯公即
侍中之元子母曰冀國夫人李氏幼而聰寤父母賢
而加愛焉及長好學遷善秀出儕輩鄴下諸兒號為
書生元和中太尉愬為魏帥下令掄材於轅門取大
將家翹秀者為子弟輩列于諸校之上公獨昌言願

效文職太尉深竒之遂假魏州大都督府參軍長慶
三年常山衆叛害其帥沂國公田司徒于帳下沂公
發迹于魏人猶懷之詔命其子布以尚書授鉞統魏
兵問罪于此疆且報家禍布既啓行士氣不振渙然
內潰獨與允從之旅偃旗而歸百憤攻中卒自引決
先侍中時為中軍都知兵馬使兼御史中丞全師在
野闕然推戴之請為假侯以鎮定中貴人飛駟上聞
穆宗夜召翰林學士草詔書以真侯命之實有魏土
從衆而合權也是歲公自揖官轉本府士曹參軍兼
監察御史賜朱衣銀印推恩以及子也一旦疏于父

母前進苦言曰臣竊惟大河之北地雄兵精而天下
賢士心侮之日曰河朔間視猶夷狄何也蓋有土者
多乘兵機際會非以義取今臣家父侯母封化為貴
門君恩至矣非痛折節礪行彰信于朝廷无以弭識
者之訛寤明君之意節著于外福延于家乘時蹈機
禍不旋踵言訖泣下數行父俞母贊天性交感三心
既叶万衆潛化天子聞而嘉之曰彼真有子乃授檢
校太子左諭德兼侍御史充節度副使累遷至散騎
常侍兼御史大夫賜金印紫綬既貳軍政事如命卿
弛張損益得以參決潛革故態人知嚮方大和二年

滄景節度使李全略卒其子同捷竊據故地詔下以
文告弗革遂用大刑先侍中表請率先諸侯使元子
以督戰制曰可公承君父之命乃捐其軀一舉而下
平原壓滄壘由是加工部尚書及王師凱旋上表願
一識承明廬詔允之遂赴北關下得覲於便殿上曰
嚮吾始討滄州議者皆曰彼魏之姻也慮陰為寇謀
吾發使教輩以偵之其還也僉曰爾父瀝款於賓筵
爾母抗詞于簾下願絕姻以立効其經始啓發出於
爾心今滄海底平策勲之日宜貴爾三族命爾父為
侍中遷鎮于近地加爾礼部尚書析相衛壇三州為

鎮以居之俾爾一門大榮以誇天下公拜稽首謝父
遷讓已爵礼无違者翌日詔下于明庭人咸曰史氏
之寵光世无有也牙旗碧幢方指東道侍中以帳下
生變聞泰極而否當歌而哭迎柩于路仰天長號因
葬于洛陽之卬山冀國夫人祔焉寢苦枕塊以所仇
同天為大酷未幾詔舉金革之義起為右金吾將軍
累表陳乞有司以違命督之輿疾即路間歲擢授廊
坊丹延等州節度觀察處置等使居四年遷鎮于滑
一歲入為右領軍衛大將軍旋改右金吾大將軍又
授鉞于邠土孟秋至治所首冬遘疾拜章入覲不克

展和鸞幃革之儀薨于靖菴里之私第享齡三十有
九當開成三年十月二十日上聞而悼之不視朝一
日贈尚書右僕射明年二月歸葬于洛都夫人琅邪
王氏祔焉繼室深澤縣君博陵崔氏有一子曰煥生
七年而孤僕射之喪自復魄至葬當門戶備祭祀建
碑表皆縣君之能且命其家老具事功來請曰娶不
恤家而憂幼嗣不知其先人之官業乞詞以傳其後
也君子以為知礼謹書之銘曰

斗杓之下崆峒播氣鍾于侍中孔武且貴奉上致命
宜昌後嗣僕射承之良兮不墜耳煩鉦鼓心說文字

虎穴之中生此騏驎大和紀元滄景不度子美父兵
跳踉海壖有鄰陰交蝟起鷄連詔下薄伐良隅騷然
時惟侍中實充魏師蓄銳未發衆心危疑僕射爲子
陳謀盡詞興言涕零有感尊慈絕姻効節精貫神祇
滄波底寧王師褒之乃遷元侯來鎮近畿乃昨元子
別建旌麾一門四節焜耀當時倏忽變生魏郊紛披
喬木雖大盲風不知干雲之臺列缺焚之哀哀孝嗣
丁此大酷迎護幃輶葬于東洛訴天觸地血染練服
礼有金革詔書敦促不遂枕戈驟膺推轂雕陰白馬
暨于邠谷雖榮三鎮不荷百祿綺紉之間珪組累累

如彼晨葩日中而萎有妻名家有子禪齒行號執礼
歸寔蒿里洛水之陽循邛之趾昭尊穆敬幽顯同理
舊松新柏亦象檣梓刻石紀功垂千萬祀

劉賓客文集卷第三

劉賓客文集卷第四 碑下 釋門銘記 附

曹溪第六祖大鑿禪師第二碑

佛衣銘 并引

唐故衡嶽律大師湘潭唐興寺儼公碑

牛頭山第一祖融大師新塔記

袁州萍鄉縣楊岐山故廣禪師碑

夔州始興寺移鐵像記

毗盧遮那佛華藏世界圖贊

成都府新脩福成寺記

大唐曹溪第六祖大鑿禪師第二碑

元和十一年某月日詔書追褒曹溪第六祖能公謚曰大鑿實廣州牧馬搃以疏聞由是可其奏尚道以尊名同歸善善不隔異教一字之褒華夷孔懷得其所故也馬公敬其事且謹始以垂後遂咨于文雄今柳州刺史河東柳君為前碑後三年有僧道琳率以其徒由曹溪來且曰願立第二碑學者志也維如來滅後中五百歲而摩騰竺法蘭以經來華人始聞其言猶夫重昏之見名爽後五百歲而達摩以法來華人始傳其心猶夫昧旦之覩白日自達摩六傳至大鑿如貫意珠有先後而無同異世之言真宗者所謂

頓門初達摩與佛衣俱來得道傳付以為真印至大鑿置而不傳豈以是為筌蹄邪窮狗邪將人人之莫已若而不若置之邪吾不得而知也按大鑿生新州三十出家四十七年而沒百有六年而謚始自蘄之東山從第五師得授記以歸高宗使中貴人再徵不奉詔第以言貢上敬行之銘曰

至人之生無有種類同人者形出人者智蠢蠢南裔降生傑異父乾母坤獨肖元氣一言頓悟不踐初地五師相承授以寶器晏坐曹溪世號南宗學徒爰來如水之東飲以妙藥差其瘖聾詔不能致許為法雄

去佛日遠羣言積億著空執有各走其域我立真筌
揭起南國無脩而脩無得而得能使學者還其天識
如黑而迷仰見斗極得之自然竟不可傳口傳手付
則礙於有留衣空堂得者天授

佛衣銘并引

吾既為僧琳撰曹溪第二碑且思所以辨六祖置衣
不傳之旨作佛衣銘曰
佛言不行佛衣乃爭忽近貴遠古今常情尼父之生
土無一里夢奠之後履存千祀惟昔有梁如象之狂
達摩救世來為醫王以言不痊因物乃遷如執符節

行乎復關民不知官望車而畏俗不知佛得衣為貴
壞色之衣道不在茲由之信道所以為寶六祖未彰
其出也微既還狼荒憬俗啗啗不有信器衆生曷歸
是開便門非止傳衣初必有終傳豈無已物必歸盡
衣胡久恃先終知終用乃不窮我道無朽衣于何有
其用已陳孰非芻狗

唐故衡嶽大師湘潭唐興寺儼公碑

佛法在九州間隨其方而化中夏之人汨于榮破榮
莫若妙覺故事禪寂者宗嵩山北方之人銳于武攝
武莫若示現故言神通者宗清涼山南方之人剝而

輕制剝莫若威儀故言律藏者宗衡山是三名山為
莊嚴國必有達者與山比崇南嶽律門以津公為上
首津之後雲峯證公承之證之後湘潭儼公承之星
月麗天珠玕同貫由其門者為正法焉公號智儼曹
氏子世為柳之右姓兆形在孕母不嗜葷成童在侶
獨不嗜戲其夙植因厚者歟生九年樂為僧父不能
奪其志抱經笥入岫嶠山從名師執業凡進品受具
聞經傳印皆當時大長老我入明門不住諸乘我行
覺路徑入智地居室方丈名聞大千護法大臣多所
賓禮嗣曹王臯之鎮湖南請為人師自是登壇莅事

三十有八載由我得度者萬有餘人人持寶衣解瓔
珞為礼公色受之謂門弟子曰彼以有相求我我以
有為應之凡建寶幢脩廢寺飾大像皆極其工應物
故也元和十三年九月二十七日中夜具湯沐剃願
項與門人告别即寂而視身與色無有壞相嗚呼豈
生能全吾真故死不速朽將有願力邪余不得而知
也問年八十二問臘六十一葬于寺東北隅傳律弟
子中獎道準傳經弟子圓皎貞璨與其徒圓靜文外
惠榮明素存政等欲其師之道光且遠故咨余乞詞
乃作長句偈以銘之曰

祝融靈山禹所治非夫有道不可止中有毗尼出塵
士以津視儼猶孫子登壇人師四十祀南方學徒宗
奧旨幼無童心至兒齒識滅形全異九死長沙潭西
幾五里陶侃故居石頭寺門前一帶湘江水吁嗟律
席之名兮與湘流而不已

牛頭山第一祖融大師新塔記

初摩阿迦葉授佛心印得其人而傳之至師子比丘
凡二十五葉而達摩得焉東來中華華人奉之為第
一祖又三傳至雙峯信公雙峰廣其道而岐之一為
東山宗能秀寂其後也一為牛頭宗巖持威鶴林徑

山其後也分慈氏之一支為如來之別子咸有祖稱
粲然貫珠大師號法融姓韋氏延陵人少為儒博極
羣書既而歎曰此仁誼言耳吾志求出世間法遂入
句曲依僧吳改逢掖而緇之徙居是山晏坐石室以
惠力感通故旱麓泉涌以神功示現故皓雪蓮生巨
蛇摧伏羣鹿聽法貞觀中雙峰過江望牛頭頓錫曰
此山有道氣宜有得之者乃來果與大師相遇性合
神授至于無言同躋智地密付真印揭立江左名聞
九圍學徒百千如水歸海由其門而為天人師者皆
脉分焉顯慶二年報身示滅道在後覺神依故山戒

香不絕龕坐未飾夫豈不思乎蓋神期冥數必有所待大和三年潤州牧浙江西道觀察使檢校禮部尚書趙郡李公在鎮三閩百爲大備尚理信古儒玄交脩始下令禁桑門販佛以眩人者而于真實相深達焉常謂大師像設宜從本教言自我啓因自我成乃召主吏籍我月入得緡錢二十萬俾秣陵令如符經營之三月甲子新塔成事嚴而工人盡甄誠達而山神來護願力旣從衆心知歸撞鐘告白龍象大會諸天聲香之蘊如見如聞即生相敬明幽同感尚書欲傳信于後遠命愚志之夫上士解空而離相中士著

空而嫉有不因相何以示覺不由有何以悟無彼達真諦而得中道者當知爲而不有賢乎以不脩爲無爲也

袁州萍鄉縣楊岐山故廣禪師碑

天生人而不能使情欲有節君牧人而不能去威勢以理至有乘天工之隙以補其化釋王者之位以遷其人則素王立中區之教懋建大中慈民起西方之教習登正覺至哉乾坤定位有聖人之道參行乎其亦猶水火異氣成味也同德輪轉異象致遠也同功然則儒以中道御羣生罕言性命故世衰而寢息

佛以大悲救諸苦廣啓因業故劫濁而益尊自白馬
東來而人知象教佛衣始傳而人知心法弘以權實
示其緝脩味真實者即清淨以觀空存相好者怖威
神而遷善厚于求者植因以覲福罹于苦者證業以
銷冤草盜心于冥昧之間泯愛緣于死生之際陰助
教化總持人天所謂生成之外別有陶冶刑政不及
曲為調柔其方可言其旨不可得而言也雖四海之
大羣倫之富必有以得其門而會其宗者為世導師
焉禪師諱乘廣其生容州始張氏七歲尚儒以俎豆
為戲十三慕道遵壞削之儀至衡陽依天柱想公以

啓初地至洛陽依荷澤會公以契真乘決鍾蘊聲和
之斯應陽燧合焰晞之乃明始由見性終得自在常
謂機有淺深法無高下分二宗者衆生存頓漸之見
說三乘者如來開方便之門名自外得故生分別道
由內證則無異同遂以攝化為心經行不倦愍彼南
裔不聞佛經由是結廬此山心與境寂應念以起教
隨方而立因居涉旬而善根者知歸逮周月而帶縛
者漸悟以月倍日以年倍時瘖濛洞開荒憬潛革邑
中長者十方善衆咸發信願大其藩垣法堂四阿股
引僧舍身心恒寂象馬交馳墮其去來皆得利益踰

嶺之北涉湘而南仰茲高山知道有所在此地緣盡
條然化惧神歸佛境悲結人世自跌坐而滅至于荼
毗三百有六旬矣爪髮加長容澤差衰真子號呼圍
繞薪火得舍利如珠璣者數十百焉於戲肖圓方之
形故寂滅以示盡入菩提之位故殊相以現靈亦猶
鳳毛成字麟角生肉必有以異不知其然於是服勤
聞法之上首曰甄升乃率其徒圓寂道弘如亮如海
等相與校汶具役建塔於禪室之右端從衆也初廣
公始生之辰歲在丁巳當玄宗之中元生三十而受
其更臘五十二而終終之夕歲直戊寅當德宗之後

元三年既望之又十日也後九年其門人還源以為
崇塔以存神與建銘以垂休皆憑像寄懷不可以闕
一謬謂余為習于文者故蠶足千里以誠相攻大惧
其先師德音與時寢遠且曰白月中黑東川無還颺
于金石傳信百劫被墮淚之感豈儒家者流專之敬
酬斯言銘示真俗文曰

如來說法徧滿大千得勝義者強名為禪至道不二
至言無辯心法東行羣迷丕變七葉無嗣四魔潜扇
佛衣生塵佛法如線吾師覺者冥極道樞承受密印
端如貫珠一室寥然高山之隅為法來者千百人俱

裔民嗤嗤戶有扉渠揖以方便家藏佛書願力既普
度門斯盛合為一乘散為萬行即動求靜故能常定
絕緣離覺乃得究竟生非我樂死非我病現滅者身
常圓者性本無言說付囑其誰等空無得後覺得之
像闕虛塔迹留仁祠十方四輩瞻禮於斯

夔州始興寺移鐵像記

佛薪盡于乾竺而象教東行是法平等故所至為淨
土是身應供故隨念如降生先是魚復人有以利金
為弥勒像者重千鈞眸容瑞相人天兩足鳧氏卒事
而它工未備故寓于西偏不知其幾年矣寺僧法照

瞻禮發信赤肩白足入諸大城乃至聚落無空過者
積十餘年得信財無量由是購工以嘗巧募徒而畢
力四輩增增工麾以肱中樞外脉陰轉陽動欵如地
踴岌如山行大象無言尊容嚮明青蓮承趺金獸捧
持藻井花鬘葱籠四垂邑人膜拜如佛出世法照以
願力能就泣于佛前因持片石乞詞以示後按此寺
始于宇文周初瀕江埤痺皇唐神龍中為水所壞有
波那賴耶國僧廣照浮海而至頓錫不去遂移于今
道場所山曰磨刀嶺曰虎岡其經始與克脩皆蕃僧
是力後之有志者豈無人哉法照夔人姓穆氏年十

有五出家依江陵名僧受具肇自貞元二十年甲申
歸此寺願崇建有爲凡修大殿立菩薩大弟子侍佛
左右逮長慶癸卯有成其善植德本者歟

毗盧遮那佛華藏世界圖讚

佛說華嚴經直入妙覺不出諸乘非大圓智不能信
解德宗朝有龍象觀公能于是經了第一義居上都
雲華寺名聞十方沙門嗣肇是其上足以經中九會
纂成華藏俾人瞻禮卽色生敬因請余讚之卽說讚
曰

清淨不染花中蓮捧持世界百億千湧出香海浩無

邊風輪負之盡夜旋大雄九會化諸天釋梵八部來
森然從昏至覺不依緣初初極極性自圓寫之綃素
色相全是色非色言非言

成都府新修福成寺記

益城右門銜大遠坦然西馳曰石笋街街之北有仁
祠形焉直啟曰福成寺寺之殿臺與城之樓交錯相
輝繡于碧霄望之如崑閭間物大和四年蜀師非將
材不修邊備南詔君長謀得內空乘隙全入闔于城
下或縱火以駭衆此寺乃焚高門修廊委為寒燼如
是者再歲帝念坤維丞相復來山川如迎父老相識

環視故地寺為樵墟載興起廢之歎爰有植因之願
乃命主俸吏以吾緡錢三十萬爲經營之基自公來
思蜀號無事時康歲稔人樂檀施公言旣先應如決
川乃傾囊楮乃出懷袖勝因化愚慧力攝慳男奔女
驟急於徵令匠者度材以指衆徒藝者運思以役衆
技斤鋸磨礮丁丁登登陶者儲精圻者效能歎自火
宅復為金繩沿故鼎新因毀成妍華夷縱觀萬目同
聳旣告訖役公來慶成雲鮮日潤輝映前後於是都
人舞抃而謠曰

昔公去此福成以燬今公重還福成復完民安軍治

亦如此寺庸可勿紀乎公實聞斯言遂折簡見命謹
月而日之時大和某年某月日大檀越具官封爵段
氏其他發大願者程功董事者自中貴人及賓寮將
吏若僧徒偕籍之而刻于石

劉賓客文集卷第四

劉賓客文集卷第五 論上

辯迹論一首 明贄論一首 華佗論一首

天論上一首 天論中一首 天論下一首

辯迹論一首

客有能通本朝之雅故者曰時之污崇視輔臣之用
否房與杜迹何觀焉建官取士之制地征口賦之令
禮樂刑法之章因隋而已矣二公奚施焉余愀然曰
三王之道猶夫循還非必變為審所當救而已隋之
過豈制置名數之間邪顧名與事乖耳因之何害焉
夫上材之道非務所舉必的然可使戶曉為迹也吾

觀梁公之迹章章如懸寓矣曷然哉請借一以明之
史不云乎初太宗怒渾戎之橫于塞也度諸將不足
以必取當宁而歎曰得李靖爲帥快哉靖時告老且
病矣梁公虛其心以起之靖忘老與病一舉虜其君
都縣其地而還夫非滅國之難能起靖之難能也靖
非不克之爲慮居功之爲慮也古之爲將度柄輕不
足以遂事重則嫌生焉是以有辭第以見志有多產
以取信有子質以滅貳有嬖監以虞謗其多患也如
是若靖者名旣成位旣崇重失畏偏其患又甚焉微
梁公之能盡材能捍患能去忌能照私彼姑藉舊勞

居素貴足矣惡乎起哉夫豈感空言而起邪心相見
久矣夫豈飾小信而要邪道相籠久矣其後敬玄擅
能去材臣而敗隨之林甫自便進蕃將而亂隨之由
是而言固相萬矣子方規規然窺上材以戶曉之迹
此吾之所不取也若杜萊公者在相位日淺將吏失
其傳然以梁公之鑒裁自天策府遂以王佐材許之
則是又能以道籠房公者矣房之許與迹孰甚焉容
無以應而作子劉子曰觀書者當觀其意慕賢者當
慕其心循迹而求雖博寡要信矣

明贄論

古之人動必有以將意故贄之道自天子達焉夫芬芳在上臭達于下而溫粹無擇有似乎聖人者堯也故用於天子清越而瑕不自揜潔白而物莫能污內堅剛而外溫潤有似乎君子者玉也故用於諸侯執之不鳴刑之不噪似死義乳必能跪似知禮者羔也故御執焉在人之上而有先後行列者鴈也故大夫執焉耿介而一志者雉也故士執焉視其所執而知其任是故食愈重而志愈卑位彌尊而道彌廣耿介之志唯志得以行之何也務細而所試者寡齒卑而所蔽者衆言未足以動聽故必激發以取異行未足

以應遠故必砥礪以沽聞借今由士為大夫捨雉而執鴈其志也隨之故耿介之名不施於大夫矣况其上乎然則為士也不思雉之介為卿也能思羔之禮歟今夫或者不明分推理而觀之則曰此居下而嗜直者是必得志而稔其訐矣彼當介而務弘者是必處高而肥其德矣曾不知訐當其分則地易而自遷弘非其所則志遠而無制矣於戲責士以御大夫之善猶諭君以士之行耳予以執贄之道得其分苟推分明矣求刑賞之僭濫得乎

史稱華佗以恃能厭事為曹公所怒荀文若請曰佗術實工人命繫焉宜議能以宥曹公曰憂天下無此鼠輩邪遂考竟至死蒼舒病且死見賢遍醫不能生始有悔之之歎嗟乎以操之明略見幾然猶輕殺材能如是文若之智力地望以的然之理攻之然猶不能返其志執柄者之志真可畏諸亦可慎諸原夫史氏之書于冊也是使後之人寬能者之刑納賢者之論而懲暴者之輕殺故自恃能至有悔悉書焉後之或者復用是為口實悲哉夫賢能不能無過苟寘于理矣或必有寬之之請彼壬人皆曰憂天下無材邪

曾不知悔之日方痛材之不可多也或必有惜之之歎彼壬人皆曰譬彼死矣將若何曾不知悔之日方痛生之不可再也可不謂大哀乎夫以佗之不宜殺昭昭然不待言也獨病夫史書之義是將推此而廣耳吾觀自曹魏以來執死生之柄者用一恚而殺材能衆矣又烏用書佗之事為嗚呼前事之不忘期有歡且懲也而暴者復藉口以快意孫權則曰曹孟德殺孔文舉矣孤于虞翻何如而孔融亦以應泰山殺孝廉自譬仲謀近霸者文舉有高名猶以可懲為故事矧他人哉

天說

柳宗元

韓愈謂柳子曰若知天之說乎吾爲子言天之說今夫人有疾痛倦辱飢寒甚者因仰而呼天曰殘民者昌佑民者殃又仰而呼天曰何爲使至此極戾也若是者舉不能知天夫果蔬飲食既壞虫生之人之血氣敗逆壅底爲癰瘍疥贅痿痔虫生之木朽而蝎中草腐而螢飛是豈不以壞而後出邪物壞虫由之生元氣陰陽之壞人由之生虫之生而物益壞食齧之攻穴之虫之禍物也滋甚其能去之者有功于物者也蕃而息之者物之讎也人之壞元氣陰陽也亦滋

甚墾原田伐山林鑿泉以井飲窺塞以送死而又穴爲堰洩築爲墻垣城郭臺榭觀游疏爲川瀆溝洫陂池燧木以燔革金以鎔陶甄琢磨悴然使天地萬物不得其情倖倖衝衝攻殘敗撓而未嘗息其爲禍元氣陰陽也不甚於虫之所爲乎吾意有能殘斯人使日薄歲削禍元氣陰陽者滋少是則有功於天地者也蕃而息之者天地之讎也今夫人舉不能知天故爲是呼且怨也吾意天聞其呼且怨則有功者受賞必大矣其禍焉者受罰亦大矣子以吾言爲何如柳子曰子誠有激而爲是邪則信辯且美矣吾能終其

說彼上而玄者世謂之天下而黃者世謂之地渾然
而中處者世謂之元氣寒而暑者世謂之陰陽是雖
大無異果菰癰痔草木也假而有能去其攻穴者是
物也其能有報乎蕃而息之者其能有怒乎天地大
果菰也元氣大癰痔也陰陽大草木也其烏能賞功
而罰禍乎功者自功禍者自禍欲望其賞罰者大謬
呼而怨欲望其哀且仁者愈大謬子而信子之仁義
以遊其内生而死耳烏置存亡得喪於果菰癰痔草
木邪

天論上

世之言天者二道焉拘于昭昭者則曰天與人實影
响禍必以罪降福必以善侏窮阨而呼必可聞隱痛
而祈必可答如有物的然以宰者故陰騭之說勝焉
泥于冥冥者則曰天與人實刺音異霆震于畜木未
嘗在罪春滋乎堇荼未嘗擇善跣躄焉而遂孔顏焉
而厄是茫乎無有宰者故自然之說勝焉余之友河
東解人柳子厚作天說以折韓退之之言文信美矣
蓋有激而云非所以盡天人之際故余作天論以極
其辯云大凡入形器者皆有能有不能天有形之大
者也人動物之尤者也天之能人固不能也人之能

天亦有所不能也故余曰天與人交相勝耳其說曰
天之道在生植其用在強弱人之道在法制其用在
是非陽而阜生陰而肅殺水火傷物木堅金利壯而
武健老而耗眊氣雄相君力雄相長天之能也陽而
藝樹陰而孳斂防害用濡禁焚用光斬材竅堅液礦
研鎧義制強訐礼分長幼右賢尚功建極閑邪人之
能也人能勝乎天者法也法天行則是爲公是非爲
公非天下之人蹈道必賞違之必罰當其賞雖三旌
之貴萬鍾之祿處之咸曰宜何也爲善而然也當其
罰雖族屬之夷刀鋸之慘處之咸曰宜何也爲惡而

然也故其人曰天何預乃事邪唯告虔報本肆類授
時之禮曰天而已矣福兮可以善取禍兮可以惡召
奚預乎天邪法小弛則是非駁賞不必盡盡罰不必
盡惡或賢而尊顯時以不肖參焉或過而僂辱時以
不辜參焉故其人曰彼宜然而信然理也彼不當然
而固然豈理邪天也福或可以詐取而禍亦可以苟
免人道駁故天命之說亦駁焉法大弛則是非易位
賞恒在佞而罰恒在直義不足以制其強刑不足以
勝其非人之能勝天之具盡喪矣夫實已喪而名徒
在彼昧者方挈挈然提無實之名欲抗乎言天者斯

數窮矣故曰天之所能者生萬物也人之所能者治萬物也法大行則其人曰天何預人邪我蹈道而已法大弛則其人曰道竟何為邪法人而已法小弛則天人之論駁焉今以一己之窮通而欲質天之有無惑矣余曰天恒執其所能以臨乎下非有預乎治亂云爾人恒執其所能以仰乎天非有預乎寒暑云爾生乎治者人道明咸知其所自故德與怨不歸乎天生乎亂者人道昧不可知故由人者舉歸乎天非天預乎人爾

天論中

或曰子之言天與人交相勝其理微庸使戶曉盍取諸譬焉劉子曰若知旅乎夫旅者羣適乎莽蒼求休乎茂木飲乎水泉必強有力者先焉否則雖聖且賢莫能競也斯非天勝乎羣次乎邑鄆求陰于華榭飽于餼牢必聖且賢者先焉否則強有力莫能競也斯非人勝乎苟道乎虞芮雖莽蒼猶鄆邑然苟由乎匡宗雖鄆邑猶莽蒼然是一日之途天與人交相勝矣吾固曰是非存焉雖在野人理勝也是非亡焉雖在邦天理勝也然則天非務勝乎人者何哉人不宰則歸乎天也人誠務勝乎天者何哉天無私故人

可務乎勝也吾于一日之途而明乎天人取諸近也
已或者曰若是則天之不相預乎人也信矣古之人
曷引天為答曰若知操舟乎夫舟行乎滌淄伊洛者
疾徐存乎人次舍存乎人風之怒號不能鼓為濤也
流之沂泗不能峭為魁也適有迅而安亦人也適有
覆而膠亦人也舟中之人未嘗有言天者何哉理明
故也彼行乎江河淮海者疾徐不可得而知也次舍不
可得而必也鳴條之風可以沃日車蓋之雲可以見
怪恬然濟亦天也黯然沈亦天也陸危而僅存亦天
也舟中之人未嘗有言人者何哉理昧故也問者曰

吾見其駢焉而濟者風水等耳而有沈有不沈非天
曷司歟荅曰水與舟二物也夫物之合并必有數存
乎其間焉數存然後勢形乎其間焉一以沈一以濟
適當其數乘其勢耳彼勢之附乎物而生猶影響也
本乎徐者其勢緩故人得以曉也本乎疾者其勢遽
故難得以曉也彼江海之覆猶伊淄之覆也勢有疾
徐故有不曉耳問者曰子之言數存而勢生非天也
天果狹於勢耶荅曰天形恒圓而色恒青周回可以
度得晝夜可以表候非數之存乎恒高而不卑恒動
而不已非勢之乘乎今天蒼蒼然者一受其形于高

大而不能自還於卑小一乘其氣于動用而不能自
休於俄頃又惡能逃乎數而越乎勢耶吾固曰萬物
之所以爲無窮者交相勝而已矣還相用而已矣天
與人萬物之尤者耳問者曰天果以有形而不能逃
乎數彼無形者子安所寓其數耶答曰若所謂無形
者非空乎空者形之希微者也爲體也不妨乎物而
爲用也恒資乎有必依於物而後形焉今爲室廬而
高厚之形藏乎內也爲器用而規矩之形起乎內也
音之作也有大小而響不能踰表之立也有曲直而
影不能踰非空之數歟夫目之視非能有光也必因

乎日月火炎而後光存焉所謂晦而幽者自有所不
能燭耳彼狸狴大鼠之目庸謂晦爲幽耶吾固曰以
目而視得形之粗者也以智而視得形之微者也烏
有天地之內有無形者邪古所謂無形蓋無常形耳
必因物而後見耳烏能逃乎數耶

天論下

或曰古之言天之曆象有宣夜渾天周髀之書言天
之高遠卓詭有鄒子今子之言有自乎答曰吾非斯
人之徒也大凡入乎數者由小而推大必合由人而
推天亦合以理揆之萬物一貫也今夫人之有顏目

耳鼻齒毛頤口百骸之粹美者也然而其本在乎腎
腸心腹天之有三光懸寓萬象之神明者也然而其
本在乎山川五行濁為清母重為輕始兩位既儀還
相為庸噓為雨露噫為雷風乘氣而生羣分彙從植
類曰生按尚書傳云海隅
蒼生謂草木也動類曰虫倮虫之長為智
最大能執人理與天交勝用天之利立人之紀紀綱
或壞復歸其始堯舜之書首曰稽古不曰稽天幽厲
之詩首曰上帝不言人事在舜之庭元凱舉焉曰舜
用之不曰天授在殷中宗襲亂而興心知說賢乃曰
帝賚堯民知餘難以神誣商俗已訛引天而毆由是

而言天預人乎

劉賓客文集卷第五

劉賓客文集卷第六 論中

因論七篇

劉子閒居作因論或問其旨昌歸歟對曰因之爲言有所自也夫造端乎無形垂訓于至當其立言之徒放詞乎無方措旨於至適其寓言之徒蒙之智不逮于是造形而有感因感而有詞匪立匪寓以因為目因論之旨也云爾

鑿藥 訊吐 嘆牛 做舟 原力 說驥 述病

鑿藥

劉子閒居有負薪之憂食精良弗知其旨血氣交沴

煬然焚如客有謂予子病病積日矣乃今我里有方士淪跡於醫厲者造焉而美肥輒者造焉而善馳矧常病也將子詣諸予然之之醫所切脉觀色聆聲參合而後言曰子之病其興居之節舛衣食之齊聲乖所由致也今夫藏鮮能安穀府鮮能毋氣徒爲美疹之囊橐耳我能攻之乃出藥一丸可兼方寸以授予曰服是足以滄昏煩而鉏蘊結銷蠱慮而歸耗氣然中有毒須其疾瘳而止過當則傷和是以微其齊也予受藥以餌過信而臆能輕痺能和涉旬而苛瘡絕焉抑搔罷焉踰月而視分纖聽察微蹈危如平嗜糲

如精或聞而慶予且開言曰子之獲是藥幾神乎誠難遭已顧醫之態多齷術以自貴遺患以要財盍重求之所至益深矣予昧者也泥通方而徂旣效猜至誠而惑勦說卒行其言逮再餌半旬厥毒果肆岑岑周軀如疔作焉悟而走諸醫醫大叱曰吾固知夫子未達也促和蠲毒者投之濱於殆而有喜異日進和藥乃復初劉子慨然曰善哉醫乎用毒以攻疹用和以安神易則兩躋明矣苟循往以御變昧於節宣奚獨吾儕小人理身之弊而已

劉子如京師過徐之右鄙其道旁午有毗增增扶班
白挈羈角齋生器荷農用摩肩而西僕夫告予曰斯
宋人梁人毫人穎人之逋者今復矣予愕而訊云予
聞隴西公暢穀之止方踰月矣今爾曹之來也欣欣
然似恐後者其聞有勞俸之簿歟蠲復之條歟振贍
之格歟碩鼠亡歟瘕狗逐歟曰皆未聞也且夫浚都
吾政之上游也自巨盜間釁而武臣額焉牧守由將
校以授皆虎而冠子男由胥徒以出皆鶴而軒故其
上也子視卒而芥視民其下也驚其理而蟬其賦民
弗堪命是軼于宅土然咸重遷也非阡危擠壑不能

違之曩者雖歸歟成謠而故態相沿莫我敢復今聞
吾帥故為丞相也能清靜畫一必能以仁蘇我矣其
佐嘗宰京邑也能誅鉏豪右必能以法衛我矣奉斯
二必而來歸惡待事實之及也予因浩歎曰行積于
彼而化行于此實未至而聲先馳聲之感人若是之
速歟然而民知至至矣政在終終也嘗試論聲實之
先後曰民黠政頗須理而後勸斯實先聲後也民離
政亂湏感而後化斯聲先實後也立實以致聲則難
在經始由聲以循實則難在克終操其柄者能審是
理俾先後終始之不失斯誘民孔易也

歎牛

劉子行其野有叟牽跛牛于蹊偶問焉何形之瑰歟
何足之病歟今穀觶然將安之歟叟攬縻而對曰瑰
其形飯之至也病其足役之過也請爲君畢詞焉我
僦車以自給嘗驅是牛引千鈞北登太行南並商嶺
掣以回之叱以聳之雖涉淖躋高轂如蓬而輒不傾
及今廢矣顧其足雖傷而膚尚脂以畜豢之則無用
以庖視之則有羸伊禁焉莫敢尸也甫聞邦君饗士
卜剛日矣是往也當要聲售于宰夫余尸之曰以叟
言之則利以牛言之則悲若之何予方窶且無長物

願解裘以贖將置諸豐草之鄉可乎叟輒然而咤曰
我之沽是屈指計其直可以持醪而齧肥飴子而衣
妻若是之逸也奚事裘爲且昔之厚其生非愛之也
利其力今之致其死非惡之也利其財子惡乎落吾
事劉子度是叟不可用詞屈乃以杖扣牛角而歎曰
所求盡矣所利移矣是以員能霸吳屬鏤賜斯既帝
秦五刑且長平威振杜郵死陔下敵擒鐘室誅皆用
盡身賤功成禍歸可不悲哉可不悲哉嗚呼執不匱
之用而應夫無方便時宜之莫吾害也苟拘于形器
用極則憂明已

做舟

劉子浮于汴涉淮而東亦既釋紼纒榜人告余曰方今湍悍而舟盪宜謹其具以虞焉予聞言若厲由是初以室之灰以堦之斛以乾之僕息而躬行夕惕而晝勤景霍晶而莫進風異响而適止兢兢然累辰是用獲濟偃檣弭櫂次于淮陰于是舟之工咸沛然自暇自逸或游肆而觴矣或拊橋而歌矣隸也休役以尚寢矣吾曹無虞以宴息矣逮夜分而竅隙潛澍渙然陰漬至乎淹簣濡荐方卒愕傳呼跣跳登墟僅以身脫目未及瞬而樓傾軸墊抵于泥沙力莫能支也

劉子缺然自視而言曰彘子兢惕也汨洪漣而無害今予宴安也蹈常流而致危畏之途果無常所哉不生於所畏而生於所易也是以越子鄰行吳君忽晉宣尸居魏臣怠白公厲劔子西晒李園養士春申易至于覆國夷族可不做哉嗚呼禍福之胚胎也其動甚微倚伏之矛盾也其理甚明困而後做斯弗及已

原力

劉子于邁舟次泗濱維絳邇之于傳傳吏適傳呼曰乘駟者方來誰何之則曰力人也雅以力聞於吳楚間中貴人器之謂宜爲爪士獻言于上有旨走如京

師頃其至則乞焉五輩咸碩其肱毅其容動睛擘如
曳趾岌如顧瞻遲回飲啜有聲泗濱守任由將授也
說而勞之饗以太牢飲以百壺酒酣氣振求試自矜
旁如無人中若有馮有盪舟如浴者扶鼎如飛者絢
鍵如麻者開兩弧而脉不債者屣巨石而齋如流者
異哉果以力駭世而聞于上也異日話于儒家者流
有客悻然自奮曰斯誠力矣上之不過誇胡人而戲
角抵次之不過倅期門而振袖服我之力異然以道
用之可以格三苗而賓左衽以威用之可以係六羸
而斲右臂由是而言彼力也長雄於匹夫然猶駟其

駢餽其食我力也無敵于天下亦當蒲其輪鶴其書
矣予詰之曰彼之力用于形者也子之力用于心者
也形近而易見心遠而難明理乎而言則子之力大
矣時乎而言則彼之力大矣且夫小大迭用曷常哉
彼固有小矣子固有大矣予所不能齊也客於邑垂
涕淺劉子解之曰屠羊于肆適味于衆口也攻玉于
山俟知于獨見也貪日得則鼓刀利要歲計而韞積
多客聞之破涕曰吾方俟多于歲計也歲歟歲歟其
我與歟

伯氏佐戎于朔陞獲良馬以遺予予不知其良也秣
之稊秕飲之污池廐櫪也上痺而下蒸羈絡也綴索
而續韋其易之如此予方病且窶求活于肆肆之馭
亦不知其良也評其價六十緡將劑矣有裴氏子羸
其二以求之謂善價也卒與裴氏裴所善李生雅挾
相術于馬也尤工覩之周躄眙然視忻然笑既而抃
隨之且曰久矣吾之不覲於是也是何柔心勁骨竒
精妍態宛如鏘如擘如翔如之備邪今夫之德也全
然矣顧其維駒藏銳于內且秣之乖方是用不說于
常目須其齒備而氣振平則衆美灼見上可以獻帝

閑次可以鬻千金裝也聞言竦焉遂倣其僕蠲其皂
筐其惡廬其溲穢以羨薦秣以薤粒起之居之澡之
拒震音之無分陰之怠斯以馬養養馬之至分也居無
何果以驥德聞客有唁予以喪其寶且譏其所貿也
微予灑然曰始予有是馬也予常馬畜之今予易是
馬也彼寶馬畜之寶與常在所遇耳且夫昔之翹陸
也謂將蹄將齧抵以撾策不知其籟雲耳昔之噓吸
也謂為疝為癘投以藥石不知其噴玉耳夫如是則
雖曠日歷月將頽踣是以曾何寶之有馬繇是而言
方之於士則八十具緡也不猶踰於五殺皮乎容謾

而竦予遂言曰馬之德也存乎形者也可以目取然猶爲之若此矧德蘊于心者乎斯從古之歎予不敢歎

述病

劉子嘗涉暑而征熱攻于膝以致病其僕也告痛亦莫能興逮浹日予有瘳醫診之曰疾幸間矣顧熱沴而未平有遺類焉宜謹於攝衛衛之乖方則病復矣所苦旣微而怠其說倦眠于衾而興焉倦隱于几而步焉面不能罷頰髮不能捐櫛口不能忘味心不能無思如是未移日而疾也瘳踈如復瘳于躬進藥

求汗凡三渙然後目能視視旣分則嚮時之僕已睨然執梧圜侍予于前矣予訝而曰曩吾與若也病偕呻也諄也若酷而吾微藥也餌也吾殷而若薄何患之同而痊之異哉僕諄諄而荅云已之被病也兀然而無知有間也亦兀然而無知髮蓬如而忘乎亂面黔如而忘乎垢自疾之殺也雖飲食是念無滑甘之思日致復初亦不知也予喟然歎曰始予有斯僕也命之理畦則蔬荒主庖則味乖顛廐則馬瘠常謂其無適能適乃今以兀然而賢我遠甚利與鈍果相長哉僕更笑劉子遂言曰樂于用則豫章貴厚其生則

社櫟賢唯理所之曾何膠于域也

劉賓客文集卷第六

劉賓客文集卷第七論下

辯易九六論

與董生論易

辯易九六論

乾之爻皆九而坤六何也世之儒曰吾聞諸孔穎達云陽尊得兼乎陰陰不得兼乎陽也它日予與董生言及易生曰吾聞諸畢中和云舉老而稱也請徵諸揲著夫端策者一變而遇少與歸奇而為五再變而遇少與歸奇而為四三變如之是老陽之數分措于指間者十有三策焉其餘三十有六四四而運得九是已故易繫注云乾一爻三十六策也一變而遇多

與歸奇而為九再變而過多與歸奇而為八三變如
之是老陰之數分措于指間者二十有五策焉其餘
二十有四四四而運得六而已故易繫注云坤一爻
二十四策也借如一變而過少再變三變而過多是
少陽之數分措于指間者二十有一策其餘二十有
八四四而運得七一變而過多再變三變而過少是
少陰之數分措于指間者十有七策其餘三十有二
四四而運得八故九與六為老老為變爻七與八為
少少為定位故曰舉老而稱亦曰尚變而稱且夫筮
為乾者常遇七斯乾矣常遇九斯得坤矣筮為坤者

常遇八斯坤矣常遇六斯得乾矣在左氏國語有之
晉公子親筮之曰尚有晉國得貞屯悔豫皆八八非
變爻故不曰有所之按坎二世而為屯屯之云二為
世爻震一世而為豫豫之初六為世爻屯之二豫之
初皆少陰不變斯非八乎卦由老數而舉曰六筮由
著數故斥曰八在左氏春秋傳有之曰穆姜薨于東
宮始往而筮之遇艮之八史曰是謂艮之隨夫艮_☶
艮_☶上下之隨_☶震_☳上下唯二不動斯遇八也餘五位皆九
六故及焉筮法以少為卦主變者五而定者一故以
八為占艮之六二曰艮其腓不拯其隨其心不快史

以為東宮實幽也過此為不利故從變爻而占苟以說于姜也何則卦以少為主若定者五而變者一即宜曰之某卦觀之否師之臨類是也變與定均即決以內外今變者五定者一宜從少占惧不吉而更之故曰是謂艮之隨是謂之云者苟以說也故穆姜終死于東宮與艮會耳而杜元凱於此註以為雜用三易故有遇八之云非臻極之理也劉子曰余與董生言九六之義信與理會為不誣矣余又于左氏二書參焉若合形影然而世人往往攘臂于其間曰主之名孰與顯達著邪而材孰與元凱賢邪歷載曠日未

嘗有聞人明是說者雖余憤然用口舌爭特貌從者什一二焉嗟乎由數立文所如皆合昭昭乎若觀三辰其不晦也如此然猶貴聽而賤視斷斷五奸然莫可更也矧無形之理不可見之道邪余獨悲而志之以俟夫後覺初董生言本畢中和中和本其師師之學本一行云

第一指餘一益二餘二益三餘三益四餘四益五第二指餘一益二餘二益三餘三益四餘四益五第三指與第二指同

右揲著數掛從下起指一自下始第一指法第故益成偶第二法大故益成奇第三人極法天故同

第一指遇一益三并掛為五遇三遇二並謂之少與一同第二指遇一益二并掛一為四第三指遇一益一并掛一為四

右三指俱遇少通計十三策其餘三十六策四

四運之得九為老陽故易繫云乾之策二百一十有六注云陽爻九一爻三十六策六爻二百一十有六

第一指遇四益四與掛一為九第二指遇四益三與掛一為八遇三亦同第三指遇四益一與掛一為八遇三亦同右三指俱過多通計二十五策其餘二十四策四四運之得六為老陰故易繫云坤之策百卅有四謂陰爻六一爻二十四策六爻一百四十四有四

第一指遇一益二并掛一為五第二指遇四益三并掛一為八第三指遇四益三并掛一為八右初指少第二第三指多以少為主通計二十

一策其餘二十八策四四運之得七為少陽

第一指遇四益四并掛一為九第二指遇一益二并掛一為四第三指遇一益二并掛一為四

右初指多第二第三少以多為主通計一十七策其餘三十二策四四而運得八為少陰

第一指遇少謂一二也並止于五第二指遇多謂三四也並止于八第三指又遇少謂一二也並止于四

右初指少第二指多第三指又少以多為主通計一十七策其餘三十二策四四而運得八為少陰

第一指遇多謂四也止于九第二指又遇多謂三四也止于八第三指遇少謂一二也止于四

右初指第二指並多第三指獨少以少為主通

計二十一策其餘二十八策四四運之得七為少陽

第一指

遇少止于五

第二指

又遇少止于四

第三指

遇多止于八

右初指二指並少三指獨多以多為主通計一十七策其餘三十二策四四運之得八為少陰穆姜薨于東宮始往而筮之遇艮之八史曰是謂艮之隨夫艮_{艮上}_{艮下}之隨_{震上}_{震下}唯六二爻不動餘五畫變變者遇九六也二不動者遇八也

晉公子親筮之曰尚有晉國得貞屯悔豫皆八夫屯_{震上}_{坎下}六位畫不過云九故不動既无所之即以世

爻為占按屯是坎宮二世卦故以一為占則遇八夫

豫_{震上}_{坤下}

是震宮一世卦以初六為占亦遇八韋昭

于此注云內曰貞外曰悔震下坎上為屯坤下震上為豫言得此兩卦震在屯為貞在豫為悔八謂震兩陰爻在貞在悔皆不動所以筮史占之謂閉而不通者爻元為也乾之策二百一十有六謂陽爻九一爻當二百一十六言三十六者舉老陽也坤之策一百四十有四謂陰爻二十四言二十四者舉老陰也凡三百有六十當暮之日二篇之策万有一千五百二十當万物之數六十四卦都三百八十四爻陰

陽相半各一百九十二爻

陽爻一爻三十六策合為六千九百一十二陰爻一爻二十四策合為四千六百八

右六九之數

一行大衍論云三實皆剛太陽之象也三變皆柔太陰之象也一剛二柔少陽之象也一柔二剛少陰之象也少陽之剛有始有壯有究少陰之柔有始有壯有究因綜四象之實而成八象焉八象之位而八卦之本列矣注云太陽始動施於太陰而生震象之七謂少陽之七再動于壯而生坎象之七謂再索而三為震初九

動于究而生艮象之七謂三索而得男也太陰始動施于太陽而生巽象之八謂少陰之八再動于壯而生離象之八謂再索而得女也三動于究而生兌象之八謂三索而得女也是以九六七八分為八象

右大衍論

國語云董因迎公于河公問焉曰吾其濟乎對曰臣筮之得泰之八曰是謂天地配亨小往大來今及之矣何不濟之有韋昭云泰三至五震象為候陰爻不動其數皆八與貞屯悔豫義同劉子曰昭此說用互躰有震按董因之言天地配亨是六五帝乙歸妹

以祉元吉之爻夫泰乾坤躰全內外位正內為身外
為事卜得國事也以外卦為占六五居尊位故統論
卦下辭曰小往大來爻遇歸妹故曰天地配亨何必
取互躰也

右與董生言易

劉賓客文集卷第七

劉賓客文集卷第八記上

天平軍節度使廳壁記

汴州刺史廳壁記

國學新修五經壁記

汴州鄭門新亭記

鄭州刺史東廳壁記

管城新驛記

和州刺史廳壁記

山南西道節度使廳壁記

山南西道新脩驛路記

天平軍節度使廳壁記

元和十四年春二月王師平河南負固之地十有二
州憲宗視地圖戶版俾參其地三月有詔其以曹濮
隸鄆為一隅按部三郡統兵三萬乃新其軍錫號天

平蓋承天威以平暴悖志動揚休在稱為雄新邦始
徠汚俗猶用朝廷革之以漸故命功臣或辨吏以帥
焉大和三年冬天平監軍使以故侯病聞上方注意
治本乃以牙璋玉節 右僕射官稱賜東都留守令
狐公曰予擇文武惟汝兼前年鎮汴州有顯庸往年
弼憲宗有素貴徒得君重剛吾四支公再拜稽首登
車有耀不踰旬抵治所夾清河而域之惟鄆州在春
秋為須句之國涉漢為濟東蓋禹貢兗州之域宣精
在上奎為文宿畫野在下魯為儒鄉故其人知書風
俗信厚天寶末大慙起于幽都虜將困兵鋒取其地

右勇左德積六十年公之來思如古醫之治劇病宣
洩願養氣還神復大凡抗詔條國式于身以先之示
菲約以裕人信賞罰以格物物力日完人風自移涉
月報政踰年鼎治牙門之容暨暨而恭壘門之容位
位而和里中之容闐闐而遂勞者以安去者以歸分
星不搖田祖降福凡革前非罷供第無名錢歲鉅萬
菽粟如之錦繒且千兩去苛法急徵毀家償租之令
故流庸自占四萬室衆無吁咨和氣乃來三田仍稔
草木咸瑞豈偶爾哉初斯堂西墉有刺史記而元戎
雄尊之位虛其左方豈有待邪公命愚志之俾來者

仰公知變風之自大和五年夏四月二十六日記

汴州刺史廳壁記

本朝以浚儀為汴州刺史治所自清醜新渠吸黃河而東行州含其樞為天下劇內屏王室東雄諸侯居無事常時帶廉察使兵興已還益以節旄用人得否繫國輕重長慶四年詔書命河南尹燉煌令狐公來莅來刺錫之介圭使印兵符汴人交賀肴醪騰貴惟是邦始都于魏惠王始郡于宇文周星躔回環天駟垂光地為四戰故其俗右武人具五都故其氣習豪公自為宰相時已熟四方之利病凡所戾止參然前

知既視事三日揖羣吏與之言曰吾食止圭田吾用止公入凡宅給過制傷廉浼潔者悉罷之壹歸乎公藏凡曲防苛禁不情乖舛者悉刻之壹出乎令典凡關征船筭奪時專利者悉更之一遵乎詔條然後刑麗事而詳賞以時而均興學以勸藝示寬以化勇居數月而汴州人恂恂然無復故態明年大成議者若曰奕奕浚都國之咽喉咀清燕和旁暢四支東夏黠馬由我以肥是浚之治非所澤于所履而已初公七代祖在隋為納言大業中持節居此亦號刺史距今餘二百年公實能似既拜闕發魚書合左右契由阡

階躋遐踵前武歆然如聞其馨香肅然如覩其形容
信乎君子之澤遠而有光輝也它日命遊梁客志之
書于廳事謹按前賢之在此堂者張平原首之陸氏
撰節度使記揭于東壁詳矣今公命爲刺史記書于
右端謹月而日之以公爲冠大和元年夏五月某日
記

國學新修五經壁記

初大曆中名儒張參爲國子司業始定五經書于論
堂東西廂之壁辯齊魯之音取其宜考古今之文取
其正繇是諸生之師心曲學偏聽臆說咸束之而歸

于大同揭揭高懸積六十歲崩剝污蠹泯然不鮮今
天子尚文章尊典籍于苑囿不加尺椽而成均以治
學上言遽賜千萬時祭酒皞實尸之博士公肅實佐
之國庠重嚴過者必式遂以羨贏再新壁書懲前土
塗不克以壽乃析堅木負墉而宇之其制如版牘而
高廣其平如粉澤而潔滑背施陰闕使衆如一附離
之際無迹而尋堂皇靚深兩廡相照申命國子能通
法書者分章揆日遜其業而繕寫焉筆削旣成讎校
旣精白黑彬班瞭然飛動以蒙來求煥若星辰以敬
來趨肅如神明以疑來質決若著蔡由京師而風天

下覃及九譯咸知宗師非止服逢掖者鑽仰而已於
是學官某等暨生徒凡四百二十有八人請金石刻
且歌之曰

我有學宇既傾而成之我有璧經既昧而明之孰規
摹之孰發揮之祭酒維齊博士維韋俾我學徒弦歌
以時切切祁祁不教不嬉庶乎適人來采我詩時余
為禮部郎凡瞽宗之事得以關決故書之以移史官
宜附于藝文志

汴州鄭門新亭記

亭于西門尊闕路也實相公以心規羣僚以辭叶而
百工以樂成斧斤無聲丹素有嚴主人肅容落以金
石走鄭之門嶽為右垣黃河一支滉漾北軒前瞻東
顧甍動軌直含景生姿逝空欲翔汴城具八方之人
殊形詭言而耳目一說初公來臨擁節及門馭吏曰
此鄭州門公心非之若曰野哉居無何即舊號而更
之曰鄭門故事王人大僚之去來元侯前驅翊門而
旋率立于塵坌中挹策為禮公心不然之乃下亭令
于執事按亭東西函史者三之有奇而南北五之有
羸樂縣宴豆前後以位棊闔對明弭撤順時修梁衡
建中虛上荷圓脊方廉高卑中經簾鑪茵帶文旒皖

榻儲以應猝周用而宜乃命尹闈視亭長抱關視掌
固啓閉拚除是謹是攷錫命賜胙勞迎贈餞我當躬
行汝先汝蠲挾膳提醪生芻縞衣我寮展事靡問文
武汝唯汝從凡入而脩容凡出而脩輶揚襲威儀勿
籍勿訶由是貴人稱諸朝羣吏詠于家行者誇于道
與人同其安者人人譯其聲而吟之始乎譏譏而威
乎龐鴻欲無文字不可也公遂條白其所以然遂命
學古者書之公姓令狐氏以文章典內外書命以暮
明登左右相以飛語策免以思材復徵自有浚師無
如今治文武兩熾其古之大臣歟

鄭州刺史廳壁記

古諸侯之居公私皆曰寢其它室曰便坐今凡視事
之所皆曰廳其它室以辨方為稱今年鄭州刺史楊
君作東廳既成而落之且以書抵余為記按圖章以
甲乙第方域大凡環天子之居為雄州鄭實邇王畿
故望雄視其版多貴人且當大遠故務劇君侯始來
三日司稅掾舉七縣董租之吏累百君曰此百媵也
悉罷之用戶符而輸入益辦司貢掾舉黎林之征請
戶曉君曰盡弛之物籍用平賈而果益精里無吏迹
民去痼疾授牘占租如臨詛盟土毛人力日夕相長

故周歲而完焉比年而愈肥雖軍興餽勞千大將
牙旗往復相踵而里中清夷鷄犬音和人既寧而物
有餘故既成而多日暇園視舊宇宜有以更之且書
得時亦以謹始因列名氏授受月而日之庶乎繼踐
于茲者知貫珠之旨其山望澤浸土風旼俗與前賢
之耿光備于正位有天寶中詞人杜顏之文在大和
四年某月日記

管城新驛記

大和二年閏三月滎陽守歸厚上言臣治所直天下
大遠肘武牢而咽東夏誰何宜謹啓閉宜度先是驛

于城中駟遽不時四門牡鍵通夕弗禁請更于外隧
永永便安制曰可守臣奉詔無徵命無奪時靡羨財
募游手速八月既望新驛成鄭人胥說琢石而紀曰
在允之方面玄負陽門銜周道牆蔭行粟境勝于外
也遠購名材旁延世工既塗宣哲銳甍剛滑術精于
內也蘧廬有甲乙牀帳有冬夏庭容牙節廡卧囊橐
示禮而不恩也內庀外廡高倉邃庫積薪就陽時翁
就燥有素而不愆也主吏有第從夫有區師行者有
饗亭擊行者有別邸周以高墉乃樓其門勞迎展蠲
潔之敬餞別起登臨之思溱洧波瀾嵩丘雲烟四時

萬象來貺于我走轂奔蹄造征急宣入而忘勞出必
屢顧其傳舍之尤乎太守姓楊氏字貞一華陽弘農
人鄭爲雄州非聞人大吏不得在其選夫驛之宜遷
于外也前此二千石嘗言之而重改作若貞一可謂
果於從政而決行其言惜乎未施乎大也

和州刺史廳壁記

歷陽古陽州之邑於天文直南斗魁下在春秋實句
吳之封後爲楚所取秦并天下以隸九江而吳爲九
江治所晉平吳復隸淮南至永興初自析爲郡益之
以烏江宋臺建目爲南豫州又益之以龍亢梁之亡

北齊圖霸功擁貞陽侯以歸王僧辨來迎會于茲地
二國和協故更名和州陳隋間無所革國朝因隋武
德中更龍亢爲含山初開元詔書以口筭第郡縣爲
三品是爲下州元和中復命有司參校之遂進品第
一按見戶萬八千有奇輸緡錢十六萬歲貢織紵二
筐吳牛蘇二鈞糝鱒九甕茅蒐七千兩鎮曰梁山浸
曰歷湖田藝四穀黍全六擾廬有旨酒庖有腴魚神
仙故事在郊在藪玄元有臺彭鏗有洞名山曰鷄籠
名鳩曰濡湏異有血閻祥有沸井城高而堅亞父所
營州師五百環峙于東南瀕江劃中流爲水疆揭旗

樹莖十有六成自孫權距陳出入六代常為宿兵之地多以材能人處之本朝混一號為善部然用人差輕非復曩時之比也始予以尚書郎待譴刺連山今也自巴東來牧考前二邦之籍與版圖纔什五六而地征三之究其所從來生植有本女工尚完堅一經一緯無文章交錯之奇男夫尚懇闢功苦戀本無即山近鹽之逸市無啗眩工無彫形無游人異物以遷其志副徵令者率非外求凡百為一出于農桑故也由是而言瘠天下者其在多巧乎寶曆九年六月二十一日刺史中山劉某記

山南西道節度使廳壁記

文皇帝初元始畫天下為十道古荆梁之地舉曰山南厥後析為東西天漢之邦實居右部按梁州為都會治所領十有五州縣道帶蠻夷山川扼隴蜀故二千石有採訪防禦之名兵興多故其任益重澄清節鉞二柄兼委建中末德宗南巡狩偃翠華而徘徊蕭勺之音洽于巴漢戡難清宮六龍言旋乃下詔復除征繇升州為府等威班制與岐益同地既尊大用人隨異故自興元至大和五十年間以勲庸佩相印者三以暮明歷真相者九由台席授鉞未幾復入相者

再焉磊落震耀冠于天下去年夏四月今丞相趙郡公徵還秦階遂命左僕射燉煌公往踐其武鄉之九相及公而十焉初公自河陽節度使入操國柄其後鎮宣武以禮悛僭悍治天下以清去培克居大鹵以仁蘇荐饑今來是都躡二三大君子之躅道同氣協無所改更如鼓和琴布指成韻羗夷砥平旱麓發生人無左言樂有夏聲俗既富庶居多閒暇園視府局素闕者補之先是公堂嘗爲行殿人不敢斥別營侯居應門有閱祭戟未具公乃條白上言詔下有司可其奏君門肅清方有眉目趨而入者聳然生敬焉惟

梁山國也其節用虎出揚其威入貯宜潔舊處仄陋黯其雄稜公遂分宅之別齋且據便地署曰節室卜剛日乃邁焉敬君命而一民心軍中增氣而知禮戟衣旣垂師節旣嚴流眄屋壁見前修之名氏列于坐右第以梁州刺史鼎興元尹記與今稱謂不合因發函進牘于不佞且曰我已飾東壁以新志累子於是按南梁故事起自始登齋壇之後為記云時開成二年歲在丁巳春二月某日記

山南西道新修驛路記

開成四年梁州牧缺上玩其印凝旒深思曰伊爾卿

族歸氏以文儒再世居喉舌今天官二卿融能嗣其
耿光嘗自內庭歷南臺尹轂下政事以試可爲元侯
乃付印綬進秩大宗伯兼御史大夫王節獸符鎮于
媯墟公拜手稽首曰臣融敢揚王休于天漢之域既
莅止咨于羣執事求急病者先之咸曰華陽黑水昔
稱醜地近者嘗爲王所百態丕變人風邑屋與山水
俱一都之會目爲善部矣唯駟遽之途敵危隘束其
醜尚存使如周道在公願指耳於是因年有秋因府
無事軍逸農隙人思貢餘乃懸墾山刊木之墉募其
力揆鑽鑿撞柶之用庀其工異舛輦舂鍤之器膺其

要礮鼓以程之糗醪以犒之說使之令旣下奮行之
徒空集我之提封居右扶風觸劔閣千一百里自散
關抵褒城次舍十有五牙門將賈黯董之自褒而南
逾利州至于劔門次舍十有七同節度副使石文穎
董之兩將受命分曹星馳並山當巖頑石萬狀均者
埴之瓦者銛者磊落傾欹波翻獸罇熾炭以烘之嚴
醢以沃之潰爲埃煤一箕可埽棧閣盤虛下臨岷呀
層崖峭絕柵木亘鐵因而廣之限以鈎欄狹徑深陁
銜尾相接從而拓之方駕從容急宣之騎宵夜不惑
却曲稜層一朝坦夷興役得時國人不知繇是聘行

者忘其勞吉行者徐其驅孥行者家以安貨行者肩
不病徒行者豈不蠶乘行者蹄不利公談私詠溢于人
聽伊彼金其牛而誘之以利曷若我子其民而來之
以義乎既訖從南梁人書事于牘請紀之以附于史
官地里志

劉賓客文集卷第八

劉賓客文集卷第九記下

夔州刺史廳壁記

連州刺史廳壁記

機汲記

洗心亭記

復荆門縣記

武陵北亭記

夔州刺史廳壁記

夔在春秋為子國楚并為楚九縣之一秦為魚復漢
為固陵蜀為巴東梁為信州初城于灤西後周大總
管龍門公拓王述登白帝歎曰此奇勢可居遂移府
于今治所是歲建德五年隋初楊素以越公領總管
又張大之唐興武德二年詔書其以信州為夔州七

年增名都督府督黔巫一十九郡開元中猶領七州
天寶初罷州置郡號雲安至德二年命嗣道王鍊為
太守賜之旌節統硤中五郡軍事乾元初復為州偃
節于有司第以防禦使為稱尋罷以支郡隸江陵按
版圖方輸不足當通邑而今秩與上郡齒特以帶蠻
夷故也故相國安陽公乾曜嘗參軍事脩圖經言風
俗甚備今以郡國更名之所以然著于壁云凡名殊
必以國事建必以年謹始也長慶二年五月一日刺
史中山劉某記

連州刺史廳壁記

此郡於天文與荊州同星分田壤制與番禺相犬牙
觀民風與長沙同祖習故嘗隸三府中而別合乃今
最久而安得人統也按宋高祖世始析郴之桂陽為
小桂郡後以州統縣更名如今其制誼也郡從嶺州
從山而縣從其郡邑東之望曰順山由順以降無名
而相歆者以萬數回環鬱遠迭高爭秀西北朝拱于
九疑城下之浸曰涅水由涅之外支流而合輸以百
數淪漣汨滴擘山為渠東南入于海山秀而高靈液
滲漉故石鍾乳為天下甲歲貢三百銖原鮮而臚卉
物柔澤故紵蕉為三服貴歲貢十笥林富桂檜土宜

陶甄故侯居以壯聞石侔琅玕水孕金碧故境物以
麗聞環峯密林激清儲陰海風毆溫交戰不勝觸石
轉柯化為涼颺城壓赭岡踞高負陽土伯噓溼抵堅
而散襲山逗谷化為鮮雲故罕罹嘔泄之患並有華
皓之齒信荒服之善部而炎裔之涼墟也永貞元年
余始以尚書外郎坐黨累出補茲郡居無何吏議以
是遷也不足庚其責故道貶為朗州司馬後十年詔
書徵還抵京師俄復前命佩故印綬而南曩之騎竹
馬北向相俛者咸任郡縣中鞫來迎下車之日私言
且笑既視事得前二千石名姓于壁端宰臣王峻俸

卿劉冕儒官嚴士元聞人韓秦僉拜焉或以於其治
功利存乎人民或不之厥官翹顯載于歌謠余不佞
從羣公之後肇武德距于今凡五十有七人所舉者
四君子猶振裘之於領袖焉元和十一年七月二十
四日刺史中山劉某記

機汲記

瀕江之俗不飲於鑿而皆飲之流予謫居之明年主
人授館于百雉之內江水浩浩周壙之間一旦有工
爰來思以技自賈且曰現今之室廬及江之涯間不
容卮顧積塊峙焉而前耳請用機以汲俾轟然之狀

莫我過已予方異其說且命之飭力焉工也儲思環
視相面勢而經營之由是比竹以為畚窶于流中中
植數尋之臬輦石以壯其趾如建標焉索綯以為繩
縻于標垂上屬數仞之端亘空以峻其勢如張弦焉
鍛錢為器外廉如鼎耳內鍵如樂鼓牝牡相函轉於
兩端走於索上且受汲具及泉而脩綆下繩盈器而
圓軸上引其往有建瓴之駛其未有推轂之易瓶縮
不羸如搏而升枝長瀾出高岸拂林杪踰峻防刻蟠
木以承澍貫脩筠以達脉走下潺潺聲寒空中通洞
環折唯用所在周除而沃盥以蠲入爨而錡釜以盈

飴餼之餘移用于湯沐漱澣之末泄注于圃畦雖瀆
湧于庭莫向其需洽也昔予嘗登陴攔然念懸流之
莫可遽挹方勉保庸督臧獲麩而挈之至于裂肩龜
手然猶家人視水如酒醪之貴今也一任人之智又
從而信之機發于冥冥而利用於物浩漾東流赴海
為期幹而遷焉遂我頤指擗之所謂阻且艱者莫能
高其高而深其深也觀夫流水之應物植木之善建
繩以柔而有立金以剛而無固軸卷而能舒竹圓而
能通合而同功斯所以然也今之工咸盜其古先王
之遺法故能成之不能知所以為成也智盡于一端

功止于一名而已噫彼經始者其取諸小過歟

洗心亭記

天下聞寺數十輩而吉祥尤章章躡名山俯大江荆吳雲水交錯如繡始予以不到爲恨今方弭所恨而充所望焉旣周覽讚嘆於竹石間最竒處得新亭形焉如巧人畫鰲背上物即之四顧遠邇細大雜然陳乎前引人目去求瞬不得微其經始日僧義然嘯侶爲工即山求材槃高孕虛萬景全來詞人處之思出常格禪子處之遇境而寂憂人處之百慮冰息鳥思猿清繞梁歷榦月來松間彫鏤軒墀石列筍簾藤蟠

蛟螭脩竹芳竿夏含涼颺斯亭之實錄云爾然上人舉如意挹我曰旣志之盍名之以行乎遠夫予始以是亭園視無不適始適乎目而方寸爲清故名洗心長慶四年九月二十三日劉某記

復荆門縣記

直故郢北走之道其聚邑曰荆門揭起重關殿于樂都名視縣內之制居殷形束之要故吏師重焉通外民之底貢會南藩之述職故賓禮蕃焉其肇允經營實王孫昌夔居荆以表之命行名建而締構之弗暇無幾何有由勇爵而授赤社于茲者激馳名于省

畜謂相沿爲非智因請罷去其號發踐更以董之有司不能端究事本循空言而可其奏繇是分地征以歸它邑野之人有回遠之歎廢文吏而顯戍督行之旅有誰何之難是利不及下也黎民病之自鄆而南斯爲畫疆抵郡之路貫其七舍持湍節而銜急宣之使蓋陰相交逐使服縵胡者備問俗之對執刀七者申餼牽之禮是敬之不及賓也君子病之如是幾二十歲距永貞元年江度尹裴公政成上游德及矜人大建長利俾無遺害乃外濟羣欲內張全摹周圖經制條白于狀昌言既從公議攸同忘勞之徒樂用之

工載大其門載高其墉徑術脉分闕閭架空然後折便地以肥之建具官以司之糜羨財以償其力役汰冗食以資其秩稍田里不聞於徵令縣官無減於歲入越某月旣成而落之官脩其方人樂其居將迎犒飫之儀展廡置符繡之事舉戍夫有伍公吏有職曲彙而分率無踰閑入其封者可以知教元和元年四海會同天子命公師長南宮三年公以介圭入覲途出斯邑邑人之華皓幼童咸須于道周距躍而謠曰起我堙廢而完之俛我蕩析而安之昔室于墟風搖雨濡自公優柔鄆閑盈子昔飲于滄夏涸冬枯自公

感通感涕生兮淑旂之華兮四牡之駢徯公之還兮
觸以祝之郤略踰蹇百形一音公為駐錯衡而勞之
有以文促公者紀事于牘且曰民可懷也蓋命夫學
舊史之事以志焉公不得讓而從之走是以有授簡
之辱初公以縣之之便聞于上也禹錫方以郎位貼
職于計曹章下之日得以省事建今以遷人獲宥于
善部工休之日得以踐履故於拜命無牢讓于傳信
無愧詞以為古之創物建庸宜於人民而得其時者
則必訶其事功為後代法雅有營謝美召伯也傳稱
城沂賢為教也賦水泉原隰之狀志慮事命日之規

當書而詠之細亦弗可略也是用謹其本始而存乎
篇俾後之視今者知楚郊之令典云

武陵北亭記

郡北有短亭繇舊也亭孤其名地藏其勝前此二千
石全然見之建言而莫踐去之日率遺恨焉七年冬
詔書以竹使符授尚書水曹外郎竇公常曰命爾為
武陵守葢止三月以碩畫佐元侯平裔夷降渠魁又
三月以順令率蒸民增水坊表大道是歲大穰明年
政成農緣訃以勇勸工執技以思賈因民之餘力乘
日之多暇乃顧其屬曰郊道有候亭示賓以不恩也

雖聞茲地韜美未發豈有待邪自吾之治于斯也購
徒庀材大起堙廢未嘗植私庭礮燕寢役必先公人
不余瑕調賦幸均矣城池幸完矣而重浹辰之役掠
苟簡之間卒使勝蜀冒沒猶璞而不攻懼換符之日
還復齋恨無乃遺誚於來者乎言得其宜智愚同贊
於是撤故材以移用相便地而居要去凡木以顯珍
茂汰汚池以通淪漣自天而勝者列于騁望由我而
美者生於願指箕張筵楹股引房櫳斧斤息響風物
異態大道出乎左藩澄湖浸乎前垠仙舟祖輶繇是
區處九月壬午工告休亭長受成赤車威遲予以落

之肅賓而入園視有適沈水北澳陽山南麓默焉蘧
蘧雄殿郊隅前軒舒陽朱檻環之舞衣回旋樂簾參
差北廡延陰外阿旁注芊眠清泚羅入洞戶初筵脩
平彫俎靜嘉林風天籟與金奏合亦既醉止州從事
舉白而言曰室成于私古有發焉矧成于公庸敢無
詞觀乎棼楣有巖丹腹相宣象公之文律曄然而光
也望之弘深即之坦夷象公之酒德溫然而達也庭
芳萬本跗萼交映如公之家肥熾而昌也門闢戶闔
連機弛張似公之政經便而通也因高而基因下而
池躋其高可以廣吾視泳其清可以濯吾纓俯于遠

惟行旅謳吟是采瞰于野惟稼穡艱難是知雲山多
狀昏旦異候百壺先帝之餞迎退食私辰之宴嬉觀
民風於嘯詠之際展宸戀于天雲之末動合于誼匪
惟寫憂公曰夫言之必可書者公言也從事不以私
視予余從而讓之是自還也其可乎迺授簡于放臣
俾書以示後後之思公者雖灌叢萋草尚勿剪拜矧
翬飛之革然石刻之隱然歟

劉賓客文集卷第九

劉賓客文集卷第十書

上杜司徒書

獻權舍人書

為京兆李尹答于襄州第一書

為京兆李尹答于襄州第二書

答饒州元使君書 答容州竇中丞書

答柳子厚書 與柳子厚書

答道州薛郎中諭方書書

與刑部韓侍郎書 與道州薛郎中論書儀書

上杜司徒書 時元和元年

月日故吏守朗州司馬員外置同正負劉某謹齋沐

致誠命僕夫持書敢獻于司徒相公閣下昔稱韓非善著書而說唯孤憤尤爲激切故司馬子長深悲之爲著于篇顯白其事夫以非之書可謂善言人情使逢時遇合之士觀之固無以異于它書矣而獨深悲之者豈非遭罹世故益惑其言之至邪小人受性顛蒙涉迹未至末學見淺少年氣粗常謂盡誠可以絕嫌猜徇公可以弭讒慝謂慎獨防微爲近隘謂艱貞用晦爲廢忠竊徇已陳刻舟從讖畧獲隨足佺然無知事去凝想時時自笑然後知韓非之善說司馬子長之深悲跡符理會千古相見雖欲勿悲可乎大凡

恒人之所以靈于庶類以其能羣以勝物也烈士之所以異于恒人以其伏節以死誼也然則交相喪者世與道難合并者机與時是以有死誼之心而卒不獲其所者世人悲之獲其所矣而一旦如不得終焉者君子悲之世人之悲悲其不遇無成而虧故其感也近君子之悲悲其不幸既得而喪故其感也深其悲則同其所以爲悲則異若小人者其不幸歟間者昧于蕃身推致危地始以飛謗生釁終成公議抵荆句朔之間再投裔土外黷相公知人之鑑內貽慈親非疾之憂常恐恩義兩乖家國同負寒心銷志以生

為慙雖欲瀝血以自明籲天以自新適足來衆多之
誚豈復有特達見知者邪遂用誼盟于心不復自白
以內咎為弭謗之具以吞聲為窒隙之媒庶乎日月
至焉而是非乃辨會友人江陵法曹掾韓愈以不幸
相悲且曰相國扶風公之遇子也厚非獨余知之天
下之人皆知之矣余聞初子之橫為口語所中獨相
國深明之及不得已而退則為之流涕以訣又不得
已而譴則為之擇地以居求之于今難與侔矣抑余
又聞曩子之介于司徒府奉誠敬于山園上公亟亟
稱于人以為不懈于位今則有脩儀以贊其詔相者

有備物以贊其容衛者七月禮畢一朝慶行誥言敷
之授以顯秩子獨足趾一跌而前勞併捐祝網之辰
動絰踈目可封之代乃為窮人斯常情之所悲矧知
子之厚者夫踣者思起必諱而求極疾者思愈必呻
而求醫子宜諱於有力而呻於有術如何以箝口自
絕為智以甘心受誣為賢嗟然自咎求知於默被李
斯遂焉而為上卿鄒陽囚焉而為上客二子者豈默
以求知者邪若可訴而不言則陷於畏可言而不辯
則鄰於怨畏與怨君子之所不處子其處之哉韓生
之言未及竟而小人不知感從中來始赧然以愧又

缺然以標終悄然以悲悲斯歎歎斯憤憤必有泄故見乎詞敢聞左右投所閔也嗟夫人之至信者心目也天性者父子也不感者聖賢也然而于竊鉄而知心目之可亂于撮蜂而知父子之可間于拾煤而知聖賢之可疑况乎道謝孔顏思異天性是非之際愛惡相攻爭先利途虞相軋則釁起希金貴意雖無嫌而謗生魯酒致邯鄲之圍飛鳶生博者之禍伯仁之殺由偶對伯奢之寃以吞聲動罹險中皆出意表雖欲周防亦難曲施加以吠聲者多辨實者寡飛語一發臚言四馳萌芽始奮枝葉俄茂方謂語怪終成禍

梯嗚呼人必求之不能自達何投分效節有積塵之難何譖行愛弛有決防之易何將進之日必自見其可而後親何將退之時乃人言其否而遂棄良由邪人必微邪謀必陰陰則難明微則易信罔極太甚古今同途是以前脩鑒其若此姑以推心取信不以循迹生嫌由是求忠臣于孝子求良婦于罵已食子盡節也推其忍可以疑心放麝逮命也推其仁可以屬國若謂其孝于親未必能忠專于夫未必能貞忍于子未必能忍于其它仁于獸未必能仁于其類則是天下之人盡不可信而盡可誣固不然也凡人之行

已必恒于所安苟非狂易不能甚異小人自居門下
僅踰十年未嘗信宿而不侍坐率惟所履固無遁逃
言行之間足見真態伏惟推心以明其迹追往以鑒於
今苟謂其嘗掩人以自售矣嘗近名以冒進矣嘗欺
謾于言說矣嘗啗貪于求取矣嘗狎比其瑣細矣嘗
媒孽其僚友矣嘗矯激以賣直矣嘗詬譎以取容矣
嘗漏言于咨諏矣嘗敗務于簿書矣有一于此雖人
謂其賢我得而刑也豈止于棄乎苟或反是雖人謂
其盜我得而任也庸可而棄乎由是而言小人之善
否不在衆人所以受譴已還行反半歲當食而歎聞

弦尚驚不以衆人之言為是非唯以相公之意為衡
準自違問左右亟蒙簡書慰誨勤勤窮賴增感伏想
仁念必思有以拯之况禮道貴終人情尚舊嘗盡其
力必加以仁於犬馬之微有帷蓋之報顧異於是豈
無庶幾儻浮言可以事久而明衆嗤可以時久而息
弘我大信以祛羣疑使熒熒微志無已矣之歎覲乎
異日得夷平民然後裹足西向謝恩有所復以塵纓
鰲貌稱故吏於相門此言朝遂可以夕死何則復於
變者其義重拯於危者其感深睽而後合示終不可
睽也否而後泰示終不及否也獲實於已喪得途於

既迷與夫平居不為艱故所激者其味異矣伏以大
君繼明元宰柄用鴻鈞播平分之氣懸象廊無私之
照渙汗大號與人惟新昭回汪濊旁下郡國投荒為
民者咸釋拳拮遂還里閭繫於稍食猶在羈絆伏讀
赦令許移近郊今武陵距京師贏二千者無幾小人
祖先塚樹在京索間瘠田可耕陋室未毀濡露增感
臨風永懷伏希憫其至誠而少加推恕命東曹補吏
置籍於滎陽伍中得奉安輿而西拜先人松楸誓當
齋志沒齒盡力於井昫之間斯遂心之願也如或官
謗未塞私欲未從雖為裔民乃有善地則北距澧浦

資宿春而可行無道途之勤蠲僕債之費重以鎮南
用和輔理扇仁風于上游霽嚴施惠得以自遂斯便
家之願也伏惟降意詳察擇可行者處之乞恩于指
顧之間為惠有生成之重雖百穀之仰膏雨豈喻其
急焉嗟哉小生仕逢聖日豈曰不辰知有相君豈曰
不遇而乘運鍾否俾躬罹災同生無手足之助終歲
有病貧之厄孰不求達而獨招嫌孰不求安而獨乘
坎賦命如此雖悔可追湘沅之濱寒暑一候陽鴈纔
到華言罕聞猿哀鳥思啁啾異響莫夜之後併來愁
腸懷鄉倦越吟之苦舉目多似人之喜俯視遺躄仰

安高堂悲愁惴慄常集方寸盡意之具固不在言身
遠與寡捨茲何託是以因言以見意恃舊以求哀敢
希末光下燭幽蟄孤志多感重恩難忘顧瞻門館慙
戀交會伏紙流涕不知所云禹錫惶悚再拜

獻權舍人書

禹錫在兒童時已蒙見器終荷荐寵始見知名衆之
指目忝閣下門客懼無以報稱故厚自淬琢靡遺分
陰乃今道未施於人所蓄者志見志之具匪文謂何
是用顛顛懇懇于其間思有所寓非篤好其章句泥
溺于浮華時態俗尚病未能也故拙于用譽直繩朗

鑿樂所趨也故銳於求益今謹錄近所論撰凡十數
篇蘄端較是非敢闕于左右猶夫礦朴納于鎔範嘗
聞昔宋廣平之沈下僚也蘇公味道時為繡衣直指
使者廣平投以梅花賦蘇盛稱之自是方列于聞人
之目是知英賢卓犖可外文字然猶用片言借說于
先達之口席其勢而後驤首當時矧碌碌者疇能自
異今閣下之名之位過于蘇公之曩日而鄙生所賦
或鉅于梅花則沈沈于霄懸在指顧間其詞汰而喻
僭誠黷禮也繫遊藩之久覲尚舊而霽嚴禹錫惶悚
再拜

為京兆李尹答于襄州第一書

閣下以大墓世在三原而去河南益遠尚繫于數百年之外于義不安遂奮然移羣從率先行古占數為京兆人且命使者脩敬于鄙薄缺然不敢當此之重洪惟閣下世雄朔易四姓之冠其宗勳有八柱之貴其碩德有二老之重因都入雒錫之土田自生齒已上列于侯籍與夫其先嘗為編戶民者大殊謹按永徽格貫在兩都者無害為本部官蓋神州赤縣尊有所厭非它土之比實待罪輦轂下閣下宣風江漢為諸侯師介圭入覲必參大政其展禮措事宜為羣倫

所觀非據之榮赧然汗下不宣實再拜

第二書

實白前辱閣下書厚自枉屈執州人之禮兼示移羣從書明所以去河南從京兆為望之旨于古義為得然而通行之自久或猷疑焉是以前書不敢不逡巡牢讓亦有以發閣下之雄辯使矚然為世旌者今月某日函使至果貽理言大明時人之所以失而我獨障頽波而逢其原既一辭不獲命又學淺不堪往復敢不敬從前史稱以大將軍而有揖客豈不為重循汲直之言則有以略其理而增高者今鄙人之不讓

適有以增閣下之重耳實白

答饒州元使君書

傳使至蒙致書一函辱示政事與治兵之要明禮以及用通經以知權視陰陽慘舒之節取震虩澤濡之象知天而不泥于神怪知人而不遺于委瑣先鄉社之治以決于舉郡首隊伍之法以及于成師猶言數者起一而至万操律者本黃鍾以極八音誠通人之說章章必可行者也鄙生涉吏日淺嘗耳剝老成人之言熟矣今研覆至論淵乎有味非游言架空之徒喜未嘗不至抃也故揚榘所見以累下執事云蓋豐

荒異政繫乎時也夷夏殊法牽乎俗也因時在乎善相因俗在乎便安不知法斂重輕之道雖歲有順成猶水旱也不知日用樂成之義雖俗方阜安猶蕩析也徙木之信必行則民不惑此政之先也置水之清必勵則人知敬此政之本也銛筦之機或行則姦不敢欺此政之助也則有以其弛張雄雌唯變所適古之賢而治者稱謂各異非至當有二也顧遭時不同耳夫民足則懷安安則自重而畏法乏則思濫濫則迫利而輕禁故文景之民厚其生爲吏者率以仁恕顯武宣之民亟於役爲吏者率以武健稱其寬猛迭

用猶質文循環必稽其弊而矯之是宜審其究奪耳
太史公曰身脩者官未嘗亂也然則脩身而不能及
治者有矣未有不自已而能及民者今之號爲有志
於治者咸能知民困於杼軸罷於征徭則曰司牧之
道莫先於簡廉奉法而已其或材拘於局促智限於
罷懦不能斟酌盈虛使人不倦以不知事爲簡以清
一身爲廉以守舊弊爲奉法是心清於棖闥之內而
柄移於胥吏之手歲登事簡偷可理也歲札理業則
潰然攜矣故曰身脩而不及理者有矣若執事之言
政詣理切情斥去迂緩簡而通和而毅其脩整非止

乎一身必將及物也其程督非務乎一切必將經遠
也坊民之理甚周而不至皎察字民之方甚裕而不
使侵侔知革故之有悔審料民之多撓厚發姦之賞
峻欺下之誅調賦之權不關於猾吏逋巨之責不遷
於豐室因有年之利以補敗汰不急之用以蓄財爲
邦之要深切著明若此其悉也推是言按是理而篤
行之烏有不及治邪古稱言之必可行非樂乘空文
耳有人民社稷固可踐其言也瀕江之郡饒爲大履
番君之故地漸甌越之遺俗餘干音翰有畝鍾之地武
林有千章之材其民牟利鬪力狃於輕悍故用暴虐

間重以山茂積苦金豐鑠銳齊民往往投鉉基而即
鐘鐘鑄損系梟而工寡擷乘時詭求其息倍稱間聞
主分土者盡寵其利而幹之坐簿書舛錯為中執法
所劾事下三府以受賕論其刑甚渥于今列郡不寒
而慄彼邦人聆其風聲固曰彼媮民者上罪之若此
其念民也至矣今二千石以前失職非其罪執事者
即人心而用之彼邦人是必翹然須其至而安矣以
思治之民遇習治之守欲不至於富庶得乎昌黎韓
宣英好實蹈中之士也前為司封郎以餘刃剗劇于
計曹號無逋事能承其家法而紹明之庭堅仲容之

族也坐事為彼郡司馬更閏餘者再焉是必能知風
俗之良窳采察之善否盍嘗問焉足為群疑之寶龜
也至於否臧文律戢玩之戒均權以制動函隸以稔
勇平居使不墮萃聚使不譁坐作疾徐心和氣振誠
纖悉於所示也故置之以湏執事異日承進律之命
握獸符而駕寅車而後貢其瞽言重曉左右耳

荅容州竇中丞書

健步劉子良至猥奉書教以愚為希儒之徒重言一
發華衮非貴世之服儒衣冠道古語居學官者為不
鮮矣求其知所以然者幾何人借曰有之未必不詬

病耳今夫挾弓注矢逝空而發者人自以為皆羿可矣移之於澤宮則噤而不敢言何哉有的不可欺故也今夫儒者函矢相攻蝸蟾相喧不啻於穀弓射空矢者孰爲其的哉異日先道大行則言益重使儒者之的懸於舌端不得讓也由是知辱教之喜可勝既乎間承得一二易生劉侍絳帳荒服之外持經鼎來爭捐珠璣以易編簡不疾而速其君子之德風歟而裔景俗已丕變矣顧其風候非民和可移地泄恒燠冬無巖氣其在裔神以佑藥兼味以禦稌所謂養賢以及萬民頤之時義不可不順苟以有待及物爲心

則養已與養民非二道也矧群情之顯顯乎禹錫再拜

荅柳子厚書

禹錫白零陵守以函置足下書爰來屑末三幅小章書僅千言申申疊疊茂勉甚悉相思之苦懷膠結贅聚至是泮然以銷所不如晤言者無幾書竟獲新文二篇且戲余曰將子爲巨衡以揣其鈞石銖黍余吟而繹之顧其詞甚約而味淵然以長氣爲幹文爲支跨躒古今鼓行乘空附離不以鑿枘咀嚼不以文字端而蔓若而腴佶然以生癯然以清余之衡誠懸于

心其揣也如是子之戲余果何如哉夫矢發乎羿毅而中微存乎它人子無曰必我之師而能我衡苟能則譽羿者皆羿也可乎索居三歲理言蕪而不治臨書乾乾不具禹錫白

與柳子厚書

間發書得箏郭師墓誌一篇以為其二獨得於天姿使木聲絲聲均其所自出抑折愉繹學者無能如繁休伯之言薛訪車子不能曲盡如此能令鄙夫冲然南望如聞善音如見其師尋又寤事神驚心得倘佯伊鬱久而不能平嘆夫郭師與不可傳者死矣弦張

柱差楚宜枵然貌存中有至音含糊弗聞噫人之而器存布方冊者是已余之伊鬱也豈獨為執師發邪想足下因僕書重有慨耳不宣禹錫白

荅道州薛侍郎諭方書書

禹錫再拜初兄出中臺守江華人咸曰函牛之鼎以之烹小鮮惜乎餘地澶漫而無庸也愚獨心有慨焉以為君子受乾陽健行之氣不可以息苟吾位不足以充吾道是宜寄餘術百藝以洩神用其無暇日與得位同久欲以是理求有得於兄而未有路會崔生來辱書教果惠以所著奇方十通商古今之宜而去

其并猥以一物足以了病者居多非累試輒效不在是族或取諸屑近亦以擴拾慮恒人多怠忽不省必建言顯白揚其功於已然其它立論率以弭病於將然為先而政治為後言君臣必以時言宣補必以性言砭火必本其輸榮言被禳必因其風俗齊和之宜炮剔之良暴灸有陰陽之候煎烹有少多之取撓火及勞以制駛露置以養潔味有所走薰有所歸存諸纖悉易則生患非博稽逖覽之士孰能知其所從來哉愚少多病猶省為童兒時風其襦袴保母抱之以如醫巫家鍼烙灌餌亘然啼號巫媪輒陽陽滿志引

手真求竟未知何方何等藥餌及壯見里中兒年齒比者必睨然武健可愛羞已之不如遂從世醫號富於術者借其書伏讀之得小品方於羣方為最古又得藥對知本草之所自出考素問識榮衛經絡百骸九竅之相成學切脈以探表候而天機昏淺布指於位不能分累葢之重輕第知息至而已然於藥石不為惜矣爾來垂三十年其術足以自衛或行乎門內疾輒良已家之嬰兒未嘗詣醫門求治者頃因欲編次已試者為一家方書顧力不足今允能我先所以辱貺之喜信踰拱璧有以賞音遠道耳常思世人

居平不讀一方病則委千金於庸夫之手至于甚殆
而曰不幸豈真不幸邪甚者或乘少壯之氣笑人言
醫以為非急昌言曰飽口飽腹藥其如我何所承之
氣有時而既於禱神佞佛遂甘心焉兄以愚言覆觀
之其人固比肩耳前蒙示藥焙法謹如教地之慝果
不能傷雖莛音胡水瀉喜速朽者率久居而無害萬
物不可以無法謂生不由養致其誣乎山川匪遊事
使之遠形不接而諭者莫賢乎書臨紙怛悵不宣禹
錫再拜

與刑部韓侍郎書

退之從丞相平戎還以功為第一官然猶議者嘆然
如未遷陟此非特用文章學問有以當衆心也乃在
恢廓器度以推賢盡材為孜孜故人心樂其道行行
必及物故耳前日赦書下郡國有棄過之目以大國
材富而失職者多千鈞之機固省度而釋豈鼯鼠所
宜承當然譬諸蟄虫壞戶而俯者與夫槁死無以異
矣春雷一振必歆然翹首與生為徒况有吹律者召
東風以薰之其化更益速雷且奮矣其知風之自乎
既得位當行之無忽禹錫再拜

答連州薛郎中論書儀書

吾兄不知愚無似猥以書見攻其非且曰我與子中外屬當為伯仲其抵我書執禮太卑按舊儀凡無姊之齒有唯無伏他以是為衰其於正敵即前云願後云白而已大歷初李贇皇貫常侍猶守之無渝二公何人也我與子何人也烏有從末俗以姑息為禮而不虞識者所窺邪其有云尔愚得書退而思惟愀然自賀曰在恒人為宜而在愚為過豈不能幸歟故盡言於兄期有以相易耳末禮之文為者定宜尊宜卑猶四方上下左右前後稱謂一立古先聖賢所不敢移管敬仲不敢當命卿之饗虞人不敢承士之招先

禮而後身也汲黯不為大將軍而虧九卿王祥不為錄尚書而屈三公先道而後時也是則非據之榮雖君命有所不受非道之利雖衆尚有所不為兄長於大曆初常接前輩游欲其風采去承平時不甚相遠愚長於貞元中所與游皆後來諸生然猶於稠人廣坐時聞老成人之說灌注耳目斑斑然不絕如綫其後為御史四方諸侯悉以書來賀校其禮皆駁不同唯洪州牧李常侍翼潭州牧楊中丞憑始言執事其宅如儀而同在憲司者咸以二牧為不遜愚時與其僚柳宗元昌言於衆曰監察八品也當衣碧言執事

爲宜不當經怪衆咸听然而咤復謂愚云子奚不碧
其服邪其不堪執事已深不可以言解及謫官十年
居僻陋不聞世論所以書相問訊皆昵親密友不容
變更而時態高下無從知耳前年祇召抵京師偶故
人席夔談因及是事乃知與十年前大殊至有同姓
屬尊致書於屬卑而貴者其紙尾言起居新婦夔獨
竊笑之而已然猶不敢顯言詆之今有人謂東為西
者一言發則凡人唾爲駮且狂苟不衆非之則東西
易位久矣尊卑失其儀恬而不怪安得使人如東西
不敢易之哉曾子有云君子之愛人也以德細民之

愛人也以姑息謂古人悉朴且賢則斯言不當發于
洙泗間耳蓋三代之尚未嘗無弊由野以至僂豈一
日之爲漸靡使之然也嫉其弊而救之以歸于中道
必俟乎薦紳先生德與位并者揭然建明之斯易也
語曰俟自直之箭則百代無一矢俟自圓之木則千
歲無一輪執矯揉之器者視之灌業無非良材耳竊
觀今之人于文章無不慕古甚者或失于野于書疏
獨陋古而汨于浮二者同出于古而背馳非不能盡
如古也蓋爲古文者得名聲爲今書者無悔吝如水
走

劉賓客文集卷第十

劉賓客文集卷第十一

表章一為淮南杜相公佑脩凡十首

讓同平章事表一首

謝平章事表一首

謝手詔表

詔後敕親批

謝貸錢物表

請赴行營表一首

謝兵馬使朱鄭等官表一首

賀復吳少誠官爵表一首

賀除虔王表一首

慰義陽公主薨表一首

慰王太尉薨表一首

讓同平章事表

臣某言高品吳千金至奉制加臣銀青光祿大夫同

中書門下平章事兼徐泗濠等州節度觀察處置等

使餘如故者初受恩榮若登霄漢退思塵忝如履春



冰臣誠惶誠恐頓首臣聞以德詔官以勞定賞苟或
虛授人無勸心臣自守方隅累更時歲荷唐虞宣力
之寄乏齊魯報政之能愧無可稱以答高位豈意聖
慈弘獎天澤荐加以變贊之崇名被庸虛之陋質懼
速官謗有玷大猷伏以宰相之職安危是注其在當
否繫于慘舒惟以材升例無平進舉不失德則副蒼
生之心苟非其人或致外夷之哂臣雖愚昧嘗覽前
言豈敢昌榮遂安竊位輒思事理冀盡芻蕘若以汴
河要津漕運所切徐方倣擾師旅未寧謹當上稟獻
謀下貞戎律克期而進屈指可平勵衆之先是臣之

志既行其事必在正名所加節制安敢飾讓至於銀
青貴服金鉉重名勲蹟無聞豈宜濫及伏乞賜寢前
命俯亮愚衷微臣遂知止之宜聖朝無不稱之服名
器斯慎退讓有聞遐邇聆風孰不知勸其新授官告
謹重封進無任懇禱屏營之至

謝平章事表

臣某言伏蒙獎拔超踐鈞衡慮玷大猷昧死陳讓再
奉嚴旨不令固辭恩厚命輕位高責重中謝臣聞天
下安危注意將相處論道具瞻之地蒙總戎作鎮之
權雖協夢而求無聞秉鉞之寄登壇以拜不兼調鼎

之榮授受維艱伊昔猶爾况臣庸瑣何以克堪陛下
玄造曲成大明私照俾掌戎律復參廟謨寵光之崇
在臣已極毫髮之効於國何施謹當罄竭微誠奉遵
至教仗天威以懾不順敷聖澤以遂羣生上分旰食
之憂下塞素餐之責力誠不足心實念茲伏乞皇明
俯賜照鑒臣恪居官次遐守藩維不獲伏謝彤庭陳
露丹慊心存闕下同犬馬之戀恩身在淮濱仰雲天
而結思無任懇悃屏營之至

謝手詔表詔後批云朕自書

臣某言中使閻忠信至奉宣聖旨存問兼賜臣手詔

拜捧紫泥跪伸金簡承旨見聖神之畧感恩知身命
之輕中謝臣素乏異能幸逢昌運猥當旌鉞之寄來
靖祚氛榮分台鼎之名何階啓沃竊位斯久速尤是
虞豈謂玄化曲成鴻私荐及特紆睿思親灑仙毫降
自九重粲然五色初喜麗天之象遠燭輝光旋驚垂
露之蹤曲覃霈澤鸞鳳騫翔而變態烟雲舒卷以呈
姿賦彩飛文聳神蕩目恭惟國寶何幸家藏感枉涕
零莫知上答應緣軍旅庶務謹具別狀奏聞無任欣
戴屏營之至

謝貸錢物表

臣某言中使南宮懷珍至奉宣聖旨存問兼賜臣墨
詔天光下濟敵澤曲流銜恩未酬居寵彌懼中謝臣
受任斯極微功莫施昨以封畧未寧干戈猶動壽春
固壘以備盜淮甸興師以扞姦經費所資數盈鉅萬
餽餉時久供億力殫慮始圖終不敢緘默輒陳管見
上黷宸聰伏蒙聖慈特遂誠請遠承如綍之旨特假
聚人之財軍須不愆士氣弥振糗糧既備永無半菽
之虞襦袴足須遂超挾纊之感是爲說使咸願先登
臣忝總戎倍百欣荷伏以上分國用俯濟軍興候清
烟塵謹備償納

請赴行營表

臣某言臣自守淮濱已周星紀虔奉朝典粗安遐方
素效未聞新恩荐及身曳兩綬寄深一隅蚊蚋負山
力誠不足鷹鷂逐鳥志則有餘臣再授兵符夙參軍
幕被堅執銳雖未經於戎行制勝伐謀亦常習於事
業自忝藩翰屬時清平無施汗馬之勞但詠素弓之
什今則幸遇殊獎委之專征以貞率先是臣素志况
聞徐州士衆本無叛心倉卒之間危疑至此臣請自
臨疆場親領紀綱裂帛繫書諭其禍福椎牛饗士養
以威聲冀宣皇風煦茲蠢類以忠義感脅從之伍以

含弘安反側之徒革面悛心期乎不日其揚州晉務
請令行軍司馬路應權知伏乞聖慈俯賜照鑒

謝兵馬使朱鄭等官表

初除侍御史續除中丞封異姓王

臣某言奏事官韋溫迴特蒙聖恩重賜朱鄭等官告
宸象昭回煥然下燭榮分右職光賁遐藩中謝臣伏
以朱鄭朴忠爲心沈毅見色當建封禦侮之寄見張
情提孩之年昨者隸職徐州分鎮蘄縣繹騷之際梗
亮彌彰歷險而未實繁其旅詳探本末有足褒稱輒
具奏聞恐煩獎勸伏蒙睿鑒俯亮微誠優詔先行已
階直指之列殊私荐至超升獨坐之崇戶領三千爵

踰五等恩生非次感異常轅門有光武旅增氣遂
使感激之士希勇爵以捐軀猖狂之徒聆聖澤而悛
性風行草偃其勢必然臣忝總戎倍百欣荷

賀復吳少誠官爵表

臣某言中使宋惟澄至奉宣聖旨存問兼賜臣墨詔
及昭示洗雪吳少誠等事天地弘覆燾之恩雷雨施
渙汗之澤瑕累咸滌危疑獲安中謝臣伏以少誠擅
興兵戈事生誑誤自王師致討天威下臨曾無悖辭
亟聞引咎初懷疑懼雖擁衆以偷生旋感聖神屢拜
章而請命陛下仁深解網慮軫納隍念餽餉飛輓之

勤閔戰爭暴露之苦舉茲宥過之典副彼效順之誠
一方承再造之恩九有覩惟新之化敷鴻霈而覃及
蠢類鼓仁風而臻于太和罷析銷鋒自茲而始臣謬
膺重寄虔守遐藩不獲稱慶墉墉陳露丹懇仰瞻宸
極倍百常情無任慶抃屏營之至

賀除虔王等表

臣某言中使李國真至奉宣聖旨存問兼賜臣墨詔
鴻澤浹下大明燭幽曉諭便藩慰安稠疊中謝臣伏
覩天書恭承睿旨弘愛人屈已之道酌因時適變之
宜擇賢王作鎮徐方俾張悖便主晉務上則成邦家

磐石之固下則副士衆拜章之請戚藩之寄斯重舊
勲之祀獲全丕變猖狂之徒咸躋仁壽之域既弘在
宥坐見止戈率土人臣孰不欣說臣素乏方畧謬荷
寵光猥承將相之名無施分寸之績遭逢若此報效
蔑聞官謗已興渥刑官及陛下恩深履載道務含
弘恤公私餽餉之勤念吏士鋒鏑之苦特紆神筭昭
發德音危疑獲安制置惟固好生宥過誠陛下開網
之仁尸位無功重徵臣素餐之責周章跼躐胡顏自
安但以遐守藩條恪居官次不獲仰謝雲陛陳露血
誠未遂周任知止之言敢逃臧文竊位之咎無任戰

越之至

慰義陽公主薨表

臣某言伏承義陽公主薨伏惟聖懷傷悼增切伏以公主妍姿令則冠絕天人稟教皇宮已挺柔嘉之德降嬪卿族益彰貞粹之儀方期作範壺闈長榮邸第豈意遘茲短曆奄謝昌辰伏慮陛下軫念未捐深慈莫遣有虧常膳罷設宮懸臣子之情不任惕戀况聖凡禮異邦家制殊伏願追齊彭殤理達脩短割肌膚之愛慰寰海之心率土人臣孰不相慰無任懇悃屏營之至

慰王太尉薨表

臣某言伏承成德軍節度使太尉兼中書令王武俊今月某日薨沒伏以武俊生逢昌時天授忠節奮揚義勇茂建勳庸秩冠朝端參爽和於台鉉姻連戚里承嘉慶於雲霄榮掩華夷事高今昔方膺作翰之寄遽迫歸泉之期鼎臣云亡梁木斯壞伏惟陛下君臣義重存沒感深臨冊襚以興懷聽鼓聲而軫念臣恪居官守奉慰無階悲慟之誠有加常品謹遣某官某乙奉表陳慰以聞

劉賓客文集卷第十一

劉賓客文集卷第十二 表章二淮南杜相公佑脩凡十一首

謝冬衣表一首

謝濠泗兩州割屬淮南表一首

謝曆日面脂表一首

謝墨詔表一首 論廢楚州營田表一首

謝朝覲表一首 謝春衣表一首

謝賜門戟表一首 謝男師損等官表一首

謝端午日賜物表一首

謝墨詔表一首

謝冬衣表

臣某言中使王國清至伏奉聖旨慰勞臣及將佐官吏僧道耆壽百姓等并賜臣墨詔及冬衣兩副大將衣四副者大明昭回遠燭下土殊錫稠疊延及偏裨慶忭失圖捧戴相賀云云臣謬承委寄獲守藩條仄琯屢移塵露無補陛下至仁天覆玄化風薰頌以兼衣貢茲瑣質降自天府光于轅門緘滕既開覩綵章之盛飾蹈舞而服發溫燠於祁寒愧塵補衮之名更荷解衣之賜恩波下浹將校同沾共戴殊榮咸思竭節生成是荷雨露難酬無任懇悃慙荷之至

謝濠泗兩州割屬淮南表

臣某言伏奉十一月二十九日詔書其濠泗兩州令臣依前收管臣謬承寵光作鎮淮海位均九伯權總十連內省無堪常恐不逮豈謂恩私曲被封畧有加慙無報政之勤重受分憂之寄伏以兵戈方息閭里未安謹當奉宣皇風慰彼黔首且責成於牧宰期不失於澄清伏惟聖明俯賜照鑒無任感戴屏營之至

謝曆日面脂口脂表

臣某言中使霍子璘至奉宣聖旨存問臣及將佐官吏僧道耆壽百姓等兼賜臣墨詔及貞元十七年新曆一軸臘日面脂口脂紅雪紫雪并金花銀合二金

稜合二皇明遠燭恩錫荐臻抃舞失容捧戴無措伏
惟皇帝陛下立極御人順時布政禮崇大蜡澤浹遐
藩臣叨祭日深竊位時久謬回宸眷猥降玉人天書
下臨覩三光之照耀玉曆爰授知四時之環周雕奩
既開珍藥斯見膏凝雪瑩含液騰芳頓光蒲柳之容
永去癘疵之患命輕恩重上荅何階無任感抃屏營
之至

謝墨詔表

臣某言中使陳日華至奉宣聖旨存問兼賜臣墨詔
又以臣所奏羅珣及裴靖政理有方今各賜手詔激

賞者恩降重霄澤流下土義存獎勸榮冠等夷臣昨
以羅珣裴靖勵精吏理效用著明人咸說安俗致殷
阜恐湏甄錄以勸在官輒獻封章具陳成績伏蒙宸
鑒俯亮愚衷載嘉理行之尤光示絲綸之深旨守道
者益以固志懷慝者由是悛心激俗化人於茲爲大
臣謬司廉問職在澄清幸遇旌善之時獲免蔽賢之
責無任欣感之至

論廢楚州營田表

臣某言中使曹進玉至奉宣聖旨存問兼賜臣墨詔
以楚州營田廢置事令臣商量奏來者跪奉天書恭

承廠旨道存致用義在隨時云云伏以本置營田是
求足食今則徒有糜費鮮逢順成刈獲所收無裨於
國用種糧每闕常假於供司較其利害宜廢已久比
來循守舊制不敢輕有上陳皇明鑒微特革斯弊取
其田蓄授彼黎蒸仍俾薄租誠爲至當但以田數雖
廣地方各殊須量沃瘠用立程度臣已追里正臣與
商量利便謹具別狀奏聞伏惟聖慮俯賜詳擇無任
震越屏營之至

請朝覲表

臣某言臣聞臣之事君有犯無隱懇誠所至敢不罄

陳伏惟聖明俯賜矜察云云臣代受國恩忝承門蔭
脫中筮仕敢期榮名陳力効官靡樹聲績始因孤直
驟歷清班復加朝獎作藩外府遠違輦下十有四年
恪守淮瀆逮今一紀犬馬懷戀寢興匪遑蒲柳易衰
遲莫俄及竊位時夕妨賢愧深况歷官已來四十八
考祇奉朝謁特纔二周服勤郡符荏苒垂老屏營魏
闕之思夢想承明之游如迫餒寒不忘衣食伏惟廠
鑒俯亮愚衷蚤賜擇人與臣交代授受之際冀無可
虞然後脂車奔赴京輦微願斯畢雖死猶生臣頃以
戎務方殷猥加宰輔今既事罷實慙此名爲有藩鎮

同時未敢輕上印綬伏以聖朝赫赫左右惟賢漢愧
得人周慙多士臣才略既短齒髮又衰柄用之地甘
心自絕所冀退歸舊里沐浴皇風絕鐘鳴漏盡之譏
展維桑與梓之敬匪惟名器不假實貴骸骨可全知
止之心神祇所鑒無任懇悃怔營之至

謝春衣表

臣某言中使陳日華至伏奉聖旨慰勞臣及將佐官
吏僧道耆壽百姓等并賜臣墨詔及春衣兩副大將
衣四副王人捧詔御府降衣寵光不隔於遐藩慶賜
猥沾於裨將臣素乏器能謬膺驅使每慙效薄常懼

食浮陛下覃以至仁均其厚施寧元和而布澤順時
律以頒衣出自禁中賁于臣下執領繪而抃舞失次
被纖柔而顧盼增輝舉體動容既安且吉在身不稱
恐招鷓翼之譏居位無功叨受鶴紋之賜下延將校
同荷生成

謝賜門戟表

臣某言臣得進奏官裴邁狀報本月九日軍器使樂
延壽奉宣進止付所司准省牒賜臣門戟十二竿者
恩降雲天榮加門戶承旨慶抃省躬慙惶伏以禮著
等威朝有命數是昭懋賞必在疇庸臣謬荷寵光素

無績效旌旄之寄已忝外藩榮戟爰列更光私第賁
于棖闈慶及子孫觀茲盛儀實愧虛受無任欣戴屏
營之至

謝男師損等官表

伏奉今月一日制授臣長男師損祕書省著作郎次
男式方太常寺主簿又得進奏官裴邁狀報伏承聖
恩特降中使送官告到臣宅分付師損者寵渥非常
授任不次驚躍無措覩懼失容云云臣謬分重寄獲
守外藩受恩既深無績可紀男師損等器惟凡品教
闕義方蚤沐敵慈已階官次每懷塵忝常戒滿盈豈

謂鴻霈曲覃大明私照寬臣尸素之責念臣葵藿之
誠下延胤息叨踐班級天書出禁中貴臨門榮冠等
夷慶流宗族况著作乃論撰之地唯才史是居太常
實禮樂之司非儒者勿履顧茲庸昧忽此超昇內省
慙惶若墜冰谷伏以聖朝立制建官惟賢名實無乖
輪轅盡適微臣父子獨為幸人非據踰涯自中徂外
虛受立山之賜實增負乘之憂進退彷徨不知所據
無任戰汗屏營之至

謝端午日賜物表

臣某言中使劉光弼至奉旨聖旨慰勞臣及將佐官

吏僧道耆壽百姓等兼賜臣墨詔并衣一副金花銀
器三事綵絲一軸大將衣四副綵絲五軸寵光荐至
慶賜曲霑抃舞失容捧戴無力伏以朱明仲月端午
佳辰萬國被薰風之和九天垂湛露之澤臣幸逢休
運獲守外藩叨承敵慈猥受榮賚發詔而煥窺宸象
振衣而頓失炎威色絲表祥戴光於佩服玩器充玩
盡飾於方圓恩輝既盈喜懼交集下延被將共荷鴻
私無任感戴之至

謝墨詔表

臣某言中使陳日華至奉宣聖旨慰勞臣及將佐官

吏僧道耆壽百姓等兼賜臣墨詔恩降紫泥澤流下
土跪奉自天之命遙馳捧日之心云云伏以皇帝陛
下凝旒穆清軫念黎獻已洽雍熙之化尚存宵旰之
勤遠降王人特迂宸翰慰安稠疊曉諭便藩任重力
微不知上谷應緣戎旅庶務謹具別狀奏聞伏乞皇
明俯賜照鑒無任感戴屏營之至

劉賓客文集卷第十三 表章三

爲杜司徒讓度支等使表

爲杜司徒謝追贈表

爲杜司徒讓立去思碑表

爲李尹賀獻懿二祖表

爲京兆韋尹賀雨止表

爲韋尹賀祈晴獲應表

爲韋尹謝許折糶表

爲韋尹賀元日祥雪表

爲韋尹賀春雪表

為京兆李尹賀雨表

為李中丞謝紫雪等表

為李中丞謝鍾馗等表

為杜相公謝鍾馗等表

為武中丞謝新茶表

為武中丞謝春衣表

為武中丞再謝新茶表

為武中丞謝新橘表

為武中丞謝柑子表

為武中丞謝冬衣表

杜司徒讓度支鹽鐵等使表

臣某言伏奉制書授臣檢校司徒同中書門下平章
事充度支及諸道鹽鐵轉運等使者臣久塵高位尸
素已多更受新恩滿盈為懼云云伏惟皇帝陛下紹
登寶位光纂鴻猷擢用之間華夷聳聽况利權所在
宜適變通國計是資須明輕重當至化鼎新之日是
微臣遲莫之年將何以上副宸衷下成庶務進退惟
谷冰炭在懷輒罄愚誠冀回天監陳力無補靡遵周
任之言循涯若驚敢飾范宣之讓慙惶踟躕倍萬常
情謹奉表陳讓以聞

杜司徒謝追贈表

臣某言伏奉制書褒贈臣亡父先臣某官尚書左僕射者時逢需澤禮極徽章云云臣家受國恩至臣累葉常惧不克負荷以忝前人豈意多幸遭逢猥居高位陛下應乾御極作解庇人恩浹寰區禮成宗廟垂仁布德自葉流根紫書忽降于重霄密印榮加于厚夜星霜增感蒸嘗有輝非臣殞越所能上報無任感咽屏營之至

杜司徒讓淮南立去思碑表

臣某言伏見淮南節度使王鏐所奏當道將吏僧道者壽等請為臣立去思碑伏奉聖旨允其所奏臣內惟菲薄聲績無聞祇荷恩私慙懼交至云云臣伏蒙先朝過獎累典方隅頃鎮江都十有四載數周星紀水旱備經境接淮瀆兵戈時起至於邑里粗免流離非臣所能悉稟聖化在唐堯可封之日奚假吏師當漢宣責實之時皆承認旨王鏐與臣交代輒有上聞况以去思為名慙無可紀之績伏以建碑有制甲令垂文苟非至公翻益貽誚臣伏覽故事宋璟自廣州都督入為尚書南海之人請刊樂石璟自遜讓至于再三雖勒其文竟從降制著在國典垂為美談璟非

苟榮人益見德臣才誠不逮心實慕之伏乞聖慈賜
寢前命臣情非飾讓義在徇公云云

京兆李尹賀遷獻懿二祖表

臣某言伏見詔書以今月某日奉遷獻祖懿祖神主
祔于德明興聖皇帝廟盛禮云畢宗祧永安云伏
以太祖景皇帝膺期撫運啓封于唐爲百代不遷之
宗開三靈眷命之兆頃以本朝初建清廟備儀二祖
冠西室之光景皇闕東向之位諸儒獻議歷載未行
陛下濬發叡謨旁延正論爰詔多士會於中臺酌三
禮之前文參百王之故事講貫斯定詢謀僉同撰日

展儀考祥視履配貴神於遠祖正尊位于始封廟貌
有嚴禘嘗允穆示人以孝得禮之中既觀秩秩之容
必降穰穰之福臣職居內史屬忝本枝躬導盛儀獲
申誠敬無任感說屏營之至

京兆韋尹賀雨止表

夏卿

臣某言今月某日中使吳文政奉宣聖旨緣今年雨
多恐傷苗稼諸有靈跡處並宜祈禱者臣謹檢尋祀
典方議徧祠惟德動天倏已澄霽伏以至教惠農兆
人務本今歲宿麥茂于常年爰自季春遂逢多雨蓋
陰陽常数有以推遷而隴畝之間未聞傷敗陛下勞

謙思切覆育恩深或慮成灾先期軫念昭薦未陳于
方社獻誠已格于上玄文明煥開陰曠潛掃有年之
慶實兆于茲辰先天不違實超于前代臣謬司京邑
虔撫烝黎欣抃之誠倍百群品無任踴躍屏營之至

京兆韋尹賀祈晴獲應表

臣某言今月十七日中使某奉宣聖旨以霖雨未時
諸有靈跡並令祈禱者臣當時于興聖寺竹林神親
自祈祝兼差官城外分路徧祠伏以神祇效靈景物
澄霽兆庶覩動天之德大田俟多稼之期臣謬荷恩
輝忝司京邑抃說之至實倍常情

京兆韋尹謝許折糴表

臣某言伏奉詔旨以臣所請畿內折糴宜令度支計
會定數奏來者天慈廣被人瘼是求臣自理京邑不
先威刑唯務便安所期富庶每因試對常奉德音府
縣之間巨細令奏伏以聖明在上風雨應時順成之
年穀糴常賤若無輕重之法必利兼并之家輒敢上
聞請行折糴天光下燭幽隱無遺宜付所司允臣所
奏事關理本惠及生靈臣忝尹京倍百欣荷無任歡
躍屏營之至

京兆韋尹賀元日祥雪表

臣某言伏以去冬以來久無雨雪臣每於內殿親奉
德音以宿麥未滋爲虞以兆人生疾爲念聖情所屬
神理皆通獻歲發春佳雪肇降當夷夏會同之日觀
天人合應之徵迎喜氣于三元浹歡心於萬國癘疵
永息豐阜可期臣以疾疹未平步趨有阻伏蒙恩貸
已具奏聞謹於光宅寺中管當本務不獲隨例稱慶
明庭既覩嘉祥益彰聖德無任欣躍屏營之至

京兆韋尹賀春雪表

臣某言伏奉詔旨充某郡主禮命賜使謝恩之日親
承德音以春初已來雨雪猶少慮妨農事省軫睿慈

今當下嫁之辰克致上玄之感雲生河漢及佳期而
降祥雪滿寰區應豐年而呈瑞臣官當撫字職在肅
雍慶抃之誠實倍常品

京兆李尹賀雨表

臣某言伏奉進旨以時雨愆候有妨耕農應諸有靈
跡處並令祈請者德音才發膏雨驟飛滂霈已周動
植咸說云伏以久愆時澤上軫聖慈爰命禱祈俾
申誠敬神應如響天且不違未興雲漢之詩已致桑
林之雨臣謬司京邑虔撫黎蒸覩豐年之可期同比
屋而稱慶無任欣抃之至

李中丞謝賜紫雪面脂等表

臣某言中使某乙至奉宣聖旨賜臣紫雪紅雪面脂口脂各一合深豆一袋特降王人俯臨私第銜恩慶抃省已慙惶云云臣謬荷寵私素無績效空變霜星之候猥霑慶賜之恩跪捧離奩榮視珍藥功能去疾永絕於癘疵澤可飾容頓光于蒲柳生成是荷雨露難酬無任感戴

李中丞謝鍾馗曆日表

臣某言中使某乙至奉宣聖旨賜臣畫鍾馗一新曆日一軸恩降雲霄先生里巷雖當歲莫如照朝和云云

伏以將慶新年聿循故事續其神象表去癘之方頌以曆書敬授時之始微臣何幸天意不遺無任感戴屏營之至

杜相公謝鍾馗曆日表

臣某言高品某乙至奉宣聖旨賜臣鍾馗一新曆日一軸星紀方回雖逢歲盡恩輝忽降已覺春來云云伏以圖寫威神祛除羣癘頒行律曆敬授四時施張有嚴既增門戶之貴動用協吉常為掌握之珍瞻仰披尋皆知聖澤無任欣戴之至貞元二十一年十二

月日

武中丞相謝新茶表

元衡

臣某言中使竇國安奉宣聖旨賜新茶一斤猥降王人光臨私室恭承慶賜跪啓緘封云伏以方隅入貢採擷至珍自遠爰來以新為貴捧而觀妙飲以滌煩顧蘭露而慙芳豈蔗漿而齊味既榮凡口培切丹心無任歡躍感恩之至貞元二十年三月日

武中丞謝春衣表

臣某言中使某乙奉宣聖旨賜臣春衣一副王人臨第御府降衣抃舞失容捧戴無措云伏以律當春莫慶洽時邕万物被薰風之和九天垂湛露之澤受

任非次速尤是虞方懷匪服之憂更荷解衣之賜恩加畫飾拖朱紫而為榮受非以庸顧形影而增愧丹誠徒罄玄造難酬無任踴躍屏營之至

武中丞再謝新茶表

臣某言中使某乙奉宣聖旨賜臣新茶一斤猥沐深恩再沾殊錫承旨慶抃有躬慙惶伏以貢自外方珍殊衆品效參藥石芳越椒蘭出自仙廚俯頒私室義同推食空荷于曲成責在素餐實慙于虛受

武中丞謝新橘表

臣某言中使某乙至奉宣聖旨賜臣新橘若干顆持

降恩光猥頒慶賜珍瑜百果榮比兼金伏以丹實初
成芑貢爰至芬馨味重方列于御筵雨露恩深忽霑
于賤品感同推食事等絕甘豈惟適口爲珍實冀捐
軀上荅

武中丞謝柑子表

臣某言中使某乙至奉宣聖旨賜臣柑子若干顆特
降殊私再頒名果自遠稱貴以新爲榮伏以方貢外
來人間未覩黃芑輝穎彫俎增華芬芳初佐于大庖
慶賜遂沾于凡口甘踰萍實剖食既同于楚謠寒比
蔗漿析醒何慙于漢史感恩思效倍百常情

武中丞謝冬衣表

臣某言中使某乙至奉宣聖旨賜臣冬衣一副恩降
重霄榮加陋質承旨慶抃省躬慙惶臣受任已來微
效莫著每更時律慙曠官常宜謂玄造曲成鴻私荐
及念茲戒寒之候錫以禦冬之衣抃舞失容顧眄增
飾鶴文是錫遠慙晉代之賢鷄翼不濡實惧曹風之
刺無任感戴屏營之至

劉賓客文集卷第十四 表章四 牋附

爲竇中丞謝上表 謝中使送上表

賀收蔡州表 賀赦表

賀赦牋 賀雪鎮州表

賀平淄青表 夔州謝上表

賀冊皇太子表 慰國哀表

賀龍飛表 賀皇太子牋

賀赦表 賀冊太皇太后表

賀冊皇太后表 和州謝上表

賀改元赦表 夔州論利害表二首

為容州實中丞謝上表

時在朗州相逢因以見托

臣某言伏奉某月日制書授臣容州刺史兼御史中丞充本管經畧招討等使臣發開州日已差某官某乙奉表陳謝伏以道途遐阻水陸縈紆臣以今月某日到本任上訖謹宣聖旨慰諭遠人臣本書生素無吏術頃因多幸責自立園累沐聖慈驟居清貴識昧通變動乖事宜愧無善狀以塞公責伏惟獻聖文武皇帝陛下凝宸穆清洞照寰海推共理之義分寄股肱念蒸人之勤溥沾遐迩察臣前任事實恕臣本性朴愚賜以恩輝拔于廢棄遠辭偏郡重委方隅捧印

綬以為榮望闕庭而增戀雖到官之始惠未及人而率下之誠務先克己凡施政教皆稟詔條參以土宜遂其物性可行必守有弊必除便蠻夷生梗之風慕臣子盡忠之道力誠不足心實在茲伏乞聖明俯賜照鑒無任感戴屏營之至

謝中使送上表

臣某言中使吐突仕曉至奉宣聖旨慰諭并送臣至本任者深山遠郡忽降王人跪受恩榮仰瞻宸極伏以發自巴峽至于南荒涉水陸湍險之途當炎夏鬱蒸之候山川縈轉晨夜奔馳幸無他疾得至本管九

重結戀遙頃捧日之心万里獲安皆荷自天之祐無
任感戴屏營之至

賀收蔡州表

臣某言伏見詔書以唐州節度使李勣生擒逆賊吳
元濟獻俘文武百僚於興安門列班稱賀者天威遠
被元惡就誅一方既平万国咸慶伏惟獻聖文武皇
帝陛下德超邃古道合上玄臨御以來天人協贊削
平吳蜀掃蕩塞垣車書大同夷狄來貢蕞尔元濟敢
懷野心輒聚犬羊苟偷時月陛下聖謨獨運敵感潛
通天助神兵人生勇氣既擒兇逆遂正刑書伏三紀

之逋誅成九衢之壯觀宗社昭告華夷式瞻行帛伐
而在礼無違烜威聲而何城不克楚氛改色淮水安
流漢上疲人盡霑雨露汝南遺老重覩昇平凡在具
臣孰不欣抃臣久辭朝列恭守遐藩不獲稱慶闕庭
陳露丹悃仰瞻宸極倍万群情無任踴躍慶快之至
元和十二年十二月二十三日

賀赦表 連州

臣某言伏奉今月一日制書大赦天下者聖德廣運
浹于華夷天光下臨照被幽蟄伏惟獻聖文武皇帝
陛下神扶寶祚天贊鴻猷意有所之事無不克當淮

右凱旋之後是域中慶幸之時順陽和以發生施需
澤於寰海網開三面危疑者許以自新耳達四聰瑕
累者期於再錄求碩膚於庶位慮遺材於放臣旌志
烈之家賞勲庸之流仁及枯骨無隔於寇戎榮加顯
親普沾於存沒恤刑已責實廩蠲徭頒錫彰有容之
詩崇儒協宗子之望岳瀆成秩耆艾飲和大僚承任
子之恩武旅荷賜金之寵斯皆禹湯文武之遺美高
祖太宗之耿光集于聖朝然後大備德音所至和氣
隨之歡謠上徹於九天福祚永延於億載能使遠夷
屈膝豈惟小醜莘心率土人臣不勝大慶臣久辭闕

至
下恪守海隅犬馬之誠倍百常品無任抃躍屏營之

賀赦牋

使持節連州諸軍事守連州刺史劉某惶恐叩頭伏
見今月一日制書大赦天下者伏以獻歲布和皇恩
遠降乾坤交泰寰海廓清伏惟皇太子殿下道冠元
良德兼忠孝承顏拜慶榮耀古今某職守有限不獲
隨例稱賀宮庭無任欣說之至元和十三年

正月二十九日

賀雪鎮州表

臣某言伏見四月二十七日德音以王承宗效順著

明復其官爵所獻二郡別置藩垣聖德動天鴻恩及
物瑕累咸滌烝黎永安伏惟獻聖文武皇帝陛下自
承寶位克振皇綱既以四海為家每念一夫不獲昨
因大慶爰降殊私廣宥過之科開自新之路綸言一
發聖神潛通遂令詿誤之徒頓失憂危之慮命胤子
以入侍獻名都以效誠臣心既明天綱為解因析四
郡別為一方惟懷永圖盡去前弊大河以北化為禮
樂之鄉率土之濱重見昇平之日臣恪居官次遐守
嶺隅不獲稱慶闕庭無任踴躍屏營之至

賀平淄青表

臣某言伏見制書魏博節度使所奏逆賊李師道并
男二人並梟斬訖以二月十一日御皇政殿受賀者
聖德玄運兵威神速旬月之內鯨鯢就誅泰嶽既寧
登封有日伏惟獻聖文武皇帝陛下有征必克舉意
無違天地協神筭之期雷霆助成師之氣蠢尔孽孽
敢生野心蕭斧一臨妖氛自滅皆自聖慈廣被獻畧
潛通獻俘者盡許生還得地者復令安堵感我仁化
激其深哀凡是協從盡思效節五紀巢穴一朝蕩夷
遂使齊魯之鄉復歸仁壽之域捷書既至傳首繼米
備文物于明庭告殊勲于清廟百辟陳賀万方會同

從此止戈所以爲武西周士庶方觀飲至之容東嶽
烟雲已望告成之禮臣恪居遠服嘗忝班行慶快之
誠倍万群品無任踴躍屏營之至元和十四年三月
二十四日

夔州謝上表

臣某言伏奉某月日制書授臣使持節都督夔州諸
軍事守夔州刺史跪受天詔神魂震驚伏惟文武孝
德皇帝陛下垂衣穆清敷鑑旁達三統交泰百神降
祥決于華夷盡致仁壽臣家本儒素業在藝文貞元
年中三忝科第德宗皇帝記其姓名知無黨援擢爲

御史在臺三載例遷省官權臣奏用分判錢穀竟坐
連累貶在遐藩先朝追還方念淹滯又遭讒嫉出牧
遠州家禍所鍾沈伏草土禮經有制羸疾僅存甘于
畎畝以樂里化伏遇陛下大明御宇照燭無私念以
殘生舉其彝典獲居善部伏感天慈臣即以今月二
日到任上訖峽水千里巴山万里空懷向日之心未
有朝天之路無任感恩戀闕之至長慶二年正月五
日

賀冊皇太子表

臣某言伏見制書以十二月二十日冊皇太子盛禮

斯畢德音遐宣萬國以負庶類咸說伏惟文武孝德
皇帝陛下躋元立極垂訓御時既闡王猷思安國本
前星位定拱宸極以昭彰蒼震氣宣與天地而長久
禮先七帝澤被華夷宗祏有無疆之休生靈懷莫大
之慶臣恪居官次遐守巴南不獲稱賀闕庭無任踴
躍屏營之至長慶三年正月日

慰國哀表

臣某言上天降大行皇帝奄棄萬國奉諱號擗糜
潰五情伏惟皇帝陛下孝思至性攀號罔極臣忝守
所部不獲陪位兩宮伏增感慕之至謹奉表陳慰以

聞長慶四年二月日

賀龍飛表

臣某言伏見詔書正月二十六日皇帝陛下嗣登寶
位萬國同歡日月繼明乾坤交泰伏惟皇帝陛下欽
承顧命惟懷永圖以大孝奉宗祧以至仁蘇品物洞
照寰海統和神人聖祚延長從今無極羣生鼓舞自
此大寧臣守遐藩恪居官次不獲奔馳拜舞稱賀闕
庭無任抃躍屏營之至長慶四年二月日

賀皇太子牋

使持節都督夔州刺史劉某叩頭伏惟皇太子殿下

祇膺詔冊光啓儲闡展至性于三朝承本枝于百代
宗祏永固神人以和四岳仰維嵩之高百川承少海
之潤某限以職守不獲隨例稱慶宮庭無任抃躍之
至

賀赦表

臣某言伏見今月三日制書大赦天下者大明初昇
万物咸覩漢汗一發神人以和伏惟皇帝陛下天資
叡聖神啓昌期端拱受萬國之朝承顏奉兩宮之慶
初嗣大位克揚孝心三光協明和氣來應臣伏讀赦
令首於奉園陵盡誠敬親九族蘇兆人次及定章程

止進獻已逋責滌夙瑕內照于九重則歸嬪嬙放鷹
犬外明於四日則求隱士開直聲柔遠以仁則還其
條虜賞延以禮則澤及後昆菲食遵夏禹之規弋緝
法漢文之儉墜典咸舉舊章再明昇平之期正在今
日發號之始疾于春風殊私所及霑若時雨臣幸逢
昌運歷事五朝出守遐藩僅垂二紀欣承雷雨作解
之澤不勝犬馬戀主之誠瞻望帝鄉無任屏營懇悃
之至長慶四年三月二十七日

賀冊太皇太后表

臣某言伏見制書以二月十八日冊立太皇太后徽

章克備慶賜遠行榮冠古今澤同寰海伏惟皇帝陛下
下續承列聖歡奉兩宮太皇太后含飴保和重光疊
慶漢儀盛于長信周祚興于太任方之聖朝彼有慙
德臣遠守巴峽不獲稱賀闕庭無任抃躍屏營之至
長慶四年三月日

賀冊皇太后表

臣某言伏見制書以二月二十五日冊立皇太后盛
礼畢陳德音遠被一人有慶万国同歡伏惟皇太后
稟靈作配誕聖表祥徽號極域中之尊慈仁為天下
之母陛下君臨有國于道無遠長樂宮中永獻南山

之壽躍龍門上再揚東漢之風率土臣子不勝歡抃
臣遠守荒服不獲稱慶闕庭無任踴躍屏營之至

和州謝上表

臣某言伏奉制書授臣使持節和州諸軍事守和州
刺史臣自理巴賔不聞善最恩私忽降慶抃失容伏
惟皇帝陛下丕承寶祚光闡鴻猷有漢武天人之姿
稟周成敵哲之德發言合古舉意通神委用得人動
植咸說理平之速從古無倫微臣何幸獲覩昌運臣
業在詞學蚤歲策名德宗尚文擢為御史出入中外
歷事五朝累承恩光三換符竹在分憂之寄祿秩非

輕而素蓄所長效用無日臣聞一物失所前王軫懷
今逢聖朝豈患無位臣即以今月二十六日到所任
上訖伏以地在江淮俗參吳楚災旱之後綏撫誠難
謹當奉宣皇恩慰彼黎庶久于其道冀使知方伏乞
聖慈俯賜照鑒臣遠守藩服不獲拜舞闕庭無任懇
悃屏營之至謹差當州軍事衙官章典奉表陳謝以
聞長慶四年十月二十六日

賀改元赦表

臣某言伏見今月七日制書大赦天下者帝遊出震
聖澤如春神人以和天地交泰伏惟皇帝陛下丕承

鴻業光闡徽圖吉日展嚴配之儀告天陳太平之盛
九廟成禮百神降祥鑿輅旋衡風雲改色殊私廣被
再弘莫大之恩寶曆惟新更啓無疆之祚兩宮承慶
四海永寧率土臣子上千万壽臣恪居官次不獲稱
賀闕庭無任屏營之至謹差當州軍事衙官試慈州
吉昌府別將徐倫奉表陳賀以聞寶曆元年二月十
六日

夔州論利害表

臣某言伏準元和十二年四月十八日赦敕諸州刺
史如有利害可言者不限時節任自上表聞奏者臣

伏見貞觀中詔許群臣各上書言利便馬周時一布衣遂因中郎將常何獻策二十餘事太宗深竒之盡行其言擢周爲御史至龍朔中壁州刺史鄧弘慶進平索看精四字堪爲酒令高宗嘉之亦行其言遷弘慶爲朗州刺史則知苟有所見雖布衣之賤遠守之微亦可施用况臣早受國恩德宗朝忝爲御史建令歷事四朝頻領藩條當陛下至明之時是微臣竭節之日伏以守在遐郡不敢廣有所陳謹準敕上利害及當州公務各具別狀以聞伏乞聖慈俯賜照鑒無任感激屏營之至謹差當州軍事衙官守易州安義

府別將員外置同正員雲騎尉馮隨謹奉表以聞長慶三年十一月七日

論利害表

臣某言伏準今年正月五日德音宜令諸道觀察使刺史各具當處利害附驛以聞者伏惟皇帝陛下睿哲自天纘成列聖善述先志發揚德音率土人臣不勝慶幸臣虔奉詔旨宣示烝黎伏以華夏不同土宜各異詳求利病謹具表奏聞伏乞聖慈俯賜照鑒臣伏覽國史竊見開元十八年朝集使至京玄宗臨軒親問利害時宣州刺史裴耀卿上便宜事論轉輸甚

詳竟不行下至二十二年耀卿爲京兆尹再以前事
奏論方見允納比及三年漕運七百万石省脚二十
餘萬貫當耀卿前見不納必有人非之及後數年方
展其效臣僻守遠郡敢望言行祇奉詔書或冀万一
伏惟明主擇之無任懇悃屏營之至長慶四年五月
十四日

劉賓客文集卷第十四

劉賓客文集卷第十五 表章五 戲附

爲裴相公賀冊魯王表

爲裴相公讓官第一表 并批荅

第二表 并批荅 第三表 并批荅

蘇州謝上表 蘇州謝賑貸表

蘇州賀冊皇太子表

賀冊皇太子戲

爲裴相公賀冊魯王表

臣某言伏見制書以今日冊魯王禮畢皇家有慶
寶祚無疆既祭本枝克固磐石伏惟皇帝陛下德符

列聖道冠前王孝敬承兩宮之歡虔恭奉九廟之祀
先崇大祀慶浹天人次念建封事兼家國伏以魯王
夙承睿訓特稟天姿爰擇吉辰光膺寵冊既示之以
君親之道又錫之以禮義之邦寰海聞風室家相慶
臣自嬰疾疹已歷旬時不獲展禮明庭拜舞稱賀

裴相公讓官第一表 并批荅

臣某言臣去冬得疾近日方劇西夕之景豈能久留
及其未亂披露誠懇臣犬馬之齒六十有七壽雖不
長亦不爲短位忝公台近十五年皆由際會非以才
進常惧官諂以招國刑今被病得死保其始終爲幸

甚厚豈復嗟咨所恨者遇聖明之君不得佐成太平
之化自量氣力忽恐奄然則有微素無階上達伏惟
聖慈照鑒憐而察之伏以三公非曠職之地宰相非
卧理之官伏枕之初已有陳乞請罷真食兼辭貴階
伏蒙優詔纔遂一事頻降中使慰勉再三專令御醫
旦夕診視苟安名器不覺經時主恩則深公議不可
伏思陛下臨御之始宰臣四人逮今零落忽已一半
臣且危懼餘年幾何唯易直外鎮獨得無恙竊惟此
理權位難居伏乞賜臣停官許在家養疾就閑辭祿
或冀有瘳害盈福謙固是神理儻天眷稠厚念以伏

事多年臣之所陳未蒙便遂則國朝勲舊以疾辭位者皆得致仕使其家居足以頤養既有成例著于舊章伏望天恩特賜哀允

省表具知夫爵位崇高以酬勲德君臣協契諒在始終斯乃前王之令圖有國之彝典也况御輔相睿祖逮于朕躬履歷四朝夷險一致服事君之大節推濟物之深誠道光朝倫行滿天下倚注之意豈同他人屬朕纂曆御乾興師伐叛騷動累歲端憂靡遑及河朔載寧郊土畢事方欲咨詢元老康靖生靈不虞寒暑所侵勤勞過疾雖國醫診視中

省臨憂屬之誠頃刻在念忽覽章奏退讓官榮雖知止之心則思避寵而謀猷之躄斯乃為時寢食之間勉加頤養其所陳乞非朕意焉

第二表 并批荅

臣某言臣所獻章表發於至誠伏奉批荅未蒙允許外負公責內迫私情祈於必遂敢守難奪臣束髮已來素號強力及其晚節亦未甚衰一朝被病遂至縣愒臣自思省得其端倪非飲食不節無有霧露之犯盖由才微而任重功薄而賞厚竊位既久妨賢則多以積年之過幸致今日之沈疾不能酌損所以生災

悟雖晚情實非矯伏惟陛下念其委使之久察其危
苦之詞特降深恩救臣不逮無冒榮之咎得遂性之
宜物議不形病心自泰思死俟命披肝再陳伏乞聖
慈俯賜容納無任迫切懇禱之至

省表具知御勲績崇高誠節忠蓋秉心一德宣力
四朝訏謨緝熙弼予于理勤勞事國啓沃匪躬功
格道光常所嘉尚所疾未瘳勉於善養勿藥之喜
佇即痊平台哀之司倚御爲重乃累陳退讓殊謂
不然宜躡朕懷即斷來表

第三表 并批荅

臣某言得疾踰年在假三月再有陳請未蒙允從慮
其奄忽銜愧入地伏惟聖慈哀而信之臣聞君之使
臣在知其心而聽其言不以容尸祿爲惠也臣之事
君在無隱情而盡忠節不以受非據爲榮也然後上
下交感終始可詠臣伏事陛下五年于茲葵藿微誠
已蒙識察桑榆暮景所冀哀憐豈今危俛之時更惧
滿盈之禍雖有藥石安能調和聖明難逢生涯漸短
躰羸無拜舞之望心在有涕戀之悲臣伏覽國史備
見前事太宗朝李靖高宗朝劉仁軌皆自宰臣乞骸
致政其後知猶可用復起于家進退之間曲盡情禮

君臣之際良史美談伏望陛下悉臣至誠念臣羸病
許遂願養以保餘年俟其有瘳或異万一無任懇款
違迫之至

省表具悉謝病之制雖起于昔賢盡瘁之詞亦標
於古典况御有功於國作相累朝自匡輔眇躬又
勤勞數載豈可以微疾去位以重望辭榮章疏徒
來延遲弥切至如太宗朝許李靖致政高宗朝遂
仁軌乞骸朕非不知事則有異何者時當明聖在
上理道已成宰臣優游固得自便今則生物尚困
工未脩言念勲賢方深倚注惟此故事恐難遽行

卿宜躅朕誠懷力更願養必有多福以扶大忠無
至確然復陳章表

蘇州謝上表

臣某言伏奉制書授臣使持節蘇州諸軍事守蘇州
刺史始從郎署出領郡章承命若驚省躬增感伏惟
皇帝陛下受上玄之眷佑揚列聖之耿光大康黎元
慎擇牧守德音每發品物咸蘇臣本書生素無黨援
謬以薄技三登文科德宗皇帝擢爲御史在臺三載
例轉省官永貞之初權臣領務遂奏錄用蓋聞虛名
唯守職業實無朋附竟坐飛語貶在遐藩憲宗皇帝

後知事情卻授刺史凡歷外任一十餘年伏遇陛下
應運重光物無廢滯收拾耆舊塵忝班行既幸逢時
常思展效在集賢院四換星霜集供御書二千餘卷
儒臣之分甘老於典墳優詔忽臨又委之符竹分憂
誠重戀闕滋深石室之書空留筆札金閨之籍已去
姓名本末可明申雪無路豈意 聖慈矜納不隔卑
微面辭之日特許升殿天顏咫尺臣禮兢惶不敢盡
言空懷誠懇承恩而出生光於九陌之間受訓而行
布政於五湖之外臣即以今月六日到任上訖伏以
水災之後物力索空臣謹宣皇風慰彼黎庶臣聞有

味之物蠹虫必生有才之人讒言必至事理如此古
今同途了然辨之唯在明聖伏惟陛下察臣此言則
天下之人無不幸甚江海遠地孤危小臣雖雨露之
恩幽遐必被而犬馬之戀親近為榮大和六年二月
六日

蘇州謝賑賜表

臣某言伏奉去年二月十五日敕蘇州宣賜米一十
二万石委刺史據戶均給者恩降九天澤流万姓伏
以臣當州去年災沴尤甚水潦雖退流庸尚多臣前
月到任奉宣聖旨闔境老幼無不涕零詢訪里閭備

知凋瘵方具事實使欲奏論聖慈憂人照燭幽遠特
有賑卹救其災荒蒼生荷再造之恩儉歲同有年之
慶臣忝爲長吏倍万常情無任感激抃躍之至大和
六年三月二十四日

蘇州賀冊皇太子表

臣某言伏奉制書以今月十日冊皇太子德音遐布
盛禮畢陳國本永安人心同慶伏惟皇帝陛下以繼
天之聖有知子之明義兼君親禮重宗祏龍樓肇建
展嘉禮於三朝鳳曆延長固本支於万葉臣守在遐
郡不獲稱慶闕庭無任踊躍屏營之至大和七年八

月十七日

蘇州賀冊皇太子牋

朝議大夫使持節蘇州諸軍事守蘇州刺史上柱國
劉某叩頭叩頭伏惟皇太子殿下允膺上嗣光啟東
朝蒼震發前星之輝黃離表重輪之瑞位居守器禮
重承祧万國以貞九圍咸說某限以守郡不獲稱慶
宮庭

劉賓客文集卷第十六 表章六

蘇州謝恩賜加章服表

蘇州賀皇帝疾愈表

汝州謝上表

同州謝上表

賀臯斬鄭注表

賀德音表

賀赦表

謝恩賜粟麥表

慰淄王薨表

謝恩放先貸斛斗表

謝分司東都表

蘇州謝恩賜加章服表

臣某言伏奉去年十一月二十七日詔書加臣賜紫金魚袋餘如故者恩降重霄榮沾陋質虛黷陟明之典恐興彼已之詩寵過若驚喜深生惧中謝臣起自書生業文入仕德宗朝為御史以孤直在臺順宗朝為郎官以緣累出省憲宗皇帝後知其寃特降敕書追赴京國緣有虛稱恐居清班務進者爭先上封者潛毀巧言易泛孤憤難申俄復一麾外轉三郡伏遇

陛下膺期御宇大振滯淹哀臣宿舊猥見收拾職兼書殿官忝儀曹微勞未宣薄命多故又離省署重領郡符延英面辭親承教誨銜命即路星言載馳到任之初便逢災疫奉宣聖澤恭守詔條上稟獻謀下求人瘼才術雖短憂勞則深俸免流離漸臻完復皆承聖化所及遂使人心獲安豈由微臣薄劣能致臣素乏親黨家本孤貧年哀無酒食之娛性拙無博奕之藝自領大郡又逢時災晝夜苦心寢食忘味曾經誣毀每事防虞惟托神明更无媒援豈期片善上達宸聽回日月之重光燭江湘之下國絲綸褒異苦節既

影印綬煒煌老容如少望雲天而拜舞豈盡丹誠視
環玦以裴回空嗟白首無任感激屏營之至大和七
年十二月十六日

蘇州賀皇帝疾愈表

臣某言臣得本道觀察使報伏承聖躬痊愈已於紫
宸殿視朝者一人有慶萬國同歡伏惟皇帝陛下外
親萬務內奉三宮常懷宵旰之勤遂失寢興之適上
玄降祐列聖表靈百神奔走以來扶四海精誠而致
感勿藥有喜如山永安宗廟保元疆之休寰瀛申莫
大之慶臣恪居官次遐守江干不獲稱賀闕庭无任

踴躍屏營之至

汝州謝上表

臣某言伏奉去年七月十四日詔書授臣使持節汝
州諸軍事守汝州刺史兼御史中丞充本道防禦使
餘如故者臣久居遠服戀闕常深忽降新恩近鄉爲
貴承旨慶抃省躬慙惶臣某誠歡誠喜頓首頓首伏
唯皇帝陛下垂衣穆清之中旁照寰瀛之內車書所
及動植咸安昨離班行遠守江徼延英辭日親奉德
音知臣所部災荒許臣到任條奏共承宸旨宣示群
黎減其征徭頒以賑賜伏蒙聖澤救此天災疲羸再

蘇幼艾同感二年連遭水潦百姓幸免流離交割之時戶口增長雖才術不至於事未周而憂勞則深爲衆所悉臣本業儒素頻登文科時命邇回再領軍郡即以今月二十七日到任上訖謹當奉宣皇化慰彼蒼生臨汝水之波朝宗尚阻望秦城之日回照何時无任感激屏營之至謹差防禦押衙韋礼簡奉表陳謝

同州謝上表

臣某言伏奉去年十月二十二日制書授臣使持節同州諸軍事守同州刺史兼御史中丞充本州防禦

長春宮等使恩降九重榮忝三輔承旨慶抃省躬慙惶臣某伏惟皇帝陛下丕承列聖光闡鴻猷氛祲掃除乾坤交泰臣幸逢昌運累沐殊私空荷生成之恩寧酬雨露之澤即以今月二日到本州上訖謹宣獻旨安慰蒸黎伏以本州四年以來連遭旱損閭閻瘵遠近共知臣頃任蘇州之年亦遭大水之後面辭之日親奉德音至於撫綏皆承聖教二年之後百姓獲安今本部災荒物力困涸忝爲長吏敢不竭誠即頒條疏續具聞奏臣恪居官次幸接王畿不獲拜舞彤庭陳露丹慙犬馬懷戀寢興匪寧瞻魏闕之容朝

天尚阻望長安之路近日爲禁无任感激屏營之至
謹差防禦知衙官試殿中監楊克文奉表陳謝大和
九年十二月二十一日

批答省表具知卿任居三輔職奉六條累聞問俗
之勞載覽勤人之志言惟願行深慰朕懷勉弘故
以副憂寄所謝知

賀梟斬鄭注表

臣某言伏奉前月二十五日詔書示逆賊鄭注已梟
首訖氛妖殄滅華夏又安伏以逆賊鄭注本出細微
潛懷梟獍之心兼結兇狂之黨人倫共棄神理不容

陛下敵畧感通天人合應重臣協力禁旅齊心指
顧之間猖狂自潰乾坤交泰日月增明凡在人臣不
勝慶伏臣恪居官次不獲稱賀闕庭无任欣歡忭躍
之至大和元年十二月二日

賀德音表

臣某言伏見今月十六日德音布告遐邇天道下濟
人情大安伏惟皇帝陛下凝旒思理垂衣擇材以日
月无私之光照寰區有截之內貴使下情盡達寧虞
厚貌潛謀一昨李訓鄭注等敢有逆心兼連兇黨陛
下叡謀神斷左右協同頃刻之間掃除已定重臣畢

力禁旅竭忠氣稷廓清華夷咸說言念正刑之外或有誑誤之徒再發德音廣宣聖澤當星紀回天之日迎陽和照物之光懷危疑者如山之安欲告訐者望風知懼非同謀者一切不問未結正者三宥從寬含生之倫普天同感臣恪居官次不獲稱賀闕庭云云謹差防禦知衙官朝議郎權知容州都督府司馬孫揚奉表

賀赦表

臣某言伏奉今月一日制書改大和十年為開成元年大赦天下者雷雨作解人神說隨澤及八荒網開

三面臣某誠歡誠喜頓首頓首伏惟皇帝陛下上承乾綱下立人極用含弘光大之澤副夷夏會同之心獻歲改元惟新景祚光明首罪次及羣妖述獻情以曉萬方施鴻霈以蘇庶物恤辜宥過已責弛征郡縣之舊弊悉除賦稅之新規咸備停藩方節獻之禮以惠疲人回權管餘羨之財以資京邑命使展澄清之志察言求謹直之材弓旌賁於丘園粟帛頒於耆艾爰以初告御于明庭德音一發於九天和氣驟周於四海開物成務實表於建元應天順人永延於億載臣幸居近輔先受殊恩不獲稱慶闕庭倍榮班次衆

星列位常拱北辰之光新歲拜章遙獻南山之壽无
任抃躍屏營之至

謝恩賜粟麥表

臣某言伏奉今月一日制書以臣當州連年歉旱時
放開成元年夏青苗錢并賜斛斛六萬石仰長吏逐
急濟用不得非時量有抽斂於百姓者恩降九天澤
周萬姓優詔纜下群情頓安臣某誠歡誠喜頓首頓
首伏以災殄流行陰陽常數物力既竭人心匪遙輒
敢奏聞本求貸借皇恩廣被玄造曲成既免在田之
征仍頒發廩之賜臣謹宣敕文節目彰示兆人鼓

舞歡謠自中徂外臣初到任所部使過儉時今蒙聖
慈特有賑恤主恩及物已爲壽域之人衆意感天有
必豐年之應臣恪居官業不獲拜舞闕庭无任感激
之至

慰淄王薨表

臣某言臣得進奏官楊暢狀報淄王薨輟朝三日伏
惟皇帝陛下德邁前王情深近屬憫枝葉之謝諒切
神哀割肌膚之愛何堪聖念萬方知化九族歸仁凡
受國恩伏深悽惻臣限以藩守不獲奉慰闕庭无任
屏營之至

謝恩放先貸斛斗表

臣某言臣奉五月二十九日敕牒據度支所奏諸道節度觀察使及州府借便省司錢物斛斗等數內當州欠三萬六千二十三貫石並放免者殊私忽降逋責滌除藩方永安遐邇咸說臣某誠歡誠喜頓首頓首伏以關輔之間頻年歉旱田租既須於放公用又不支持承前長吏例有借便以救一時之急皆積欠之名既未支填常懷憂懼聖恩周洽洞見物情爰命有司使之條奏去其舊弊衆已獲安嚴立新規人知所措臣恪居官次不獲拜舞闕庭元任抃躍屏營

之至

謝分司表

臣某言伏奉今月十九日制書授臣太子賓客分司東都者寵命自天戰越無地臣發迹書生以文為業出身入仕四十餘年頃自集賢學士出守吳郡面辭之日親承德音念百姓水潦之餘示微臣政理之法臣祇膺聖旨夙夜竭誠閭里獲安流庸盡復猥蒙朝獎錫以金章及遷同州又遇歉旱悉心綏撫幸免流離今荷天慈憫臣耆舊列名賓護之職分局河洛之都老馬沾束帛之恩枯株蒙雨露之澤獲居榮秩以

畢餘年顧此微軀實為厚幸伏以臣始為御史逮事
德宗今忝官寮幸逢聖日舉四海之內賢能則多求
六朝之臣零落將盡雖迫桑榆之景猶傾葵藿之心
臣无任感恩惕抃之至

劉賓客文集卷第十六

劉賓客文集卷第十七狀

為淮南杜相公論新羅請廣利方狀

為京兆韋尹降誕日進衣狀

為京兆李尹降誕日進衣狀

為京兆韋尹進野豬狀

為杜相公自淮南追入長安至長樂駟謝賜酒

為杜相公謝就宅賜食狀

為東都韋留守謝賜食狀

為裴相公進東封圖狀

舉崔監察羣自代狀

舉開州柳使君公綽自代狀

舉姜補闕倫自代狀

蘇州舉揚子韋中丞自代狀

蘇州上後謝宰相狀

蘇州加章服謝宰相狀

汝州上後謝宰相狀

汝州舉杭州裴大夫自代狀

汝州進鷹狀

同州舉蕭諫議自代狀

上宰相賀德音狀

上宰相賀改元赦書狀

薦處士嚴忌狀

薦處士王龜狀

爲淮南杜相公論新羅請廣利方狀

淮南節度觀察處置等使敕賜貞元廣利方五卷右
臣得新羅賀正使朴如言狀稱請前件方一部將歸
本國者伏以纂集神効出自聖衷藥必易求疾元隱
狀搜方伎之祕要拯生靈之夭瘥坐比華胥咸躋仁
壽遂令絕域遐聽風聲美茲豐功爰有誠請臣以其
久稱藩附素混車書航海獻琛既已通於華禮釋疴

蜀瀛豈獨隔於外區正當四海為家冀覩十全之效
臣即欲寫付未敢自專謹錄奏聞

為京兆韋尹降誕日進衣狀

衣一副四事黃折造衫一領白吳綾汗衫一領白花
羅半臂一領白花羅袴一腰右伏以正陽令月誕聖
嘉辰運協千年慶流萬國凡在臣子合有獻陳敢頌
就日之心願奉如山之壽輕瀆宸扆元任兢惶

為京兆李尹降誕日進衣狀

衣一副四事右伏以水德方清真龍下降天長地久
瞻北極以常尊獻壽稱觴配南山而永固臣地居宗

屬職忝尹京慶賀之誠倍萬常品前件衣服謹詣銀
臺門奉進輕瀆旒扆伏用兢惶貞元十九年四月十

九日

為京兆韋尹進野猪狀

右伏以收獲之餘田獵有獲異於翁豢著在方書既
堪充庖輒敢上獻前件野猪謹隨狀進謹奏

為杜相公自淮南進入長安至長樂驛謝賜

酒食狀

具官臣某右臣今日至長樂驛高品某奉宣聖旨賜
臣酒食者伏以恩降王人榮分御膳未展儀于雙闕

先受賜於八珍品越膳味香醪醴頓驚凡口倍益
歡心无任欣躍

爲杜相公謝就宅賜食狀

具官臣某右高品某奉宣聖旨賜臣食者出自太官
飲於私第光榮曲被猥承推食之恩駕蹇未施益重
素餐之責舉其七筮若負山丘无任戰荷躍踴之至

爲東都韋留守謝賜食狀

具官臣某右臣食今日發至長樂驛中使某奉宣聖
旨賜臣食者伏以味兼海陸品溢圓方降自御厨光
臨傳舍臣初辭魏闕倍懷犬馬之誠猥受珍羞 更

切稻梁之感无任欣躍

爲裴相公進東封圖狀

集賢殿御書院開元東封圖一面右臣謹按開元十
三年玄宗皇帝以天下太平登封東岳聲名文物振
耀古今伏惟陛下丕承耿光再闡鴻業祖宗盛事紹
復有期臣所以寫成此圖輒敢上獻至於繪畫躬自
指揮徵史氏之文纂礼容之要山川氣象悉擬真形
羽衛威儀盛稽故實所異處情一覽遐想玄踪臣叨
榮過深抱疾已久望陛下告成之日心必前知嗟老
臣將謝之年身恐不見疲羸之際感激倍深右件圖

謹美某官某謹詣光順門上進謹奏

舉崔監察羣自代狀

御史臺宣歙池等州都團練判官監察御史裏行崔羣右臣蒙恩授監察御史伏準建中元年正月五日制常參官上後三日舉一人自代者伏以前件官在諸生中號爲國器執維外府人咸惜之臣既深知敢舉自代貞元十九年閏十月日

舉開州柳使君公綽自代狀

尚書屯田某官等守開州刺史柳公綽右臣蒙恩授尚書屯田員外郎伏準建中元年正月五日制常參

官上後三日舉一人自代者伏以前件官以賢良方正再敷王庭在流輩間號爲端士昨除遠郡人皆惜之臣初蒙授官得以論荐多士之內非無其人竊惟用材宜自遠始謹具如前謹錄奏聞伏聽勅旨貞元二十一年四月八日

舉姜補闕倫自代狀

東都尚書省前左補闕姜倫右臣蒙恩授尚書主客郎中分司東都伏準建中元年正月五日敕常參官上後三日舉一人自代者臣伏詳詔旨欲達聰旁求發揚幽遠故人得言所知不當循其階次也臣伏

以前件官有儒學士行蒙以諫官徵會其年老被疾不堪上道有司按視如狀不復逼迫至今居家而篤志無倦臣謹舉郎吏分司別都庶優賢振滯兩得其道大和元年六月十四日

蘇州舉韋中丞自代狀

蘇州狀上中書門下諸道鹽鐵轉運江淮留後朝議郎守太僕少卿兼御史中丞上柱國賜紫金魚袋韋應物右臣蒙恩授蘇州刺史伏準建中元年正月五日制刺史上後舉一人自代者前件官歷掌劇務皆有美名執心不回臨事能斷今預職雖重本官尚輕

伏以當州口賦首出諸郡况經災沴切在撫綏尚省無能輒承公舉司權筦之利誠藉時才流豈第之風實惟邦本非承臆說以塞詔書今具聞奏大和六年十二月九日

蘇州上後謝宰相狀

朝議大夫使持節蘇州諸軍事守蘇州刺史上柱國劉某右某今月六日到州上訖某山東一書生潦倒踈濶在少壯日猶不逮人况今衰遲智力愈短相公哀憐不過擢授名邦實為弘獎慙非器使伏以當州由大寢之後物力蕭然飢寒殞仆相枕于野誓當悉

心條理續具奏論才術素空憂勞方始惧无聞問忝
負恩知不任瞻望懇迫之至

蘇州加章服謝宰相狀

右某素乏吏才謬居劇郡以无庸之器當難治之時
恭守詔條勤求人瘼伏以聖德柔遠皇明燭幽凡有
上陳皆可其奏遂令管見得及疲黎自承雨露之恩
非有循良之政猥蒙朝獎特降命章顧逢掖之腐儒
被華章之貴服有瀆陟明之典誠招彼已之訛限以
守官不獲拜謝瞻望榮感心魂載馳大和七年十二
月日

汝州上後謝宰相狀

朝議大夫使持節汝州諸軍事守汝州刺史兼御史
中丞充本州防禦使上柱國賜紫金魚袋劉某右某
自領吳郡仍歲天災上稟詔條下求人瘼地苞數澤
俗尚剽輕悉心撫綏用法擒擿事繁才短常積憂虞
忽蒙天恩稍移近郡家本榮上籍占洛陽病辭江干
老見鄉樹榮感之至實倍常情印綬所拘不獲拜謝
瞻望德宇精誠坐馳无任感戀之至

汝州舉裴大夫自代狀

正議大夫使持節杭州諸軍事守杭州刺史上柱國

賜紫金魚袋裴弘泰右臣蒙恩授汝州刺史兼御史中丞充本州防禦使伏準建中元年正月五日敕諸州刺史上後舉一人自代者伏以前件官前為九卿出領兩鎮頃因微累遂有左遷今授遠州物情未塞臣前任鄰接具知公才舊屈未伸輒舉自代云云

汝州進鷹狀

汝州防禦使當使進奉籠母鷹六聯右伏以前件鷹等學習應期馴養斯至獻于常貢有異衆禽受絀之時志已存于雲外下韝之際思用展于霜前既懷百中之能愿獻三驅之礼謹差防禦押衙景再休隨狀

奉進以聞大和九年九月十一日

同州舉蕭諫議自代狀

同州防禦使前諫議大夫蕭倣右臣蒙恩授同州刺史兼御史中丞充本州防禦長春宮等使伏準貞元二年正月二十四日敕上後三日舉一人自代者伏以前件官生于貴族伏膺儒門播紳之間號為端士前蒙朝獎冠于諫垣時方被病不果上道長告已滿塊然家居今聞疾瘳可以効用臣與倣久同班列悉其材能為官擇人敢舉自代大和九年十二月四日

上宰相賀德音狀

同州狀上中書門下今月十六日德音右被刑部牒
宣示德音伏以聖澤滋深就恩廣被言念正刑之外
或有誑誤之徒爰降殊私特弘在宥瑕累咸滌危疑
獲安此皆廟算弼諧致君及物事光前史功格上玄
某限以守官不獲隨例拜賀无任抃躍之至大和九
年十二月二十三日

上宰相賀改元赦書狀

同州狀上中書門下改元赦見右伏奉今月一日制
書改大和十年爲開成元年大赦天下者伏以律首
三元礼崇四始順陽和發生之德敷大號渙汗之恩

宥過恤刑施征已責盡去人瘼通知物情德音朝發
於九天和氣夕周於四海此皆相公弼諧之道燮贊
之功進熟於密勿之間發揚成滂沛之澤某恪守官
業印綬所拘不獲隨例拜賀

薦處士嚴恣狀

處士嚴恣左右庶子損之之孫國子司業士元之子
舊名保嗣亦有官班頃者李賓客渤常與之游辟爲
桂州支使其後寄家汝海專靜自居某常典汝州與
語甚熟歷代史及國朝故事悉能說通搃心甚危觀
跡相副未逢知己已過壯年汨沒風塵有足悲者伏

見赦文節目委州郡長史披訪隱淪夫舉无他惟善
所在每覽殊英卷後列學士姓名有常州人符鳳白
衣在選取其藝業不棄遠人某忝被儒官得以荐士
亦非出位冀不廢言儻弘文集賢史氏之館採其實
學有勸諸生伏以桂州辟之於前某荐之於後豈必
有土長吏然後事行伏惟相公試味斯言降意詳擇
謹狀

荐處士王龜狀

處士王龜古者選公族大夫必以博惠者教之文敏
者道之果敢者諗之鎮靜者循之孜孜于此者蓋膏

梁之性難正而惧公侯之胤不能嗣其耿光可以深
惜然則成宣之後而老為大夫非恥乎此智武子誠
文子既冠而見之詞也是知古之取士不專寒族必
參用世胄以廣得人之路今見處士王龜即居守之
第三子也天性貞靜操心甚危不由門資誓志自立
樂處士之號不汨綺襦之間自到洛都便居山寺耽
玩墳籍放情烟霞曾邀與語如鋸木屑信有稟受居
然出羣以比在京師甚足知者諫院有狀名流亟言
某流滯周南靜閱時輩身雖不用心甚愛才况遇相
公持衡敢有所啓誠懸之下輕重難欺伏惟深賜詳

擇知御族之內有遺逸焉謹狀正議大夫檢校禮部
尚書兼太子賓客分司東都劉某狀

劉賓客文集卷第十七

劉賓客文集卷第十八

上杜司徒啓
上淮南李相公啓

上門下武相公啓

上中書李相公啓

謝門下武相公啓

謝中書張相公啓

賀門下裴相公啓

上門下裴相公啓

賀門下李相公啓

自西川入爲大夫拜相

上僕射李相公啓

謝裴相公啓

謝竇相公啓

上杜司徒啓

某啓一自謫居七悲秋氣越聲長苦听者誰哀湯網
雖踈久而猶註失意多病哀不待年心如寒灰頭有
白髮惕厲之日利於退藏是以彌年不敢奏記近本
州徐使君至奉手書一函稱謂不移問訊加劇重復
點竄一无容言忽疑此身猶在門下收紙長想欣然
感生尋省遭罹萬重不幸方寸之地自不能言求人
見諒豈復容易伏蒙遠示且曰浮謗漸消况承慶宥

期以振刷方今聖賢合德朝野多歡澤柔異類仁及
行葦萬族咸說獨為窮人四時平分未變寒谷自同
類牽復又已三年側聞衆情或以哀歎某材畧无取
廢錮是宜若非舊恩孰肯留念六翮方鍛思重託于
扶搖孤桐半焦冀見收于灰燼伏紙流涕不知所言
謹啓

上淮南李相公啓

某啓某間以昧于周身措足危地駭機一發浮謗如
川巧言竒中别白无路祝網之日漏恩者三咋舌競
魂分終裔寰豈意天未勦絕仁人登庸施一陽于剝

極之際援衆溺於坎深之下南箕播物不勝昌言危
心鍛翻繇是自保陰施之德已然乃聞受恩罔人盟
以死荅私感竊抃積於窮年化權禮絕孤志莫展今
幸伍中牽復司存宇下伏慮因是記其姓名謹獻詩
二篇敢聞左右古之所以導下情而通比興者必文
其言以表之雖貶謫俚旨可儼風什伏惟降意詳擇
斯大幸也謹因楊子程留後行謹奉啓不宣謹啓

上門下武相公啓

某啓去年本州吏人自蜀還復伏奉示問兼賜衣服
繒綵等雲水路遙緘滕貺厚恭承惠下之旨重以念

舊之懷熙如陽和列在緗簡苦心多感危涕自零驚
神驛思若待穎杖伏以聖上注意理本銳求國楨念
外臺報政之功追宣室前席之事重下丹詔再昇黃
樞羣情合符和氣來應八柄所在三人同心協台坐
之精應傑材之數談笑於規隨之際從容于陶冶之
間物皆由儀人識所措某久罹憲網兀若枯株當萬
類咸說之辰抱窮途終慟之苦清朝无絳灌之列至
理絕椒蘭之嫌此時不遇可以言命嗟乎一身主祀
萬理望粉榆之鄉高堂有親九年居蠻貊之地從坐
之典固有等差同類之中又尋牽復頃在臺日獲奉

準繩指吏途於按讞道文律於章奏藻鑑之下難逃
陋容炎涼載移足見真態自違間左右沈淪避荒歲
月滋深艱真彌厲緬思受譴之始他人不知屬山園
事繁孱懦力竭本使有內嬖之吏供有司恃寵之臣
言涉猜嫌動礙闕東城杜之勢函矢紛然彌縫其間
崎嶇備盡始慮罪因事闕寧虞謗迹生智乏周身
又誰咎也伏以趙國公頃承一顧之重高邑公夙荷
見知之深雖提挈不忘而顯白無自蓋以永貞之際
皆在外方雖得傳聞莫詳本末特哀黨錮亟形話言
自前歲振淹命行中止或聞輿論亦愍重傷伏遇相

公秉鈞輒已自賀儻重言一發清議攸同使聖朝无
錮人大治無廢物自新之路既廣好生之德遠彰羣
蟄應南山之雷窮鱗得西江之水指顧之內生成可
期伏惟發膚寸之陰成彌天之澤回一瞬之念致再
造之恩誠无補於多事之時庶有助於陰施之德无
任懇悃之至謹啓

上中書李相公啓

某啓去年國子主簿楊歸厚致書相慶伏承相公言
及廢錮愍色甚深哀仲翔之久謫恕元直之方寸思
振淹之道廣錫類之人遠聆一言如受華衮伏自不

窺牆仞九年于茲高卑邈殊禮數懸絕雖身居廢地
而心恃至公伏以相公久以訐謨參于宥密材既為
時而出道以得君而亨令發於流水之源化行猶偃
草之易習強仇者自納于軌物困杼軸者咸躋於仁
壽六轡在手平衡居心運思於陶冶之間宣猷於魚
水之際然能軫念廢物遠哀窮途嗟哉小生有足悲
者內无手足之助外乏強近之親為學苦心本求榮
養得罪由已翻乃貽憂捫躬自劾愧入肌骨禍起飛
語刑極淪胥心因病怯氣以愁耗近者否運將泰仁
人持衡伏惟推曾閔之懷憐烏鳥之志處夔龍之位

傷屈賈之心沛然垂光昭振幽蟄言出口吻澤濡寰
區昔者行葦勿傷骷枯猶淹哀老以出幣愍窮而開
懷无情異類尚或嬰慮顧惟江干逐客曾是相府故
人言念材能誠无所取譬諸飛走庸或知恩嗚呼以
不駐之光陰抱无涯之憂悔當可封之至理為永廢
之窮人聞弦尚驚危心不定垂耳斯久長鳴孔悲腸
回淚盡言不宣意謹啓

謝門下武相公啓

某啓某一坐飛語廢錮十年昨蒙徵還重罹不幸詔
命始下周章失圖吞聲咋舌顯白无路豈謂烏鳥徵

志惻于深仁恤然動極溺之懷煦然存道舊之旨言
念敵鯨慰安倉黃推以恕心期于造膝重言一發獻
聽克從回陽曜于肅殺之辰沃天波于蹭蹬之際俾
移善地獲奉安輿率土知孝治之源羣生識人倫之
厚感召和氣發揚皇風豈惟匹夫獨受其賜某即以
今月十一日到州上訖守在要荒拘于印綬中講詣
謝有志莫從誠知微生不足酬德捐軀之外无地寄
言効節肅屏虔然心禱无任懇悃屏營之至謹勒軍
事衙官左威衛慈州吉昌府別將負外置同正負常
懇奉啓起居不宣謹啓

謝中書張相公啓

某啓某智乏周身動必招悔一坐飛語如衝駭機昨
者詔書始下驚惧失次叫闈无路擠壑是虞草木賤
軀誠不足惜烏鳥微志實有可哀伏蒙聖慈遽寢前
命移葭善邦載形綸言凡左人臣皆感至德凡為人
子同荷至仁豈惟鯁生獨受其賜伏以相公心符上
德道冠如仁一夫不獲戚見于色容旨未下歎形于
言竟回三舍之光能拔九泉之厄袁公之平楚獄不
忍錮人晏子之哀越石乃伸知己所以慶垂胤祚言
成春秋神理孔昭報應斯必身侔蟬翼何以受恩死

輕鴻毛固得其所卑守有限拜謝末由無任感激兢
惶之至謹勒軍事衙官守左威衛慈州吉昌府別將
負外置同正負常懇奉啓起居不宣謹啓

賀門下裴相公啓

某啓伏以相公含道傑出降神挺生坐籌以弼廠謨
秉鉞以行天討風雲助氣川岳效靈制勝于尊俎之
間指縱于韞鞬之末蕭斧既定衮衣必歸若心如魚
水人望如風草一德交浹萬邦和平運神思于鴻鑪
納生靈于壽域文武丕績冠于古今某恪守遐荒不
獲隨例拜賀瞻望踴躍無任

上門下裴相公啓

某啓曩者淮右逋誅即戎歲久天子齋戒以命元臣
登壇之日上畧前定從九天而下縱以神兵分六符
之光掃其長彗授鉞於西顛之半策勲於北陸之初
功成偃節復執大柄君臣相遇播于樂章山河啓封
載在盟府上方注意人益具瞻因魚水之協符極夔
龍之事業時屬四始恩覃萬方致君及物其德兩大
古先俊賢所未備者我從容而保之殆非人事抑有
幽贊夫異同之論我以獨見剖之文武之道我以上
材統之崇高之位我以大功居之造物之權我以虛

心運之然持盈之術古所難也實在陰施及物厚其
德基以左右功庸而百祿是荷人所欽載久而愈宜
昔表太尉不忍錮人而楚獄哀息一言之慶子孫丕
承以今日將明之材行前脩博施之義筆端膚寸澤
及九垓猶夫疾耕必有滯穗某頃墜危厄常受恩厚
誼盟於心要之自効常懼廢死荒服永辜願言敢因
賀牋一寄丹懇固非竒理不足以縈于冲襟然則利
於行者固在乎常談而卓詭孤特之言未必利於行
也伏惟以愚言與賢者叅之謹啓

賀門下李相公啓

自西川入爲
大夫拜相

某啓伏以聖君當功成愷樂之日而求賢愈切思治
益深是上玄垂休欲速致太平之明效以相公事業
而逢此時天下之人視仁壽之域其或尋尺故命書
所至德風隨之微材片善咸自磨拂况同主國柄如
吹埴篔簹含生之倫唯所措置日月亭午物無邪陰聖
賢合德人識正道雖居畎畝足以詠歌某遐守遐荒
不獲隨例拜賀私感竊抃實倍恒情

上僕射李相公啓

某啓州吏還伏蒙擺落常態手筆具書言及貞元中
登朝人逮今無十輩及叢中書相公一函具道閣下

亟言曩遊顏間頗有衰色夫溝中之木與犧象同跡
追琢不至坐成枯薪朱而藍之猶足爲器苟液欄曲
戾不足枉斧斤願爲庭燎以照嘉客謹啓

謝裴相公啓

某啓某遭不幸歲將二紀雖累更符竹而未出網羅
親知見憐或有論薦如陷還潭動而愈沈甘心終否
無路自奮豈意天未勦絕仁人持衡紆神慮於多方
起堙沈於久廢居剝極之際一陽復生出坎深之中
平路資始通籍卽位分曹樂都喬木展舊國之思行
雲有故山之戀姻族相賀壺觴盈門官無責詞始自

今日禽魚之志誓以死生草木之年惜其晚晚章程
有守拜謝無由瞻望岩廊虔然心禱謹啓

謝竇相公啓

某啓某一辭朝列二十三年雖轉郡符未離謫籍卑
溼生疾哀遲鮮歡望故國而未歸如痿人之念起昨
蒙罷免甘守丘園相公不棄舊遊特哀久廢每奉華
翰賜之衷言果蒙新恩重忝清貫薦延有漸極拔多
方六律變幽谷之寒一丸銷彌年之疹鋸翮將舉危
心獲安布武夷途自此而始分曹有繫拜謝無由瞻
望德藩坐馳情爽元任感激之至謹啓

劉賓客文集卷第十八

劉賓客文集卷第十九

集紀

唐故相國李公集紀

唐故中書侍郎平章事韋公集紀

唐故相國贈司空令狐公集紀

唐故尚書主客員外郎盧公集紀

唐故衡州刺史呂君集紀

唐故尚書禮部員外郎柳君集紀

董氏武陵集紀

澈上人文集紀

唐故相國李公集紀

天以正氣付偉人必飾之使光耀于世粹和網緼積于中鏗鏘發越形乎外文之細大視道之行止故得其位者文非空言咸繫于訐謨宥宥庸可不紀惟唐以神武定天下羣慝既讐驟示以文韶英之音與鉦鼓相襲故起文章為大臣者魏文貞以諫諍顯馬高唐以智畧奮岑江陵以潤色聞无草昧汗馬之勞而任遇在功臣上唐之貴文至矣哉後王纂承多以國柄付文士元和初憲宗遵聖祖故事視有宰相器者貯之內庭猶是釋筆硯而操化權者十八九公實得

時而光馬公諱絳字深之趙郡人在貢士中傑然有奇表既登太常第又以詞賦升甲科授祕省校書郎歲滿從調有司設甲乙問以觀決斷復居高品補渭南尉擢拜監察御史未幾以本官充翰林學士居中轉尚書主客員外郎歷司勳郎中知制誥遷中書舍人風儀峻整敷奏謹切言事感動上輒目送之一旦召至浴堂門與語半日曰將移用于大位宜稔熟民隱遂出為戶部侍郎遷中書侍郎同平章事毅然有直聲及冊免而問望益大周旋公卿間伍為尚書歷御史大夫左僕射一以三公領太常刺近輔居保釐

登齋壇皆再爲大和三年以司空鎮南鄭居二歲坐
氣剛玉折海內寬惜之後三年嗣子前京兆府尹戶
曹掾琢次子前監察御史裏行頊等泣持遺草請編
之聲自從試有司至于宰天下詞賦詔誥封章啓事
歌詩贈餞金石颺功凡四百餘篇勒成二十卷上所
以知君臣啓沃之際下所以備風雅詩聲之義洪鍾
駭聽瑤瑟清音其在翰苑及登台庭並言大事誠貫
理直感通神祇龍鱗收怒天日回照有所謂一言興
邦者信哉始愚與公爲布衣遊及仕畿服幸公同邑
其后雖翔泳勢異而不以名數革初心今考其文至

論事疏感人肺肝毛髮皆聳嗚呼其盛唐之遺直歟

唐故中書侍郎平章事韋公集紀

漢庭以賢良文學徵有道之士公孫弘條對第一席
其勢鼓行人間取丞相且侯使漢有得人之聲伊弘
發也皇唐文物與漢同風故天后朝燕國張公說以
詞標文苑徵玄宗朝曲江張公九齡以道侔伊呂徵
德宗朝天水姜公公輔杜陵韋公執誼河東裴公均
以賢良方正徵憲宗朝河南元公稹京兆韋公溥以
才識兼茂徵隴西牛公僧孺李公宗閔以能直言極
諫徵咸用對冊甲於天下繼爲有聲宰相古今相望

落落然如騎星辰與夫起版築飯牛者異矣公本名
淳舉進士登第賢良既仕方更名處厚字德載漢丞
相扶陽侯之裔孫后周逍遙公夙之八代孫江陵節
度參謀監察御史裏行贈右僕射某之元子生而聰
明絕人在提孩發言成詩未幾能賦受經於先君僕
射學文於伯舅許公孟容及壯通六經旁貫百氏咨
天人之際遂探曆數明天官窮性命之源以至于佛
書尤邃初爲集賢殿校書郎宰相李趙公監脩國史
引直東觀就改成陽尉遷右拾遺轉左補闕世稱有
史才而能諫諍入尚書爲郎歷禮部考功皆人望所

在上方用威武以警不庭宿兵寢久韋丞相貫之酌
人情上言不合意冊免因歷詆所善公在詆中出爲
開州刺史居三年執友崔敦詩爲相徵拜戶部郎中
至關下旬歲間以本官知制誥穆宗新即位注意近
臣召入翰林充侍講學士初授諫議大夫續換中書
舍人侍遊蓬萊池延問大義退而進六經法言二十
篇優詔答之賜以金紫尋遷權知兵部侍郎知制誥翰
林侍講史館脩撰長慶四年春敬宗踐祚以公用經
術左右先帝五年稔聞其德尤所欽倚內署故事與
外廷不同凡言翰林學士必草詔書有侍講者專備

顧問雖官為中書舍人或他官知制誥第用其班次耳不竄言於訓詞至至上器公且有以寵之乃使內謁者申命去侍講之稱慮未諭于百執事居數日降命書重舉舊官以明新意尋真拜夏官二御由是內庭詞臣無出其右者凡密旨必承乎權輿故號承旨學士上富春秋未親為政或有凝滯視公如者龜寶曆季年宮壺間一夕生變人情大駭雖鼎臣無所關決唯內署得參馬群議反胡貢然俟公一言而定戲難續服再維乾綱今上繼明策勲第一擢拜中書侍郎同中書門下平章事以高材遇英主功顯人伏言

无不從筆端膚寸澤及天下盡罷冗食請歸材人事先有司物止常貢城社無託巖廊益尊感恩盡瘁不畱神用大和二年十二月上前言事未及畢辭疾作暴備以朝服委地同列白奏播笏扶持之不能起上命中貴人左右翼負歸於中書如大醉狀上震驚咨嗟徵醫賜藥旁午疊委會莫肩輿至第詰旦以不起聞贈襚加常禮後十年嗣子蕃以太子舍下直弘文館編次遺文七十通銜哀貢誠乞詞以冠其首謹按公文未為近臣已前所著詞賦讚論記述銘志皆文士之詞也以才麗為主自入為學士至宰相以往所

執筆皆經綸制置財成潤色之詞也以識度爲宗觀
其發德音福生人沛然如時雨褒元老諭功臣穆然
如景風命相之冊和而莊命將之誥昭而毅薦賢能
其氣似孔文舉論經學其博似劉子駿發十難以摧
言利者其辯似管夷吾噫逢時得君奮智謀以取高
位而令名隨之豈不偉哉初蕃旣纂脩父書咨於先
執李習之請文爲領袖許而未就一旦習之憮然謂
蕃曰翱昔與韓吏部退之爲文章盟主同時倫輩惟
柳儀曹宗元劉賓客夢得耳韓柳之逝久矣今翱又
被病慮不能自述有孤前言齋恨無已將子薦誠於

劉君乎無何習之夢奠于襄州蕃具道其語余感相
國之年昔且嘉蕃之虔虔孝敬庶幾能世其家故不
讓云

唐故相國贈司空令狐公集紀

起文章而陟大位丹青景化焜耀蕃方如非烟祥風
緣飾萬物而與令名相終始者有唐文臣令狐公實
當之公名楚字慤士燉煌人今占數于長安右部天
授神敏性能無師始學語言乃協宮徵故五歲以爲
詩成章旣冠參貢士果有名字時司空杜公以重德
知貢舉擢居甲科琅邪王拱識公於童州雅器重之

至是拱自虞部正郎領桂州銳于辟賢以酬不次之
遇先拜章而後告公既而授試弘文館校書郎公為
人子重難遠行稟命而去居一歲竟迫方寸而歸家
在并汾間急于祿養捧從事檄于并州凡更三牧官
至監察御史元和初憲宗聞其名徵拜右拾遺歷太
常博士入尚書為礼部員外郎性至孝既孤以善居
喪聞一月除刑部員外時帝女下嫁相礼闕官公以
本官攝博士當門名之荅上親臨帳幄簾內以窺之
礼容甚偉聲氣朗徹上送目良久謂左右曰是官可
用記其姓名未幾改職方知制誥詞鋒犀利絕人遠

甚適有旨選司言高第者視草內庭宰臣以公為首
遂轉本司郎中充翰林學士滿歲遷中書舍人專掌
內制武帳通奏柏梁陪燕嘉猷高韻冠于一時會淮
右稽誅上遣丞相即戎以督戰公草詔書詞有涉嫌
者相府上言有命中書參詳竄定因罷內職歸閣中
而君心眷然將有大用且出入以試之乃牧華州兼
御史中丞錫以金紫居鎮七月遷大夫充河陽三城
懷州節度使又七月急召抵京師拜中書侍郎同中
書門下平章事天下然后知上心倚以為相非一朝
也是歲元和十四年秋明年正月憲宗晏駕惜其在

位日淺遭時大變穆宗踐祚轉門下侍郎平章事萬
幾百度別有所付第以舊相署位充山陵使七月禮
畢部下吏有以贓狀聞者朝典用責率之義是以左
授宣歙池等州都團練觀察處置使兼御史大夫恩
顧一異媒孽隨生旋又貶衡州刺史移郢州轉太子
賓客分司東都尋起為陝虢觀察使或有上封者稱
前以奉陵寢不檢下獲譴今陵土猶溼未宜遽用次
陝一日重為賓客分司長慶四年改河南尹其秋授
檢校禮部尚書兼汴州刺史充宣武軍節度管內觀
察處置等使汴州為四戰之地擇帥先有功峻刑右

武疑似沈命號為危邦者積年公始以清儉自律以
恩信待人以夷坦去群疑以禮讓汰慘急自上化下
速于置郵泮林革音無復故態璽書勞之就加大司
馬文宗纂服三年冬上表以大臣未識天子願朝正
月制曰可操節入覲遷戶部尚書俄為東都留守又
轉檢校尚書右僕射兼鄆州刺史天平軍節度使后
以王業之始實為北京移鎮太原從人望也以吏部
尚書徵續換太常卿真拜尚書左僕射大和九年冬
十一月京師有急兵起上方御正殿即日還宮是夕
召公決事禁中以見賢遍反事傳古義為對其詞謹切

無所顧望上心嘉之居一二日守本官兼諸道鹽鉄轉運使以幹利權既非素尚佗佗牢讓故復為檢校左僕射興元尹山南西道節度觀察使兼御史大夫開成二年十一月十二日薨于漢中官舍享年七十齊終之前一日自脩遺物表初述感恩陳力之大義中及朝廷刑政之或闕意切言盡神識不昏上深悼之形于愍冊未登三事故以贈之歸全之夕有大星殞于正寢之上光燭于庭天意若曰既稟之而生亦有涯而落其文章貴壽之氣焰歟初憲宗覽國書見五王復辟之際狄梁公實尸之公為台臣獨召便殿

問曰仁傑有後乎公以其支孫試校書郎兼謨為對即日拜左拾遺公遂草制他日相銜者因挾其詞以為非春秋諱魯之旨穆宗新即位謀讓不自決遂有衡州之貶公議冤之嗟乎天之於賦予也甚嗇而難周公獨賦文華于良時歷名卿至元老蓋忠廉孝友愛才與物合是粹美以將之邪可謂全德矣既免喪嗣子左補闕絢集公之文成一百三十卷因長子太子左諭德弘分司東都負其笥來謁泣曰先正司空與文人為顯交撤懸之前五日所賦詩寄友非它人也今手澤尚存言之嗚呼長號予為之慟收淚而視

分當編次之始公參大鹵記室以文雄於邊議者謂一方不足以騁用徵拜於私累遷曹郎乃登西掖入內署訐謨密勿遂委魁柄斯以文雄於國也嗚呼咫尺之管文敏者執而運之所如皆合在藩聳萬夫之觀望立朝賁群寮之頰舌居內成大政之風霆導猷澮於章奏鼓洪瀾於訓誥筆端膚寸膏潤天下文章之用極其至矣而又餘力工於篇什古文士所難兼焉晉王珣為晉僕射夢人授大筆如椽覺而謂人曰此必有大手筆事後孝武哀冊文乃珣之詞也公為宰相奉詔撰憲宗聖神章武孝皇帝哀冊文時稱乾

陵崔文公之比今考之而信故以為首冠尊重事也其他各以類聚著于篇

唐故尚書主客員外郎盧公集紀

心之精微發而為文文之神妙詠而為詩猶夫孤桐朗玉自有天律能事具者其名必高名繇實生故久而益大尚書郎盧公諱象字偉卿始以章句振起于開元中與王維崔顥比肩驥首鼓行于時妍詞一發樂府傳貴由前進士補祕書省校書郎轉右衛倉曹掾丞相曲江公方執文衡揣摩后進得公深器之擢為左補闕河南府司錄司勳員外郎名盛氣高少所

卑下為飛語所中左遷齊汾鄭三郡司馬入為膳部
員外郎時大盜起幽陵入洛師東夏衣冠不克歸王
所為虜劫執公墮脅從伍中初謫果州長史又貶永
州司戶移吉州長史天下無事朝廷思用宿舊徵拜
主客員外郎道病留武昌遂不起故相崔太傅時為
右史方在鄂以文誌其墓其詞曰憶公妙年有聲振
耀當代翱翔雲路不虞增反層繳盛名先物易生癘
疵三年郎署坐或遺羞蹭蹬江皋棲棲沒齒見知者
恨之公遠祖元魏北齊後周皆為帝師公之叔父嵩
山逸人諫議大夫顛然真隱者也公下世後七十三

年其孫元符捧遺草來乞詞以表之嘗經亂離多散
落今之存者十有二卷凡若干篇

唐衡州刺史呂君集紀

五行秀氣得之若多者為俊人其色激灑於顏間其
聲而為文章天之所與有物來相彼由學而致者
如工人染夏以視羽猷有生死之殊矣初貞元中天
子之文章煥乎垂光慶霄在上萬物五色天下文人
為氣所召其生乃蕃靈芝建蒲與百果齊折然煌煌
翹翹出乎其類終為偉人者幾希矣東平呂和叔實
生是時而絕人遠甚始以文學震三川三川守以為

貢士之冠名聲四馳速如羽檄長安中諸生成避其鋒刃甲科連中芒刃愈出德宗聞其名自集賢殿校書郎擢為左拾遺明年大戎請和上問能使絕域者君以奇表有專對材膺選轉殿內史錫之銀章還拜尚書戶部員外郎轉司封遷刑部郎中兼侍御史副治書之職會中執法左遷緣坐道州刺史以善政聞改衡州年四十而沒後十年其子安衡泣捧遺草來謁咨余紬之成一家言凡二百篇和叔名溫別字化光祖考皆以文學至大官蚤聞詩礼于先侍郎又師吳郡李質通春秋從梁肅學文章勇於藝能咸有所

祖年益壯志益大遂撥去文學與雋賢交重氣槩覈名實歆然以致君及物為大欲每與其徒講疑考要王霸富強之術臣子忠孝之道出入上下百千年間詆訶角逐疊發連注得一善輒盱衡擊節揚袂頓足信容德色舞於眉端以為按是言循是理合於心而氣將之昭昭然若揭日月而行孰能闕其勢而爭天光者嗚呼言可信而時異道甚長而命窄精氣為物其有所歸乎古之為書者先立言而後體物賈生之書首過秦而荀卿亦後其賦和叔年少過君而卒以謫似賈生能明王道似荀卿故余所先後觀二書斷

自人文化成論至諸葛武侯廟記為上篇其它咸有為而為之始學左氏書故其文微為富艷夫羿之闕弓唯巴蛇九日乃能盡其殼而回注鷄爵亦要夫中於尋常之間非羿之手弓有能有不能所過然也後之達解者推而廣之知余之素交不相索於文字之內而已

唐故尚書禮部員外郎柳君集紀

八音與政通而文章與時高下三代之文至戰國而病涉秦漢復起漢之文至列國而病唐興復起夫政靡而土裂三光五嶽之氣分扶問大音不完故必混

一而後大振初貞元中上方嚮文章昭回之光下飾萬物天下文士爭執所長與時而奮榮焉如繁星麗天而芒寒色正人望而敬者五行而已河東柳子厚斯人望而敬者歟子厚始以童子有奇名於貞元初至九年為名進士十有九年為材御史二十有一年以文章稱首入尚書為禮部員外郎是歲以踈雋少檢獲訛出牧邵州又謫佐永州居十年詔書徵不用遂為柳州刺史五歲不得召病且革留書抵其友中山劉某曰我不幸卒以謫死以遺草累故人某執書以泣還編次為三十通行於世子厚之喪昌黎韓退

之誌其墓且以書來弔曰哀哉若人之不淑吾嘗評其文雄深雅健似司馬子長崔蔡不足多也安定皇甫湜於文章少所推讓亦以退之之言為然凡子厚名氏與仕與年暨行已之大方有退之誌若祭文在今附于第一通之末云

董氏武陵集紀

片言可以明百意坐馳可以役萬里工於詩者能之風雅牀變而興同古今調殊而理具達於詩者能之工生於才達生於明二者還相為用而後詩道備矣余嘗執斯評為公是且衡而度之誠懸乎心默揣群

才鈞銖尋尺隨限而盡如其所閱者百態一旦得董生之詞杳如搏翠屏浮層瀾視聽所遇非風塵間物亦猶明金絳羽得於遐裔雖欲勿寶可乎生名佺字庶中幼嗜屬詩晚而不哀心源為鑪筆端為炭鍛鍊元本雕讐群形糾紛舛錯逐意奔走因故沿濁協為新殺嘗所與遊者皆青雲之士聞名如盧杜盧負外象杜負外高韻如包李包祭酒侍郎紆進以章句揚於當時末路寡徒值余歡甚因相謂曰間者身以廷尉屬為荊州從事移疾罷去幽卧於武陵迄今四年言未信於世道不施於人寓其性懷播為吟咏時復發笥紛然盈

前凡五十篇因地為目吾子嘗號知我蓋表而志之
為生羽翼余不得讓而著於篇因係之曰詩者其文
章之蘊邪義得而言喪故微而難能境生於象外故
精而寡和千里之繆不容秋毫非有的然之姿可便
戶曉必俟知者然後鼓行於時自建安距永明已還
詞人比肩唱和相發有以朔風零雨高視天下蟬噪
鳥鳴蔚在史策國朝因之粲然復興由篇章以躋貴
仕者相踵而起兵興已還右武尚功公卿大夫以憂
濟為任不暇器人於文什之間故其風寢息樂府協
律不能足聲新詞以度曲夜諷之職寂寥无紀則董

生之貧卧于齋土也其不得於時者歟其不試故藝
者歟

澈上人文集紀

釋子工為詩尚矣休上人賦別怨約法師哭范尚書
咸為當時才士之所傾歎厥後比比有之上人生於
會稽本湯氏子聰察嗜學不肯為凡夫因辭父兄出
家號霽澈字源澄雖受經論一心好篇章從越客嚴
維學為詩遂籍籍有聞韞維卒乃抵吳興與長老詩
僧皎然游講藝益至皎然以書薦于詞人包侍郎佶
包得之大喜又以書致于李侍郎紆是時以文章風

韻主盟於世者曰包李以是上人之名由二公而颺如雲得風柯葉張王以文章接才子以禪理說高人風議甚雅談笑多味貞元中西遊京師名振輦下緇流疾之造飛語激動中貴人因侵誣得罪徙汀州會赦歸東越時吳楚間諸侯多賓禮招延之元和十一年終于寅州開元寺七十有一門人遷之建塔於越之山陰天柱峯之陞從本教也初上人在吳興居何山與畫公為侶皎然字清晝時以字行時予方以兩髦執筆硯陪其吟咏皆曰孺子可教後相遇於京洛興文許之契焉上人沒後十七年予為吳郡其門人秀峯捧先

師之文來乞詞以志且曰師嘗在吳賦詩僅二千首今刪取三百篇勒為十卷自大曆至元和凡五十年間接詞客文人酬倡別為十卷今也思行乎昭代求一言羽翼之因為評曰世之言詩僧多出江左靈一導其源護國襲之清江揚其波法振沿之如么絃孤韻瞥入人耳非大樂之音獨吳興畫公能備衆體畫公後澈公承之至如芙蓉園新寺詩云經來白馬寺僧到赤烏年謫汀州云青蠅為吊客黃耳寄家書可謂入作者閭域豈特雄於詩僧間邪



劉賓客文集卷第二十

傷我馬詞

口兵戒

猶子蔚適趙戒

又觀博

觀市

論書

劉氏集畧說

名子說

奏記丞相府論學事

澤宮詩

魏生兵要述

救沈志

傷我馬詞

馬乾類蓋健而善馳君子之所宜求為獸也故法求

于力或逸而善駭法求于和或乾而易仆由德稱者
之鮮焉曩予知善馬之難遭也不求于肆而于其鄉
一旦果得陰山之阿蠖畧其形蕭然其鳴長顧遠視
順而能力顧其軀非騫然而偉也雖士得以乘之始
予被皂衣于朝朝之人多三四其狀以迭馭予元兼
馬水轍之淋滿淖途之汪洋結為確犖融為恻堂前
有僨輶後有濡裳我策垂空我鑣方揚振鬣軒昂矯
如飛翔翹翹其雄也非力而何烈火之具舉鈎膺之
疊舞一蹊千趾駢比齟齬度者斯擠捍者斯怒我鞍
如山我轡如組弭毛容與宛若孤處靡靡其柔也非

慧而何前日予之獲譴于闕下背商顏趨昭丘日中
而踰舍循門之南非騎所宜夷則沮洳高則嶮巖虎
踞空林蝨鬪荒墟風雨孤征簡書之威俾予弗顛我
馬是依屑屑其勞也非德而何予至武陵居沅水之
傍或踰月未嘗跨馬以故莫得伸其所長躅躅顧望
兮頓其鎖韁飲齧日削兮精耗神傷寒櫪騷騷兮瘁
毛蒼涼路聞躑躅兮逸氣騰驤朔雲深兮邊草遠意
欲往兮聲不揚隕然似不得其所而死故其嗟也兼
常初玄宗羈大宛而盡有名馬命典牧以時起居洎
西幸蜀往民間得其種而蕃焉故良毛色者率非中

土類也稽是毛物豈祖于宛與漢之歌曰龍為友武陵有水曰龍泉遂歸骨于是川且吊之曰生于磧礮善馳走萬里南來困丘阜青菰寒菽非適口病聞北風猶舉首金臺已平骨空朽投之龍淵從爾友

口兵戒

余讀蒙莊書曰兵莫慘于志莫邪為下缺然知志士之傷夫生也它日讀遠祖中壘校尉書曰口者兵也盡然知言之為兵又慘乎志因博考前載極其兩端夫志兵之薄人激烈抗憤不過無從容于世耳口兵之起其刑渥焉繇是知吾祖之言為急作戒以書于

盤盂五刃之傷藥之可平一言成疴智不能明人或罹兵道塗奔救托方效技思恐其後人或罹譖比肩狐疑借有解紛毀輒隨之故曰舌端之孽慘乎楚鉄夷竈城謀執戈以驅掩人誠智折筭以詈賢者誨子信有其旨發言之難伸舌猶爾辯為詐媒默為德基玉櫝不啓孰能瑕疵隳麋深居孰謂可唾戒哉我口之啓爾心之門无為我兵當為我藩以慎為楫以忍為閤可以多食勿以多言

猶子蔚適趙戒

猶子慰晨跪于席端曰臣幼承叔父訓始勾萌至于

扶踈前日不自意有司以名汗賢能書又自不意被
丞相府召為從事重競累媿惧貽叔父羞今當行乞
辭以為戒余曰若知彛器乎始乎斲輪因人規矩刻
中廉外枵然而有容者理臆質堅然后加密石焉風
戾日晞不副不聲五交反然後青黃之鳥獸之飾乎瑤
金貴在清廟其用也冪以養潔其藏也櫝以養光苟
措非其所一有毫髮之傷儻然與破甑為伍矣汝之
始成人猶器之作朴是宜力學為礪斲親賢為青黃
睦僚友為瑤金忠所奉為清廟盡敬以為冪慎微以
為櫝去怠以護傷在勤而行之耳設有人思披重霄

而挹顛氣病無階而升有力者揭層梯而倚泰山然
而一舉足而一高非獨揭梯者所能也凡大位未嘗
曠故世多貴人唯天爵并者乃可偉耳夫偉人之一
顧踰乎華章而一非亦慘乎黜刑行矣慎諸吾見垂
天之雲在爾肩腋間矣昔吾友柳儀曹嘗謂吾文雋
而膏味无窮而炙愈出也遲汝到丞相府居一二日
袖吾文入謁以取質焉丞相吾友也汝事所從如事
諸父借有不如意推起敬之心以奉焉無忽

觀博

客有以博戲自任者速余觀焉初主人執握槩之器

寘于廡下曰主進者要約之既揖讓即次有博齒二
異乎古之齒其制用骨觚稜四均鏤以朱墨耦而合
數取應期月視其轉止依以爭道是制也通行之久
矣莫詳所祖以其用必投擲故以博投設之是日客
抵骨于局且祝之曰其來如趨其去如脫事先趨趨
命中无蹉跌无從彼呼無戾我恒分曹道迫自朝至
于日中稷穀梁其也而率與所祝異焉客視骨如有情
焉如或馮焉悉詈之不洩又從而齧齧蹂躪之莫顧
十目之眙讓也乃曰非子術之不工是朽骸者不予
畀也請刷恥于奕棋主人云從命命燭以續驚神默

計巧竭智匱主進者書勝負之數于牘視其所喪又
倍前籍焉觀者曰以夫人之褊心亦將詬碁而抵枰
矣既乃恬而不恤赧然有失鵠求身之色人咸異之
子劉子曰先人者制人博投是已從人制于人枯碁
是已二者豈有數存乎其間哉但處之勢異耳是知
當軸者易生嫌而退身者易為譽易生之嫌不足貶
也易為之譽不足多也亦辨其所處而已

觀市

由命士已上不入于市周礼有焉乃今觀之盖有因
也元和二年沅南不雨自季春至于六月毛澤將盡

郡守有志于民誠信而零遂徧山川方社又不雨遂
遷市于城門之遠余得自麗譙而俯焉摩下令之日
布市籍者咸至夾軌道而分次焉其左右前后班間
錯峙如在闌闔制其列題區榜揭價名物參外夷之
貨馬牛有蹄私屬有閒在中笥者織文及素馬在几
閣者彫彤及質馬在筐筥者白黑巨細焉業于饗者
列饗饌陳餅餌而苾然業于酒者舉酒旗滌盃盃而
澤然鼓刀之人設膏俎解豕羊而赫然華實之毛畋
漁之生交蜚走錯水陸羣狀夥名入隊而分韞藏而
待價者負挈而求沽者乘射其時者竒贏以游者坐

賈顯顯行賈遑遑利心中驚貪目不瞬于是質劑之
曹較古之倫合彼此而騰躍之冒良苦之巧言數量
衡于檢手杪忽之差鼓舌僞儻詆欺相高詭態橫出
鼓薰譁空煙埃奮羶腥疊中履嚙而合之異致同歸
鷄鳴而爭赴日中而駢闐萬足一心恐人我先交易
而退陽光西徂幅負不移經術如初中无求隙地俱
唯守犬烏烏樂得腐餘是日倚衡而閱之感其盈虛
之相尋也速故著于篇云

論書

或問曰書足以記姓名而已工與拙何損益于數哉

答曰此誠有之蓋舉下之說爾非蹈中之說亦猶言
居室曰避燥濕而已言衣裳曰適寒燠而已言飲食
曰充腹而已言車馬曰代勞而已言祿位曰代耕而
已今夫考居室必以宏門豐屋為美筭衣裳必以文
章道澤為甲評飲食必以精良海陸為貴第車馬必
以華輶絕足為高干祿位必以重侯累封為意是數
者皆不行舉下之說奚獨于書也行之邢禮曰士依
于德游于藝德者何曰至曰敏曰孝之謂藝者何禮
樂射御書數之謂是則藝居三德之后而士必游之
也書居數之上而六藝之一也語曰飽食終日无所

用心難矣哉不有博奕者乎為之猶賢乎已是則博
奕不得列于藝差愈于飽食无所用心耳吾觀今之
人適有面詆之曰子書居下品矣其人必適爾而笑
或謦然不屑詆之曰子握槩奕棊居下品矣其人必
赧然而媿或艷然色是故時敢以六藝斥人不敢以
六博斥人嗟乎衆尚之移人也問者曰然則彼魏晉
宋齊間亦嘗尚斯藝矣至有君臣爭名父子不讓何
哉答曰吾姑欲求中道耳子寧以尚之之弊規我歟
且夫信者美德也秦繆尚之而賢臣莫贖黃老者至
道也竇后尚之而儒臣見刑道德且不可尚矧由道

德以下者哉所謂中道而言書者何處之文學之下
六博之上材鈞而善者得以加譽遇一作鈞而善者
得以議能所加在乎譽非實也不黷于賞所議在乎
過非實也不紊于刑夫如是庶乎六書之學不堙墜
而已乎

劉氏集畧說

子劉子曰五達之井百汲而盈科未必涼而甘所處
之勢然也人之詞待扣而揚猶井之利汲耳始予為
童兒居江湖間喜與屬詞者游謬以為可教視長者
所行止必操觚從之及冠舉秀才一幸而中說有司

惧不厭于衆亟以口譽之長安中多循空言以為誠
果有名字益與曹輩畋漁于書林宵語途話琴酒調
謔一出于文章俄披召為記室參軍會出師淮上恒
磨墨于楯鼻上或寢羣書中居一二歲由旬服升諸
朝凡三進班而所掌猶外府或官課或為人所倩昌
言奏記移讓告諭奠神志葬或猥并焉及謫于沅湘
間為江山風物之所蕩往往指事成歌詩或讀書有
所感輒立評議窮愁著書古儒者之大同非高冠長
劍之比耳前年蒙恩澤以郡符居海壖多雨慝作適
晴喜躬曬書于庭得以書四十通道爾自哂曰道不

加益焉用是空文爲真可供醬豢藥楮耳它日子婿
博陵崔生闕言曰某也鄴游京師偉人多問丈人新
書幾何且欲取去而某應曰無有輒媿起于顏間今
當復西期有以拜媿者由是刪取四之一爲集略以
貽此卽非敢行乎遠也

名子說

魏司空王昶名子制誼咸得立身之要前史是之然
則書紳銘器孰若發言必稱之乎今予名爾長子曰
咸允字信臣次日同虞字敬臣欲爾於人无賢愚于
事无小大成推以信同施以敬俾物從而衆說其庶

幾乎夫忠孝之于人如食與衣不可斯須離也豈俟
余勗哉仁義道德非訓所及可勉而企者故存乎名
夫朋友字之非吾職也顧名者所在遂從而釋之孝
始于事親終于事君偕曰臣知終也

奏記丞相府論學事

十一月七日使持節都督夔州諸軍事夔州刺史劉
某謹奏記相公閣下凡今能言者皆謂天下少士而
不知養材之道鬱堙而不揚非天不生材也亦猶不
耕者而歎廩庾之無餘非地不產百穀也伏以貞觀
中增築學舍十二百區生徒三千餘人時外夷上疏

請遣子弟入附于三雍者五國雖菁菁者莪育材之道不足比也今之膠庠不聞弦歌而室廬圯廢生徒衰少非學官不能振舉也病无貲財以給其用鯁生今日一見使太學立富幸遇相公在位可以索言之礼云凡學官春釋奠于其先師斯礼止于辟廱類官非及天下也今四海郡縣咸以春秋上下有事孔子廟其礼不應于古且非孔子意也炎漢初定羣臣皆起屠販為公卿故孝惠高后之間置原廟于郡國逮孝元韋玄成以碩儒為丞相遂建議罷之夫以子孫尚不敢違礼以饗其祖况后學師先聖之道而首違

之乎祭義曰祭不欲數語云祭神如神在與其煩于舊饗孰若行其教道今夫子之教日頽靡而以非礼之祀媚之斯儒者所宜憤悱也竊觀歷代无有是事皇家武德二年詔于國學立周公孔子廟四時致祭貞觀十一年又詔立宣尼廟于兗州至二十年許敬宗等奏乃遣天下諸州縣置三獻官其他如方社敬宗非通儒不能稽典礼開元中玄宗嚮學與儒臣議由是發德音其罷郡縣釋奠牲牢唯酒脯以薦後數年令定時王孫林甫為宰相不涉學委御史中丞王敬從刊之敬從非文儒遂以明衣牲字編在學令是

首失于敬宗而終失于林甫習以為常罕有敢非之者謹按本州四縣一歲釋奠物之直緡錢十六萬有奇舉天下之郡縣當千七百不啻羈縻者不在數中凡歲中所出于經費過四千萬適資三獻官飾衣裳飽妻子而已于尚學之道无有補焉前日詔書許列郡守臣得以上言便事今謹條奏某乞下礼官博士詳議典制罷天下縣邑牲牢衣幣如有生徒春秋依開元敕旨用酒醴服脩膳脯棗栗示敬其事而州府許如故儀然後籍其資半附益所隸州使增學校其半率歸國庠猶不下萬計築學室具器用豐簞食增

掌固以備使令凡儒官各加稍食其紙筆鉛黃視所出州率令折入學徒既備明經日課僖書若干紙進士命讎校亦如之則貞觀之風粲然不殊其它郡國皆立程督授級懷璽棧樸菁莪良可詠矣伏惟相公發迹咸自諸生其尊素王之道儀刑四方宜在今日是以前生敢沿故事以奏記于左右姑舉其大較至于證據纖悉條奏具之章下之日乞留神省察不勝大願惶恐拜手稽首

澤宮詩

澤宮選士歲貢也晉昌唐如晦以信誼為良弓文學

為散矢規爵祿猶衆禽家穀持滿逝風蜚微者數矣
有措杯之妙而无雙鶴之獲報弓叔視歸究其術由
是跡愈屈而名愈聞君子益多之彼不由其行一幸
而中者雖懸貲在庭君子未嘗多也歲殫矣告予以
西予為賦澤宮一章庶見子之弓弗再張也已秩秩
澤宮有徇維鵠祁祁庶士于以干祿彼鵠斯微若止
若翔千里之差起于毫芒我矢既直我弓既良依于
高墉因我不臧高墉伊何維器與時視之以心誰謂
鵠微

魏生兵要述

余為書殿學士四年所與居皆鴻生彥士一旦詔下
懷吳郡章而東門下生成惜是行且曰吳中富士必
有知書宜為太守所礼者及下車閱客籍森然三千
有鉅鹿魏生持所著書來謁曰不佞始讀書為文章
凡二十年在貢士中孤鳴甚哀卒元善聽者退而收
視易慮伏北窓下考前言成兵要十編度諸侯未遑
是事將笈而西求一言以生羽翼予取書觀之始自
黃帝伏蚩尤終于隋氏平江南語春秋戰國事最備
磅礴下上數千年間其擴摭評議无遺策用是以干
握兵符貴人宜有虛已而樂聞者子盍行乎吾知元

侯上舍不獨善雞鳴彈長鈇三五九九之伎顯之而已

救沈志

貞元季年夏大水熊武五溪鬪決于沈突舊防毀民家濟高望之溟津葩華山腹為坻林端如莎湍道駛悍不風而怒崩巖前邁浸淫旁掩柔者靡之固者脫之規者旋環之矩者倒顛之輕而泛浮者碾磕之重而高大者前却之生者力音殫者弛形蔽流而東若木柳然有僧愀然焉誓于路曰浮圖之慈悲救生最大能拔彼于溺我當為魁里中兒願從四三輩皆狎

川勇游者相與乘堅舟挾善器維以脩絃杖于崇丘水當洄洑人易寘力凝臚執用俟可而拯大凡空處之類穴居之彙在牧之羣在豢之馴上羅黔首下逮毛物拔乎洪濶致諸生地者數十百焉適有孽獸如鷓夷而前攫持流柝首用不陷隅目傍睨其姿弭然甚如六擾之附人者其徒將取焉僧趣促訶之曰第無濟是為目之可里所而不能有所持矣舟中之人曰吾聞浮圖之教貴空空生普普生慈不求報施之謂空不擇善惡之謂普不逆因窮之謂慈孺也生必救而今也窮見廢无乃計善惡而忘普與慈乎僧曰

甚矣問之迷且妄也吾之教惡乎无善惡哉六塵者在身之不善也佛以賊視之末伽聲聞者在彼之未寤也佛以邪目之惡乎无善惡也吾鄉也所援而出死地者衆矣形乾氣還各復本狀躑躅然羽者尅蕭然而言者譏譏然隨其所之吾不尸其施也不德吾則已焉能害為彼形之乾鬢鬢之姿也彼氣之還暴悖之用也心足反噬而齒甘最靈是必肉吾屬矣庸能躑躅譏譏之比歟夫虎之不可使知恩猶人之不可使為虎也非吾自貽患焉爾且將貽患于衆多吾罪大矣子劉子曰余聞善人左患不救不祥惡

人在位不去亦不祥僧之言遠矣故志之

劉賓客文集卷第二十

劉賓客文集卷第二十一

雜興三十首

學阮公體三首

偶作二首

古詞二首

寓興二首

昏鏡詞 并引

養鷺詞 并引

武夫詞 并引

賈客詞 并引

調瑟詞 并引

讀張曲江集作 并引

庭梅詠寄人

詠古二首有所寄

詠史二首

苦雨行

萋兮吟

經檀道濟故壘

題歌器圖

華山詩

聚蚊謠

磨鏡篇

百舌吟

有獺行

飛鷲標

秋螢引

劉賓客文集卷第二十一詩

雜興三十一首

學院公體三首

少年負志氣信道不從時只言繩自直安知室可欺
百勝難慮敵三折乃良醫人生不失意焉能慕已知

二

朔風悲老驥秋霜動鷲禽出門有遠道平野多層陰
滅沒馳絕塞振迅拂華林不因感哀節安能激壯心

三

昔賢多使氣憂國不謀身目覽千載事心交上古人

侯門有仁義靈臺多苦辛不學腰如磬徒使甌生塵

偶作二首

終朝對尊酒嗜興非嗜甘終日偶衆人縱言不縱談
世情閑盡見藥性病多諳寄謝嵇中散予无甚不堪

二

萬卷堆床書學者識其真萬里長江水征夫度要津
養生非但藥悟佛不因人燕石何須辨逢時即至珍

古詞二首

軒后初冠冕前旒為蔽明安知從復道然後見人情

二

簿領乃俗士清談信古風吾觀蘇令綽朱墨一何工

寓興二首

常談即至理安事非常情寄語何平叔無為輕老生

二

世途多礼數鵬鷄各逍遙何事陶彭澤拋官為折腰

昏鏡詞并引

鏡之工列十鏡于賈奩發奩而視其一皎如其九霧
如或曰良楛之不佞甚矣工解頤謝曰非不能盡良
也蓋賈之意唯售是念今來市者必歷鑿周踈求與
已宜彼皎者不能隱芒杪之瑕非美者不合是用什

一其數也予感之作昏鏡詞

昏鏡非美金漠然喪其晶陋容多自欺謂若他鏡明
瑕疵闇不見妍態隨意生一日四五照自言羨傾城
飾帶以綺繡裝匣以瓊瑛秦宮豈不重非適乃爲輕

養鷲詞并引

途逢少年志在逐句絕方呼鷹隼以襲飛走因縱觀之
卒無所獲行人有常從事於斯者曰夫鷲禽飢則爲
用今哺之過篤故然者也余感之作養鷲詞

養鷲非玩形所資擊鮮力少年昧其理日夜哺不息
探雛網黃口旦莫有餘食寧知下韝時翅重飛不得

韞繆上林表狡兔自南北飲啄既已盈安能勞羽翼

武夫詞

有武夫過詫余以從軍之樂翌日質于通武之善經
者則曰果有樂也夫威恣而賞勞則樂用威雄而賞
競則樂橫聲去顧其樂安出耳余惕然作是詞

武夫何泯泯衣紫襲絳裳借問胡爲爾列校在鷹揚
依倚將軍勢交結少年場探丸害公吏袖刃妒名倡
家產既不事顧盼自生光酣歌高樓上袒裼大道傍
昔爲編戶人秉耒甘哺糠今來從軍樂躍馬飲持梁
猶思風塵起無種取侯王

賈客詞并引

五方之賈以財相雄而鹽賈尤熾或曰賈雄則傷農
余感之作是詞

賈客無定遊所遊唯利并眩俗雜良苦乘時取重輕
心計析秋毫搖鈎侷懸衡錐刀既無棄轉化日已盈
徼福禱波神施財遊化城妻約雕金釧女垂貫珠纓
高資比封君奇貨通倖卿趨時鷲鳥思藏鎡盤龍形
大扁浮通川高樓次旗亭行止皆有樂闌梁自無征
農夫何為者辛苦事寒耕

調瑟詞并引

里有富豪翁厚自奉養而嚴督臧獲力屈形削然猶
役之無藝極一旦不堪命亡者過半追亡者亦不來
復翁頽沮而追昨非之莫及也余感之作調瑟詞
調瑟在張弦弦平音自足朱絲二十五闕一不成曲
美人愛高張瑤軫再三促上弦唯獨響下應不相屬
日暮聲未和寂寥一枯木却顧膝上弦流淚難相續

讀張曲江集作并引

世稱張曲江為相建言放臣不宜與善地多徒五溪
不毛之鄉及今讀其文自內職牧始安有瘴癘之歎
自退相守荆門有拘囚之思託諷禽鳥寄詞草樹鬱鬱

然與騷人同風嗟夫身出于遐陬一失意而不能堪
矧華人士族而必致醜地然后快意哉議者以曲江
為良臣識胡雛有反相差凡器與同列密啓廷爭雖
古哲人不及而燕翼元似終為餒鬼豈知心忠怨陰
謫最大雖二美莫贖邪不然何袁公一言明楚獄而
鐘鼎四葉以是相較神可誣乎余讀其文因為詩以
弔

聖言貴忠恕至道重觀身法在何所恨色相斯為仁
良時難久恃陰謫豈無因寂寞韶陽廟魂歸不見人

庭梅詠寄人

早花常犯寒繁實常苦酸何事上春日坐令芳意闌
天桃定相笑遊妓肯回看君問調金鼎方知正味難

詠古二首有所寄

車音想鱗鱗不見綦下塵可憐平陽第歌舞嬌青春
金屋容色在文園詞賦新一朝復得幸應知失意人

二

寂寥照鏡臺遺基古南陽真人昔來遊翠鳳相隨翔
目成在桑野志遂貯椒房豈無三千女初心不可忘

詠史二首

驃騎非元勢少卿終不去世道劇頽波我心如砥柱

賈生明王道衛綰工車戲同過漢文時何人居貴位

苦雨行

悠悠飛走情同樂在陽和歲中三百日常恐風雨多
天人信遐遠時節易蹉跎洞房有明燭无乃酣且歌

萋兮行

天涯浮雲生爭蔽日月光窮巷秋風起先摧蘭蕙芳
萬貨列旗亭恣心注明璫名高毀所集言巧智難防
多謂行大道斯須成太行莫吟萋兮什徒使君子傷

經檀道濟故壘

萬里長城壞荒營野州秋秣陵多士女猶唱白符鳩

史云當時人歌曰可伶
白符鳩枉殺檀江州

題歌器圖

秦國功成思稅駕晉臣名遂歎危機无因上蔡牽黃
犬願作丹徒一布衣

聚蚊謠

沈沈夏夜蘭堂開飛蚊伺暗聲如雷嘈然歛起初駭
聽殷殷若自南山來喧騰鼓舞喜昏黑昧者不分聰
者惑露花滴瀝月上天利嘴迎人著不得我軀七尺
爾如芒我孤爾衆能我傷天生有時不可遏為爾設

幄潛匡床清商一來秋日曉羞爾微形飼丹鳥

百舌吟

曉星寥落春雲低初聞百舌間關啼花柳滿空迷處
所搖動繁英墜紅雨笙簧百轉音韻多黃鸝吞聲燕
無語東方朝日遲、升迎風弄景如自矜數聲不盡
又飛去何許相逢綠楊路綿蠻宛轉佞娛人一心百
舌何紛紛醜顏俠少停歌聽墜弭妖姬和睡聞可憐
光景何時盡誰能低回避鷹隼廷慰張羅自不關潘
郎挾彈无情損天生羽族爾何微舌端萬變乘春輝
南方朱鳥一朝見索漠无言蒿下飛

飛鳶操

鳶飛杳杳青雲裡鳶鳴蕭蕭風四起旗尾飄揚勢漸
高箭頭若劃聲相似長空悠悠霽日懸六翮不動凝
飛烟遊鷁翔雁出其下慶雲清景相回旋忽聞飢鳥
一噪聚瞥下空中爭腐鼠騰音礪吻相喧呼仰天大
嚇慘鴛鴦畏人避犬投高處俛吻无聲猶屢顧青鳥
自矜玉山禾仙禽徒貴華亭露撲棟危巢向莫時毡
毳飽腹躡枯枝遊童挾彈一麾肘臆碎羽分人不悲
天生衆禽各有類威鳳文章在仁義鷹隼儀形螻蟻
心雖能戾天何足貴

秋螢引

漢陵秦苑遙蒼蒼陳根腐葉秋螢光
夜空寥寂金氣淨千門九陌飛悠揚
紛綸暉映互明滅金鑪星噴鏗
花發露華洗濯清風吹低昂不定
招搖垂高麗果思照珠網斜歷璇
題舞羅幌曝衣樓上拂香帟承露
臺前轉仙掌槐市諸生夜讀書北
窓分明辨魯魚行子東山起征思
中郎騎省悲秋氣銅雀人歸自入
簾長門帳開來照淚誰言向晦常
自明童兒走步嬌女爭天生有光
非自銜遠近低昂暗中見撮蚊祆
鳥亦夜飛翅如車輪而已佈

華山詩

洪鑪作高山元氣鼓其橐俄然神功就
峻拔在寥廓靈蹤露指爪殺氣見稜角
凡木不敢生神仙聿來託天資帝王宅
以我為闕鑰能令下國人一見換神骨
高山固無限如此方為嶽丈夫无持達
雖貴猶碌碌

磨鏡篇

流塵翳明鏡歲久看如漆門前負局人
爲我一摩拂
葦開綠池滿暈盡金波溢白日照空心
圓光走幽室
山神秋氣沮野魅真形出却思未磨時
瓦礫甘唐突

有獺吟

有獺得嘉魚自謂天見憐先祭不敢食捧鱗望清玄
人立寒沙上心專脰肩肩漁翁以為妖飛塊投其前
呼兒貫鰓歸與獺同烹煎關關黃金鷄大翅格江烟
下見盈尋魚投身擘洪漣攫拏隱嶙去哺雛林岳巔
鷓鴣欲伺隙遙噪莫敢前長居青雲路彈射无由緣
何地無江湖何水無鮪鱸天意不宰割菲祭徒虔虔
空餘知礼重載在淹中篇

劉賓客文集第二十一

劉賓客文集卷第二十二

五言今體三十首

春日退朝

經東都安國觀九仙公主舊院作

蜀先主廟

觀八陣圖

八月十五夜玩月

許給事見示哭工部劉尚書詩因命同作

奉和中書崔舍人八月十五夜玩月二十韻

奉和淮南李相公莫秋即事寄成都武相公

元和癸巳歲仲秋詔發江陵偏師問罪蠻傲後
命宣慰釋兵歸降凱旋之辰率爾成詠寄荆南
嚴司空

武陵書懷五十韻

經伏波神祠

聞董評事病因以書贈

贈澧州高大夫司馬霞寓

宿誠禪師山房題贈二首

晚泊牛渚

罷郡歸洛陽閑居

城中閒遊

罷郡歸洛陽寄友人

陝州河亭陪韋伍大夫雪後眺望因以留別與
韋有布衣之舊一別二紀經遷貶而歸

途中蚤發

初至長安

大和戊申歲大有年詔賜百寮出城觀秋稼謹
書盛事以俟采詩者

蚤秋集賢院即事

金陵懷古

晝居池上亭獨吟

分司東都蒙襄陽李司徒相公書問因以奉寄
奉和吏部楊尚書太常李卿二相公策免後即
事述懷贈答十韻

門下相公榮加冊命天下同歡忝沐眷私輒敢
申賀

病中一二禪客見問因以謝之

劉賓客文集卷第二十二

五言今體三十首

春日退朝

紫陌夜來雨南山朝下看戟枝迎日動閣影助松寒
瑞氣卷綃縠遊光泛波瀾御溝新柳色處處拂歸鞍
經東都安國觀九仙公主舊院作

仙院御溝東今來事不同門開青草日樓閉綠楊風
將犬昇天路披霓赴月宮武皇曾駐蹕親問主人翁

蜀先主廟

漢末謠黃牛白腹五銖當復

天下英雄氣千秋尚凜然勢分三足鼎業復五銖錢

得相能開國生兒不象賢淒涼蜀故妓未舞魏宮前

觀八陣圖

軒皇傳上畧蜀相運神機水落龍蛇出沙平鵝鶴飛
波濤无動勢鱗介避餘威會有知兵者臨岐指是非

八月十五夜玩月

天將今夜月一遍洗寰瀛暑退九霄淨秋澄萬景清
星辰讓光彩風露發晶英能變人間世倘然是玉京

許給事見示哭工部劉尚書詩因命同作

漢室賢王後

從叔望出河間

孔門高第人濟時成國器樂道

任天真特達圭无玷堅貞竹有筠總戎寬得衆市義

貴能貧護塞无南牧馳心拱北辰乞身來闕下賜告

卧漳濱榮耀初題劔清羸已控紳宮星徒列位隙日

不回輪自昔追飛侶今爲侍從臣素弦寒已絕青簡

歎猶新未遂揮金樂空悲撤瑟晨淒涼竹林下无復

見清塵

從叔自渭北節度以疾歸朝
比及拜尚書竟不克中謝

奉和中書崔舍人八月十五夜玩月二十韻

莫景中秋爽陰靈既望圓騰精離碧海分照接虞淵

迴見孤輪出高從倚盖旋二儀含皎激萬象共澄鮮

整御當西陸舒光麗上玄從星變風雨順日助陶甄

遠近同時望晶燦此夜偏運行調玉燭潔白應金天

曲沼疑瑤鏡通衢若象筵
達人盡冰雪過境即神仙
引素吞銀漢凝清洗綠烟
皋禽警露下鄰杵思風前
水是還珠浦山成種玉田
劍沈三尺影鐙罷九枝然
象外形无迹寰中影有遷
稍當雲闕正未映斗城懸
靜對揮宸翰閑臨擘彩牋
境同牛渚上宿在鳳池邊
興掩尋安道詞勝命仲宣
從今紙貴後不復咏陳篇

奉和淮南李相公莫秋即事寄成都武相公

八柱共承天東西別隱然
遠夷爭慕化真相故臨邊
並進夔龍位仍齊龜鶴年
相公有齊年並進之句也同心舟已濟
造膝壁常聯對領專征寄
遙持造物權斗牛添氣色

井絡靜氛煙獻可通三畧
分甘出萬錢漢南趨節制
趙北賜山川玉帳觀渝舞
虹旌獵楚田步嫌雙綬重
夢入九城徧秋與離情動
詩從樂府傳聆音還竊抃
不覺撫么弦李中書自揚州見示詩本因命仰和

元和癸巳歲仲秋詔發江陵
偏師問罪蠻傲後命宣慰釋
兵歸降凱旋之辰率爾成詠
寄

荆南嚴司空

蠻水阻朝宗兵符下渚宮
前籌得上策无戰已成功
漢使星飛入夷心草偃同
歡謠開竹棧拜舞擲桑弓
就日知冰釋投人念鳥窮
網羅三面解章奏九門通

弁服聯操袂雕題盡鞠躬降幡秋練白驛騎畫塵紅
火號休傳警机橋罷亘空登山不見虜振旆自生風
江遠烟波靜軍回氣色雄佇看聞喜後金石賜元戎

武陵書懷五十韻并引

按天官書武陵當翼軫之分其在春秋及戰國時皆
楚地後為秦惠王所并置黔中郡漢興更名曰武陵
東從于今右所常林義陵記云初項籍殺義帝于郴
武陵人曰天下憐楚而興今吾王何罪乃見殺郡民
縞素哭于招屈亭高祖聞而義之故亦曰義陵今郡
城東南亭舍其所也晉宋齊梁間皆以分王子弟事

存于其書永貞元年余始以尚書外郎出補于山守
道貶為是郡司馬至則以方志所載而質諸其人民
顧山川風物皆騷人所賦乃具所聞見而成是詩因
自述其出處之所以然故用書懷為目云

西漢開支郡南朝號威藩四封當列宿百雉俯清沅
高岸朝霞合驚湍激箭奔積陰春暗度將霽霧先昏
俗尚東皇祀謠傳義帝冤桃花迷隱跡練葉慰忠魂
戶算資漁獵鄉豪恃子孫照山畬火動躡月俚歌喧
擁檝舟為市連蕘竹覆軒披沙金粟見拾羽翠翹翻

茗拆蒼溪秀蘋生枉渚妍蒼溪茶為邑人所
重枉渚近在廓東禽驚格

磔起魚戲噏喙繁

按本草經曰鵠鵠聲如鈎轄格磔者是也

沈約臺榭故

李衡墟落存

隱侯臺木奴洲並在

湘靈悲鼓瑟泉客泣酬恩露

變薰葭浦星懸橘柚村虎咆空野震鼉作滿川渾鄰

里皆遷客兒童習左言炎天無冽井霜月見芳蓀清

白家傳澤詩書志所敷列科叨甲乙從宦出丘樊結

友心多契馳聲氣尚吞士安曾重賦元礼許登門草

檄嫖姚幕巡兵戍已屯築臺先自隗送客獨留髡遂

結王畿綬來觀衡室尊鷲飛入鷹隼魚目儼璣璠曉

燭羅馳道朝陽闢帝閣王正會夷夏月朔盛旗幡獨

立當瑤闕傳訝步紫垣按章清犴獄視祭潔蘋蘩御

曆昌期遠傳家寶祚蕃由文光夏啓神教畏軒轅內

禪司天性膺圖授化元繼明懸日月出震統乾坤大

孝三朝備洪恩九族悖百川宗渤澥五岳輔崑崙何

幸逢休運微班識至尊校緡資堯權復土奉山園以時

本官判度支鹽鉄一失貴人意徒聞太學論直廬辭

錦帳遠守愧朱轡巢幕方猶燕搶榆尚笑鯢遭回過

荆郢流落感涼溫旅望花无色愁心醉不惛春江千

里草莫雨一聲猿問卜安冥數看方理病源帶賒衣

改製塵澀劔成痕三秀悲中散二毛傷虎賁未憂禦

魑魅歸願牧鷄豚就日秦京遠臨風楚奏煩南登無

灞岸旦夕上高原

經伏波神祠

蒙蒙脩竹下有路上壺頭漢壘磨髑鬪蠻溪霧雨愁
懷人敬遺像閱世指東流自負霸王畧安知恩澤侯
鄉國辭石柱筋力盡炎洲一以功名累翻思馬少遊

聞董評事病因以書贈董生奉內典

繁露傳家學青蓮譯梵書火風乖四大文字廢三餘
欹枕晝眠靜折巾秋鬢疎武皇思視草誰許茂陵居

贈澧州高大夫司馬霞寓

前年收錦城馬蹋血泥行千里追戎首三軍許勇名

殘兵疑鶴唳空壘辨烏聲一誤雲中級南遊湘水清

宿誠禪師山房題贈二首

宴坐白雲端清江直下看來人望金刹講席繞香壇
虎嘯夜林動鼉鳴秋夜寒衆音徒起滅心在淨中觀

二

不出孤峯上人間四十秋視身如傳舍閱世甚東流
法為因緣立心從次第脩中宵問真偈有住是吾憂

晚泊牛渚

蘆葦晚風起秋江鱗甲生殘霞忽變色遊雁有餘聲
戍鼓音响絕漁家燈火明無人能詠史獨自月中行

罷郡歸洛陽閑居

十年江外守旦夕有歸心及此西還日空成東武吟
花間數殘酒月下一張琴聞說功名事依前惜寸陰

城中閑遊

借問池臺主多居要路津千金買絕境永日屬閑人
竹筵縈紆入花林委曲巡斜陽衆客散空鎖一園春

罷郡歸洛陽寄友人

遠謫年猶少初歸鬢已衰門閑故吏去室靜老僧期
不見蜘蛛集頻為僕句欺穎微囊未出寒甚谷雞吹
濩落唯心在平生有已知商歌夜深後聽者竟為誰

陝州河亭陪韋伍大夫雪後眺望因以留別

與韋有布衣之舊一別二紀經遷貶而歸

雲霽大陽津城池表裏春河流添馬頰原色動龍鱗
萬里獨歸客一栢逢故人因高向西望閑路正飛塵

途中蚤發

中庭望啓明促促事晨征寒樹鳥初動霜橋人未行
水流白煙起日上彩霞生隱士應高枕無人問姓名

初至長安

時自外郡
再授郎官

左遷凡二紀重見帝城春老大歸朝客平安出嶺人
每行經舊處却想侶前身不改南山色其餘事、新

大和戊申歲大有年詔賜百寮出城觀秋稼
謹書盛事以俟采詩者

長安銅雀鳴秋稼與雲平玉燭調寒暑金風報順成
川原呈上瑞恩澤賜閒行欲及重城掩猶聞歌吹聲

蚤秋集賢院即事時為學士

金數已三伏火星正西流樹含秋露曉閣倚碧天秋
灰琯應新律銅壺添夜籌商飈從朔塞爽氣入神州
蕙草香書殿槐花點御溝山明真色見水靜濁煙收
蚤歲忝華省再來成白頭幸依羣玉府有路向瀛洲

金陵懷古

潮滿冶城渚日斜征虜亭蔡洲新草綠幕府舊煙青
興廢由人事山川空地形後庭花一曲幽怨不堪聽

畫居池上亭獨吟

日午樹陰正獨吟池上亭靜看蜂教誨閒想鶴儀形
法酒調神氣清琴入性霧浩然機已息几杖復何銘
分司東都蒙襄陽李司徒相公書問因以奉

寄

蚤忝金馬客晚為商洛翁知名四海內多病一生中
舉世往還盡何人心事同幾時登峴首恃舊楫三公

奉和吏部楊尚書大常李卿二相公策免後

即事述懷贈答十韻

文雅關西族衣冠趙北都有聲真漢相無類勝隋珠
當軸龍為友臨池鳳不孤九天開內殿百辟看晨趨
誠滿澄歌器成功別大鑪餘芳在公論積慶是神扶
步武離台席徊翔集帝梧銓材秉秦鏡典樂去齊筭
瀟灑風塵外逢迎詩酒徒唯應待華皓更食萬錢廚
門下相公榮加冊命天下同歡忝沐眷私輒
敢申賀

冊命出宸衷官儀自古崇特膺平土拜光贊格天功
再佩扶陽印常乘鮑氏驄七賢遺老在猶得詠清風

病中一二禪客見問因以謝之

勞動諸賢者同來問病夫添鑪烹鷄舌灑水淨龍鬚
身是芭蕉喻行須印竹扶醫王有妙藥能乞一九無

劉賓客文集卷第二十三

古調十六首

登司馬錯故城

卧病聞常山旋師策勳宥過王澤大洽因寄李

六侍郎

謁柱山會禪師

善卷壇下作

武陵觀火詩

崔元受少府自貶所還遺山薑花以詩答之

途中蚤發



和董庶中古散調詞贈尹果毅

望衡山

遊桃源一百韻

客有為余話登天壇遇雨之狀因以賦之
有僧言羅浮事因為詩以寫之

秋江蚤發

裴祭酒尚書見示春歸城南青松塢別墅寄王
左丞高侍郎之什命同作

和河南裴尹侍郎宿齋太平寺詣九龍祠祈雨
二十韻

冬夜宴河中李相公中堂命箏歌送酒

冬寒寒何中李財公中堂命率場遊西

劉賓客文集卷第二十三

古調十六首

登司馬錯故城

秦昭王命錯征五溪蠻城在武陵沅江南

將軍將秦師西南奠遐服故壘清江上蒼烟晦喬木

登臨值蕭辰周覽壯前躅塹平陳葉滿墉高秋蔓綠

廢井抽寒菜毀臺生穉穀耕人得古器宿雨多遺鏃

楚塞鬱重疊蠻溪紛詰曲留此數仞基幾人傷遠目

卧病聞常山旋師策勳宥過王澤大洽因寄

李六侍御

寂寂重寐寐病夫卧秋齋夜蛩思幽壁稿葉鳴空塔



南國異氣候火旻尚昏霾瘴烟點飛羽冷氣傷百骸
昨聞凱歌旋飲至酒如淮無戰陋丹水垂仁輕棠街
清廟既策勳圓丘俟燔柴車書一以混幽遠靡不懷
逐客顛顛久故鄉雲雨乖禽魚各有化予欲問齊諧

謁柱山會禪師

我本山東人平生多感慨弱冠遊咸京上書金馬外
結交當世賢馳聲溢四塞勉脩貴及蚤狂健不知退
緇鉢揚芬馨尋尺招瑕類淹留邳南鄙摧頽羽翰碎
安能咎往事且欲去沈痼吾師得真如自在人寰內
哀我墮名網有如翮飛輩瞳瞳揭智炬照使出昏昧

靜見玄關啓歆然初心會夙尚一何微今得失可羨
覺路明證入便門通懺悔悟理言自忘處屯道猶泰
色身豈吾寶慧性非形碍思此靈山期未卜何年載

善卷壇下作在柱山

先生見堯心相與去九有斯民既已治我得安林藪
道為自然貴名是元窮壽瑤壇在此山識者常回首

武陵觀火詩

楚鄉祝融分炎火常為虞是時直突烟發自晨炊徒
盲風扇其威白晝曛陽烏操綆不暇汲循墻寧避踰
怒如列缺光迅與焚輪俱聯延掩四達赫奕成洪鑪

馬蹋塵上霜月明岡頭路行人朝氣銳宿鳥相辭去
流水隔遠村縵山多紅樹悠悠關塞內來往无閑步

和董庶中古散調詞贈尹果毅

昔聽東武吟壯年心已悲如何心落聞君苦辛辭
言有窮巷士弱齡頗尚奇讀得玄女符生當事邊時
借名遊俠窟結客幽并兒往來長楸間能帶雙鞋馳
崩騰天寶末塵暗燕幽垂燿火入咸陽詔徵神武師
是時占軍募挿羽揚金羈萬夫列轅門觀射中戟支
誓當雪國讎親愛從此辭中宵倚長劍起視蚩尤旗
介馬晨蕭蕭陳雲竟天涯陰風獵白草旗檠光參差

勇氣貫中腸視身忽如遺曾擒白馬將虜騎不敢追
貴臣上戰功名姓隨意移終歲肌骨苦他人印累累
謂者既清宮諸侯各罷戲上將賜甲第門戟不可窺
皆血下沾襟天高問无期却尋故鄉路孤影空相隨
行逢里中舊樸遯昔所嗤一言合侯王腰佩黃金龜
問我何自苦可憐真數奇遲回顧徒御得色懸雙眉
翻然悟世途撫已昧所宜田園已荒沒流浪江海湄
鷲禽毛翮摧不見翔雲姿哀容蔽逸氣孑孑無人知
寂寞玄草徒長吟下書惟聞君發哀韻粲若瑤林枝
有客識其真潺湲涕交頤勸爾一杯酒陶然足自怡

望衡山

東南倚盖卑維嶽資柱石前當祝融居上拂朱鳥翻
青冥結精氣磅礴宣地脉還聞膚寸陰能致彌天澤

遊桃源一百韻

沅江清悠悠連山鬱岑寂回流抱絕巘皎鏡含虛碧
昏旦透明媚烟嵐紛委積香蔓垂綠潭暴龍照孤磧
此下潭名綠淵明著前志子驥思遠號子驥事見陶
羅磧名暴龍寂寂無何鄉窅邈天地隔金行太元歲漁者偶探蹟
尋花得幽蹤窺洞穿閤隙依微聞鷄犬豁達值阡陌
居人互相迎笑語如平昔廣樂雖交奏海禽心不擇

揮手一米歸故溪无處覓絲絲五百載市朝幾遷革
有路在壺中無人知地脉皇家感至道聖祚自天錫

金闕傳本支玉函留寶曆禁山開祕宇復戶潔靈宅

詔隸二十戶免徭以奉灑掃

藥檢香氣氤醮壇烟幕幕我来塵外

躅莹若朝醒析崖轉對翠屏水窮留畫鷁三休俯喬

木千級攀峭壁旭日聞撞鐘綵雲迎躡屐遂登窳高

頂縱目還楚澤平湖見草青遠岸連霞赤幽尋如夢

想繚思屬空閒寅緣且忘疲耽玩近成癖清猿自曉

發瑤草陵寒坼祥禽舞葱籠珠樹搖玃璫羽人顧我

笑勸我稅歸軌霓裳何飄飄童顏潔白哲重巖是藩

屏馴鹿受羈勒樓居迺清霄蘿薦成翠帟仙翁遺竹
杖王母留桃核姪女飛丹砂青童護金液寶氣浮鼎
耳神光生劔脊虛无天樂來僊宰鬼兵役丹丘肅朝
礼玉札工紉繹枕中淮南方牀下阜鄉烏明鏡坐遙
夜幽籟聽浙瀝因話近世仙聳然心神惕乃言瞿氏
子骨狀非凡格徃事黃先生羣兒多侮劇警然不適
意元氣貯肝鬲徃徃遊不歸洞中觀博弈言高未易
信猶復加訶責一旦前致辭自云仙期迫言思有道
骨前事常被謫如今三山上名字在真籍悠然謝主
人後歲當來覲言畢依庭樹如烟去無迹觀者皆失

次驚追紛絡繹日莫山逕窮松風自蕭槭遠逢脩蛇
見瞋目光激射如嚴三清居不使恣搜索唯餘涉江
勢八趾在沙礫至今東北隅表以壇上石列仙徒有
名世人非目擊如何度庶際白日振飛翮洞天豈幽
遠得道如咫尺一氣無死生三光自遷易因思人間
世前路何湫窄瞥然此生中善祝期滿百大方播群
類秀氣肖翕闢性靜本同和物牽成阻阨是非鬪方
寸葷血昏精魄遂令多天傷猶喜見班白喧喧車馬
馳苒苒桑榆夕共安緹繡榮不悟泥途適紛吾本孤
賤世業在逢掖九流宗指歸百氏旁擴撫公卿偶慰

薦鄉曲謬推擇居安白社負志傲玄纁辟功名希自
取簪組俟揚歷書府蚤懷鈔射宮嘗發的起草香生
帳坐曹烏集柏賜宴聆蕭韶侍祠閱琮璧嘗聞履忠
信可以行蠻貊自述希古心妄恃干時畫巧言忽成
錦苦志徒食藥平地生峯巒深心有矛戟層波一震
盪弱植果淪溺北渚弔霽均長岑思亭伯禍來昧幾
兆事去空歎惜塵累與時深流年隨漏滴才能疑木
雁報施迷夷跖楚奏繫鍾儀商歌勞甯戚稟性非懸
解對境方感激自從嬰網羅每事問龜策王正降雷
雨環玦賜遷斥儻復夷平人誓將依羽客買山構精

舍領徒開講席冀無身外憂自有閑中益道牙期日
就塵慮乃冰釋且欲遺姓名安能慕竹帛長生尚學
致一溉豈虛擲芝朮資餽糧烟霞拂巾幘黃石履看
墮洪崖肩可拍聊復嗟蜉蝣何煩哀虺蜴青囊既深
味瓊葩亦屢摘縱無西山姿猶免長戚戚

客有爲余話登天壇遇雨之狀因以賦之

清晨登天壇半路逢陰晦疾行穿雨過却立視雲背
白日照其上風雷走于內澗澆雪海翻槎牙玉山碎
蛟龍露鬚鬣神鬼含變態萬狀互相生百音以繁會
俯觀羣動靜始覺天宇大山頂自晶明人間已霧霈

豁然重昏斂澳若春水潰反照入松門瀑流飛縞帶
遙光泛物色餘韻吟天籟洞府撞仙鐘村墟起夕靄
却見山下侶已如迷世代問我何處來我來雲雨外

有僧言羅浮事因爲詩以寫之

君言浮羅上容易見九垓漸高元氣壯洶湧來翼身
夜宿最高峯瞻望浩无鄰海黑天宇曠星辰來逼人
是時當眙魄陰物恣騰振日光吐鯨背劍影開龍鱗
倏若萬馬馳旌旗聳齋淪又如廣樂奏金石含悲辛
疑其有巨霸怪物盡來賓陰陽迭用事乃俾夜作晨
唧喔天鷄鳴扶桑色昕昕赤波千萬里湧出黃金輪

下視生物息霏如隙中塵醯雞仰鑿口亦謂雲漢津
世人信耳目方寸度大鈞安知視聽外怪愕不可陳
悠悠想大方此乃梧水濱知小天地大安能識其真

秋江蚤發

輕陰迎曉日霞霽秋江明草樹含遠思襟懷有餘清
凝睇萬象起朗吟孤憤平渚鴻未矯翼而我已遐征
因思市朝人方聽晨鷄鳴昏昏戀枕衾安見元氣英
納爽耳目變玩竒筋骨輕滄洲有竒趣浩蕩吾將行

裴祭酒尚書見示春歸城南青松塢別墅寄

王左丞高侍郎之什命同作

蚤官閱人事晚懷生道機時從學省出獨望郊園歸
野豹度春水山花映巖扉石頭解金章林下步綠薇
青松鬱成塢脩竹盈尺圍吟風起天籟蔽月無炎威
危徑盤羊腸連甍聳翬飛幽谷響樵斧澄潭環釣磯
因高見帝城冠蓋揚光輝白雲難持寄清韻投所希
二公如長離比翼翔大微含情謝林壑酬贈駢珠璣
顧予久即潛愁寂對芳菲一聞丘中趣再撫黃金微

和河南裴尹侍郎宿齋太平寺詣九龍祠祈

雨二十韻

有事九龍廟潔齋梵王祠玉簫何時絕碧樹空涼颼

吏散埃壒息月高庭宇宜重城肅穆間澗水潺湲時
人稀夜復閑慮靜境亦隨紆懷斷鼇足凝想乘鸞姿
朱明盛農節膏澤方愆期瞻言五靈瑞能救百穀萎
呬喔晨鷄鳴闌干斗柄垂脩容謁神像注意陳正詞
驚飈起泓泉若調雷雨師黑烟聳鱗甲灑液如焚絲
豐隆震天衢列缺揮火旗炎空忽淒緊高雷懸綬縻
生物已霧霈溼雲稍離披丹霞啓南陸白水含東菑
熙熙飛走適藹藹草樹滋浮光動宮觀遠思盈川坻
吳公敏於政謝守工為詩商山有病客言賀舒龐眉

冬夜宴河中李相公中堂命箏歌送酒

朗朗鷓鴣弦華堂夜多思
簾外雪已深坐中人半醉
翠娥發清响曲盡有餘意
酌我莫憂狂老來无逸氣

劉賓客文集卷第二十三

劉賓客文集卷第二十四

七言五十六首

西塞山懷古

陽山廟觀賽神

漢壽城春望

後梁宣明二帝碑堂下作

荊州道懷古

朗州竇貲外見示與澧州元郎中郡齋贈答長句二篇因而繼和

早春對雪奉寄澧州元郎中

賓朗州見示與澧州元郎中蚤秋贈答命同作
衡州徐負外使君遺以縞紵兼竹書箱因成一
篇用答佳贖

唐秀才贈端州紫石硯以詩答之

覽董評事思歸之什因以詩贈

松滋渡望硤中

揚州春夜李端公益張侍御登段侍御平仲密
縣李少府暘祕書張正字復元同會于水館對
酒聯句追刻燭擊銅鉢故事遲輒舉觥以飲之
遠夜艾羣公沾醉紛然就枕余偶獨醒因題詩

於段君枕上以志其事

逢王十二學士入翰林因以詩贈

闕下口號呈柳儀曹

監祠夕月壇書事

戲贈崔千牛

元和甲午歲詔書盡徵江湘逐客余自武陵赴
京宿于都亭有懷續來諸君子

江陵嚴司空見示與成都武相公唱和因命同
作

徵還京師見舊番官馮叔達

故洛城古牆

元和十一年自朗州承召至京戲贈看花諸君子

再遊玄都觀絕句

望夫石

金陵五題

石頭城

烏衣巷

臺城

生公講堂

江令宅

謝寺雙檜

韓信廟

秋夜安國觀聞笙

洛中寺北樓見賀監草書題詩

聞韓賓擢第歸覲以詩美之兼賀韓十五曹長

時韓牧永州

寄楊八壽州

李賈二大諫拜命后寄楊八壽州

宣上人遠寄賀禮部王侍郎放榜后詩因而繼

和

贈東嶽張鍊師

祕書崔少監見示陸馬長句因而和之

寄楊虢州與之舊姻

秋日題竇負外崇德里新居

蒙恩轉儀曹郎依前充入賢學士舉韓湖州自
代因寄七言

途次華州陪錢大夫登城北樓春望因覩李崔
令狐三相國唱和之什翰林舊侶繼踵華城山
水清高鸞鳳翔集皆忝夙眷遂題是詩

三鄉驛樓伏覩玄宗望女几山詩小臣斐然有
感

洛下初冬拜表有懷上京故人

尉遲郎中見示自南遷牽復却至洛城東舊居

之作因而和之

洛中酬福建陳判官見贈

始聞秋風

和蘇十郎中謝病閒居時嚴常侍蕭給事同過
訪歎初有二毛之作

酬淮南廖參謀秋夕見過之作

題王郎中宣義里新居

酬朗州崔負外與任十四兄侍御同過鄙人舊
居見懷之什時守吳郡

美溫尚書鎮定興元以詩寄賀

劉駙馬水亭避暑

述舊賀遷寄陝虢孫常侍

酬端州吳大夫夜泊湘川見寄一絕

劉賓客文集卷第二十四

七言五十六首

西塞山懷古

西晉樓船下益州金陵王氣漠然收
千尋鐵鎖沈江底一片降幡出石頭
人世幾回傷往事山形依舊枕寒流
今逢四海為家日故壘蕭蕭蘆荻秋

陽山廟觀賽神

梁松南征至此遂為其神在朗州

漢家都尉舊征蠻血食如今配此山
曲蓋幽深蒼檜下洞簫愁絕翠屏間
荆巫脉脉傳神語野老婆娑啓醉顏
日落風生廟門外幾人連蹋竹歌還

漢壽城春望

古制州刺史治亭其下有子胥廟魚楚王古墳

漢壽城邊野草生
荒祠古墓對荆榛
田中牧豎燒芻狗
陌上行人看石麟
華表半空經霹靂
碑文纔見滿埃塵
不知何日東瀛變
此地還成要路津

後梁宣明二帝碑堂下作

玉馬朝周從此辭
園陵寂寞對豐碑
千行宰樹荆州道
莫雨蕭蕭聞子規

荊州道懷古

南國山川舊帝畿
宋臺梁館尚依稀
馬嘶古道行人歇
麥秀空城澤雉飛
風吹落葉填宮井
火入荒陵化

寶衣徒使詞臣庾
開府咸陽終日苦思歸

朗州竇貞外見示與澧州元郎中郡齋贈答

長句二篇因而繼和

鴛鴦差池出建章
綵旗朱戶鬱相望
新恩共理犬牙地
昨日同舍雞舌香
白芷江邊分驛路
山桃溪外接甘棠
應憐一罷金閨籍
枉渚逢春十度傷

早春對雪奉寄澧州元郎中

新賜魚書墨未乾
賢人暫屈遠人安
朝驅旌旆行時令
夜見星辰憶舊官
梅蘂覆階鈴閣煥
雪峯當戶戟枝寒
寧知楚客思公子
北望長吟澧有蘭

賓朗州見示與澧州元郎中蚤秋贈答命同

作

鄰境諸侯同舍郎
芷江蘭浦恨無梁
秋風門外旌旗動
曉露庭中橘柚香
玉簫微涼宜白晝
金笳入暮應清商
騷人昨夜聞題鵠
不歎流年惜衆芳

衢州徐員外使君遺以縞紵兼竹書箱因成

一篇用答佳贐

按此郡本自婺州析置徐自台州遷

爛柯山下舊仙郎
列宿來添婺女光
遠放歌聲分白紵
知傳家學與青箱
水朝滄海何時去
蘭在幽林亦自芳
聞道天台有遺愛
人將琪樹比甘棠

唐秀才贈端州紫石硯以詩答之

端州石硯人間重
贈我應知正草玄
闕里廟堂空舊物
開方竈下豈天然
玉燭吐水霞光靜
綵翰朝搖風絳作錦鮮
此日傭工記名姓
因君數到墨池前

覽董評事思歸之什因以詩贈

幾年油幕佐征東
却泛滄浪狎釣童
欹枕醉眠成戲蝶
抱琴閒望送歸鴻
文儒自襲膠西相
倚杖能齊塞上翁
更說扁舟動鄉思
青菰已熟柰秋風

松滋渡望峽中

渡頭輕雨灑寒梅
雲際溶溶雪水來
夢渚草長迷楚

望夷陵土黑有秦灰
巴人淚應猿聲落
蜀客船從鳥道回
十二碧峯何處所
永安宮外是荒臺

揚州春夜李端公益張侍御登段侍御平仲
密縣李少府暘祕書張正字復元同會于水
館對酒聯句追刻燭擊銅鉢故事遲輒舉觥
以飲之連夜艾羣公沾醉紛然就枕余偶獨
醒因題詩於段君枕上以志其事

寂寂獨看金燼落
紛紛只見玉山頽
自羞不是高陽
侶
一夜星星騎馬回

逢王十二學士入翰林因以詩贈

時元貞二
十二年王

以藍田尉
充學士

廐馬翩翩禁外逢
星槎上漢杳難從
定知欲報淮南
詔
促召王褒入九重

闕下口號呈柳儀曹

綵仗神旗獵曉風
雞人一唱鼓蓬蓬
銅壺漏水何時
歇
如此相催即老翁

監祠夕月壇書事

具祀用書

西畔司分晝夜平
羲和亭午太陰生
鏗鏘揖讓秋光
裏
觀者如雲出鳳城

戲贈崔千牛

學道深山許老人，留名萬代不關身。
勸君多買長安酒，南陌東城占取春。

元和甲午歲詔書盡徵江湘逐客，余自武陵赴京宿于都亭，有懷續來諸君子。

雲雨江湘起，卧龍武陵樵。客躡仙蹤，十年楚水楓林下。今夜初聞長樂鐘。

江陵嚴司空見示與成都武相公唱和因命

同作

南荆西蜀大行臺，幕府旌門相對開。
名重三司平水土，威雄八陣役風雷。
彩雲朝望青城起，錦浪秋經白

帝來不是郢中清，唱發誰當丞相扶。
天才

徵還京師見舊番官馮叔達

前者忽忽襆被行，十年顛顛到京城。
南官舊吏來相問，何處淹留白髮生。

故洛城古牆

粉落椒飛知幾春，風吹雨灑旋成塵。
莫言一片危一作色基在，猶過無窮來往人。

元和十一年自朗州承召至京，戲贈看花諸君子。

紫陌紅塵拂面來，無人不道看花回。
玄都觀裏桃千

樹盡是劉郎去後栽

再遊玄都觀絕句

余貞元二十一年為屯田員外郎時此觀未有花是歲出牧連州尋貶朗州司馬居十年召至京師人人皆言有道士手植仙桃滿觀如紅霞遂有前篇以志一時之事旋又出牧今十又四年復為主客郎中重遊玄都蕩然無復一樹唯兔葵燕麥動搖于春風耳因再題二十八字以俟後遊時大和二年三月日百畝庭中半是苔桃花靜盡菜花開種桃道士歸何處前度劉郎今又來

望夫石

正對和州郡樓

終日望夫夫不歸化為孤石苦相思望來已是幾千載只似當時初望時

金陵五題

并引

余少為江南客而未遊秣陵嘗有遺恨後為歷陽守跋而望之適有客以金陵五題相示道尔生思歛然有得他日友人白樂天掉頭苦吟歎賞良久且曰石頭題詩云潮打空城寂寞回吾知後之詩人不復措辭矣餘四詠雖不及此亦不孤樂天之言尔

石頭城

山園故國周遭在潮打空城寂寞回淮水東邊舊時
月夜深還過女牆來

烏衣巷

朱雀橋邊野草花烏衣巷口夕陽斜舊時王謝堂前
燕飛入尋常百姓家

臺城

臺城六代競豪華結綺臨春事最奢萬戶千門成野
草只緣一曲後庭花

生公講堂

生公說法鬼神聽身後空堂夜不扃高坐寂寥塵漠

漠一方明月可中庭

江令宅

南朝詞臣北朝客歸來唯見秦淮碧池臺竹樹三畝
餘至今人道江家宅

謝寺雙檜

雙檜蒼然古貌竒含烟吐霧鬱參差晚依禪客當金
殿初對將軍映畫旗龍象界中成寶蓋鴛鴦瓦上出
高枝長明鐙是前朝焰曾照青青年少時

韓信廟

將畧兵機命世雄蒼黃鍾室歎良弓遂令後代登壇

者每一尋思怕立功

秋夜安國觀聞笙

織女分明銀漢秋桂枝梧葉共颺颺月露滿庭人寂
寂霓裳一曲在高樓

洛中寺北樓見賀監草書題詩

高樓賀監昔曾登壁上筆蹤龍虎騰中國書流讓皇
象北朝文士重徐陵偶因獨見空驚目恨不同時便
伏膺唯恐塵埃轉磨滅再三珍重囑山僧

聞韓賓擢第歸覲以詩美之兼賀韓十五曹

長時韓牧永州

零陵香草滿郊坰丹穴雛飛入翠屏孝若歸來呈畫
讚孟陽別後有山銘蘭陔舊地多纒結桂樹新枝色
更青為報儒林丈人道如今從此鬢星星

寄楊一作韓八壽州

風獵紅旗入壽春滿城歌舞向朱輪八公山下清淮
水千騎塵中白面人桂嶺雨餘多鶴迹茗園晴望似
龍鱗聖朝方用敢言者次第應須舊諫臣

李賈二大諫拜命后寄楊八壽州

諫省新登二直臣萬方驚喜捧絲綸遙知天子明如
日肯放淮陽高卧人

宣上人遠寄賀礼部王侍郎放榜后詩因而

繼和

礼闈新榜動長安九陌人人走馬看一日聲名徧天下
滿城桃李屬春官自吟白雪銓詞賦指示青雲借
羽翰借問支公誰印可支郎天眼定中觀

贈東嶽張鍊師

東岳真人張鍊師高情雅淡世間希堪為烈女書青
簡久事元君住翠微金縷機中拋錦字玉青壇上看
霓衣雲衢不要吹簫伴只擬乘鸞獨自飛

祕書崔少監見示墜馬長句因而和之

麟臺少監舊仙郎洛水橋邊墜馬傷塵汗腰間青鬃
綬風飄掌上紫遊韉上車著作應來問折臂三公定
送方猶賴德全如醉者不妨吟咏入篇章

寄楊虢州與之舊姻

避地江湖知幾春今來本郡擁朱輪阮郎元復里中
舊楊僕却為關外人各繫一官難命駕每懷前好易
沾中玉城山裏多靈藥擺落功名且養神

秋日題竇貲外崇德里新居

竇氏判
度支案

長愛街西風景閒到君居處暫開顏清光門外一渠
水秋色牆頭數點山疎種碧松通月朗多栽紅藥待

春還莫言堆案无餘地認得詩人在此間

蒙恩轉儀曹郎依前充入賢學士舉韓湖州

自代因寄七言

翔鸞闕下謝恩初通籍由未
在石渠暫入南宮判祥
瑞還歸內殿閱圖書故人
猶在三江外同病凡經二
紀餘今日薦君嗟久滯不
唯文體似相如

途次華州陪錢大夫登城北樓春望因覩李

崔令狐三相國唱和之什翰林舊侶繼踵華

城山水清高鸞鳳翔集皆
忝夙眷遂題是詩

城樓四望出風塵見盡關
西渭北春百二山河雄上

國一雙旌旆委名臣壁中
今日題詩處天上同時草
詔人莫怪老郎呈濫吹官
途雖別舊情親

三鄉驛樓伏覩玄宗望女
几山詩小臣斐然
有感

開元天子萬事足唯惜當
時光景促三鄉陌上望仙
山歸作霓裳羽衣曲仙心
從此在瑤池三清八境相
追隨天上忽乘白雲去世
間空有秋風詞

洛下初冬拜表有懷上京故人

鳳樓南面控三條拜表郎
官早渡橋清洛曉光鋪碧
葦上陽霜葉剪紅綃省門
簪組初成列雲路駕鸞想

退朝寄謝慙懃九天侶
捨榆水擊各逍遙

尉遲郎中見示自南遷牽復却至洛城東
舊居之作因而和之

曾遭飛語十年謫
新受恩光萬里還
朝服不妨遊洛浦
郊園依舊看嵩山
竹舍天籟清商樂
水遶庭臺碧玉環
留作功成退身地
如今只是暫時閒

洛中酬福建陳判官見贈

潦倒聲名擁腫材
一生多故苦遭迴
南宮舊籍遙相管
東洛閒門晝永開
靜對道流論藥石
偶逢詞客與瓊瑰
怪君近日文鋒利
新向延平看劍來

始聞秋風

昔看黃菊與君別
今聽玄蟬我却回
五夜廳廳枕前覺
一年顏狀鏡中來
馬思邊草拳毛動
鷗看青雲睡眼開
天地肅清堪四望
為君扶病上高臺

和蘇十郎中謝病閒居時嚴常侍蕭給事同過訪歎初有二毛之作

清瀛隱几望雲空
左掖駕鸞到室中
一卷圖書消永日
數莖斑鬢對秋風
菱花照后容雖改
著草占來命已通
莫怪人人驚蚤白
綠君合是黑頭翁

酬淮南廖參謀秋夕見過之作

休公昔為楊州從事參謀

從釋子
反初服

揚州從事夜相尋
無限新詩月下吟
初服已驚玄髮
長高情猶向碧雲深
語餘時舉一椀酒
坐久方聞數
處砧不逐繁華訪
閒散知君擺落俗人心

題王郎中宣義里新居

愛君新買街西宅
客到如遊鄠杜間
雨后退朝貪種
樹申時出省趁看山
門前落陌三條近
墻內池亭萬
境閒見擬移居作鄰里
不論時節請開關

酬朗州崔負外與任十四兄侍御同過鄙人
舊居見懷之什時守吳郡

昔日居鄰招屈亭
楓林橘樹鷓鴣聲
一辭御苑青門
去十見蠻江白芷生
自此曾沾宣室召
如今又守闔
閭城何人萬里能相憶
同舍仙郎與外兄
任侍御子
外兄崔負
外南宮
同官

美溫尚書鎮定興元以詩寄賀

旌旗入境犬無聲
戮盡鯨鯢漢水清
從此世人開耳目
始知名將出書生

劉駙馬水亭避暑

千竿竹翠數蓮紅
水閣虛涼玉簟空
琥珀玳紅疑瀉
酒水精簾密更通風
賜冰滿盃沈朱實
法饌盈盤覆

碧籠盡日逍遙避煩暑再三珍重主人翁

述舊賀遷寄陝虢孫常侍

南宮左輔
兩處交代

南宮幸襲芝蘭後左輔曾交印綬來多病未離清洛苑新恩已歷望仙臺關頭古塞桃林靜城下長河竹箭回聞道隨車有零雨此時偏動子荆才

酬端州吳大夫夜泊湘川見寄一絕

夜泊湘川逐客心月明猿叫血沾襟湘妃舊竹痕猶淺從此因君染更深

劉賓客文集卷第二十四

劉賓客文集卷第二十五

雜體四十首

翠微寺有感

連州臘日觀莫徭獵西山

觀舞柘枝二首

君山懷古

秋江晚泊

步出武陵東亭臨江寓望

秋日送客至潛水驛

晚歲登武陵城顧望水陸悵然有作

湖州崔郎中魯長寄三癖詩自言癖在詩與琴
酒其詞逸而高吟咏不足昔柳吳興亭皋隴首
之句王融書之白團扇故為四韻以謝之

為郎分司寄上都同舍

登陝州城北樓卻寄京都親友

請告東歸發霸橋卻寄諸僚友

秋晚題湖城驛上池亭

平蔡州三首

平齊行二首

城西行

武昌老人說笛歌

西山蘭若試茶歌

廟庭偃松詩

并引

答東陽于令涵碧圖詩

并引

贈致仕滕庶子先輩

咏红柿子

庭竹

臺城懷古

題壽安甘棠館二首

與歌者米嘉榮

聽舊宮中樂人穆氏唱歌

渾侍中宅牡丹

唐郎中宅與諸公同飲酒看牡丹

與歌者何戡

與歌童田順郎

燕爾館破屏風所畫至精人多歎賞題之

賞牡丹

寄陝州姚中丞

奉酬湖州崔郎中見寄五韻

劉賓客文集卷第二十五

雜體三十九首

翠微寺有感

吾王昔遊幸離宮雲際開朱旗迎夏蚤涼軒避暑來
湯餅賜都尉寒冰頒上才龍顛不可望玉坐生浮埃
連州臘日觀莫徕獵西山

海天殺氣薄蠻軍部位驚林紅葉盡變原黑草初燒
圍合繁鉦息禽興大旆搖張羅依道口嗾犬上山腰
猜鷹慮奮迅驚麋時躅跳瘴雲四面起臘雪半空消
箭頭餘鷓血鞍傍見雉翹日莫還城邑金笳發麗譙

觀舞柘枝二首

胡服何威蕤，僊僊登綺墀。神颯獵紅蕖，龍燭然金枝。
垂帶覆纖腰，安鈿當嫵眉。翹神中繁鼓，傾眸遡華棖。
葵餘有舊曲，淮南多冶詞。欲見傾城處，君看赴節時。

二

山雞臨清鏡，石燕赴遙津。何如上客會長袖，入華茵。
體輕似无骨，觀者皆聳神。曲盡四月處，曾波猶注人。

君山懷古

屬君八十一，此地阻長風。千載威靈盡，赭山寒水中。

秋江晚泊

長泊起秋色，空江涵霽暉。萬霞千萬狀，賓鴻次第飛。
古戍見旗迴，荒村聞犬稀。軒峨船上客，勸酒夜相依。
步出武陵東，亭臨江寓望。

鷹至感風候，霜餘變林麓。孤颿帶日來，寒江轉沙曲。
戍遙旗影動，津晚櫓聲促。月上彩霞收，漁歌遠相續。
秋日送客至潛水驛

候吏立沙際，田家連竹溪。神林社日鼓，茅屋午時鷄。
雀噪晚禾地，蝶飛秋草畦。驛樓官樹近，疲馬再三嘶。
晚歲登武陵城，顧望水陸，悵然有作。

星象乘鳥翼，蠻貊想犬牙。俚人祠竹節，仙洞開桃花。

城基歷漢魏江源自賓巴華表廖立墓菜地黃瓊家
霜輕菊秀晚石淺水紋斜樵音遠故壘汲路明寒沙
清風稍改葉盧橘始含葩野橋鳴驛騎叢祠發迴笳
跳鱗避舉網倦鳥寄行查路塵高出樹山火遠連霞
夕曛轉赤岸浮藹起蒼葭軋軋渡溪梁連連赴林鷗
叫閭道非遠賜環期自賒孤臣本危涕喬木在天涯

湖州崔郎中魯長寄三癖詩自言癖在詩與
琴酒其詞逸而高吟咏不足昔柳吳興亭皋
隴首之句王融書之白團扇故為四韻以謝
之

視事畫屏中自稱三癖翁管弦泛春渚旌旆拂晴虹
酒對青山月琴韻白蘋風會書團扇上知君文字工
為郎分司寄上都同舍

籍通金馬門身在銅駝陌省闈晝無塵宮樹遠凝碧
荒街淺深轍古渡潺湲石唯有嵩丘雲堪誇蚤朝客
登陝州城北樓卻寄京都親友

獨上百尺樓目窮思亦愁初日徧露草野田荒悠悠
塵息長道白林清宿烟收回首雲深處水懷鄉舊遊
請告東歸發霸橋卻寄諸僚友

征途出霸埃回首傷如何故人雲雨散滿目山川多

征車無停軌流景同迅波前歡漸成昔感歎益勞歌

秋晚題湖城驛上池亭

秋次池上館林塘照南榮塵衣紛未解幽思浩已盈
風蓮墜故萼露菊含晚英恨為一夕客愁聽晨鷄鳴

平蔡州三首

蔡州城中衆心死祆星夜落照河水漢家飛相下天
來馬箠一揮門洞開賊徒崩騰望旗拜有若羣蟄驚
春雷狂童面縛登檻車大帛夭矯垂捷書相公從容
來鎮撫常侍郊迎負文弩四人歸業閭里閒小兒跳
踉健兒舞

汝南晨鷄喔喔鳴城頭鼓角音和平路傍老人憶舊
事相與感激皆涕零老人收泣前致辭官軍入城人
不知忽驚元和十二載重見天寶承平時

九衢車馬渾渾流使臣來獻淮西囚四夷聞風失七
筋天子受賀登高樓妖童擢髮不足數血污城西一
杯土南風無火楚澤閒夜行不鎖穆陵關策勳祀畢
天下泰猛士按劍看常山時唯常山不庭

平齊行二首

胡塵昔起薊北門河南地屬平盧君貂裘代馬繞東
岳嶧陽孤桐削為角地形十二虜意驕恩澤含容歷

四朝魯人背科帶弓箭齊人不復聞蕭韶今朝天子
聖神武手握玄武平九土初哀狂童襲故事文告不
來方震怒去秋詔下誅東平官軍四合猶嬰城春來
群鳥噪且驚氣如壞山墮其庭牙門大將有劉生夜
半射落欒槍星帳中虜血流滿地門外三軍舞連臂
驛騎函首過黃河城中无賊天氣和朝庭侍郎來慰
撫耕夫滿野行人歌

泰山沈寇六十年旅祭不饗生愁烟今逢聖君欲封
禪神使陰兵來助戰祇氛掃盡河水清日觀杲杲御
雲見開元皇帝東封時百神受職爭奔馳千鈞猛籊

順流下洪波涵淡浮熊羆侍臣蕪公秉文筆玉檢告
天無愧詞當今睿孫承聖祖岳神望幸河宗舞青門
大道屬車塵共待歲筴翠華舉

城西行

城西簇簇三叛族叛者為誰蔡吳蜀中使提刀出禁
來九衢車馬轟成雷臨刑與酒栝未覆仇家白官先
請肉守吏能然董卓臍飢鳥來覘桓玄目城西人散
恭街平雨洗血痕春草生

武昌老人說笛歌

武昌老將七十餘手把度令相問書自言少小學吹

笛早事曹王曾賞激往事鎮戍到蘄州楚山蕭蕭笛
竹秋當時買材恣搜索典卻身上烏貂裘古苔蒼蒼
封老節石上孤生飽風雪商聲五音隨指發水中龍
應行雲絕曾將黃鶴樓上吹一聲占盡秋江月如今
老去語猶遲音韻高低耳不知氣力已微心尚在時
時一曲夢中吹

西山蘭若試茶歌

山僧後檐茶數叢春來映竹抽新茸宛然為客振衣
起自傍芳叢摘鷹觜斯須炒成滿室香便酌砌下金
沙水驟雨松殼入鼎來白雲滿盃花裴回悠揚噴鼻

宿醒散清峭徹骨煩襟開陽崖陰嶺冬殊氣未若竹
下莓苔地炎帝雖嘗未解煎桐君有籙那知味新芽
連拳半未舒自摘至煎俄頃餘木蘭墜露香微似瑤
草臨波色不如僧言霧味宜幽寂采采翹英為嘉客
不辭緘封寄却齋軌并銅鉏損標格何況蒙山顧渚
春白泥赤印走風塵欲知花乳清冷味須是眠雲跂
石人

廟庭偃松詩

并引

侍中后閣前有小松不待年而偃丞相晉公為賦詩
美其猶龍蛇然植于高檐喬木間上欽旁軋盤蹙傾

亞似不得天和者公以遂物性為意乃加憐焉命畚
土以壯其趾使無歌索絢以牽其幹使不仆盥漱之
餘以潤之顧盼之輝以照之發于人心感召和氣無
復夭闕坐能敷舒擗之跽感化為竒古故雖衰丈而
有偃號焉予嘗詣閣白事公為道所以且示以詩竊
感嘉木之逢時斐然成咏

勢軋枝偏根已危高情一見與扶持忽從顛顛有生
意卻為離披無俗姿影入巖廊行樂處韻含天籟宿
齋時謝公莫道東山去待取成陰滿鳳池

答東陽于令涵碧園詩

并引

東陽令于興宗丞相燕國公之猶子生綺襦紈袴間
所見皆貴盛而挈然有心如山東書生前年白有司
願為親民官以自效遂補東陽及蒞官以簡易為治
故多暇日一旦于縣五里偶得竒境埋没于翳蒼中
于生自以有特操而生于公侯家由覆蔭入仕常忽
忽歎息因移是心開扶泉石芟去蘿蒿斧凡材畚息
壤而清溪翠巖森立坐來因構亭其端題曰涵碧碧
流貫于庭中如青龍蜿蜒冰聲激射人樹石雲霞列
于前昏旦萬狀惜其居地不得有聞于時故圖之來
乞詞既元負尤物予亦久翳蘿蒿者睹之慨然遂賦

七言以貽後之文士

東陽本是佳山水何况曾經沈隱侯
化得邦人解吟詠如今縣令亦風流
新開潭洞疑仙境遠寫丹青到
雖州落在尋常畫師手猶能三伏凜生秋

贈致仕滕庶子先輩

時及第人中最善

朝服歸來畫錦榮登科記上更無名
壽觴每使曾孫獻勝境長攜衆妓行
矍鑠據鞍時聘騁一作健殷勤把酒
尚多情陵寒卻向山陰去衣繡郎君雪裏迎

時令子為御史

主務在越中

咏红柿子

曉連星彩出晚帶日光懸木因遺採掇翻自保天年

庭竹

露滌鈿粉節風搖青玉枝依依似君子无地不相宜

臺城懷古

清江悠悠王氣沈六朝遺事何處尋
宮牆隱嶼園野澤鸛鷓夜鳴秋色深

題壽安甘棠館二首

公館似仙家池青竹徑斜山禽忽驚起衝落半岩花

二

門前洛陽道門裏桃源路塵土與烟霞其間十餘步

與歌者米嘉榮

唱得涼州意外聲
舊人唯數米嘉榮
近來時世輕先輩
好染髭鬚事後生

聽舊宮中樂人穆氏唱歌

曾隨織女渡天河
記得雲間第一歌
休唱貞元供奉曲
當時朝士已無多

渾侍中宅牡丹

徑尺千餘朵
人間有此花
今朝見顏色
更不向諸家

唐郎中宅與諸公同飲酒看牡丹

今日花前飲
甘心醉數椀
但愁花有語
不為老人開

與歌者何戡

二十餘年別帝京
重聞天樂不勝情
舊人唯有何戡在
更與殷懃唱渭城

與歌童田順郎

天下能歌御史娘
花前月底奉君王
九重深處無人見
分付新聲與順郎

燕爾館破屏風所畫至精人多歎賞題之

畫時應遇空亡日
賣處難逢識別人
唯有多情往來客
強將衫袖掃埃塵

賞牡丹

庭前芍藥妖无格池上芙蓉淨少情惟有牡丹真國
色花開時節動京城

寄陝州姚中丞

時分司
東都

八月天地肅二陵風雨收旌旗闕下來雲日關東秋
禹跡想前事漢臺餘故丘裴回襟帶地左右帝王州
留滯悲昔老恩光榮徹侯相思望棠樹一寄商聲謳

奉酬湖州崔郎中見寄五韻

山陽昔相遇灼灼晨葩鮮同遊翰墨場和樂埴篔簹然
一落名宦途浩如乘風船行當衰暮日卧埋淮海邊
猶期謝病後樂桑榆年

劉賓客文集卷第二十五

劉賓客文集卷第二十六

樂府五十一首上

團扇歌

荊州歌二首

紀南歌

宜城歌

順陽歌

馬嵬行

視刀環歌

三閣辭四首

吳聲

清華詞

步虛詞二首

桃源行

魏宮詞二首

阿嬌怨

九華山并引

送春曲

送夏曲三首

更衣曲

柳花詞三首

淮陰行五首

并引

送春詞

競渡曲

秋詞二首

隄上行

采菱行

秋風引

莫徭歌

蠻子歌

洞庭秋月

蹋歌詞四首

劉賓客文集卷第二十六

樂府上

團扇歌

團扇復團扇奉君清暑殿秋風入庭樹從此不相見
上有衆鸞女蒼蒼網蟲遍明年入懷袖別是機中練

荊州歌二首

渚宮楊柳暗麥城朝雉飛可憐蹋青伴乘煖著輕衣

二

今日好南風商旅相催發沙頭檣竿上始見春江濶

紀南歌

風烟紀南城塵土荆門路天寒多獵騎走上樊姬墓
宜城歌

野水遶空城行塵起孤駟荒臺側生樹石碣陽鐫額
靡靡渡行人溫風吹宿麥

順陽歌

朝辭官軍駟前望順陽路野水齧荒坟秋蟲鏤官樹
曾聞天寶末胡馬西南驚城守魯將軍拔城從此去

馬嵬行

綠野扶風道黃塵馬嵬駟路邊楊貴人坟高三四尺
乃問里中兒皆言幸蜀時軍家誅佞倖天子捨妖姬

羣吏伏門屏貴人牽帝衣低回轉美目風日爲无暉
貴人飲金屑倏忽葬英莫平生服杏丹顏色其如故
屬車塵已遠里巷來窺覷共愛宿妝妍君王畫眉蹙
履綦元復有文組光未滅不見岩畔人空見陵波襪
郵童愛蹤跡私手解鞶結傳看千萬眼縷絕香不歇
指環照骨明首飾敵連城將入咸陽市猶得賈胡驚

視刀環歌

常恨言語淺不如人意深今朝兩相視脉脉萬種心

三閣辭四首 吳聲

貴人三閣上日晏未梳頭不應有恨事嬌甚卻成愁

珠箔曲瑣鈎子細見揚州北兵那得度浪語判悠悠
沈香帖閣柱金鏤畫門楣回首降幡下已見黍離離
三人出智井一身登檻車朱門漫臨水不可見鱸魚

更衣曲

博山炯炯吐香霧紅燭引至更衣處夜如何其夜漫
漫鄰鷄未鳴寒雁度庭前雪壓松桂叢廊下點點懸
紗籠滿堂醉客爭笑語嘈噴琵琶琵琶青幕中

淮陰行五首并引

古有長干行言三江之事悉矣余嘗阻風淮陰作淮
陰行以裨樂府

簇簇淮陰市竹樓緣岸上好日起檣竿鳥飛驚五兩
今日轉船頭金烏指西北烟波與春草千里同一色
船頭大銅鑲摩挲光陳陳蚤晚使風來沙頭一眼認
何物令儂羨羨郎船尾燕銜泥趁檣竿宿食長相見
隔浦望行船頭昂尾憶憶无柰脫菜時清淮春浪軟

競渡行

競渡始于武陵至今舉楫而相和之其音咸呼曰何在斯招屈之義事見圖經

沅江五月平隄流邑人相將浮綵舟霧均何年歌已
矣哀謠振楫從此起揚枹擊節雷闐闐亂流齊進聲
轟然蛟龍得雨鬚鬣動蟬螭飲河形影聯刺史臨流
寡翠幃揭竿命爵分雄雌先鳴餘勇爭鼓舞未至銜

枚顏色沮百勝本自有前期一飛由來无定所風俗
如狂重此時縱觀云委江之湄絲旗夾岸照蛟室羅
襪陵波呈水嬉曲終人散空愁莫招屈亭前水東注

隄上行三首

酒旗相望大隄頭隄下連樯隄上樓日莫行人爭渡
急槳聲幽軋滿東流

江南江北望烟波入夜行人相應歌桃葉傳情竹枝
怨水流無限月明多

長隄繚繞水徘徊酒舍旗高次第開日晚上簾招估
客舸我大扁落颿來

采菱行

武陵俗嗜菱歲秋矣有女郎盛遊
于馬湖薄言采之歸以御客古有采

菱曲罕傳其詞故
賦之以俟采詩者

白馬湖平秋日光紫菱如錦采駕翔盪中遊女滿中
央采菱不顧馬上郎爭多逐勝紛相向時轉蘭橈破
輕浪長鬢弱袂動參差釵影釧文浮蕩漾笑語哇咬
顧晚暉蓼花綠岸扣船歸歸來共到市橋步野蔓繫
船萍滿衣家、竹樓臨廣陌下有連樯多估客攜觴
薦芟夜經過醉蹋大隄相應歌屈平祠下沅江水月
照寒波白烟起一曲南音此地聞長安北望三千里

秋風引

何處秋風至蕭蕭送雁羣朝來入庭樹孤客最先聞
莫徭歌

莫徭自生長名字無符籍市易雜鮫人婚姻通木客
星居占泉眼火種開山脊夜渡千仞谿含沙不能射

蠻子歌

蠻語鈎鞞音蠻衣斑斕布熏狸掘沙鼠時節祠盤瓠
忽逢乘馬客恍若驚鷹顧腰斧上高山竟行無舊路

洞庭秋月

洞庭秋月生湖心曾波萬頃豁鎔金孤輪徐轉光不
定遊氣濛濛隔寒鏡是時白露三秋中湖平月上天

地空岳陽城頭暮角絕蕩漾已過君山東山城蒼蒼
夜寂窸水月逶迤繞城白盪槩已童歌竹枝連櫓估
客吹羗笛勢高夜久陰力全金氣肅肅開星塵浮雲
野馬蹄四裔遙望星斗當中天天鷄相呼曙霞出劍
影舍光讓朝日日出喧喧人不閒夜來清景非人間

蜀歌詞四首

春江日出大隄平隄上女郎連袂行唱盡新詞歡不
見紅霞映樹鷓鴣鳴
桃溪柳陌好經過鐙下妝成月下歌為是襄王故宮
地至今猶自細膏多

新詞宛轉遞相傳
振袖傾鬟風露前
月落烏啼雲雨散
遊童陌上拾花鈿

日莫江南聞竹枝
南人行樂北人悲
自從雪裏唱新曲
直到三春花盡時

華清詞

日出驪山東
裴回照溫泉
樓臺影玲瓏
稍稍開白烟
言昔太上皇
常居此祈年
風中間清樂
往往來列仙
翠華入五雲
紫氣歸上玄
哀哀生人淚
泣盡弓劍前
聖道本自我
凡情徒顯然
小臣感玄化
一望青冥天

步虛詞二首

阿母種桃雲海際
花落子成三千歲
海風吹折最繁枝
跪捧瓊槃獻天帝

華表千年一鶴歸
凝丹為頂雪為衣
星星仙語人聽盡
却向五雲翻翅飛

桃源行

漁舟何招招
浮在武陵水
垂綸擲餌信流去
誤入桃源行
數里清源尋盡花
綿綿蹋花覓逕至
洞前洞門蒼黑烟
霧生暗行數步逢
虛明俗人毛骨驚
仙子爭來致詞何至此
須臾皆破冰雪顏
笑言委曲問人間
因嗟隱身來種玉
不知人世如風燭
筵羞石髓勸客

餐饗藝松脂留客宿雞聲犬聲遙相聞曉光蔥蘢開
五雲漁人振衣起出戶滿庭無路花紛紛翻然恐迷
鄉縣處一息不肯桃源住桃花滿溪水似鏡塵心如
垢洗不去仙家一出尋無蹤至今水流尚重重

魏宮詞二首

日晚長秋簾外報望陵歌舞在明朝漆鑪大欲熏衣
麝憶得分明不忍燒

日映西陵松柏枝下臺相顧一相悲朝來樂府長歌
曲唱著君王自作詞

阿嬌怨

望見歲隄舉翠華試開金屋掃庭花須臾宮女傳來
信言幸平陽公主家

九華山并引

九華山在池州青陽縣西南九峯競秀神采奇異昔
予仰太華以為此外无奇愛女几荆山以為此外无
秀及今見九華始悼前言之容易也惜其地偏且遠
不為世所稱故歌以大之

奇峯一見驚魂魄意想洪壚始開闢疑是九龍夭矯
欲攀天忽逢霹靂一聲化為石不然何至今悠悠億
萬年氣勢不死如騰公音騫輕舉貌雲含幽兮月添冷日

月凝輝兮江漾影結根不得要路津迴秀長在無人
境軒皇封禪登雲亭大禹會計臨東溟乘標力最反
不來廣樂絕獨與猿鳥愁青熒君不見敬亭之山黃山行貌
索漠兀如斷岸元稜角宣城謝守一首詩遂使名聲
齊丘岳九華山九華山自是造化一尤物焉能籍甚
乎人間

送春曲

春向晚春晚思悠哉風雲日已改花葉自相催漠漠
空中去何時天際來

春已莫冉冉如人老映葉見殘花連天是青草可憐

桃與李從此同桑棗

春景去此去何時回遊人千萬恨落日高臺寂寞
繁花盡流鶯歸不來

初夏曲

銅壺方促夜斗柄暫南回稍嫌單衣重初憐北戶開
西園花已盡新月為誰來

時節過繁華陰陰千萬家巢禽命子戲園果墜枝斜
寂寞孤飛蝶窺叢覓晚花

綠水風初煖青林露草晞麥田雉朝雊桑野人莫歸
百舌悲花盡元稹來去飛

柳花詞三首

開從綠條上散逐香風速故取花落時悠揚占春晚
輕飛不假風輕落不委地撩亂舞晴空發人無限思
晴天黯黯雪來送青春莫无意似多情千家萬家去

送春詞

昨來樓上迎春處今日登樓又送歸蘭葉殘粧含露
泣柳條長袖向春揮佳人對鏡容色改楚客臨江心
事遠萬古至今同此恨无如一醉盡忘機

秋詞二首

自古逢秋悲寂寥我言秋日勝春朝晴空一鶴排雲

上便引詩情到碧霄

山明水淨夜來霜數樹深紅出淺黃試上高樓清入
骨豈如春色嗾人狂

劉賓客文集卷第二十七

樂府五十七首

下

秦娘歌

并引

秋扇詞

搗衣曲

七夕二首

龍陽縣歌

度桂嶺歌

揆田歌

并引

畬田作

邊風行

竹枝詞九首

楊柳枝詞九首

浪淘沙詞九首

瀟湘神二首

拋毬樂詞二首

楊柳枝詞二首

竹枝詞二首

葡萄歌

紇那曲詞二首

題鳩吟

牆陰歌

觀雲篇

沓潮歌并引

百花行

春有情篇

路傍曲

白鷺兒

壯士行

劉賓客文集卷第二十七

樂府下

秦娘歌并引

秦娘本韋尚書家主謳者初尚書為吳郡得之命樂工誨之琵琶使之歌且舞元幾何盡得其術居一二歲攜之以歸京師京師多新聲善工于是又捐去故技以新聲度曲而秦娘名字往往見稱于貴遊之間元和初尚書薨于東京秦娘出居民間久之為蘄州刺史張慜所得其後慜坐事謫居武陵郡慜卒秦娘無所歸地荒且遠无有能知其容與藝者故日抱樂

罷而哭其音焦殺以悲雜客聞之為歌其事以續于
樂府云

秦娘家本閭門西門前綠水環金隄有時妝成好天
氣走上皋橋折花戲風流太守韋尚書路傍忽見停
隼旗斗量明珠鳥傳意紺憶迎入專城居長鬢如雲
衣似霧錦茵羅薦承輕步舞學驚鴻水榭春歌撩上
客蘭堂莫從郎西入帝城中貴遊簪組香簾櫳低鬟
緩視抱明月纖指破撥生胡風繁華一旦有消歇題
劍無光履聲絕洛陽舊宅生草萊杜陵蕭蕭松柏哀
妝奩蟲網厚如繭博山鑪側傾寒灰蘄州刺史張公

子白馬新到銅駝里自言買笑擲黃金月墮雲中從
此始安知鵬鳥坐隅飛寂寞旅魂招不歸秦嘉鏡有
前時結韓壽香銷故篋衣山城少人江水碧斷鴈哀
猿風雨夕朱弦已絕為知音雲鬢未秋私自惜舉目
風烟非舊時夢尋歸路多參差如何將此千行淚更
灑湘江斑竹枝

秋扇詞

莫道恩情無重來人間榮謝遞相催當時初入君懷
袖豈念寒鑪有死灰

搗衣曲

爽砧應秋律繁杵含淒風一一遠相續家家音不同
戶庭凝露清伴侶明月中長裾委襪積輕珮垂璉瓏
汗餘衫更馥鈿移麝半空報寒驚邊雁促思聞候蟲
天狼正芒角虎落定相攻盈筐寄何處征人如轉蓬

七夕二首

河鼓靈旗動姮娥破鏡斜滿空天是幕徐轉斗為車
機罷猶安石橋成不碍查寧知觀津女竟夕望雲涯

二

天衢啓雲帳神馭上星橋初喜渡河漢頻驚轉斗杓
餘霞張錦幃輕電閃紅銷非是人間世還悲后会遙

龍陽縣歌

縣門白日无塵土百姓縣前挽魚罟主人引客登大
隄小兒縱觀黃犬怒鷓鴣驚鳴遠籬落橘柚垂芳照
窓戶沙平草綠見吏稀寂歷斜陽照懸鼓

度桂嶺歌

桂陽嶺下下復高高人稀鳥獸駭地遠草木豪寄言
千金子知予歌者勞

揀田歌并引

連州城下俯接村墟偶登郡樓適有所感遂書其事
為俚歌以俟采詩者

岡頭花草齊燕子東西飛田塍望如線白水光參差
農婦白紵帶農夫綠蓑衣齊唱田中歌嚶儻如竹枝
但聞怨响音不辨俚語詞時時一大笑此必相嘲嗤
水平苗漠漠烟火生虛落黃犬往復還赤鷄鳴且啄
路傍誰家郎烏帽衫袖長自言上計吏年幼離帝鄉
田夫語計吏君家儂定譜一來長安罷眼大不相參
計吏笑致辭長安真大處省門高軒峨儂入无度数
昨來補衛士唯用筒竹布君看二三年我作官人去

畬田作

何處好畬田團團縵山腹鑽龜得兩卦上山燒卧木

驚麇走且顧羣雉聲呶喔紅焰遠成霞輕煤飛入郭
風引上高岑獵獵度青林青林望靡靡赤光低復起
照潭出老蛟爆竹驚山鬼夜色不見山孤明星漢間
如星復如月俱逐曉風滅本從敲石光遂致烘天熱
下種煖灰中乘陽坼牙孽蒼蒼一雨後茗穎如雲發
巴人拱手吟耕耨不關心由來得地勢徑寸有餘陰

葡萄歌

野田生葡萄纏繞一枝蒿移來碧墀下張王日日高
分歧浩繁縹脩蔓蟠詰曲揚翹向庭柯意思如有屬
為之立長架布護當軒綠米液澆其根理疎看滲漉

繁葩組綬結懸寶珠璣盛馬乳帶輕霜龍鱗躍初旭
有客汾陰至臨堂瞪雙目自言我晉人種比如種玉
釀之成美酒令人飲不足為君持一斗往取涼州牧

題鳩吟

朝陽有吟鳳不聞千萬祀題鳩催衆芳晨間先入耳
秋風白露晞從是爾啼時如何上春日唧唧滿庭飛

牆陰歌

白日左右浮天潢朝晡影入東西牆昔為兒童在陰
戲當時意小覺日長東隣侯家吹笙簧隨陰促促移
象床西鄰田舍乏糟糠就影汲汲舂黃梁因思九州

四海外家家只占牆陰內莫言牆陰咫尺間老卻生
人如等閒君看眼前光景促中心莫學太行山

觀雲篇

興雲感陰氣疾走如見機晴來意態行有若功成歸
蔥籠含晚景凝白潔秋暉夜深度銀漢銀漢仙人衣

沓潮歌 并引

元和十年夏五月終風駕濤南海羨溢南人曰沓潮
也率三更歲有之予為連州客或為予言其狀因歌
之附于南越志

屯門積日無回颿滄波不歸成沓潮轟如鞭石屹且

搖亘空欲駕龍翼橋驚湍盛縮悍而驕大陵高岸失
岩堯四邊元阻音響調皆負元氣掀重霄介鯨得性
方迢遙仰鼻噓吸揚朱翹海人狂顧迭相招罽衣鑿
首聲曉曉征南將軍登麗譙赤旗指麾不敢囂翌日
風回沴氣消歸濤納納景昭昭烏泥白沙復滿海海
色不動如青瑤

百花行

長安百花時風景宜輕薄無人不沽酒何處不聞樂
長風連夜動微雨凌曉濯紅焰出牆頭雪花映樓角
繁紫間松竹遠黃遠篤落臨落不勝愁輕飛去何託

滿庭蕩魂魄照庶成丹渥爛漫嗾顛狂飄寒勸行樂
時節易晚晚清陰覆池閣唯有安石榴當軒慰寂寞

春有情篇

為問遊春侶春情何處尋花含欲語意草有鬪生心
雨頻催發色雲輕不作陰縱令元月夜芳興暗中深

路傍曲

南山宿雨晴春入鳳凰城處處聞弦管元非送酒聲

白鷺兒

白鷺兒最高格毛衣新成雪不敵衆禽喧呼獨凝寂
孤眼芊芊草久立潺潺石前山正元雲飛去入遙碧

壯士行

陰風振寒郊猛虎正咆哮徐行出燒地連吼入黃茅
壯士走馬去鎧前鸞玉稍叱之使人立一發如鉞交
悍睛忽星墮飛血濺林梢彪炳為我席羶腥充我庖
里中欣害除賀酒紛號吹明日長橋上傾城看斬蛟

邊風行

邊馬蕭蕭鳴邊風滿磧生暗添弓箭力半上鼓鞞聲
襲月寒風起吹雲陰陳成將軍占氣候出號夜翻營

一作寒號
畏翻城

竹枝詞

四方之歌異音而同樂歲正月余來建平里中見聯
歌竹枝吹短笛擊鼓以赴節歌者揚袂睢舞以曲多
為賢聆其音中黃鐘之羽卒章激許如吳聲雖僂僂
不可分而含思宛轉有淇濮之豔昔屈原居沅湘間
其民迎神詞多鄙陋乃為作九歌至于今荆楚鼓舞
之故余亦作竹枝詞九篇俾善歌者颺之附于末後
之吟已歛知變風之自焉

白帝城頭春草生白鹽山下蜀江清南人上來歌一

曲北人陌上動鄉情

山桃紅花滿上頭蜀江春水拍山流花紅易衰似郎

意水流無限似儂愁

江上朱樓新雨晴
灤西春水穀文生
橋東橋西好楊柳
人來人去唱歌行

日出三竿春霧消
江頭蜀客駐蘭橈
憑寄狂夫書一紙
住在成都萬里橋

兩岸山花似雪開
家家春酒滿銀杯
昭君坊中多女伴
永安宮外蹋青來

城西門前濫灑堆
年年波浪不能摧
懊恨人心不如石
少時東去復西來

瞿塘嘈嘈十二灘
此中道路古來難
長恨人心不如

水等閒平地起波瀾

巫峽蒼蒼烟雨時
清猿啼在最高枝
箇裏愁人腸自斷
由來不是此聲悲

山上層層桃李花
雲間烟火是人家
銀釧金釵來負水
長刀短笠去燒畬

楊柳枝詞九首

塞北梅花羌笛吹
淮南桂樹小山詞
請君莫奏前朝曲
聽唱新翻楊柳枝

南陌東城春蚤時
相逢何處不依依
桃紅李白皆誇好
須得垂楊相發揮

鳳闕輕遮翡翠幃，龍池遙望麴塵絲。
御溝春水相暉映，狂殺長安年少兒。
金谷園中鶯亂飛，銅駝陌上好風吹。
城中桃李須臾盡，爭似垂楊無限時。
花萼樓前初種時，美人樓上鬪腰支。
如今拋擲長街裏，露葉如啼欲恨誰。
煬帝行宮汴水濱，數枝殘柳不勝春。
晚來風起花如雪，飛入官牆不見人。
御陌青門拂地垂，千條金縷萬條絲。
如今綰作同心結，將贈行人知不知。

城外春風吹酒旗，行人揮袂日西時。
長安陌上無窮樹，唯有垂楊綰別離。
輕盈嫋娜占年華，舞榭妝樓處處遮。
春盡絮飛留不得，隨風好去落誰家。

浪淘沙詞九首

九曲黃河萬里沙，浪淘風簸自天涯。
如今直上銀河去，同到牽牛織女家。

洛水橋邊春日斜，碧流輕淺見瓊砂。
無端陌上狂風急，驚起鴛鴦出浪沙。

汴水東流虎眼文，清淮曉色鴨頭春。
君看渡口淘沙處，浪下沙斜旋復勻。

處渡卻人間多少人

鸚鵡洲頭浪颭沙青樓春望日將斜銜泥燕子爭歸
舍獨有狂夫不憶家

濯錦江邊兩岸花春風吹浪正淘沙女郎剪下鴛鴦
錦將向中流定晚霞

日照澄洲江霧開淘金女伴滿江隈美人首飾侯王
印盡是沙中浪底來

八月濤聲吼地來頭高數丈觸山回須臾卻入海門
去卷起沙堆是雪堆

莫道讒言如浪深莫言遷客似沙沈千濤萬灑雖辛

苦吹盡狂沙始到金

流水淘沙不暫停前波未滅後波生令人忽憶瀟湘
渚回唱迎神三兩聲

瀟湘神二首

湘水流湘水流九疑人物至今愁君門二妃何處所
零陵香草露中秋

斑竹枝斑竹枝淚痕點點寄相思楚客欲聽瑤瑟怨
瀟湘深夜月明時

拋毬樂詞二首

五綵繡團圓登君璫瑁筵最宜紅燭下偏稱落花前

上客如先起應須贈一船
春早見花枝朝朝恨發遲及看花落後卻憶未開時
幸有拋球樂一柸君莫辭

楊柳枝詞二首

迎得春光先到來淺黃輕綠映樓臺只緣袅娜多情
思便被春風長暗猜
巫峽巫山楊柳多朝雲暮雨遠相和因想陽臺無限
事憑君回唱竹枝歌

竹枝詞二首

楊柳青青江水平聞郎江上唱歌聲東邊日出西邊

雨道是無情還有情

楚水巴山江雨多巴人能唱本鄉歌今朝北客思歸
去回入紇那披綠羅

紇那曲詞二首

楊柳鬱青青竹枝無限情周郎一回顧聽唱紇那聲

二

蜀曲興元窮調同詞不同願郎千萬壽長作主人翁
右已上詞先不入集伏緣播在樂章今附于卷末

劉賓客文集卷第二十八

送別四十六首

送工部張侍郎入蕃弔祭

早秋送臺院楊侍御歸朝

送工部蕭郎中刑部李郎中並以本官兼中丞

分命充京西京北覆糧使

送李尚書鎮滑州

送渾大夫赴豐州

送源中丞充新羅冊立使

送陸侍御歸淮南使府五韻

送太常蕭博士棄官歸養赴東都

送王司馬之陝州

洛中送楊處厚入關便遊蜀謁常令公

洛中送韓七中丞之吳興口號五首

送周使君罷渝州歸郢別墅

發華州留別張侍御

奉送家兄歸王屋山隱居二首

送王師魯協律赴湖南使幕

別友人后得書因以詩贈

奉送浙江李僕射相公赴鎮

重送浙西李相公頃廡問江南已經七載後歷

滑臺劔南兩鎮遂入相今復領舊地新加旌旄

送華陽尉張茗赴邕府使幕

送湘陽熊判官孺登府罷歸鍾陵因寄呈江西

裴中丞二十三兄

送帝秀才道冲赴制舉

送李策秀才還湖南因寄幕中親故兼簡衡州

呂八郎中

送張盥赴舉

并引

送裴處士應制舉

和州送錢侍御自宣州幕拜官便於華州覲省
將赴汝州途出浚下留辭李相公

送令狐相公自僕射出鎮南梁

送趙中丞自司金外郎轉官參山南令狐僕射
幕府

奉送裴司徒令公自東都留守再命太原

奉送李戶部侍郎自河南尹再除本官歸闕

送蘄州李郎中赴任

洛中春末送杜錄事赴蘄州

夜宴福建盧侍御宅因送之鎮

洛中送崔司業使君扶侍赴唐州

送河南皇甫少尹赴絳州

送前進士蔡京赴學究科

送唐舍人出鎮閩中

送盧處士歸嵩山別業

送李及路秀才赴舉

送國子令狐博士赴興元覲省

送李二十九兄負外赴邠寧使幕

送分司陳郎中祇召直史館重脩三聖實錄

送李中丞赴楚州

送李唐先輩赴選

送廖謀東遊二首

送從弟郎中赴浙西并引

劉賓客文集卷第二十八

送別四十六首

送工部張侍郎入蕃弔祭

時張兼脩史

月窟賓諸夏雲官降九天飾終鄰好重錫命祀容全
水咽猶登隴沙鳴稍極邊路因乘駟近志為飲冰堅
毳帳差池見鳥旗搖曳前歸來賜金石榮耀自編年

早秋送臺院楊侍御歸朝

兄弟四人遍歷諸科二人同在省

仙署棣華春當時已絕倫今朝丹闕下更入白眉人

重振高陽族分居要路津一門科第足五府辟書頻

鷲鳥得秋氣法星懸大旻聖朝寰海靜所至不埋輪

送工部蕭郎中刑部李郎中並以本官兼中丞分命充京西京北覆糧使

霜簡映金章相輝同舍郎天威巡虎落星使出駕行尊俎成全策京坻閱見糧歸來虜塵滅畫地奏明光

送李尚書鎮滑州自浙西觀察徵拜兵部侍郎月餘有此拜

南徐報政入文昌東郡須才別建章視草名高同蜀

客擁旄年少勝荀郎黃河一曲當城下緹騎千重照

路傍自古相門還出相如今人望在巖廊其后果繼

送渾大夫赴豐州自大鴻臚拜家承舊勳

鳳銜新詔降恩華又見旌旗出渾家故吏來辭辛屬

國精兵願逐李輕車羶裘君長迎風馭錦領首豪躅雪衙其柰明年好春日無人喚看牡丹花

送源中丞充新羅冊立使侍中之孫

相門才子稱華簪持節東行捧德行身帶霜威辭鳳

闕口傳天語到雞林煙開鼈背千尋碧日浴鯨波萬

頃金想見扶桑受恩後一時西拜盡傾心

送陸侍御歸淮南使府五韻用年字

江左重詩篇陸生名久傳鳳城來已熟羊酪不嫌羶

歸路芙蓉府離堂瑤瑁筵泰山呈臘雪隋柳布新年

曾忝揚州薦因君達短牋時段丞相鎮揚州嘗辱表薦

送太常蕭博士棄官歸養赴東都時元兄罷相為少師

仲兄為郎官並分司洛邑

兄弟盡駕鸞歸心切問安貪榮五綵服遂掛兩梁冠
侍膳曾調鼎循陔更握蘭從今別君後長向德星看

送王司馬之陝州自太常丞授工為詩

暫輟清齋出太常空攜詩卷赴甘棠府中既有朝中
舊司馬應容酒後狂紫牘來時唯署字風煙入興便
成章兩京大道多遊客每遇詞人戰一場

洛中送楊處厚入關便遊蜀謁常令公

洛陽秋日正淒淒君去西秦更向西舊學三冬今轉

富曾傷六翮養初齊王城晚入窺丹鳳蜀路晴來見
碧鷄蚤識卧龍應有分不妨從此躡丹梯

洛中送韓七中丞之吳興口號五首

昔年意氣絡羣英幾度朝回一字行海北天南零落
盡兩人相見洛陽城

自從雲散各東西每日歡娛却慘悽離別苦多相見
少一生心事在書題

今朝无意訴離杯何況清絃急管催本欲醉中輕遠
別不知翻引酒悲來

駱駝橋下蘋風起鸚鵡杯中箸下春水碧山青知好

處開顏一笑向何人

溪中士女出芭籬溪上鴛鴦避畫旗何處人間似仙境春山攜妓採茶時

送周使君罷渝州歸郢州別墅

君思郢上吟歸去故自渝南擲郡章野戍岸邊留畫舸綠蘿陰下到山莊池荷雨后衣香起庭草春深綬帶長只恐鳴騶催上道不容待得晚菘嘗

發華州留別張侍御賈

束簡下延閣買符驅短轅同人惜分袂結念辭芳尊切切別弦急蕭蕭征騎煩臨岐無限意相視却忘言

張詩云夫子生知者相期妙理中遂有忘言之句

奉送家兄歸王屋山隱居二首據道書王屋山一名陽洛山

陽洛天壇上依稀似玉京夜分先見日月淨遠聞笙雲路將雞犬丹臺有姓名古來成道者兄弟一同行

二

春來山好事歸去憶逍遙水淨苔莎色露香芝朮苗登臺吸瑞景飛步翼神颯願薦墳麓曲相將學玉簫

送王師魯協律赴湖南使幕即文穆公之孫

翩翩馬上郎驅傳度三湘橘樹沙洲暗松醪酒肆香

素風傳竹帛高價騁琳瑯楚水多蘭若何人事寥芳
別友人后得書因以詩贈

前時送君去揮手青門橋路轉不相見猶聞馬蕭蕭
今得出關書行塵日已遙春還遲君至共結蘭芳茗

奉送浙江李僕射相公赴鎮

奉送至臨泉驛書札見微拙詩時在汝州

建節東行是舊遊歡聲喜氣滿吳州郡人重到黃丞
相童子爭迎郭細侯詔下初辭溫室樹夢中先到景
陽樓自憐不識平津閣遙望旌旗汝水頭

重送浙西李相公頃廉問江南已經七載後
歷滑臺劍南兩鎮遂入相今復領舊地新加

旌旄

江北萬人看玉節江南千騎引金鏡鳳從池上遊滄
海鶴到遼東識舊巢城下清波含百谷窓中遠岫列
三茅碧雞白馬回翔久却憶朱方是樂郊

送華陰尉張茗赴邕府使幕

張郎燕公之孫頃坐事除名

昔忝南宮郎往來東觀頻嘗披燕公傳聳若窺三辰
翊聖崇國本保賢正朝倫高視緬今古清風夏无鄰
蘭錡照通衢一家十朱輪鄴國嗣侯絕韋卿世業貧
夫子承大名少年振芳塵青袍仙掌下矯首陵烟旻
公治本非罪潘郎一為民風霜苦搖落堅白无緇磷

一旦逢良時天光燭幽淪重為長裾客佐彼觀風臣
分野窮禹畫人烟過虞巡不言北行遠所樂相知新
雨起巫山陽鳥鳴湘水濱離筵出蒼莽別曲多愁辛
今朝一樽酒明日千里人從此孤舟去悠悠天海春

送湘陽熊判官孺登府罷歸鍾陵因寄呈江
西裴中丞二十三兄

射策志未就從事歲云除篋留馬卿賦袖有劉弘書
忽見夏木深悵然憶吾廬復持州民刺歸謁專城居
君家誠易知勝絕傾里閭人言北郭生門有卿相輿
鍾陵藹千里帶郭西江水朱檻照河官旗亭綠雲裏

前年初缺守慎簡由震宸臨軒弄郡章得人方付此
是時左馮翊天下第一理貴臣持牙璋優詔發青紙
迎風汚吏免先令疲人喜何武劾腐儒陳蕃禮高士
昔升君子堂腰下綬猶黃中丞時為汾陰有寶氣赤
董多竒銳束簡下曲臺佩鞬來歷陽綺延陪一笑蘭

室襲餘芳風水忽異勢江湖遂相忘因君倘借問為

話老滄浪中丞為博士製相國柳宜誠謚議識者避

司徒以中丞材譽俱高欲令軍裝以重我府節度使杜

本州團練使滿坐觀腰鞬禮成驩甚相視而笑后房

尚書屯田員外郎出守踵其武者今給事中穆公代

給事者右丞段公予不佞繼

右丞之後故曰襲餘芳焉

送韋秀才道冲赴制舉

驚禽一辭巢棲息无少安秋扇一離手流塵蔽霜紈
故侶不可追涼風日已寒遠逢杜陵士別盡平生歡
逐客无印綬楚江多芷蘭因君時暇遊長缺不復彈
闕書南軒霽絙瑟清夜闌萬境外寂一枵腹中寬
伊昔玄宗朝冬御冠駕鸞肅穆升內殿從容領儒冠
游夏无措詞陽秋垂不刊至今群玉府學者空縱觀
世人希德門揭若攀峯巒之子向明訓鏘如振琅玕
一旦西上書班衣拂征鞍荆臺宿暮雨漢水浮春瀾
君門起天中多士如星攢烟霞覆雙闕林舞羅千官

清漏滴銅壺仙廚下雕槃熒煌仰金榜錯落濡飛翰
古來長策人所歎遭時難一鳴從此始相望青雲端

送李策秀才還湖南因寄幕中親故兼簡衡

州呂八郎中

深春風日淨晝長幽鳥鳴僕夫前致辭門有白面生
撮衣相問訊解帶坐南榮端志見眉睫芳言發精誠
因出懷中文調孤詞亦清悄如促柱弦掩抑多不平
乃言本蜀士世降岷山靈前人秉藝文高視來上京
曳綬司徒府所從信國禎析薪委空林善響難繼聲
何處翳附郭幾人思邱城雲天望喬木風水悲流萍

前與計吏西始列貢士名森然就筆北從試春官鄉
帝城歧路多萬足伺晨星茫茫風塵中工拙同有營
寒女勞夜織山苗榮寸莖侯門方擊鐘衣褐誰將迎
弱羽果摧頰壯心鬱怏怏諒無蟠木客聊復蓬累行
昨日訊靈龜繇言利艱貞當求捨拔中必在審已明
誓將息薄遊焦思窮筆精蔣蘭在幽渚安得揚茶馨
曰余摧落者散質負華纓一聆苦辛詞再動伊鬱情
身弁言不重愛才心尚驚恨无羊角風使爾化北溟
論罷情益親涉旬忘歸程日攜邑中客閒眺江上城
晝渴命金罍宵談轉璿衡薰風香塵尾月露濡桃笙

忽被戎羸駭薄言事南征火雲蔚千里旅思浩已盈
湘江含碧虛衡嶺浮翠晶豈伊山水異適與人事并
油幕似崑丘粲然疊瑤瓊庾樓見清月孔坐多綠醞
復有衡山守本自雲龍庭抗志在靈府發越倅咸英
一麾出營陽惠彼咄咄隼旟辭灞水居者皆涕零
惟昔與伊人交歡在夙齡一從雲雨散滋我鄙悵萌
北渚不堪愁南音誰復聽離憂若去水浩漾无時停
常聞祝融峯上有神禹銘古石琅玕姿祕文螭虎形
聖功莫遠服神物擁休禎賢人在其下仿佛疑蓬瀛
君行歷郡齋大袂拂雙旌飾容遇朗鑒肝鬲可以呈

昔日馬相如臨邛生盡傾勉君刷羽翰蚤取凌青冥

送張盥赴舉 并引

古人以偕受舉爲同門友今人以偕升名爲同年友其語熟見縉紳者皆道焉余與張盥爲友丈人由是道也曩吾見爾之始生以老成爲祝今吾見爾之成人以未立爲憂吾不幸嚮所謂同年友當其盛時聯袂齊鑣亘絕九衢若屏風然今來落落如曙星之相望借曰會合不煩異席可長太息哉然而尚書右丞衛大受兵部侍郎武庭碩二君者當時偉人咸萬夫之望足以計千朋之多也第如京師無騷騷爾亦无

忻忻爾時秋也吾爲若叩商之謳幸有感夫二君子爾生始懸弧我作坐上賓引箸舉湯餅祝詞天麒麟今成一丈夫坎坷愁風塵長裾來謁我自號廬山人道舊與撫孤悄然傷我神依依見眉睫嘿嘿含悲辛永懷同年友追想出谷晨三十二君子齊飛陵烟旻曲江一會時後會已凋淪况今三十載閱世難重陳盛時一已過來者日日新不如搖落樹重有明年春火後見琮璜霜餘識松筠肅機乃獨秀武部亦絕倫爾今持我詩西見二重臣成賢必舊念保責在安貧清時爲清郎氣力侔陶鈞乞取斗升水因之雲漢津

送裴處士應制舉 并引

晉人裴昌禹讀書數千卷於周官小戴禮尤邃性是古敢言雖侯王不能卑下故與世相參差凡抵有位以索合行天下幾戶依遍常歎諸侯莫可遊欲一見天子而未有路會今年詔書徵賢良昌禹大喜以爲盡可以豁平生搏髀爵躍曰一觀龍庭足矣絲是裹三月糧而西徂咨余以七言爲遊之資藉耳

裴生久在風塵裏氣勁言高少知已註書曾學鄭司農歷國多於孔夫子往年訪我到連州無窮絕境終日遊登山雨中試蠟屐入洞夏裏被貂裘白帝城邊

又相遇斂翼三年不飛去忽然結束如秋蓬自稱對策明光宮人言策中說何事掉頭不答看飛鴻彤庭翠竹迎曉日鳳銜金榜雲間出中貴腰鞭立傾酒宰臣委佩觀搖筆古稱射策如彎弧一發偶中何時无由來草澤无忌諱努力滿挽當雲衢憶得童年識君處嘉禾日後聯牆住垂鈎釣得玉餘魚躡芳共登蘇小墓此事今同夢想間相看一笑且開顏老大希逢舊鄰里爲君扶病到方山

和州送錢侍御自宣州幕拜官便於華州觀

省

五綵繡衣裳當年正相稱春風函關路歸去甫多興
蘭陔行可採蓮府猶回瞪楊家紺憶迎侍御即王相
謝守瑤華贈宣州崔相公御街草泛濫臺柏烟含凝
曾是平昔遊无因理歸乘

將赴汝州途出浚下留辭李相公

長安舊遊四十載鄂渚一别十四年後來富貴已零
落歲寒松柏猶依然初逢貞元尚文主雲闕天池共
翔舞相看却數六朝臣屈指如今無四五夷門天下
之咽喉昔時往往生瘡疣聯翩舊相來鎮壓四海吐
納皆通流久别凡經几多事何由說得平生愁千思

萬慮盡如空一笑一言真可休世間何事最殷勤白
頭將相逢故人功成名遂會歸老請向東山爲近鄰

送令狐相公自僕射出鎮南梁

夏木正陰成戎裝出帝京沾襟辭闕淚回首別鄉情
雲樹褒中路風煙漢上城前旌轉谷去後騎蹋槁聲
久領駕行重无嫌虎綬輕終提一麾去再入副蒼生

送趙中丞自司金外郎轉官參山南令狐僕

射幕府趙氏兄弟皆僕射門客

綠樹滿褒斜西南蜀路賒驛門臨白草縣道過黃花
相府開油幕門生逐絳紗行看布政後還從入京華

奉送裴司徒令公自東都留守再命太原封

晉國公兩任
相去十六年

星使出關東兵符賜上公山河歸舊國管籥換離宮
行色旌旗動軍聲鼓角雄愛棠餘故吏騎竹見新童
漢壘三秋靜胡沙萬里空其餘天下望旦夕詠清風
奉送李戶部侍郎自河南尹再除本官歸闕
昔年內署振雄詞今日東都結去思宮女猶傳洞簫
賦國人先詠衮衣詩華星却復文昌位別鶴重歸太
乙池想到金門待通籍一時驚喜見風儀

送蘄州李郎中赴任

楚關蘄水路非賒東望雲山日夕佳薤葉照人呈夏
簞松花滿盃試新茶樓中飲興因明月江上詩情爲
晚霞北地交親長卧領蚤時玄鬢到京華

洛中春末送杜錄事赴蘄州

尊前花下長相見明日忽為千里人君過午橋回首
望洛城猶自有殘春

夜宴福建盧侍御宅因送之鎮

暫駐旌旗洛水隄綺筵紅燭醉蘭闥美人美酒長相
逐莫怕猿轂發建溪

洛中送崔司業使君扶侍赴唐州

綠野方成路殘春柳絮飛風鳴驕驕馬日照老萊衣
洛苑魚書至江柳鴈戶歸相思望淮水雙鯉不應稀

送河南皇甫少尹赴絳州

祖帳臨周道前旌指晉城午橋羣吏散亥字老人迎
詩酒同行樂別離方見情從茲洛陽社吟詠欠書生

送前進士蔡京赴學究科

時舊相楊尚書掌選

耳聞戰鼓帶經鋤振發名聲自里閭已是世間能賦
客更攻窓下絕編書朱門達者誰能識絳帳書生盡
不如幸過天官舊丞相知君无翼上空虛

送唐舍人出鎮閩中

暫辭鴛鴦出蓬瀛忽擁貔貅鎮粵城閩嶺夏雲迎皂
蓋建溪秋樹映紅旌山川遠地由來好富貴當年別
有情了却人間婚嫁事復歸朝右作公卿

送盧處士歸嵩山別業

世業嵩山隱雲深元四鄰藥鑪燒姹女酒甕貯賢人
曉日華陰霧秋風函谷塵送君從此去鈴閣少談賓

送李及路秀才赴舉

誰鄰相門子不語望秋山生長紈綺內辛勤筆硯間
榮親在名字好學弃官班佇俟明年桂高堂開笑顏

送國子令狐博士赴興元覲省

相門才子高陽族學省清資五品官諫院過時榮棣
萼謝庭歸去蹋芝蘭山頭花帶烟嵐晚棧底江涵雪
水寒伯仲到家人盡賀柳營蓮府遞相歡

送李二十九兄負外赴邠寧使幕

家襲帶平身業文素風清白至今貧南宮通籍新郎
吏西候從戎舊主人城外草黃秋有雪烽頭烟靜虜
元塵鼎門為別霜天晚賸把離觴三五巡

送分司陳郎中祇召直史館重脩三聖實錄

蟬鳴宮樹引行車言自成周赴玉除遠取南朝貴公
子重脩東觀帝王書常時載筆窺金匱暇日登樓到

石渠若問舊人劉子政如今頭白在商於

送李中丞赴楚州

緹騎朱旗入楚城士林皆賀振家聲兒童但喜迎賢
守故吏猶應記小名萬頃水田連郭秀四時煙月映
淮清憶君初得崑山玉同向揚州携手行

送李庾先輩赴選

一家何啻十朱輪諸父雙飛秉大鈞曾脫素衣參幕
客却為精舍讀書人離筵洛水侵梧色征路函關向
晚塵今日山公舊賓主知君不負帝城春

送廖謀東遊二首

九陌逢君又別離行雲別鶴本无期望嵩樓上忽相
見看過花開花落時

繁花落盡君辭去綠草垂楊引征路東道諸侯皆故
人留連必是多情處

送從弟郎中赴浙西并引

從弟三復十餘年間凡三為浙右從事往年主公入
相荐敷登朝中復從事鎮南未幾而罷昨以尚書外
郎奉使至洛旋承新命改轅而東三從公皆在舊地
徵諸故事莫無其倫故賦詩贈之亦志異也

銜命出尚書新恩換使車漢庭無右者梁苑重歸歎

又食建業水曾依京口居劉前軍傳云本京口人世家京口共經何限
事賓主兩如初

劉賓客文集卷第二十九

送贈二十四首

贈別君素上人 并引

送深法師遊南岳

廣宣上人寄在蜀與韋令公唱和詩卷因以令

公手札答詩示之

送僧仲剎東遊兼寄呈靈澈上人

送僧元嵩南遊 并引

送如智法師遊辰州兼寄許評事

贈長沙讚頭陀

送惠則法師上都因呈廣宣上人并引

秋日過逢舉法師寺院便送歸江陵并引

重送鴻舉赴江陵謁馬逢侍御

送僧及南謁柳負外

贈日本僧智藏

贈眼醫婆羅門僧

海陽湖別浩初師并引

觀碁歌送儂師西遊

贈別約師并引

送鴻舉師江南并引

送霄韻上人遊天台

送義舟師卻還黔南并引

送景玄師東歸并引

送元曉上人歸稽亭

送維良上人并引

送元簡上人適越

送宗密上人歸南山草堂寺因詣河南尹白侍

郎

劉賓客文集卷第二十九

送贈二十四首

贈別君素上人并引

曩予習禮之中庸至不勉而中不思而得愾然知聖人之德學以至于无學然而斯言也猶示行者以室廬之奧耳求其經術而布武未易得也晚讀佛書見大推念物之普級寶山而梯之高揭慧火巧鎔惡見廣疎便門旁束邪徑其所證入如舟濟川未始念于前而日遠矣夫何勉而思之邪是余知突音窈與于中庸啓鍵關於內典會而歸之猶初心也不知予者誦

予因儒而援佛謂道有二焉夫悟不因人在心而已
其証也猶啗人之享太牢信知其味而不能形于言
以聞于耳也口耳之間兼寸耳尚不可使聞它人之
不吾知宜矣開士君素偶得予于所親一麻棲草千
里來訪素以道服視予余以所視視之不由陞級攜
手智地居數日若有得而行乃爲詩以見志焉云
窮巷唯秋草高僧獨扣門相歡如舊識問法到无言
水爲風生浪珠非塵可昏去來皆是道此別不銷魂

送深法師遊南岳

上人本在資聖寺

師在白雲鄉名登善法堂十方傳句偈八部會壇場

飛錫无定所寶書留舊房唯應銜菓鳥相送至衡陽

廣宣上人寄在蜀與韋令公唱和詩卷因以

令公手札答詩示之

碧云佳句久傳芳曾向成都住草堂振錫常過長者
宅披文猶帶令公香一時風景添詩思八部人天入
道場若許相期同結社吾家本自有紫桑

送僧仲剎東遊兼寄呈靈澈上人

釋子道成神氣閒住持曾上清涼山晴空禮拜見真
像金毛五髻御雲間西遊長安隸僧籍本寺門前曲
江碧松間白月照寶書竹下香泉灑瑤席前時學得

經論成奔馳象馬開禪局高筵談柄一麾拂講下聽
徒如醉醒舊聞南方多長老次第來入荆門道荆門
本自重彌天南朝塔廟猶依然宴坐東陽枯樹下經
行居止故臺邊忽憶遺民社中客爲我衡陽駐飛錫
講罷同尋相鶴經閒來共蠟登山屐一旦揚眉望沃
州自言王謝許同遊憑將雜擬三十首寄與江南湯
惠休

送僧元嵩南遊

并引

予策名二十年百慮而無一得然後知世所謂道元
非畏途唯出世間法可盡心耳由是在席覲者多旁

行四句之書備將迎者皆赤頰白足之侶深入智地
靜通還源客塵觀盡妙氣來宅內視胷中猶煎鍊然
開士元嵩姓陶氏本丹陽居家世有爵人不藉其資
於毗尼禪那極細密之義於中後日習搃持之門妙
音奮迅願力昭答雅聞予事佛而佞亟來相從或問
師隳形之自對曰小失怙恃推棘心以求上乘積四
十年有羸老將至而不懈始悲浚泉之有冽今痛防
墓之未遷塗芻莫備薪火恐滅諸相皆離此心長懸
雖萬姓歸佛盡爲釋種如何入海无復水名然具一
切智者豈唯遺百行求无量義者寧容斷思今聞南

諸侯雅多大士思扣以苦調而希其末光无容至前
有足悲者予聞是說己力不足而悲有餘因為詩以
送之庶乎踐霜露者矜之有惻
寶書翻譯學初成振錫如飛白足輕彭澤因家凡几
世霽山預會是前生傳鐙已悟无為理濡露猶懷罔
極情從此多逢大居士何人不願解珠璣

送如智法師遊辰州兼寄許評事

前日過蕭寺看師上講筵都人礼白足施者散金錢
方便无非教經行不廢禪還知習居士發論待彌天

贈長沙讚頭院

外道邪山千萬重真言一發盡摧鋒有時明月无人
夜獨向昭亭制惡龍

送惠則法師上都因呈廣宣上人

并引師精
淨名經

佛示滅後大弟子演聖言而成經傳心印曰法承法
而能專曰宗由宗而分教曰友坐而攝化者朦義皆
空之宗也行而宣教者摧破邪山之友也釋子惠則
生于像季思濟劫濁乃學于一友開彼群迷以為盡
妙理者莫如法門變凡夫者莫如佛土悟无染者莫
如散花故業于淨名深達實相自京師涉漢沔歷鄔
邽登熊湘聽徒百千耳感心化法无住道行而歸顧

予有社內之因故言別之日愛緣瞥起時也秋盡詠
江淹雜擬以送之前見宣上人為我多謝

昨日東林看講時都人象馬蹋瑠璃雪山童子應前
世金粟如來是本師一錫言歸九城路三衣曾拂萬
年枝休公久別如相問楚客逢秋心更悲

秋日過逢舉法師寺院便送歸江陵 并引

梵言沙門猶華言去欲也能離欲則方寸地虛虛而
萬景入入必有所泄乃形乎詞詞妙而深者必依于
聲律故自近古而降釋子以詩聞于世者相踵焉因
定而得境故脩然以清由惠而遣詞故粹然以麗信

禪林之蘊萼而誠河之珠璣耳初鴻舉學詩于荆郢
皆私試竊詠發于餘習蓋榛楛之翠羽弋者未之眄
焉今年至武陵二千石始竒之有起予之歎以方袍
親絳紗者十有餘旬由是名稍聞而藝愈變閏八月
余步出城中門謁仁祠而鴻舉在焉與之言移時因
告以將去且曰貧道雅聞東諸侯之工為詩者莫若
武陵今章承其話言如得法印寶山之下宜有所持
豈徒衣衲之中泉花而已余聞是說乃叩商而吟成
一章章八句郡守以坐嘯餘詠激清徵而應之師其
行乎足以資一時中之學矣

看畫長廊遍尋僧一逕幽小池兼鶴靜古木帶蟬秋
客至茶烟起禽歸講席收浮栢明日去相望水悠悠

重送鴻舉赴江陵謁馬逢侍御

西北秋風彫蕙蘭洞庭波上碧雲寒茂陵才子江陵
住乞取新詩合掌看

送僧及南謁柳負外并引

九江僧方及既出家依匡山一時中頗屬詩以據思
古詩人暨及號為能賦詩有輒求其詞吟呻之拳拳
然多多益嗜影不出山者十年嘗登最高峰四望天
海冲然有遠遊之志頓錫而言曰神馳而形闕者方

內之徒及吾无方闕於何者繇是耳得必目探之意
必身隨之文雲遊鳥企虛言无迹而速予為連州居

无何而方及至出袂中詩一篇以贖予其詞其富留
一歲觀其行短矩如教益多之一旦以行日來告且
曰雅云鳥味之下有賢諸侯願躋其門如蹈下地敢
乞詞之以抵之予唯而賦顧其有重請之色起於顏
間耳昔事廬山遠精舍虎溪東朝陽照瀑水樓閣虹
霓中騁望羨游雲振衣若秋蓬舊居閉松月遠思吟
江風古寺歷頭陀奇峯攀祝融南登小桂嶺卻望歸
塞鴻衣袂貯文章自言學雕蟲槍榆念陵后覆篋圖

穹崇遠郡多暇日有時訪禪宮石門崇峭絕竹院含
空濛幽響滴巖溜晴芳飄野叢海雲懸颯毋山果屬
祖公忽憶吳興郡白蘋正惹龍願言挹風采邈若窺
華嵩桂水多夏瀾火山宵焰紅三衣濡菌露一錫飛
烟空勿謂翻譯徒不爲文雅雄古來賞音者樵爨得
孤桐按祖公宜斥賦茅者而越絕書有猿公張衡賦
而言謂猿南都有猿父長嘯之句古文字又云猿父繇是
謂父明矣

贈日本僧智藏

浮楮萬里過滄溟遍禮名山適性靈深夜降龍潭水
黑新秋放鶴野田青身無彼我那懷土心會真如不

讀經為問中華學道者幾人雄猛得寧馨

贈眼醫婆羅門僧

三秋傷望遠終日泣途窮兩目今先暗中
年似老翁眉朱漸成碧羞日不禁風師有金篦術如何為發蒙

海陽湖別浩初師并引

瀟湘間無土山無濁水民乘是氣往往清惠而文長
沙人浩初生既因地而清矣故去葦洗慮剔顛毛而
壞其衣居一都之殷易與士會得執本教盡捐苛禮
自公侯守相必賜其清閒耳目灌注習淳于性而里
中兒質適與浩初比者嬰冠帶豢要子吏得以乘陵

之汨沒天惠不得自奮莫可望浩初之清光于侯門
上坐第自吟羨而已浩初益自多其術尤勇于近遠
者而歸之往年之臨賀唁侍郎楊公留歲餘云遺以
七言詩手筆于素前年省柳儀曹于龍城又為賦三
篇皆章書今復來連山以前所得雙南金出于穢亟
請予廣之按師為詩頗清而奕棋至第三品二道者
足以取幸于士大夫宜薰餘習以深入也會吳郡以
山水冠世海陽又以奇甲一州師慕道于泉石宜篤
故攜之以嬉及言旋復引與共載于湖上奕于樹石
間以植沃州之因緣且賦詩以道其事

近郭有殊境獨遊常鮮懽逢君駐緇錫觀白稱林巒
湖滿景方霽野香春未闌愛泉移席近聞石輟棊看
風止松猶韻花繁露晚乾橋形出樹曲巖影落池寒
湘東架險凡四橋山下出泉逗岩為池泓別路千嶂
澄可愛者不可遍舉故狀其境以貽好事
裏詩情莫雲端宅年買山處似此則隳官

觀棊歌送儂師西遊

長沙男子東林師閒讀藝經工弈棊有時凝思如入
定暗覆一局誰能知今年訪予來小桂方袍袖中貯
新勢山城無事愁日長白晝惜惜眠匡牀因君臨局
看鬪智不覺遲景沈西牆自從山人遇樵子直到開

元王長史前身後身付餘習百變千化無窮已初疑
磊落曙天星次見搏擊三秋兵鴈行布陳衆未曉虎
穴得子人皆驚行盡三湘不逢敵終日饒人損机格
自言臺閣有知音悠然遠起西遊心商山夏木陰寂
寂好處裴回駐飛錫忽思爭道畫平沙獨哭无言心
有適藹藹京城在九天貴遊豪士足華筵此時一行
出人意賸取聲名不要錢

贈別約師并引

邢州人丈約市井生而雲鶴性故去葷為浮圖生寤
而證入與南抵六祖始生之壚得遺教甚悉今年訪

余于連州且曰貧道昔浮湘川會柳儀曹謫零陵宅
于佛寺幸聯棟而居者有年繇是時人大士得落耳
界夫聞為見因今日之來曩時之因耳時儀曹牧柳
州與八句贈別

師逢吳興守相伴住禪高春雨同栽樹秋燈對講經
廬山曾結社桂水遠揚舲話舊還惆悵天南望柳星

送鴻舉師江南并引

始余適朗州爾時是師振麻衣斐然而前持文篇以
為僧贊唧唧而清如虫吟秋自然之響无有假合有
足佳者故為賦二章以殼之距今年遇于建平赤顛

益蕃文思益深而內外學益富既訊已探穢中出前
所與詩閱之紙勞墨瘁與我同來因思夫苒苒之光
渾渾之輪時而言有初中後之分日而言有今昨明
之稱身而言有幼壯艾之期乃至一磬效一彈指中
際皆具何必來三生以異身邪然而視予之文昔與
今有筵楹之別視余之書昔與今有鈞石之懸視予
之任昔與今乃唯阿之差耳豈有工拙之數之存乎
其間哉蓋可勉而進者與日月而至矣彼儻來外物
雖日月無能至焉是歲師告余遊江西復為賦七言
以為遊地爾

禪客學禪兼學文出山初似無心雲從風卷舒來何
處繚繞巴山不得去山州古寺好閒居讀盡龍王宮
裏書使君灘頭揀石視白帝城邊尋野蔬忽然登高
心瞥起又欲浮楫信流水烟波浩淼魚鳥情東去三
千三百里荆門硤斷無盤渦湘平漢闊清光多廬山
霧開見瀑布江西月淨聞漁歌鍾陵八部多名守半
是西方社中友與師相見便談空想得高齋師子吼

送霄韻上人遊天台

曲江僧向松江見又道天台看石橋鶴戀故巢雲戀
岫比君猶自不逍遙

送義舟師卻還黔南并引

黔之鄉在秦楚為爭地近世人多過言其幽荒以談笑聞者又從而張皇之猶夫東益遂原燎或近乎語妖適有沙門義舟道黔江而來能畫地為山川及條其風俗纖悉可信且曰貧道以一錫遊他方衆矣至黔而不知其遠始遇前節使而聞今節使益賢而文故其佐多才士麾圍之下曳裾秉筆彬然與克園同風蕃僧以外學嗜篇章時或攝衣為末客其來也約主人乘秋風而還今乞詞以颺之如捧意珠行住坐卧知相好耳余曰唯命筆為七言以應之

黔江秋水浸雲霓獨泛慈航路不迷
猿狖窺齋林葉動蛟龍聞呪浪花低
如蓮半偈心常悟問菊新詩手自攜
常說麾圍似靈鷲卻將山屐上丹梯

送景玄師東歸并引

廬山僧景玄袖詩一軸來謁往往有句輕而適如鶴
雛襪襪未有六翮而步舒遠視戛然一吸乃非泥滓
問物獻詩已斂衽而辭且曰其來也與故山秋為期
夫丐者僧事也今无他請唯文是求故賦一篇以代
瓔珞耳

東林寺裏一沙彌心愛當時才子詩
山下偶隨流水

出秋來卻赴白雲期灘頭躡屐挑沙菜路上停舟讀
古碑想到舊房拋錫杖小松應有過檐枝

送元曉上人歸稽亭

重疊稽亭路山僧歸獨行遠峯斜日影本寺舊鐘聲
徒侶問新事煙雲舍別情應誇乞食處蹋遍鳳凰城

送維良上人并引

以貌窺天者曰乾然徒單于然而高以數迎天者曰
其用四十有九天果以有形而不脫乎數立象以推
筮既成而遺之古所謂神交造物者非空言耳軒皇
受天命其佐皆聖人故得之惟唐繼天德如皇帝有

外臣一行亦聖之徒與刊曆考元書成化去今丹徒
人惟良生而能知非自外求以乾坤之策當十期之
數凝神運指上感躔次視玄黃溟滓元倪有常絕機
泯知獨以神會數起于復之初九音生乎黃鍾之宮
積微本隱言與化合乎天人之數極而含變變而靡
不通神趨鬼悞不足駭也惟良得一行之道故亦慕
其為外臣謬謂余為世間聰明子子來訪初以說合
至于不言言息而理冥復申之以嘆歎曰師其庶幾
乎信神與之而不能測神之所以付信術通之而不
能知術之所以淺哉余聞乎曾井蛙醯雞之不若也

長慶四年冬十一月甲子語至夜艾遂為詩以志焉
高齋照寒水是夕山僧至玄牝無關鎖瑣書拾文字
燈明香滿室月午霜凝地語到不言時世間人盡睡

送元簡上人適越

孤雲出岫本無依勝境名山即是歸久向吳門遊好
寺還思越水洗塵機浙江濤驚師子吼稽嶺峯疑靈
鷲飛更入天台石橋路垂珠璀璨拂三衣

送宗密上人歸南山草堂寺因詣河南尹白

侍郎

宿習脩來得慧根多聞第一卻忘言自從七祖傳心

印不要三乘入便門東泛滄江尋古跡西歸紫閣出
塵喧河南尹白大檀越好把真經相對翻

劉賓客文集卷第二十九

劉賓客文集卷第三十

哀挽悲傷三十八首

德宗神武孝文皇帝挽歌二首

敬宗睿武昭愍孝皇帝挽歌三首

文宗元聖昭獻孝皇帝挽歌三首

故相國燕國公子司空挽歌二首

重至衡陽傷柳儀曹

并引

謫居悼往二首

哭呂衡州時予方謫居

遙傷段右丞

傷桃源薛道士

王思道碑堂下作

遙傷丘中丞 并引

傷獨孤舍人 并引

余次敷水驛伏觀華州舅氏昔日行縣題詩處
潜然有感

湖南觀察使故相國袁公挽歌三首

代靖安佳人怨二首 并引

傷愚溪三首 并引

碧澗寺見元九侍御和展上人詩有三生之句

因以和

傷秦姝行 并引

夔州竇負外使君見示悼妓詩願予嘗識之因
命同作

竇夔州見寄寒食日憶故姬小紅吹笙因和之
傷循州渾尚書

哭龐京兆

再傷龐尹

哭王僕射

傷韋賓客續

再經故元九相公宅池上作

劉賓客文集卷第三十

哀挽悲傷三十八首

德宗神武孝文皇帝挽歌二首

出震清多難乘時播大鈞
操弦調六氣揮翰動三辰
運偶升天日哀深率土人
瑤池无轍跡誰見屬車塵

二

鳳翼擁銘旌威遲異吉行
漢儀陳祕器楚挽咽繁聲
駐驂辭清廟凝笳背直城
唯應留內傳知是向蓬瀛

敬宗睿武昭愍孝皇帝挽歌三首

寶曆方无限仙期忽有涯
事親崇漢礼傳聖法殷家

晚出芙蓉闕春歸棠棣花玉輪今日動不是畫雲車

二

任賢勞夢寐登位富春秋欲逐東人幸寧虞杞國憂
長楊收羽騎太液泊龍舟惟有衣冠在年年愴月遊

三

講學金華殿親耕鉤盾田侍臣容諫獵方士信求仙
虹影俄侵日龍顛不上天空餘水銀海長照夜鐙前

文宗元聖昭獻孝皇帝挽歌三首

繼體三才理承顏九族親禹功留海內殷曆付天倫
調露曲長在秋風詞尚新本支方百代先讓棣華春

二

月落宮車動風淒儀仗間路唯瞻鳳翼人尚想龍顏
御宇方无事乘雲遂不還聖情悲望處沈日下西山

三

享國十五載升天千萬年龍鑣仙路遠騎吹祀容全
日下初陵外人悲舊劍前周南有遺老掩淚望秦川

故相國燕國公子司空挽歌二首

彤弓封舊國黑綃維前功十年鎮南雍九命作司空
池臺樂事盡簫鼓葬儀雄一代英豪氣曉散白楊風

二

陰山貴公子來葬五陵西前馬悲无主猶帶朔風嘶
漢水青山郭襄陽白銅鞮至今有遺愛日莫人悽悽

重至衡陽傷柳儀曹并引

元和乙未歲與故人柳子厚臨湘水為別柳浮舟適
柳州余登陸赴連州後五年余從故道出桂嶺至前
別處而君沒于南中因賦詩以投弔

憶昨與故人湘江岸頭別我馬映林嘶君颿轉山滅
馬嘶循故道颿滅如流電千里江蘿春故人今不見

謫居悼往二首

邑邑何邑邑長沙地卑溼樓上見春多花前恨風急

猿愁腸斷叫鶴病翹趾立牛衣獨自眠誰哀仲卿泣

二

鬱鬱何鬱鬱長安遠于日終日念鄉關燕來鴻復還
潘岳歲寒思屈平顛顛顏殷勤望歸路無雨即登山

哭呂衡州時予方謫居

一夜霜風彫玉芝蒼生絕望士林悲空懷濟世安人
畧不見男婚女嫁時遺草一函歸太史旅坟三尺近
要離朔方徙歲行當滿欲為君刊第二碑

送傷段右丞

江湖舊遊南宮交代

江湖多豪氣朝廷有直聲何言馬蹄下一旦是佳城

傷桃源薛道士

壇邊松在鶴巢空白鹿閒行舊徑中
手植紅桃千樹發滿山无主住春風

王思道碑堂下作

蒼蒼宰樹起寒烟尚有威名海內傳
四府舊聞多故吏幾人垂淚拜碑前

遥傷丘中丞并引

河南丘絳有詞藻與余同升進士科
從仕鄴下不幸遇害故爲傷詞

鄴下殺才子蒼茫冤氣凝枯楊映漳水
野火上西陵

馬鬣今無所龍門昔共登何人為弔客
唯是有青蠅

傷獨孤舍人并引

貞元中余以御史監祠事河南獨孤生
始仕為奉禮郎有事宗廟郊疇必與之
俱繇是甚熟及予謫武陵九年間獨孤
生仕至中書舍人視草禁中上方許以
宰相元和十年春余祇召抵京師次都
亭日舍人疾不起余聞因作傷詞以為弔

昔別一年少今悲喪國華遠來同社燕
不見蚤梅花

余次敷水驛伏觀華州舅氏昔日行縣
題詩

處潛然有感

昔日股肱守朱輪茲地遊繁華日已謝章句此空留
萋草佳城閉故林棠樹秋今來重垂淚不忍過西州

湖南觀察使故相國袁公挽歌三首

五驅龍虎節一入鳳凰池令尹自無喜羊公人不疑
人歸京兆日葉下洞庭時湘水秋風至淒涼吹素旗

二

丹旄發江臯人悲雁亦號湘南罷亥市漢上改詞曹
表墓雙碑立尊名一字褒常聞平楚獄爲報里門高

三

返葬三千里荆衡達帝畿逢人多故吏拜奠盡沾衣

地得青烏相賓驚白鶴飛五公碑尚在今日亦同歸

代靖安佳人怨二首并引

靖安丞相武公居里名也元和十一年六月公將朝
夜漏未盡三刻騎出里門遇盜薨于牆下初公為郎
余為御史繇是有舊故今守于遠服賤不可以誅又
不得為歌詩聲于楚挽故代作佳人怨以埤于樂府
云

寶馬鳴珂蹋曉塵魚文匕首犯車茵適來行哭里門
外昨夜華堂歌舞人

秉燭朝天遂不迴路人彈指望高臺牆東便是傷心

地夜夜秋螢飛去來

傷愚溪三首并引

故人柳子厚之謫永州得勝地結茅樹蔬為沼泚為臺榭目曰愚溪柳子沒三年有僧遊零陵告予曰愚溪无復曩時矣一聞僧言悲不能自勝遂以所聞為七言以寄恨

溪水悠悠春自來草堂无主燕飛回
隔簾惟見中庭草一樹山榴依舊開
草聖數行留壞壁木奴千樹屬鄰家
唯見里門通德榜殘陽寂寞出樵車

柳門竹巷依依在野草青苔日月多
縱有鄰人解吹笛山陽舊侶更誰過

碧澗寺見元九侍御和展上人詩有三生之句因以和

廊下題詩滿壁塵塔前松樹已鱗皴
古來唯有王文度重見平生竺道人

傷秦妹行并引

河南房開士前為虞部郎中為余話曰
我得善箏人于長安懷遠里其後開士為赤縣牧容州求國工而誨之藝工而夭今年開士遺予新詩有悼佳人之目

顧予知所自也惜其有良妓獲所從而不久乃為
傷詞以貽開士

長安二月花滿城插花女兒弄銀箏南宮仙郎下朝
晚曲頭駐馬聞新聲馬蹄逶遲心蕩漾高樓已遠猶
頻望此時意重千金輕烏傳消息紺輪迎芳筵銀燭
一相見淺笑低鬟初目成蜀弦錚鏦指如玉皇帝第
子韋家曲青牛文梓赤金簧玫瑰寶柱秋鴈行斂蛾
收袂凝清光抽弦授調怨且長八鸞鏘鏘渡銀漢九
雛威鳳鳴朝陽曲終韻盡意不足餘思悄絕愁空堂
從郎鎮南別城闕樓船理由瀟湘月馮夷躑躑舞綠

波鮫人出聽停綃北池含烟瑤草短萬松亭下清

風滿

北池萬松皆容州勝槩

秦聲一曲此時聞嶺泉鳴咽腸堪

斷來自長陵小市東薜花零落瘴江風侍兒掩泣收
銀甲鸚鵡不言愁玉籠博山鑪中香自滅鏡奩塵暗
同心結從此東山非昔遊長嗟人與弦俱絕

夔州竇負外使君見示悼妓詩願余嘗識之

因命同作

前年曾見兩鬟時今日驚吟悼妓詩鳳管學成知有
籍龍媒欲換歎無期空廊月照常行地後苑花開舊
折枝寂寞魚山青草裏何人更立智瓊祠

寶夔州見寄寒食日憶故姬小紅吹笙因和之

鸞聲窈眇管參差清韻初調眾樂隨幽院妝成花下弄高樓月好夜深吹忽驚木槿飄零盡唯有朝雲夢想期聞道今年寒食日東山舊路獨行遲

傷循州渾尚書

貴人淪落路人哀碧海連天丹旆回遙想長安此時節朱門深巷百花開

哭龐京兆少年有俊氣常擢制科之首

俊骨英才氣衰然策名飛步冠羣賢逢時已自致高

位得疾還因倚少年天上別歸京兆府人間空歎茂陵阡今朝總帳哭君處前日見鋪歌舞筵

再傷龐尹

京兆歸何處章臺空莫塵可憐鸞鏡下哭殺畫眉人

哭王僕射名播時兼鹽鐵暴薨

子侯一日病滕公千載歸門庭颯已變風物慘无輝群吏謁新府舊賓沾素衣歌堂忽莫哭賀雀盡驚飛

傷韋賓客自工部尚書除賓客

韋公八十餘位至六尚書五福惟無富一生誰得如桂枝攀最久蘭省出仍初海內時流盡何人動素車

再經故元九相公宅池上作

故池春又至一到一傷情
雁鷺羣猶下蛙蟻衣已生
竹叢身後長臺勢雨來傾
六尺孤安在人間未有名

劉賓客文集卷第三十

劉賓客外集卷第一

正議大夫檢校禮部尚書兼太子賓客贈兵部尚書劉禹錫

詩

翰林白二十二學士見寄詩一百篇因以荅賦

吟君遺我百篇詩使我獨坐形神馳
玉琴清夜人不語琪樹春朝風正吹
邛人斤斲無痕跡仙人衣裳棄刀尺
世人方內欲相尋行盡四維無處覓

始至雲安寄兵部韓侍郎中書白舍人二公近曾

遠守故有屬焉

天外巴子國山頭白帝城
波清蜀村盡雲散荒臺傾
迅瀨下哮吼兩岸勢爭衡
陰風鬼神過暴雨蛟龍生
破斷見孤邑江流照飛甍
蠻軍擊嚴鼓笳馬引雙旌
望闕遙拜舞分

一之



庭備將迎銅符一以合文墨紛來縈暮色四山起愁猿數
處聲重關羣吏散靜室寒燈明故人青霞意飛舞集蓬瀛
昔曾在池籞應知魚鳥情

白舍人自杭州寄新詩有柳色春藏蘇小家之句
因而戲酬兼寄浙東元相公

錢塘山水有奇聲暫謫仙官有百城女妓還聞名小小使
君誰許喚卿卿鼇驚震海風雷起蜃鬪噓天樓閣成莫道
騷人在三楚文星今向斗牛明

春日書懷寄東洛白二十二楊八二庶子

曾向空門學坐禪如今萬事盡忘筌眼前名利同春夢醉
裏風情敵少年野草芳菲紅錦地游絲撩亂碧羅天心知
洛下閑才子不作詩魔即酒顛

白舍人見酬拙詩因以寄謝

雖陪三品散班中資歷從來事不同名姓也曾鐫石柱詩
篇未得上屏風甘陵舊黨凋零盡魏闕新知禮數崇煙水
五湖如有伴猶應堪作釣魚翁

白舍人曹長寄新詩有遊宴之盛因以戲酬

蘇州刺史例能詩西掖今來替左司二八城門開道路五
千兵馬引旌旗水通山寺笙歌去騎過虹橋劍戟隨若共
吳王鬪百草不如應是欠西施

蘇州白舍人寄新詩有歎早白無兒之句因以贈之

莫嗟華髮與無兒却是人間久遠期雪裏高山頭白早海
中仙果子生遲于公必有高門慶謝守何煩曉鏡悲幸免
如新分非淺祝君長詠夢熊詩

高山本高于門使之高二
義有殊古之詩流曉此

和汴州令狐相公到鎮改月偶書所懷二十二韻
受脈新梁苑和羹舊傳巖援毫動星宿垂釣取韜鈴赫弈
三川至歡呼百姓瞻綠油貌虎擁青紙鳳凰銜外壘曾無
警中廚亦罷監推誠人自服去殺令逾嚴赳赳容皆飾幡
幡口盡鉗為兄憐庾翼選壻得蕭咸鬱屈咽喉地駢闐水
陸兼渡橋鳴紉憶入肆颺雲帆端月當中氣東風應遠占
管絃喧夜景燈燭掩寒蟾酒每傾三雅書能發百函詞人
羞布鼓遠客獻貂襜歌榭白團扇舞筵金縷衫旌旗遙一
簇烏履近相攬花樹當朱閣晴河逼翠簾夜風飄鬢鬢燭
淚滴巉巖玉笋虛頻易金爐暖重添映鏤窺豔豔隔袖見
纖纖謝傅何由接桓伊定不凡應憐郡齋老旦夕鑷霜髯

白太守行

聞有白太守棄官歸舊谿蘇州十萬戶盡作嬰兒啼太守
駐行舟閭門草萋萋揮袂謝啼者依然兩眉低朱戶非不
崇我心如重狴華池非不清意在寥廓棲夸者竊所怪賢
者默思齊我為太守行題在隱起珪

酬樂天揚州初逢席上見贈

巴山楚水淒涼地二十三年棄置身懷舊空吟聞笛賦到
鄉翻似爛柯人沉舟側畔千帆過病樹前頭萬木春今日
聽君歌一曲暫憑盃酒長精神

同樂天登棲靈寺塔

步步相攜不覺難九層雲外倚欄杆忽然語笑半天上無
限遊人舉眼看

罷郡歸洛途次山陽留辭郭中丞使君

自到山陽不許辭高齋日夜有佳期管絃正合看書院語
笑方酬各詠詩銀漢雪晴褰翠幕清淮月影落金卮洛陽
歸客明朝去容趁城東花發時

楚州開元寺北院枸杞臨井繁茂可觀羣賢賦詩

因以繼和

僧房藥樹依寒井井有香泉樹有靈翠黛葉生籠石甃殷
紅子熟照銅瓶枝繁本是仙人杖根老新成瑞犬形上品
功能甘露味還知一勺可延齡

和樂天鸚鵡

養來鸚鵡嘴初紅宜在朱樓繡戶中頻學喚人緣性慧偏
能識主爲情通斂毛睡足難銷日蹀翅愁時願見風誰遣
聰明好顏色事須安置入深籠

歲杪將發楚州呈樂天

楚澤雪初霽楚城春欲歸清淮變寒色遠樹含晴暉原野
已多思風霜潛減威與君同旅鴈北向刷毛衣

洛中逢白監同話遊梁之樂因寄宣武令狐相公
曾經謝病各遊梁今日相逢憶孝王少有一身兼將相更
能四面占文章開顏座內催飛盞迴首庭中看舞槍借問
風前兼月下不知何客對胡牀

河南王少尹宅宴張常侍白舍人兼呈盧郎中李

貞外二副使

將星夜落使星來三省清臣到外臺事重各銜天子詔禮
成同把故人盃捲簾松竹雪初霽滿院池塘春欲迴第一
林亭迎好客殷勤莫惜玉山頽

鶴歎二首并序

友人白樂天去年罷吳郡挈雙鶴雛以歸予相遇於揚子
津閑翫終日翔舞調態一符相書信華亭之尤物也今年
春樂天爲秘書監不以鶴隨置之洛陽第一旦予入門問
訊其家人鶴軒然來晚如記相識徘徊俛仰似含情顧慕
填膺而不能言者因作鶴歎以贈樂天

寂寞一雙鶴主人在西京故巢吳苑樹深院洛陽城徐引
竹間步遠含雲外情誰憐好風月隣舍夜吹笙東隣即王家
丹頂宜承日霜翎不染泥愛池能久立看月未成棲一院
春草長三山歸路迷主人朝謁早貪養汝南雞

有所嗟

庾令樓中初見時武昌春柳鬪腰肢相逢相笑盡如夢爲

雨爲雲今不知

鄂渚濛濛煙雨微女郎魂逐暮雲歸只應長在漢陽渡化
作鴛鴦一隻飛

荅樂天臨都驛見贈

北固山邊波浪東都城裏風塵世事不同心事新人何似
故人

再贈樂天

一政政官軋軋一年年老駸駸身外名何足筭別來詩且
同吟

和裴相公傍水閑行

爲愛逍遙第一篇時時閑步賞風煙看花臨水心無事功
業成來二十年

和宣武令狐相公郡齋對新竹

新竹脩脩韻曉風隔窓依砌尚蒙籠數間素壁初閑後一段清光入座中歌枕閑看知自適含毫朗詠與誰同此君若欲長相見政事堂東有舊叢

荅白刑部聞新蟬

蟬聲未發前已自感流年一入淒涼耳如聞斷續絃晴清依露葉晚急畏霞天何事秋卿詠逢時一悄然

和裴相公寄白侍郎求雙鶴

皎皎華亭鶴來隨太守船

白君罷吳郡太守攜雙鶴來

青雲意長在滄海到

經年留滯清洛苑徘徊明月天何如鳳池上雙舞入祥煙

和樂天送鶴上裴相公別鶴之作

昨日看成送鶴詩高籠提出白雲司朱門乍入應迷路玉

樹容棲莫揀枝雙舞庭中花落處數聲池上月明時三山碧海不歸去且向人間呈羽儀

終南秋雪

南嶺見秋雪千門生早寒閑時駐馬望高處捲簾看霧散瓊枝出日斜鉛粉殘偏宜曲江上倒影入清瀾

闕下待傳點呈諸同舍

禁漏晨鐘聲欲絕旌旗組綬影相交殿含佳氣當龍首閣倚晴天見鳳巢山色葱蘢丹檻外霞光泛濫翠松梢多慙再入金門籍不敢爲文學解嘲

和樂天早寒

雨引苔侵壁風驅葉擁堦久留閑客話宿請老僧齋酒甕新陳接書籤次第排脩然自有處搖落不傷懷

和樂天以鏡換酒

把取菱花百鍊鏡換他竹葉十分盃
嘖眉厭老終難去蘸甲須歡便到來
妍醜太分迷忌諱松喬俱傲絕嫌猜校量
功力相千萬好去從空白玉臺

同樂天送河南馮尹學士

可憐玉馬風流地
蹙鞞金貂侍從才
閣上掩書劉向去
門前脩刺孔融來
峻陵路靜寒無雨
洛水橋長晝起雷
共羨府中棠棣好
先於城外百花開

同白二十二贈王山人

愛名之世忘名客
多事之時無事身
古老相傳見來久
歲年雖變貌常新
飛章上達三清路
受籙平交五嶽神
笑聽藜藜朝暮鼓
只能催得市朝人

一七

題集賢閣

鳳池西畔圖書府
玉樹玲瓏景氣閑
長聽餘風送天樂
時登高閣望人寰
青山雲繞欄杆外
紫殿香來步武間
曾是先賢翔集地
每看壁記一慙顏

杏園花下酬樂天見贈

二十餘年作逐臣
歸來還見曲江春
遊人莫笑白頭醉
老醉花間有幾人

和令狐相公初歸京國賦詩言懷

凌雲羽翮挾天才
揚歷中樞與外臺
相印昔辭東閣去
將星還拱北辰來
殿庭捧日影纓入
閣道看山曳履迴
口不言功心自適
吟詩釀酒待花開

曲江春望

鳳城煙雨歇萬象含佳氣酒後人倒狂花時天似醉三春
車馬客一代繁華地何事獨傷懷少年曾得意

和令狐相公春日尋花有懷白侍郎閣老

芳菲滿雍州鸞鳳許同遊花徑須深入時光不少留色鮮
由樹嫩枝亞爲房稠靜對仍持酒高看特上樓時宜連夜
賞雨便一年休共憶秋官處餘霞曲水頭

和樂天南園試小樂

閑步南園煙雨晴遙聞絲竹出牆聲欲拋丹筆三川去先
教清商一部成花木手栽偏有興歌詞自作別生情多才
遇景皆能詠當日人傳滿鳳城

和樂天春詞

新粧宜面下朱樓深鎖春光一院愁行到中庭數花朵蜻

蛭飛上玉搔頭

和嚴給事聞唐昌觀玉蕊花下有遊仙二絕

玉女來看玉蕊花異香先引七香車攀枝弄雪時迴顧驚
怪人間日易斜

雪蕊瓊絲滿院春衣輕步步不生塵君平簾下徒相問長
伴吹簫別有人

歎水別白二十二

水至清盡美從一勺至千里利人利物時行時止道性淨
皆然交情淡如此君遊金谷堤上我在石渠署裏兩心相
憶似流波潺湲日夜無窮已

荅樂天戲贈

才子聲名白侍郎風流雖老尚難當詩情逸似陶彭澤齋

日多如周太常矻矻將心求淨法時時偷眼看春光知君
技癢思歡宴欲倩天魔破道場

同樂天送令狐相公赴東都留守

自戶部尚書拜

尚書劍履出明光居守旌旗赴洛陽世上功名兼將相人
間聲價是文章衙門曉闢分天仗賓幕初開辟省郎從發
坡頭向東望春風處處有甘棠

自華陵至河南皆故林也

劉賓客外集卷第一

劉賓客外集卷第二

詩

同樂天和微之深春二十首

同用家花車斜四韻

何處深春好春深萬乘家宮門皆映柳輦路盡穿花池色
連天漢城形象帝車旌旗暖風裏獵獵向西斜

何處深春好春深阿母家瑤池長不夜珠樹正開花橋峻
通星渚樓暄近日車層城十二闕相對玉梯斜

何處深春好春深執政家恩光貪捧日貴重不看花玉饌
堂交印沙堤柱礙車多門一已閉直道更無斜

何處深春好春深大鎮家前旌光照日後騎蹙成花節院
收衙隊球場簇看車廣筵歌舞散書号夕陽斜

何處深春好春深貴戚家櫪嘶無價馬庭發有名花欲進

宮人食先熏命婦車晚歸長帶酒冠蓋任傾斜
何處深春好春深恩澤家爐添龍腦炷綬結虎頭花賓客
珠成履嬰孩錦縛車畫堂簾幕外來去燕飛斜
何處深春好春深京兆家人眉新柳葉馬色醉桃花盜息
無鳴鼓朝迴自走車能令帝城外不敢徑由斜
何處深春好春深刺史家夜闌猶命樂雨甚亦尋花傲客
多憑酒新姬苦上車公門吏散後風擺戟衣斜
何處深春好春深羽客家芝田繞舍色杏樹滿山花雲是
淮王宅風爲列子車古壇操簡處一徑入林斜
何處深春好春深小隱家芟庭留野菜撼樹去狂花醉酒
一千日貯書三十車推衾從露體不敢有餘斜
何處深春好春深富室家唯多貯金帛不擬負鶯花國樂

呼聯轡行厨載滿車歸來看理曲燈下寶釵斜
何處深春好春深豪士家多沽味濃酒貴買色深花已臂
鷹隨馬連催妓上車城南蹋青處村落逐原斜
何處深春好春深貴胄家迎呼偏熟客揀選最多花飲饌
開華幄笙歌出鈿車興酣樽易罄連瀉酒瓶斜
何處深春好春深唱第家名傳一紙榜興管九衢花薦聽
諸侯樂來隨計吏車杏園拋曲處揮袖向風斜
何處深春好春深少婦家能偷新禁曲自翦入時花追逐
同遊伴平章貴價車從來不墮馬故遣髻鬟斜
何處深春好春深幼女家雙鬟梳頂髻兩面繡裙花粧壞
頻臨鏡身輕不占車鞦韆爭次第牽拽綵繩斜
何處深春好春深蘭若家當香收栢葉養蜜近梨花野徑

宜行樂遊人盡駐車菜園籬落短遙見桔槔斜
何處深春好春深老宿家小欄圍蕙草高架引藤花四字
香書印三乘壁畫車遲迴聽句偈雙樹晚陰斜
何處深春好春深種蔣家分畦十字水接樹兩般花櫛比
栽籬槿啞啞轉井車可憐高處望綦布不曾斜
何處深春好春深稚子家爭騎一竿竹偷折四隣花笑擊
羊皮鼓行牽犢領車中庭貪夜戲不覺玉繩斜

刑部白侍郎謝病長告改賓客分司以詩贈別

鼎食華軒到眼前拂衣高步豈徒然九霄路上辭朝客四
皓叢中作少年他日卧龍終得雨今朝放鶴且冲天洛陽
舊有衡茅在亦擬抽身伴地仙

遥和白賓客分司初到洛中戲呈馮尹

西辭望苑去東占洛陽才度嶺無歸思看山不懊來冥鴻
何所慕遼鶴乍飛迴洗竹通新徑攜琴上舊臺塵埃長者
轍風月故人盃聞道龍門峻還因上客開

和留守令狐相公荅白賓客

蛟龍和風吹樹枝商山逸客出關時身無拘束起長晚路
足交親行自遲官拂象筵終日待私將雞黍幾人期君來
不用飛書報萬戶先從紙貴知

始聞蟬有懷白賓客去歲白有聞蟬見寄詩云祇

應催我老兼遣報君知之句

蟬韻極清切始聞何處悲人含不平意景值欲秋時此歲
方晚晚誰家無別離君言催我老已是去年詩

憶樂天

尋常相見意殷勤別後思量夢更頻每遇登臨好風景羨他天性少情人

樂天寄洛下新詩兼喜微之欲到因以抒懷也

松間風未起萬葉不自吟池上月未來清輝同夕陰宮徵不獨運塤荒自相尋一從別樂天詩思日已沉吟君洛中作精絕百鍊金乃知孤鶴情月露為知音微之從東來威鳳鳴歸林羨君先相見一豁平生心

月夜憶樂天兼寄微之

今宵帝城月一望雪相似遙想洛陽城清光正如此知君當此夕亦望鏡湖水展轉相憶心月明千萬里

酬鄂州令狐相公官舍言懷見寄兼呈樂天

詞人各在一涯居聲味雖同跡自疎佳句傳因多好事尺

題稀為不便書已通戎略逢黃石仍占文星耀碧虛聞說朝天在來歲霸陵春色待來車

吟白樂天哭崔兒上篇愴然寄贈

吟君苦調我霑纓能使無情盡有情四望車中心未釋千秋亭下賦初成庭梧已有雛棲處池鶴今無子和聲從此期君比瓊樹一枝吹折一枝生

答樂天所寄詠懷且釋其枯樹之歎

衙前有樂饌常精宅內連池酒任傾自是官高無狎客不論年長少歡情驪龍領被探珠去老蚌胚還應月生莫羨三春桃與李桂花成實向秋榮

白侍郎大尹自河南寄示池北新葺水齋即事招

賓十四韻兼命同作

公府有高政新齋池上開再吟佳句後一似畫圖來結構
疎林下黃緣曲岸隈綠波穿戶牖碧甃疊瓊瓌幽異當軒
滿清光繞砌迴潭心澄晚鏡渠口起晴雷瑤草緣堤種煙
松上島栽遊魚驚撥刺浴鷺喜韞璫爲客烹林笋因僧採
石苔酒瓶常不罄書案任成堆簷外青雀舫座中鸚鵡盃
蒲根抽九節蓮萼捧重臺芳訊此時到勝遊何日陪共譏
吳太守自占洛陽才

赴蘇州酬別樂天

吳郡魚書下紫宸長安廐吏送朱輪二南風化承遺愛八
詠聲名躡後塵梁氏夫妻爲寄客陸家兄弟是州民江城
春日追隨處共憶東歸舊主人

贈樂天

一別舊遊盡相逢俱涕零在人雖晚達於樹似冬青痛飲
連宵醉狂吟滿座聽終期拋印綬共占少微星

福先寺雪中酬別樂天

龍門賓客會龍宮東去旌旗駐上東二八笙歌雲幕下三
千世界雪花中離堂未暗排紅燭別曲含淒向曉風才子
從今一分散便將詩詠向吳儂

醉荅樂天

洛城洛城何日歸故人故人今轉稀莫嗟雪裏暫時別終
擬雲間相逐飛

和樂天耳順吟兼寄敦詩

吟君新什慰蹉跎屈指同登耳順科鄧禹功成三紀事孔
融書就八年多已經將相誰能爾拋却丞郎爭奈何獨恨

長洲數千里且隨魚鳥泛煙波

到郡未浹日登西樓見樂天題詩因即事以寄

自此郡謝
病西歸

湖上收宿雨城中無晝塵樓依新柳貴池帶亂苔春雲水
正一望簿書來繞身煙波洞庭路愧彼扁舟人

早夏郡中書事

水禽渡殘月飛雨灑高城華堂對嘉樹簾廡含曉清拂鏡
整危冠振衣步前楹將吏儼成列簿書紛來縈言下辨曲
直筆端破交爭虛懷詢病苦懷律操剽輕闕吏告無事歸
來解簪纓高簾覆朱閣忽爾聞調笙

虎丘寺見元相公二年前題名愴然有詠

前年滄橋
送之武昌

滄水送君君不還見君題字虎丘山因知早貴兼才子不

得多時在世間

寄贈小樊

花面了頭十三四春來綽約向人時終須買取名春草處
處將行步步隨

憶春草

憶春草處處多情洛陽道金谷園中見日遲銅駝陌上迎
風早河南大尹頻出難只得池塘十步看府門閉後滿街
月幾處遊人草頭歇館娃宮外姑蘇臺鬱鬱芊芊撥不開
無風自偃君知否西子裙裾曾拂來

樂天寄憶舊遊因作報白君以荅

報白君別來已度江南春江南春色何處好燕子雙飛故
宮道春城三百七十橋夾岸朱樓隔柳條了頭小兒蕩畫

槩長袂女郎簪翠翹郡齋北軒卷羅幕碧池逶迤繞畫閣
池邊綠竹桃李花花下舞筵鋪彩霞吳娃足情言語黠越
客有酒巾冠斜座中皆言白太守不負風光向盃酒酒酣
襞牋飛逸韻至今傳在人人口報白君相思空望嵩丘雲
其奈錢塘蘇小小憶君淚點石榴裙白君在城近
自洛歸錢塘

和白侍郎送令狐相公鎮太原

十萬天兵貂錦衣晉城風日斗生輝行臺僕射新恩重從
事中郎舊路歸疊鼓感成汾水浪門旗驚斷塞鴻飛邊庭
自此無烽火擁節還來坐紫微

秋夕不寐寄樂天

洞戶夜簾卷華堂秋篔簹清螢飛過池影蛩思繞階聲老枕
知將雨高窓報欲明何人諳此景遠問白先生

冬日晨興寄樂天

庭樹曉禽動郡樓殘點聲燈挑紅燼落酒暖白光生髮少
嫌梳利顏衰恨鏡明獨吟誰應和須寄洛陽城

酬樂天見寄

元君後輩先零落崔相同年不少留華屋坐來能幾日夜
臺歸去便千秋背時猶自居三品三川吳
郎品同得老終須卜一丘
投老之日願
樂天爲隣若使吾徒還早達亦應簫鼓入松楸

答樂天見憶

與老無期約到來如等閑偏傷朋友盡移興子孫間筆底
心無毒盃前膽不猥呼關唯餘憶君夢飛過武牢關

和樂天誚失婢榜者

把鏡朝猶在添香夜不歸鴛鴦拂瓦去鸚鵡透籠飛不逐

張公子即隨劉武威新知正相樂從此脫青衣

樂天重寄和晚達冬青一篇因成再答

風雲變化饒年少光景蹉跎屬老夫秋隼自能凌汗漫寒
龜飲氣受泥塗東隅有失誰能免北叟之言豈便誣振臂
猶堪呼一擲爭知掌下不成盧

河南白尹有喜崔賓客歸洛兼見懷長句因而繼和
幾年侍從作名臣却向青雲索得身朝士忽爲方外士王
人仍是眼中人雙鸞遊處天京好五馬行時海嶠春遙羨
光陰不虛擲肯令絲竹暫生塵

和楊師臯給事傷小姬英英

見學胡琴見藝成今朝追想幾傷情撚絃花下呈新曲放
撥燈前謝改名但是好花皆易落從來尤物不長生鸞臺

夜直衣衾冷雲雨無因入禁城

和樂天洛下醉吟寄太原令狐相公兼見懷長句
舊相臨戎非稱意詞人作尹本多情從容自使邊塵靜談
笑不聞桴鼓聲章句新添塞下曲風流舊占洛陽城昨來
亦有吳趨詠唯寄東都與北京

郡齋書懷寄河南白尹兼簡分司崔賓客

謾讀圖書三十車年年爲郡老天涯一生不得文章力百
口空爲飽暖家綺季衣冠稱鬢面吳公政事副詞華還思
謝病今歸去同醉城東桃李花

酬樂天七月一日夜即事見寄

夜樹風韻清天河雲彩輕故花多露草隔樹聞鶴鳴搖落
從此始別離含遠情聞君當是夕倚瑟吟商聲外物豈不

足中懷向誰傾秋來念歸去同聽嵩陽笙

題于家公主舊宅

樹滿荒臺葉滿池簫聲一絕草蟲悲隣家猶學宮人髻園
客爭偷御果枝馬埒蓬蒿藏狡兔鳳樓煙雨嘯愁鴟何郎
獨在無恩澤不似當初傅粉時

吟樂天自問愴然有作

親友關心皆不見風光滿眼倍傷神洛陽城裏多池館幾
處花開有主人

八月十五日夜半雲開然後翫月因詠一時之景

寄呈樂天

半夜碧雲收中天素月流開城邀好客置酒賞新秋影透
衣香潤光凝歌黛愁斜暉猶可翫移宴上西樓

秋日書懷寄白賓客

州遠雄無益年高健亦衰興情逢酒在筋力上樓知蟬噪
芳意盡鴈來愁望時商山紫芝客應不向秋悲

酬樂天見貽賀金紫之什

久學文章含白鳳却因政事賜金魚郡人未識聞謠詠天
子知名與詔書珍重和詩呈錦繡願言歸計並園廬舊來
詞客多無位金紫同遊誰得如

酬樂天初冬早寒見寄

乍起衣猶冷微吟帽半欹霜凝南屋瓦雞唱後園枝洛水
碧雲曉吳宮黃葉時兩傳千里意書札不如詩

樂天見示傷微之敦詩晦叔三君子皆有深分因

成是詩以寄

吟君歎逝雙絕句使我傷懷奏短歌世上空驚故人少集
中唯覺祭文多芳林新葉催陳葉流水前波讓後波萬古
到今同此恨聞琴淚盡欲如何

春池泛舟聯句

鳳池新雨後池上好風光禹錫上相公取酒愁春盡留宿喜日長
度送柳絲迎畫舸水鏡瀉雕梁羣送賈園長潭洞迷仙府煙霞認
醉鄉餗送張鶯聲隨笑語行色入壺觴籍送王客晚景含澄澈時
芳得豔陽禹錫飛鳧拂輕浪綠柳暗迴塘度逸韻追安石高
居勝辟疆羣孟停新令舉詩動彩牋忙餗顧謂同來客歡
遊不可忘籍

杏園聯句

杏園千樹欲隨風一醉同人此暫同羣上司空老態忽忘絲管裏

哀顏宜解酒盃中絳上白曲江日暮殘紅在翰苑年深舊事
空居易上二十四年流落者故人相引到花叢禹錫

花下醉中聯句

共醉風光地花飛落酒盃絳送劉殘春猶可賞晚景莫相
催禹錫送白侍郎酒幸年年有花應歲歲開居易送兵部相公且當金韻擲
莫遣玉山頽絳送庾高會彌堪惜良時不易陪承宣送誰能
拉花任爭得換春迴禹錫送吏部我輩尋常有佳人早晚來嗣復
寄言三相府欲去且徘徊居易時戶部相公會

宴興慶池亭送白二十二東歸聯句

東洛言歸去西園告別來白頭青眼客池上手中盃度離
瑟殷勤奏仙舟委曲迴征輪今欲動賓閣爲誰開禹錫坐弄
琉璃水行登綠縵苔花低粧照影萍散酒吹醅居易岸蔭新

抽竹亭香欲變梅隨遊多笑傲遇勝且徘徊籍澄澈連天
鏡潺湲出地雷林塘難共賞鞍馬莫相催度信及魚還樂
機忘鳥不猜晚晴槐起露新暑石添苔禹錫擬作雲泥別尤
思頃刻陪歌停珠貫斷飲罷玉峰頽居易雖有逍遙志其如
磊落才會當重用日此去肯悠哉籍

西池送白二十二東歸兼寄令狐相公聯句

促坐宴迴塘送君歸洛陽彼都留上宰爲我說中腸度威
鳳池邊別冥鴻天際翔披雲見居守望日拜封章禹錫春盡
年華少舟通景氣長送行歡共惜寄遠意難忘籍東道瞻
軒蓋西園醉羽觴謝公深眷眄商皓信輝光行武舊德推三
友新篇代八行

首夏猶清和聯句

記得謝家詩清和即此時居易餘花數種在密葉幾重垂度
芳謝人人惜陰成處處宜禹錫水萍爭點綴梁燕共追隨行
武亂蝶憐疎蕊殘鶯戀好枝籍草香殊未歇雲勢漸多奇
居易單服初寧體新篁已出籬度與春爲別近覺日轉行遲
禹錫繞樹風光少侵堦苔蘚滋行武唯思奉歡樂長得在西池
籍

薔薇花聯句

似錦如霞色連春接夏開禹錫波紅分影入風好帶香來度
得地依東閣當階奉上台行武淺深皆有態次第暗相催禹
錫滿地愁英落綠堤惜棹迴度芳穠濡雨露明麗隔塵埃行
武似著胭脂染如經巧婦裁居易奈花無別計只有酒殘盃籍
西池落泉聯句

東閣聽泉落能令野興多行武散時猶帶沫涼處即跳波度
徧洗磷磷石還驚泛泛鶯籍色清塵不染光白月相和居易
噴雪縈絲竹攢珠濺芰荷禹錫對吟時合響觸樹更搖柯籍
照圃紅分藥侵堦綠浸莎居易日斜車馬散餘韻逐鳴珂禹錫

和樂天柘枝

柘枝本出楚王家玉面添嬌舞態奢鬆鬢改梳鸞鳳髻新
衫別織鬪雞紗鼓催殘拍腰身軟汗透羅衣雨點花畫筵
曲罷辭歸去便隨王母上煙霞

和樂天題真娘墓

簷蔔林中黃土堆羅襦繡黛已成灰芳魂雖死人不怕蔓
草逢春花自開幡蓋向風疑舞袖鏡燈臨曉似粧臺吳王
嬌女墳相近一片行雲應往來

劉賓客外集卷第三

詩

客有話汴州新政書事寄令狐相公

天下咽喉今大寧軍城喜氣徹青冥庭前劍戟朝迎日筆
底文章夜應星三省壁中題姓字萬人頭上見儀形汴州
忽復承平事正月看燈戶不扃

和令狐相公郡齋對紫薇花

明麗碧天霞丰茸紫綬花香聞荀令宅豔入孝王家幾歲
自榮落高情方歎嗟有人移上苑猶是占年華

令狐相公見示河中楊少尹贈答兼命繼聲

兩首新詩百字餘朱絃玉磬韻難如漢家丞相重徵後梁
苑仁風一變初四面諸侯瞻節制八方通貨溢河渠自從

卻毅爲元帥大將歸來盡把書

和令狐相公謝太原李侍中寄蒲桃

珍果出西域移根到北方昔年隨漢使今日寄梁王上相
芳緘至行臺綺席張魚鱗含宿潤馬乳帶殘霜染指鉛粉
膩滿喉甘露香醞成十日酒味敵五雲漿咀嚼停金盞稱
嗟饗盡堂慙非末至客不得一枝嘗

和令狐相公送趙常盈鍊師與中貴人同拜嶽及

天台投龍畢却赴京師

銀璫謁者引霓旌霞帔仙官到赤城白鶴迎來天樂動金
龍擲下海神驚元君伏奏歸中禁武帝親齋禮上清何事
夷門請詩送梁王文字上聲名

令狐相公俯贈篇章斐然仰謝

鄂渚臨流別梁園衝雪來旅愁隨凍釋歡意待花開城曉
烏頻起池春鴈欲迴飲和心自醉何必管絃催

酬令狐相公贈別

越聲長苦有誰聞老向湘山與楚雲海嶠新辭永嘉守夷
門重見信陵君田園松菊今迷路霄漢鴛鴻久絕羣幸遇
甘泉尚詞賦不知何客薦雄文

酬令狐相公寄賀遷拜之什

遭迴二紀重爲郎洛下遙分列宿光不見當關呼早起曾
無侍史與焚香三花秀色通書幌十字春波繞宅牆白首
青衫誰比數相憐只是有梁王

相公昔曾以大寮分司
故有同病相憐之句

酬令狐相公早秋見寄

公來第四秋樂國號無愁軍士遊書肆商人占酒樓熊羆

交黑稍賓客滿青油今日文章主梁王不姓劉

和令狐相公翫白菊

家家菊盡黃梁國獨如霜瑩靜真琪樹分明對玉堂仙人披雪鬢素女不紅粧粉蝶來難見麻衣拂更香向風搖羽扇含露滴瓊漿高豔遮銀井繁枝覆象牀桂叢慙並發梅蓋妬先芳一入瑤華詠從茲播樂章

夏日寄宣武令狐相公

長憶梁王逸興多西園花盡興如何近來溽暑侵亭館應覺清談勝綺羅境入篇章高韻發風穿號令衆心和承明欲謁先相報願拂朝衣逐曉珂

令狐相公見示贈竹二十韻仍命繼和

高人必愛竹寄興良有以峻節可臨戎虛心宜得士衆芳

信妍媚威鳳難棲止遂於鞀鼓間移植東南美封以梁國土澆之浚泉水得地色不移凌空勢方起新青排故葉餘粉籠疎理猶復隔牆藩何因出塵滓茲辰去前蔽永日勞瞪視械械林已成熒熒玉相似規摹起心匠洗滌在願指曲直既瞭然孤高何卓爾垂梢覆內屏迸筍侵前庀妓席拂雲鬢賓階蔭珠履抱琴恣閑翫執卷堪斜倚露下懸明璫風來韻清徵堅貞貫四候標格殊百卉歲晚當自知繁華豈云比古詩無贈竹高唱從此始一聽清瑤音琤然長在耳

和令狐相公入潼關

寒光照旌節關路曉無塵吏謁前丞相山迎舊主人東瞻軍府靜西望勅書頻心共黃河水同昇天漢津

和令狐相公尋白閣老見留小飲因贈

傲士更逢酒樂天仍對花文章管星曆情興占年華宦達
翻思退名高却不誇唯存浩然氣相共賞煙霞

酬令狐相公雪中遊玄都見憶

好雪動高情心期在玉京人披鶴氅出馬躡象筵行照耀
樓臺變淋漓松桂清玄都留五字便入步虛聲

和令狐相公以司空裴相公見招南亭看雪四韻

重門不下關樞務有餘閑上客同看雪高亭盡見山瑞呈
霄漢外興入笑言間知是平陽會人人帶酒還

和令狐相公別牡丹

平章宅裏一欄花臨到開時不在家莫道兩京非遠別春
明門外即天涯

酬令狐留守巡內至集賢院見寄

仙院文房隔舊宮當時盛事盡成空墨池半在頽垣下書
帶猶生蔓草中巡內因經九重苑裁詩又繼二南風爲兄
手寫殷勤句遍歷三台各一通

和鄆州令狐相公春晚對花

朱門退公後高興對花枝望闕無窮思看書欲盡時含芳
朝競發凝豔晚相宜人意殷勤惜狂風豈得知

酬令狐相公春日言懷見寄

前陪看花處隣里近王昌今想臨戎地旌旗出汶陽營飛
柳絮雪門耀戟枝霜東望清河水心隨扁上郎

和令狐相公言懷寄河中楊少尹

章句慙非第一流世間才子暗陪遊吳宮已歎芙蓉死

張司

業詩云吳宮四面秋江
水天清露白芙蓉死
邊月空愁蘆管秋
李尚任向洛陽稱傲吏
分
白賓客
苦教河上領諸侯
天平石渠甘對圖書老
關外楊公安
穩不

遙和令狐相公座中聞思帝鄉有感

當初造曲者爲誰說得思鄉戀闕時
滄海西頭舊丞相
停盃處分不須吹

酬令狐相公見寄

羣玉山頭住四年
每聞笙鶴看諸仙
何時得把浮丘袂
白日將昇第九天

途次大梁雪中奉天平令狐相公書問兼示新什

因思曩歲從此拜辭形於短篇以申仰謝

遠守宦情薄故人書信來
共曾花下別今獨雪中迴紙尾

得新什眉頭還暫開此時同鴈鷺池上一徘徊

令狐相公自天平移鎮太原以詩申賀
相公昔爲并州從事

北都留守將天兵出入香街宿禁局
鞞鼓夜聞驚朔鴈
旌旗曉動拂參星
孔璋舊檄家家有
叔度新歌處處聽
夷落遙知真漢相
爭來屈膝看儀形

重酬前寄

邊烽寂寂盡收兵
宮樹蒼蒼靜掩扃
戎羯歸心如內地
天狼無角比凡星
新成麗句開緘後
便入清歌滿座聽
吳苑晉祠遙望處
可憐南北太相形

酬令狐相公秋懷見寄

寂寞蟬聲靜
差池燕羽迴
秋燐多越絕
朔氣想臺駘
相去數千里
無因同一盃
殷勤望飛鴈
新自塞垣來

酬令狐相公六言見寄

已嗟離別太遠更被光陰苦催吳苑燕辭人去汾川鴈帶
書來愁吟月落猶望憶夢天明未迴今日便令歌者唱兄
詩送一盃

令狐相公自太原累示新詩因以酬寄

飛蓬捲盡塞雲寒戰馬閑嘶漢地寬萬里胡天無警急一
籠烽火報平安燈前妓樂留賓宴雪後山河出獵看珍重
新詩遠相寄風情不似舊登壇

酬太原令狐相公見寄

書信來天外瓊瑤滿匣中衣冠南渡遠旌節北門雄鶴唳
華亭月馬嘶榆塞風山川幾千里唯有兩心同

酬令狐相公歲暮遠懷見寄

別侶孤鶴怨冲天威鳳歸容光一以間夢想是耶非芳訊
還珍重知音老更稀不如湖上鴈北向整毛衣

酬令狐相公親仁郭家花下即事見寄

荀令園林好山公遊賞頻豈無花下侶遠望眼中人斜日
漸移影落英紛委塵一吟相思曲惆悵江南春

酬令狐相公首夏閑居書懷見寄

蕙草芳未歇綠槐陰已成金罍唯獨酌瑤瑟有離聲翔泳
各殊勢篇章空寄情應憐三十載未變使君名

貞元中自郎官出守至今

三十一
年

酬令狐相公庭前白菊花謝偶書所懷見寄

數叢如雪色一旦冒霜開寒蕊差池落清香斷續來思深
含別怨芳謝惜年催千里難同賞看看又早梅

酬令狐相公季冬南郊宿齋見寄

壇下雪初霽城南凍欲生齋心祠上帝高步領名卿沐浴
含芳澤周旋聽佩聲猶憐廣平守寂寞竟何成

貞元中侍郎舅氏牧華州時予再忝科第前後由

華覲謁陪登伏毒寺屢馬亦曾賦詩題於梁棟
今典馮翊暇日登樓南望三峰浩然生思追想
昔年之事因成篇題舊寺

曾作關中客頻經伏毒巖晴煙沙苑樹晚日渭川帆昔是
青春貌今悲白雪髯郡樓空一望含意捲高簾

酬令狐相公杏園下飲有懷見寄

年年杏園望花發即經過未飲心先醉臨風思倍多三春
看又盡兩地欲如何日望長安道空成勞者歌

和令狐相公春早朝迴鹽鐵使院中作

柳動御溝清威遲堤上行城隅日未過山色雨初晴鶯避
傳呼起花臨府署明簿書盈几案要自有高情

令狐相公見示題洋州崔侍郎宅雙木瓜花頃接

侍郎同舍陪宴樹下吟翫來什輒成和章

金牛蜀路遠玉樹帝城春榮耀生華館逢迎欠主人簾前
凝小雪牆外麗行塵來去皆迴首情深是德隣

和令狐僕射相公題龍迴寺

茲地迴鑿日皇家禪聖時路無胡馬跡人識漢官儀天子
旌旗度法王龍象隨知懷去嗟歎經此益遲遲

相公家本咸陽有喬木之思

和令狐相公晚泛漢江書懷寄洋州崔侍郎閬州

高舍人二曹長

雨過遠山出江澄暮霞生因浮濟川舟遂作適野行郊樹
映緹騎水禽避紅旌田夫捐畚鍤織婦窺柴荆古岸夏花
發遙林晚蟬清沿洄方翫境鼓角已登城部內有良牧望
中寄深情臨觴念佳期泛瑟動離聲寂寞一病士夙昔接
羣英多謝謫仙侶幾時還玉京

酬令狐相公使宅別齋初栽桂樹見懷之作

清淮南岸家山樹黑水東邊第一栽影近畫梁迎曉日香
隨綠酒入金盃根留本土依江潤葉起寒稜映月開早晚
陰成比梧竹九霄還放綵鵬來

令狐相公頻示新什早春南望遐想漢中因抒短

章以寄情悵

軍城臨漢水旌旆起春風遠思見江草歸心看塞鴻野花

沿古道新葉映行宮唯有詩兼酒朝朝兩不同

酬令狐相公見寄

才兼文武播雄名遺愛芳塵滿洛城身在行臺爲僕射書
來角里訪先生閑遊占得嵩山色醉卧高聽洛水聲千里
相思難命駕七言詩裏寄深情

令狐相公春思見寄

一紙書封四句詩芳晨對酒遠相思長吟盡日西南望猶
及殘春花落時

令狐相公見示新栽蕙蘭二草之什兼命同作

上國庭前草移來漢水潯朱門雖易地玉樹有餘陰豔彩
凝還泛清香絕復尋光華童子佩柔軟美人心惜晚含遠
思賞幽空獨吟寄言知音者一奏風中琴

和令狐相公南齋小宴聽阮咸

陋巷久蕪沉四絃有遺音雅聲發蘭室遠思含竹林座絕
衆賓語庭移芳樹陰飛觴助真氣寂聽無流心影似白團
扇調諧朱絃琴一毫不平意幽怨古猶今

和令狐相公詠梔子花

蜀國花已盡越桃今正開色疑瓊樹倚香似玉京來且賞
同心處那憂別葉催佳人如擬詠何必待寒梅

酬令狐相公新蟬見寄

相去三千里聞蟬同此時清吟曉露葉愁噪夕陽枝忽爾
絃斷絕俄聞管參差洛橋碧雲晚西望佳人期

和令狐相公九日對黃白二菊花見懷

素萼迎寒秀金英帶露香繁華照旄鉞榮盛對銀黃琮璧

交輝映衣裳雜綵章晴雲遙蓋覆秋蝶近悠揚空想逢九
日何由陪一觴滿叢佳色在未肯委嚴霜

城內花園頗曾遊翫令公居守亦有素期適春霜
一夕委謝書實以答令狐相公見謔

樓下芳園最占春年年結侶採花頻繁霜一夜相撩冶不
似佳人似老人

令狐僕射與予投分素深縱山川阻峭然音問相

繼今年十一月僕射疾不起聞予已承訃書寢

門長慟後日有使者兩輩持書并詩計其日時

已是卧疾手筆盈幅翰墨尚新新詞一篇音韻

彌切收淚握管以成報章雖廣陵之絃於今絕

矣而蓋泉之感猶庶聞焉焚之總帳之前附於

舊編之末

前日寢門慟至今悲有餘已嗟萬化盡方見八行書滿紙
傳相憶裁詩怨索居危絃音有絕哀玉韻猶虛忽歎幽明
異俄驚歲月除文章雖不朽精魄竟焉如零淚霑青簡傷
心見素車淒涼從此後無復望雙魚

劉賓客外集卷第三

劉賓客外集卷第四

郡內書情獻裴侍中留守

功成頻獻乞身章擺落襄陽鎮洛陽萬乘旌旗分一半八
方風雨會中央兵符今奉黃公略書殿曾隨翠鳳翔心寄
華亭一雙鶴日隨高步繞池塘

酬樂天閑卧見寄

散誕向陽眠將閑敵地仙詩情茶助爽藥力酒能宣風碎
竹間日露明池底天同年未同隱緣欠買山錢

酬樂天小亭寒夜有懷

寒夜陰雲起疎林宿鳥驚斜風閃燈影迸雪打窓聲竟夕
不能寐同年知此情漢皇無奈老何況本書生

奉和裴晉公涼風亭睡覺

驪龍睡後珠原在仙鶴行時步又輕
方寸瑩然無一事水聲來似玉琴聲

和樂天閑園獨賞八韻前以蜂鶴拙句寄呈今辱

蝸蟻妍詞見答因成小巧以取大哈

永日無人事芳園任興行
陶廬樹可愛潘宅雨新晴
傳粉琅玕節熏香菡萏莖
榴花裙色好桐子藥丸成
柳蠹枝偏亞桑開葉再生
睢盱欲鬪雀索漠不言鶯
動植隨四氣飛沉含五情
捨榆與水擊小大強爲名

酬樂天衫酒見寄

酒法衆傳吳米好舞衣偏尚越羅輕
動搖浮蟻香濃甚裝束輕鴻意態生
閱曲定知能自適舉盃應歎不同傾
終朝

相憶終年別對景臨風無限情

空齋兩如何詩謝裴令公贈別二首

一言一顧重重何如今日陪遊清
洛苑昔年別入承明廬一東一西別
別何如終期大治再鎔鍊願託扶搖
翔碧虛

將之官留辭裴令公留守

祖帳臨伊水前旌指渭河
風煙里數少雲雨別情多重疊
受恩久邇迴如命何東山與東閣
終冀再經過

酬喜相遇同州與樂天替代

舊託松心契新交竹使符
行年同甲子筋力羨丁夫
別後詩成帙攜來酒滿壺
今朝停五馬不獨爲羅敷

前章比言春草白君之舞

妓也故有此答

奉和裴令公新成綠野堂即事

藹藹鼎門外澄澄洛水灣
堂皇臨綠野坐卧看青山
位極却忘貴功成欲愛閑
官名司管籥心術去機關
禁苑凌晨出園花及露攀
池塘魚撥刺竹徑鳥綿蠻
志在安瀟灑嘗經歷險艱
高情方造適眾意望徵還
好客文珠履華筵舞玉顏
無因隨賀燕翔集畫梁間

自左馮歸洛下酬樂天兼呈裴相公

新恩通籍在龍樓分務神都近
舊丘自有園公紫芝侶時賓

行四人盡在洛中

仍追少傅赤松遊華林霜葉紅
霞晚伊水晴光碧

玉秋更接東山文酒會始知江左未風流

王儉云江左風流宰相唯有謝公

秋齋獨坐寄樂天兼呈吳方之大夫

空齋寂寂不生塵藥物方書繞
病身纖草數莖勝靜地幽禽忽至似佳賓
世間憂喜雖無定釋氏銷磨盡有因
同向

洛陽閒度日莫教風景屬他人

和樂天齋戒月滿夜對道場偶詠懷

常脩清淨去繁華人識王城長者家
案上香煙鋪貝葉佛前燈燄透蓮花
持齋已滿招閑客理曲先聞命小娃
明日若過方丈室還應問為法來耶

吳方之見示獨酌小醉首篇樂天續有酬荅皆含

戲謔極至風流兩篇之中並蒙見屬輒呈濫吹

益美來章

閑門共寂任張羅靜室同虛養
太和塵世歡娛關意少醉鄉風景獨遊多
散金疎傳尋常樂枕麴劉生取次歌計會
雪中爭挈榼鹿裘鶴氅遞相過

酬樂天齋滿日裴令公置宴席上戲贈

一月道場齋戒滿今朝華幄管絃迎銜盃本自多狂態事
佛無妨有佞名酒力半酣愁已散文鋒未鈍老猶爭平陽
不獨容賓醉聽取喧呼吏舍聲

酬樂天偶題酒甕見寄

從君勇斷拋名後世路榮枯見幾回門外紅塵人自走甕
頭清酒我初開三冬學任胃中有萬戶侯須骨上來何幸
相招同醉處洛陽城裏好池臺

荅裴令公雪中訝白二十二與諸公不相訪之什
玉樹瓊樓滿眼新的知開閣待諸賓遲遲未去非無意擬
作梁園座右人

酬樂天請裴令公開春嘉宴

高名大位能兼有恣意遨遊是特恩二室煙霞成步障三

州風物是家園晨窺苑樹韶光動晚渡河橋春思繁絃管
常調客常滿但逢花處即開樽

樂天示過敦詩舊宅有感一篇吟之泣然追想昔

事因成繼和以寄苦懷

淒涼同到故人居門枕寒流古木疎向秀心中嗟棟宇蕭
何身後散圖書本營歸計非無意唯筭生涯尚有餘忽憶
前因更惆悵丁寧相約速懸車

敦詩與予友樂天三人同
甲子平生相約同休洛中

吳方之見示聽江西故吏朱幼恭歌三篇頗有懷
故林之思吟諷不足因而和之

侯家故吏歌聲發逸處能高怨處低今歲洛中無雨雪眼
前風景是江西

閑坐憶樂天以詩問酒熟未

案頭開縹帙肘後檢青囊唯有達生理應無治老方減書
存眼力省事養心王君酒何時熟相攜入醉鄉

和樂天洛城春齊梁體八韻

帝城宜春入遊人喜意長草生季倫谷花出莫愁坊斷雲
發山色輕風漾水光樓前戲馬地樹下鬪雞場白頭自爲
侶綠酒亦滿觴潘園觀種植謝墅閱池塘至閑似隱逸過
老不悲傷相問焉功德銀黃遊故鄉

三月三日與樂天及河南李尹奉陪裴令公泛洛

禊飲各賦十二韻

洛下今脩禊群賢勝會稽盛筵陪玉鉉通籍盡金閨波上
神仙妓岸傍桃李蹊水嬉如鷺振歌響雜鶯啼歷覽風光
好沿洄意思迷棹歌能儷曲墨客競分題翠幄連雲起香

車向道齊人誇綾步障馬惜錦障泥塵暗宮牆外霞明苑
樹西舟形隨鷁轉橋影與虹低川色晴猶遠烏聲暮欲棲
唯餘蹋青伴待月魏王堤

寄和東川楊尚書慕巢兼寄西川繼之二公近從

弟兄情分偏睦早忝遊舊因成是詩

太華蓮峰降嶽靈兩川棠樹接郊坰政同兄弟人人樂曲
奏墳麓處處聽楊葉百穿榮會府芝泥五色耀天庭各拋
筆硯誇旄鉞莫遣文星讓將星

秋中暑退贈樂天

暑服宜秋著清琴入夜彈人情皆向菊風意欲摧蘭歲稔
貧心泰天涼病體安相逢取次第却甚少年歡

和樂天洛下雪中宴集寄汴州李尚書

洛城無事足盃盤風雪相和歲欲闌樹上因依見寒鳥座
中收拾盡閑官笙歌要請頻何爽笑語忘機拙更歡遙想
兔園今日會瓊林滿眼映旂竿

喜遇劉二十八偶書兩韻聯句

病來佳興少老去舊遊稀笑語縱橫作盃觴絡繹飛度清
談如水玉逸韻貫珠璣高位當金鉉虛懷似布衣禹錫已容
狂取樂仍任醉忘機捨眷將何適留歡便是歸居易鳳儀常
欲附蚊力自知微願假樽壘末膺門自此依紳

劉二十八自汝赴左馮途經洛中相見聯句

不歸丹掖去銅竹漫云云唯喜因過我須知未賀君度詩
聞安石詠香見令公熏欲首函關路來披緱嶺雲居易貂蟬
公獨步鴛鴦我同羣插羽先飛酒交鋒便戰文紳鎮嵩知

表德定鼎為銘勲顧鄙容商洛徵歡候汝墳禹錫頻年多謔
浪此夕任喧紛故態猶應在行期未要聞度遊藩榮已久
捧袂惜將分詎厭盃行疾唯愁日向曛居易窮陰初莽蒼離
思漸氤氳殘雪午橋岸斜陽伊水濱紳上謨尊右掖全略
靜東軍萬頃徒稱量滄溟詎有垠禹錫

予自到洛中與樂天為文酒之會時時構詠樂不
可支則慨然共憶夢得而夢得亦分司至止歡
愜可知因為聯句

成周文酒會吾友勝鄒枚唯憶劉夫子而今又到來度欲
迎先倒屣入座便傾盃飲許伯倫右詩推公幹才並以本
事居易久
曾聆郢唱重喜上燕臺晝話牆陰轉宵歡斗柄迴禹錫新聲
還共聽故態復相哈遇物皆先賞從花半未開度起時烏

帽側散處玉山顏墨客誼東閣文星犯上台居易詠吟君稱

首踈放我為魁憶戴何勞訪指夢得夢得留髻不用猜宴席

夫甃起樂天奉觴承麴藥落筆捧瓊瑰醉弁無妨側詞鋒不

可摧此兩韻美令水軒看翡翠石徑踐莓苔童子能騎竹佳

人解詠梅陪遊南宅洛中三可矣鄴下七悠哉自向風光急

不須絃管催度樂觀魚踴躍閑愛鶴徘徊煙柳青凝黛波

萍綠撥醅居易春榆初改火律管又飛灰紅藥多遲發碧松

宜亂栽禹錫馬嘶駝陌上鷓泛鳳城隈色色時堪惜步步病

莫推度涸流尋軋軋餘刃轉恢恢從此知心伏無因敢自

媒禹錫室隨親客入席許舊寮陪逸興稽將阮交情陳與雷

此二句屬夢洪爐思哲匠大廈要羣材他日登龍路應知免

得也居易曝鯤禹錫

洛中早春贈樂天

漠漠復靄靄半晴將半陰春來自何處無迹日以深韶嫩
冰後水輕盈煙際林藤生欲有託柳弱不自任花意已含
蓄鳥言尚沉吟期君當此時與我恣追尋翻愁爛熳後春
暮却傷心

和樂天宴李周美中丞宅池上賞櫻桃花

櫻桃千萬枝照耀如雪天王孫宴其下隔水疑神仙宿露
發清香初陽動暄妍妖姬滿髻插酒客折枝傳同此賞芳
月幾人有華筵盃行勿遽辭好醉過三年

和牛相公遊南莊醉後寓言戲贈樂天兼見示

城外園林初夏天就中野趣在西偏薔薇亂發多臨水鷓
鷦雙遊不避船水底遠山雲似雪橋邊平岸草如煙白家

唯有盃觴興欲把頭盤打少年

思黯南墅賞牡丹花

偶然相遇人間世合在增城阿姥家有此傾城好顏色天
教晚發賽諸花

樂天少傅五月長齋廣延緇徒謝絕文友坐成睽

間因以戲之

五月長齋戒深居絕送迎不離通德里便是法王城舉目
皆僧事全家少俗情精脩無上道結念未來生賓閣緇衣
占書堂信鼓鳴戲童爲塔象啼鳥學經聲黍用青菰角葵
承玉露烹馬家供薏苡劉氏餉蕪菁暗網籠歌扇流塵晦
酒鐺不知何次道作佛幾時成

樂天池館夏景方妍白蓮初開綵舟空泊唯邀緇

侶因以戲之

池館今正好主人何寂然白蓮方出水碧樹未鳴蟬靜室
宵聞磬齋厨晚絕煙蕃僧如共載應不是神仙

酬樂天晚夏閑居欲相訪先以詩見貽

池榭堪臨泛脩然散鬱陶步因驅鶴緩吟爲聽蟬高林密
添新竹枝低縋晚桃酒醅晴易熟藥圃夏頻薈老是班行
舊閑爲鄉里豪經過更何處風景屬吾曹

酬樂天感秋涼見寄

庭晚初辨色林秋微有聲槿衰猶強笑蓮迴却多情簷燕
歸心動鞦鷹俊氣生閑人占閑景酒熟且同傾

樂天以愚相訪沽酒致歡因成七言聊以奉荅

少年曾醉酒旗下同輩黃衣領亦黃蹴蹋青雲尋入仕蕭

條白髮且飛觴今徵古事歡生雅客喚閑人與任狂猶勝
獨居荒草院蟬聲聽盡到寒螿

秋晚新晴夜月如練有懷樂天

雨歇晚霞明風調夜景清月高微暈散雲薄細鱗生露草
百蟲思秋林千葉聲相望一步地脉脉萬重情

和思黯南莊見示

丞相新家伊水頭智囊心匠日增脩化成池沼無痕迹奔
走清波不自由臺上看山徐舉酒潭中見月慢迴舟從來
天下推尤物合屬人間第一流

同留守王僕射各賦春中一物從一韻至七

鶯能語多情春將半天欲明始逢南陌復集東城林疎時
見影花密但聞聲營中緣催短笛樓上來定哀箏千門萬

戶垂楊裏百轉如簧煙景晴

和樂天春詞依憶江南曲拍爲句

春去也多謝洛城人弱柳從風疑舉袂叢蘭裛露似霑巾
獨坐亦含嚬

謝樂天聞新蟬見贈

碧樹有蟬後煙雲改容光瑟然引秋氣芳草日夜黃夾道
喧古槐臨池思垂楊離人下憶淚忠士激剛腸昔聞阻山
川今聽同匡牀人情便所遇音韻豈殊常因之比笙竽送
我遊醉鄉

新秋對月寄樂天

月露發光彩此時方見秋夜涼金氣應天靜火星流蛩響
偏依井螢飛直過樓相知盡白首清景復追遊

酬樂天小臺晚坐見憶

小臺堪遠望，獨上清秋時。
有酒無人勸，看山祇自知。
幽禽囀新竹，孤蓮落靜池。
高門勿遽掩，好客無前期。

早秋雨後寄樂天

夜雲起河漢，朝雨灑高林。
梧葉先風落，草蟲迎濕吟。
簟涼扇恩薄，室靜琴思深。
且喜炎前別，安能懷寸陰。

和樂天秋涼閑卧

暑退人體輕，雨餘天色改。
荷珠貫索斷，竹粉殘粧在。
高僧掃室請，逸客登樓待。
槐柳漸蕭疎，閑門少光彩。

秋晚病中樂天以詩見問力疾奉酬

耳虛多聽遠，展轉晨雞鳴。
一室背燈卧，中夜掃葉聲。
蘭芳經雨敗，鶴病得秋輕。
肯蹋衡門草，唯應是友生。

和樂天燒藥不成命酒獨醉

九轉欲成就，百神應主持。
嬰啼鼎上去，老貌鏡前悲。
却顧空丹竈，迴心向酒卮。
醺然耳熱後，慙似少年時。

酬樂天詠老見示

人誰不願老，老去有誰憐。
身瘦帶頻減，髮稀冠自偏。
廢書緣惜眼，多灸爲隨年。
經事還諳事，閱人如閱川。
細思皆幸矣，下此便脩然。
莫道桑榆晚，爲霞尚滿天。

歲夜詠懷

彌年不得意，新歲又如何。
念昔同遊者，而今有幾多。
以閑爲自在，將壽補蹉跎。
春色無情故，幽居亦見過。

元日樂天見過因舉酒爲賀

漸入有年數，喜逢新歲來。
震方天籟動，寅位帝車迴。
門巷

掃殘雪林園驚早梅與君同甲子壽酒讓先盃

裴令公見示酬樂天寄奴買馬絕句斐然仰和且

戲樂天

常奴安得似方回爭望追風絕足來若把翠蛾酬綠耳始知天下有奇才

酬思黯代書見戲

官冷如漿病滿身凌寒不易過天津少年留守多情興請待花時作主人

酬思黯見示小飲四韻

拋却人間第一官俗情驚怪我方安兵符相印無心戀洛水嵩雲恣意看三足鼎中知味久百尋竿上擲身難追呼故舊連宵飲直到天明興未闌

酬樂天醉後狂吟十韻

來章有移家住醉鄉之句

散誕人間樂逍遙地上仙詩家登逸品釋氏悟真詮制誥留臺閣歌詞入管絃處身於木鴈任世變桑田吏隱情兼遂儒玄道兩全八關齋適罷三雅興尤偏文墨中年舊松筠晚歲堅魚書曾替代香火有因緣

陸法和云與梁元帝於空王寺佛前訂香火因緣欲

向醉鄉去猶爲色界牽好吹楊柳曲爲我舞金鈿

酬牛相公獨飲偶醉寓言見示

宮漏夜丁丁千門閉霜月華堂列紅燭絲管靜中發歌眉低有思舞體輕無骨主人啓醜顏酣暢浹肌髮猶思城外客阡陌不可越春意日夕深此歡無斷絕

和僕射牛相公春日閑坐見懷

官曹崇重難頻入第宅清閑且獨行塔蟻相逢如偶語園

蜂速去恐違程人於紅藥唯看色鶯到垂楊不惜聲東洛
池臺怨拋擲移文非久會應成

牛相公見示新什謹依本韻次用以抒下情

劇韻新篇至因難始有能雨天龍變化晴日鳳騫騰遊海
驚何極聞韶素不曾愜心時拊髀擊節自麾肱符彩添渝
墨波瀾起剡藤揀金光熠燿累壁勢層層珠媚多藏賈花
撩欲定僧封來真實物寄與愧文朋已老無時疾時洛中時
癘多傷少
年長貧望歲登雀羅秋寂寂蟲翅曉薨薨羸驥方辭絆虛
舟已絕絙榮華甘死別徒羨亦生憎玉柱瑱琤韻金觥電
凸稜何時良宴會促膝對華燈

秋霖即事聯句三十韻

蕭索窮秋月蒼茫苦雨天泄雲生棟上行潦入庭前居易送
上僕射

苔色侵三徑波聲想五絃井蛙爭入戶轍鮒亂歸泉起送上
中丞大

監高雷愁晨坐空塔警夜眠鶴鳴猶未已蟻穴亦頻遷禹錫
送上

少傳散漫疎還密空濛斷又連竹霑青玉潤荷滴白珠圓居
易

易地濕灰蛾滅池添水馬憐有苗霑霖霖無月弄潺湲起

籬菊潛開秀園蔬已罷鮮斷行隨鴈翅孤嘯聳鳶肩鏤橋

柱黏黃菌牆衣點綠錢草荒行藥路沙淀釣魚船居易長者

車猶阻高人榻且懸此思劉君
之來也金烏何日見玉爵幾時傳起

近井桐先落當簷石欲穿趨風誠有戀披霧邈無緣禹錫以
答懸榻

之廩米陳生醜庖薪濕起煙鳴雞潛報曉急景暗凋年居易

蓋灑高松上絲繁細柳邊拂叢時起蝶墜葉乍驚蟬起巾

角皆爭墊裙裾別似湔人多蒙翠被馬盡著連乾禹錫好客

無來者貧家但悄然寒泥印鶴跡漏壁絡蝸涎居易蚊聚雷

侵室鷗翻浪滿川上樓愁暮暮繞舍厭濺濺起律候今秋

喜晴聯句

苦雨晴何喜喜於未雨時氣收雲物變聲樂鳥鳥知居易送上僕射
蕙泛光風圃蘭開皎月池千峰分遠近九陌好追隨起送上尚書
白日開天路玄陰卷地維餘清在林薄新照入連漪禹錫碧
樹涼先落青蕪濕更滋曬毛經浴鶴曳尾出泥龜居易舞去
商羊速飛來野馬遲柱邊無潤礎臺上有遊絲起橋淨行
塵息堤長禁柳垂宮城開睥睨觀闕麗眾恩禹錫洛水澄清
鏡嵩煙展翠帷梁成虹乍見市散蟻初移居易藉草風猶暖
攀條露已晞屋穿添碧瓦牆缺召金鉞起迴澈來雙目昏
煩去四支霞文晚煥爛星影夕參差禹錫爽助門庭肅寒摧

草木哀黃乾向陽菊紅洗得霜梨居易假蓋閑誰惜彈絃燥
更悲散蹄良馬穩炙背野人宜起洞戶晨輝入空庭宿霧
披推牀出書目傾筭上衣梳禹錫道路行非阻軒車望可期
無辭訪圭竇且願見瓊枝居易山閣逢萊客古以秘書喻蓬萊儲宮羽
翼師此言少傳每憂陪麗句何暇覲英姿起以酬圭竇之言翫景方搔首懷
人尚斂眉因吟仲文什高興盡於斯禹錫

會昌春連宴即事

元年寒食日上巳暮春天雞黍三家會鶯花二節連居易光
風初淡蕩美景漸暄妍簪組蘭亭上車輿曲水邊禹錫松聲
添奏樂草色助鋪筵雀舫宜閑泛螺盃任漫傳起園蔬香
帶露池柳暗藏煙麗句輕珠玉清談勝管絃居易陌喧金距
鬪樹動綵繩懸姹女粧梳豔遊童衣服鮮禹錫圃香知種蕙

池暖憶開蓮怪石雲疑觸夭桃火欲然起正歡唯恐散雖

醉未思眠嘯傲人間世追隨地上仙居易燕來雙茫茫鴈去

累翩翩行樂真吾事尋芳獨我先禹錫滯周慙太史太史公留滯周南今

榮示慙古人矣入洛繼先賢此言劉白聲價與二陸爭長矣昔恨多分手今歡謬比肩

起病猶陪宴飲老更奉周旋望重青雲客情深白首年居易

遍嘗珍饌後許入畫堂前舞袖翻紅炬歌鬟插寶蟬禹錫斷

金多感激倚玉貴遷延說史吞顏註論詩笑鄭箋起松筠

寒不變膠漆冷彌堅興伴王尋戴謂隨僕射過尚書也榮同隗在燕居易

誦擲盧誇使氣刻燭闢成篇實藝皆三捷虛名愧六聯禹錫

興闌猶舉白話靜每思玄更說歸時好高亭月正圓起

僕射來示有三春向晚四者難并之說誠哉是言

輒引起題重為聯句疲兵再戰勅敵難降下筆

之時輾然自哂走呈僕射兼簡尚書

三春今向晚四者昔難并借問低眉坐何如攜手行居易舊

遊多過隙新宴且尋盟鸚鵡林須樂麒麟閣未成起分陰

當愛惜遲景好逢迎林野薰風起樓臺穀雨晴禹錫牆低山

半出池廣水初平橋轉長虹曲舟迴小鷁輕居易殘花猶布

繡密竹自聞笙欲過芳菲節難忘宴會情起月輪行似箭

時物勢如傾見鴈隨兄去聽鶯求友聲禹錫蕙長書帶展菰

嫩剪刀生座密衣裳暖堂虛絲管清居易峰巒侵碧落草木

近朱明與點非沂水陪膺是洛城白嘗為三川守故云起撥醅爭綠醕

卧酪待朱櫻幾處能留客何人喚解醒禹錫舊儀尊右揆新

命寵春卿有喜鵲頻語無機鷗不驚居易青林思小隱白雪

仰芳名訪舊殊千里登高賴九城起鄼侯司管鑰疏傳傲

簪纓綸綍曾同掌煙霄即上征禹錫冊庭嘗接武書殿忝連
衡蘭室春彌馥松心晚更貞居易琴招翠羽下釣掣紫鱗呈
只願迴烏景誰能避兕觥起方知醉兀兀應勝走營營鳳
閣鸞臺路從他年少爭居易更呈二公

樂天是月長齋鄙夫此時愁卧里閤非遠雲霧難
披因以寄懷遂爲聯句所期解悶焉敢驚禪

五月長齋月 苦行心蘭葱不入戶蒼苔自成林夢得護

戒先辭酒嫌喧亦撤琴塵埃賓位靜香火道場深樂天我靜
馴狂象吾餘施衆禽定知於佛佞豈復向書淫夢得欄藥凋
紅豔庭槐換綠陰風光徒滿目雲霧未披襟樂天樹爲清涼
倚池因盥漱臨蘋芳遭燕拂蓮拆待蜂尋夢得舍下環流水
窓中列遠岑苔斑錢剝落石怪玉嶽峯樂天鵲頂迎秋禿鶯

喉入夏瘖柳絲垂色線棘刺露長針夢得散秩身猶幸趨朝
力不任官將才共拙年與病交侵樂天狗樂非時選忘機似
陸沉鑿容稱四皓捫腹有三壬夢得攜手慙連壁同心許斷
金紫芝雖繼唱前後各在賓客白雪少知音樂天憶罷吳門守相逢楚
水淖舟中頻曲宴夜後各加斟夢得濁酒銷殘漏絃聲間遠
砧醜顏舞長袖密坐接華簪樂天持論峰巒峻戰文矛戟森
笑言誠莫逆造次必相箴夢得往事應如昨餘歡迄至今迎
君常倒屣訪我輒攜衾樂天陰魄初離畢將有後雨陽光正在參五
節待公休一食縱飲共狂吟夢得

劉賓客外集卷第五

雜詩

答張侍御賈喜再登科後自洛赴上都贈別

又被時人寫姓名春風引路入京城
知君憶得前身事分付鶯花與後生

和武中丞秋日寄懷簡諸寮故

退朝還公府騎吹息繁音
吏散秋庭寂鳥啼煙樹深
威生奉白簡道勝外華簪
風物清遠目功名懷寸陰
雲衢念前侶彩翰寫冲襟
涼菊照幽院敗荷攢碧潯
感時江海思報國松筠心
空愧壽陵步芳塵何處尋

赴連州途經洛陽諸公置酒相送張員外賈以詩

見贈率爾酬之

謫在三湘最遠州邊鴻不到水南流如今暫寄樽前笑明日辭君步步愁

贈元九侍御文石枕以詩獎之

文章似錦氣如虹宜薦華簪綠殿中縱使真飈生旦夕猶堪拂拭愈頭風

酬元九侍御贈璧州鞭長句

碧玉孤根生在林美人相贈比雙金初開郢客緘封後想見巴山冰雪深多節本懷端直性露青猶有歲寒心何時策馬同歸去關樹扶疎敲鐙吟

和李六侍御文宣王廟釋奠作

歎息魯先師生逢周室卑有心律天道無位救陵夷歷聘不能用領徒空爾爲儒風正禮樂旅象入著龜西狩非其

應中都安足施世衰由我賤泣下爲人悲遺教光文德興王叶夢期土田封後胤冕服飾虛儀鐘鼓膠庠薦牲牢郡邑祠聞君喟然歎偏在上丁時

敬酬徹公見寄二首

淒涼沃洲僧憔悴柴桑宰別來二十年唯餘兩心在越江千里鏡越嶺四時雪中有逍遙人夜深觀水月

酬元九院長自江陵見寄

無事尋花至仙境等閑栽樹比封君金門通籍真多士黃紙除書每日聞

韓十八侍御見示岳陽樓別竇司直詩因令屬和

重以自述故足成六十二韻

楚江何蒼然曾瀾七百里孤城寄遠目一寫無窮已蕩漾

浮天蓋迴環宣地理積漲在三秋混成非一水冬遊見清
淺春望多洲沚雲錦遠沙明風煙青草靡火星忽南見月
魄方東迤雪波西山來隱若長城起獨專朝宗路駛悍不
可止支川讓其威蓄縮至南委熊武走蠻落熊武二瀟湘來
奧鄙炎蒸動泉源積潦搜山趾歸往無旦夕包含通遠邇
行當白露時眇視秋光裏曙色未昭晰露華遙斐亶浩爾
神骨清如觀混元始犸風忽震盪驚浪迷津浹怒激鼓鏗
旬感成山巋峴鷗鵬疑變化罔象何恢詭噓吸寫樓臺騰
驤露鬢尾景移羣動息波靜繁音弭明月出中央青天絕
織滓素光淡無際綠靜平如砥空影度鵷鴻秋聲思蘆葦
鮫人弄機杼貝闕駢紅紫珠蛤吐玲瓏文鯨翔旖旎水鄉
吳蜀限地勢東南庠翼軫粲垂精衡巫屹環峙名雄七澤

藪國辨三苗氏唐羿斷脩蛇荆王憚下逆青兕秦狩跡猶在

虞巡路從此軒后奏宮商騷人詠蘭芷茅嶺潛相應橘洲

傍可指郭璞驗幽經羅含著前紀觀津戚里族按道侯家

子聯袂登高樓臨軒笑相視假守亦高卧實時權領郡事墨曹正垂

耳韓亦量移江陵法曹司法參軍或謂之墨曹契濶話涼溫壺觴慰遷徙地偏山水

秀客重盃盤侈紅袖花欲然銀燈晝相似興酣更抵掌樂

極同啓齒筆鋒不能休藻思一何綺伊予負微尚夙昔慙

知已出入金馬門交結青雲士襲芳踐蘭室學古遊槐市

策慕宋前軍文師漢中壘陋容昧俯仰孤志無依倚衛足

不如葵漏川空歎蟻幸逢萬物泰獨處窮途否鍛翮重疊

傷兢魂再三褫遽瑗亦屢化左丘猶有耻桃源訪仙官薛

服祠山鬼故人南臺舊公爲御史時與禹錫同官一別如弦史今朝會荆

蠻時禹錫出爲連州途至荆南改武陵司馬和韻於荆斗酒相燕喜爲予出新什笑拈隨
伸紙擘若觀五色歡然臻四美委曲風濤事分明窮達旨
洪韻發華鐘淒音激清徵羊濟聲平共和江淹多雜擬徒
欲仰高山焉能追逸軌湘洲路四達巴陵城百雉何必顏
光祿留詩張內史

酬竇員外使君寒食日途次松滋渡先寄示四韻
楚鄉寒食橘花時野渡臨風駐綵旗草色連雲人去住水
紋如縠燕差池朱輪尚憶羣飛雉青綬初懸左顧龜非是
湓城魚司馬水曹何事與新詩

和竇中丞晚入容江作

漢郡三十六鬱林東南遙人倫選清臣天外頒詔條桂水
步秋浪火山凌霧朝分圻辨風物入境聞謳謠莎岸見長

亭煙林隔麗譙日落舟益駛川平旗自飄珠浦遠明滅金
沙晴動搖一吟道中作離思懸層霄

呂八見寄郡內書懷因而戲和

文苑振金聲循良冠百城不知今史氏何處列君名

寄楊八拾遺

時出爲國子主簿分司東都王十八員外亦轉國子博士同在洛陽

聞君前日獨庭爭漢帝偏知白馬生忽領簿書遊太學寧
勞侍從厭承明洛陽本自宜才子海內而今有直聲爲謝
同寮老博士范雲來歲即公卿

酬竇員外郡齋宴客偶命柘枝因見寄兼呈張十

一院長元九侍郎

員外即兼節度判官佐平蠻之略張初罷都已元方從事

分憂餘刃又從公白羽胡牀嘯詠中彩筆諭戎矜倚馬華
堂留客看驚鴻渚宮油幕方高步澧浦甘棠有幾叢若問

騷人何處所門臨寒水落江楓

酬竇員外旬休早涼見示

奉書報言
明朝有宴

新秋十日斡朱衣鈴閣無聲公吏歸風韻漸高梧葉動露
光初重槿花稀四時苒苒催客鬢三爵油油忘是非更報
明朝池上酌人知太守字玄暉

和楊侍郎憑見寄二首

翔鸞闕底謝皇恩纓上滄浪舊水痕疎傳揮金忽相憶遠
擎長句與招魂

十年毛羽摧頽一旦天書召迴看看花時欲到故侯也好
歸來

南海馬大夫見惠著述三通勒成四帙上自遼古

達於國朝采其菁華至簡如富欽受嘉貺詩以

謝之

紅旗閱五兵絳帳領諸生味道輕鼎食退公猶筆耕青箱
傳學遠金匱納書成一瞬見前事九流當抗行編蒲曾苦
思垂竹愧無名今日承芳訊誰言贈袞榮

南海馬大夫遠示著述兼酬拙詩輒著微誠再有

長句時蔡戎未弭故見於末篇

漢家旌旆付雄才百越南溟統外臺身在絳紗傳六藝腰
懸青綬亞三台連天浪靜長鯨息映日帆多寶舶來聞道
楚氛猶未滅終須旌旆掃雲雷

和楊侍郎初至郴州紀事書情題郡齋八韻

旌節下朝臺分圭從北迴城頭鶴立處驛樹鳳棲來

蘇耽傳
云後化

為仙鶴止城東北隅樓上又州北樓
鳳驛圖經云常有威鳳降於寒梧也舊路芳塵在新恩駟騎催里

閭風偃草鼓舞抃成雷吏散山禽轉庭香夏葢開郡齋堪
四望壁記有三台人訝徵黃晚文非弔屈哀一吟梁甫曲
知是卧龍才

和郴州楊侍郎翫郡齋紫薇花十四韻

幾年丹霄上出入金華省暫別萬年枝看花桂陽嶺南方
足竒樹公府成佳境綠陰交廣除明豔透蕭屏雨餘人吏
散燕語簾櫳靜懿此含曉芳翛然忘簿領紫茸垂組綬金
縷攢鋒穎露溼暗傳香風輕徐就影苒弱多意思從容占
光景得地在侯家移根近仙井開樽好凝睇倚瑟仍迴頸
遊蜂駐綵冠舞鶴迷煙頂興生紅藥後愛與甘棠並不學
天桃姿浮榮有俄頃

和南海馬大夫聞楊侍郎出守郴州因有寄上之作

忽驚金印駕朱轡遂別鳴珂聽曉猿碧落仙來雖暫謫赤
泉侯在是深恩玉環慶遠瞻台座銅柱勲高壓海門一詠
瓊瑤百憂散何勞更樹北堂萱

奉和鄭相公以考功十弟山薑花俯賜篇詠

採擷黃薑葢封題青瑣闈共聞調膳日正是退朝歸香爲
綺筵發情隨綠翰飛故將天下寶萬里共光輝

馬大夫見示浙西王侍御贈答詩因命同作

又歷交趾桂林南人歌之列在風什王
侍御公易一別歲餘寄末篇以代札

大夫榮
踐舊府

憶逐羊車凡幾時今來舊府統成師象筵照室會詞客銅
鼓臨軒舞海夷百越酋豪稱故吏十洲風景助新詩秣陵
從事何年別一見瓊章如素期

酬馬大夫登淮口戍見寄

新辭金印拂朝纓臨水登山四體輕猶念天涯未歸客瘴雲深處守孤城

酬馬大夫以愚獻通羨奠酒感通拔二字因而寄別之作

泥沙難振拔誰復問窮通莫訝提壺贈家傳枕麴風成謠獨酌後深意片言中不進終無已應須荀令公

答楊八敬之絕句

楊生時亦謫居

飽霜孤竹聲偏切帶火焦桐韻本悲今日知音一留聽是君心手不平時

鄂渚留別李二十一表臣大夫

高檣起行色促柱動離聲欲問江深淺應如遠別情

答表臣贈別二首

昔爲瑤池侶飛舞集蓬萊今作江漢別風雪一徘徊嘶馬立未還行舟路將轉江頭暝色深揮袖依稀見

始發鄂渚寄表臣二首

祖帳管絃絕客帆淒風生迴車已不見猶聽馬嘶聲曉發柳林戍遙城聞五鼓憶與故人眠此時猶晤語

出鄂州界懷表臣二首

離席一揮盃別愁今尚醉遲遲有情處却恨江帆駛夢覺疑連榻舟行忽千里不見黃鶴樓寒沙雪相似

重寄表臣二首

對酒臨流奈別何君今已醉我蹉跎分明記取星星鬢他日相逢應更多

世間人事有何窮過後思量盡是空早晚同歸洛陽陌卜

隣須近祝雞翁

寄唐州楊八歸厚

淮安古地雍州師畫角金鏡旦夕吹淺草遙迎鷓鴣馬春
風亂颭辟邪旗謫仙年月今應滿慙諫聲名衆所知何況
遷喬舊同伴一雙先入鳳凰池

時徐晦楊嗣復二舍人
與唐州俱同年及第

重寄絕句

淮西既是平安地鴉路今無羽檄飛聞道唐州最清靜戰
場耕盡野花稀

春日寄楊八唐州二首

淮西春草長淮水逶迤光燕入新村路人耕舊戰場可憐
行春守立馬看斜桑

漠漠淮上春莠苗生故壘梨花方城路荻筍蕭陂水高齋

有謫仙坐嘯清風起

寄朗州溫右史曹長

暫別瑤墀鴛鷺行綵旗雙引到沅湘城邊流水桃花過簾
外春風杜若香史筆枉將書紙尾朝纓不稱濯滄浪雲臺
功業家聲在徵詔何時出建章

和東川王相公新漲驛池八韻

今日池塘上初移造物權包藏成別島沿濁致清連變化
生言下蓬瀛落眼前泛觴驚翠羽開幕對紅蓮遠寫風光
入明含氣象全渚煙籠驛樹波日漾賓筵曲岸留緹騎中
流轉彩船無因接元禮共載比神仙

酬楊八副使將赴湖南途中見寄一絕

知逐征南冠楚材遠勞書信到陽臺明朝若上君山上一

道巴江自此來

酬楊司業巨源見寄

壁雍流水近靈臺中有詩篇絕世才
渤海歸人將集去梨園弟子請詞來
瓊枝未識魂空斷寶匣初臨手自開
莫道專城管雲雨其如心似不然灰

酬國子崔博士立之見寄

健筆高科早絕倫後來無不揖芳塵
徧看今日乘軒客多是昔年呈卷人
胄子執經瞻講座郎官共食接華裯
煩君遠寄相思曲慰問天南一逐臣

酬馮十七舍人宿衛贈別五韻

少年爲別日隋宮楊柳陰白首相逢處
巴江煙浪深使星三蜀酒春雨霑衣襟
王程促速意夜語殷勤心却歸天上

去遺我雲間音

劉賓客外集卷第五

劉賓客外集卷第六

律詩

唐侍御寄遊道林嶽麓二寺詩并沈中丞姚員外

所和見徵繼作

湘西古刹雙蹲踞羣峰朝拱如駿奔青松步障深五里龍
宮黯黯神爲閣高殿呀然厭蒼巘俯瞰長江疑欲吞橘洲
泛浮金竇動水郭繚繞朱樓騫語餘百響入天籟衆竒引
步輕翻翻泉清石布博碁子蘿密鳥韻如簧言迴廊架險
高且曲新徑穿林明復昏淺流忽濁山獸過古木半空天
火痕星使雙飛出禁垣元侯餞之遊石門紫髯翼從紅袖
舞竹風松雪香溫磨遠持青瑣照巫峽一戛驚斷三聲猿
靈山會中身不預吟想峭絕愁精魂恨無黃金千萬餅布

地買取爲丘園

遙和韓睦州元相公二君子

玉人紫綬相輝映却要霜髯一两莖其奈無成空老去每臨明鏡若爲情

張郎中籍遠寄長句開緘之日已及新秋因舉目

前仰酬高韻

南宮詞客寄新篇清似湘靈促柱絃京邑舊遊勞夢想歷陽秋色正澄鮮雲銜日脚成山雨風駕潮頭入渚田對此獨吟還獨酌知音不見思蒼然

酬湖州崔郎中見寄

風箏吟秋空不肖指爪聲高人靈府間律呂伴咸英昔年與兄遊文似馬長卿今來寄新詩乃類陶淵明磨礪老益

智吟詠閑彌精豈非山水鄉蕩漾神機清渚煙蕙蘭動溪雨虹霓生憑君虛上舍待子乘興行

酬楊八庶子喜韓吳興與予同遷見贈依本韻次用

早遇聖明朝鴈行登九霄吳興與予中外兄弟文輕傳武仲酒逼蓋寬

饒捨矢同瞻鵠當筵共賽臬吳興與予同年判入等第琢磨三益重唱和

五音調臺栢煙常起池荷香暗飄吳興與予同爲御臺門外有蓮池也星文辭北

極旗影度東遼吳興自度支郎中出爲行軍司馬所從即范僕射昔范明友爲度遼將軍直道由來黜浮

名豈敢要三湘與百越雨散又雲搖遠守慙侯籍徵還荷

詔條悴容唯舌在別恨幾魂銷滿眼悲陳事逢人少舊寮

煙霞爲老伴蒲柳任先凋虎綬懸新印龍舸理去橈斷腸

天北郡攜手洛陽橋幢蓋今雖貴弓旌會見招其如草玄

客空宇久寥寥

秋日書懷寄河南王尹

公府想無事西池秋水清去年爲狎客永日奉高情况有
臺上月如聞雲外笙不知桑落酒今歲與誰傾

浙東元相公書歎梅雨鬱蒸之候因寄七言

稽山自與岐山別何事連年鸞鷲飛百辟商量舊相入九
天祇候遠臣歸平湖晚泛窺清鏡高閣晨開掃翠微今日
看書最惆悵爲聞梅雨損朝衣

酬嚴給事賀加五品兼簡同制水部李郎中

九天雨露傳青詔八舍郎官換綠衣初佩銀魚隨仗入宜
乘白馬退朝歸雕盤賀喜開瑤席彩筆題詩出瑣闥聞道
水曹偏得意霞朝霧夕有光輝

裴相公大學士見示答張秘書謝馬詩并羣公屬

和因命追作

草玄門戶少塵埃丞相并州寄馬來初自塞垣銜首蒼忽
行幽徑破莓苔尋花緩轡威遲去帶酒垂鞭躩躑迴不與
王侯與詞客知輕富貴重清才

奉和司空裴相公中書即事通簡舊寮之作

談笑在巖廊人人盡所長儀形見山立文字動星光日運
丹青筆時看赤白囊佇聞戎馬息入賀領駕行

微之鎮武昌中路見寄藍橋懷舊之作悽然繼和
兼寄安平

今日油幢引他年黃紙追同爲三楚客獨有九霄期宿草
恨長在傷禽飛尚遲武昌應已到新柳映紅旗

奉和裴侍中將赴漢南留別座上諸公

金貂曉出鳳池頭，玉節前臨南雍州。
暫輟洪爐觀劍戟，還將大筆注春秋。
管絃席上留高韻，山水途中入勝遊。
峴首風煙看未足，便應重拜富人侯。

和兵部鄭侍郎省中四松詩十韻

松是中書相公任侍郎日手栽

右相歷中臺，移松武庫栽。
紫茸抽組綬，青實長玫瑰。
便有干霄勢，看成構厦材。
數分天柱半，影逐日輪迴。
舊賞台階去，新知谷口來。
息陰常仰望，翫境幾徘徊。
翠粒晴懸露，蒼鱗雨起苔。
凝音助瑤瑟，飄蒨泛金罍。
月桂花遙燭，星榆半對開。
終須似雞樹，榮茂近昭回。

和蘇郎中尋豐安里舊居寄王客張郎中

漳濱卧起恣閑遊，宣室徵還未白頭。
舊隱來尋通德里，新篇寫出畔牢愁。
池看科斗成文字，鳥聽提壺憶獻酬。
同學

同年又同舍許君雲路並華輶

將赴蘇州途出洛陽留守李相公累申宴餞寵行

話舊形於篇章，謹抒下情以申仰謝

歲杪風物動雪餘，宮苑晴兔園賓客至金谷。
管絃聲洛水，故人別吳宮。
新燕迎越郎，憂不淺懷袖有瓊英。

吳興敬郎中見惠斑竹杖兼示一絕聊以謝之

一莖炯炯琅玕色，數節重重玳瑁文。
拄到高山未登處，青雲路上願逢君。

和浙西王尚書聞常州楊給事製新樓因寄之作

文昌星象盡東來，油幕朱門次第開。
且上新樓看風月，會乘雲雨一時迴。

尚書在南宮爲左丞給事與禹錫皆是郎吏

酬浙東李侍郎越州春晚即事長句

越中藹藹繁華地秦望峰前禹穴西湖草初生邊鴈去山
花半謝杜鵑啼青油晝捲臨高閣紅旆晴翻繞古堤明日
漢庭徵舊德老人爭出若耶溪後漢劉寵爲會稽大治及徵還山陰忽有五六老叟自若耶山谷間出人
賈百錢以送寵寵勞之答曰自明府下車民不見吏年老遇值聖明故自扶奉送寵爲人選一大錢受之也

酬淮南牛相公述舊見貽

少年曾忝漢庭臣晚歲空餘老病身初見相如成賦日尋
爲丞相掃門人追思往事咨嗟久喜奉清光笑語頻猶有
登朝舊冠冕待公三日拂埃塵

酬鄭州權舍人見寄十二韻

朱戶凌晨啓碧梧含早涼人從桔槔至書到漆沮傍拈會
因佳句情深取斷章愜心同笑語入耳勝笙簧憶昔三條
路居隣數仞墻舍人舊宅光福時忝東隣學堂青玉案綵服紫羅囊麟角

看成就龍駒見抑揚毅中飛一箭前雲際落雙鷁舍人一舉登科又判入等第

甸邑叨前列天臺愧後行鄙人爲渭南主簿十年舍人方尉其邑及

考功員外鯉庭傳事業雞樹遂翱翔書殿連鳴鵲神池接鳳凰追

遊蒙尚齒惠好結中腸鄙人在集賢與西掖接近日夕追遊微翮方擡舉危根易

損傷一麾憐棄置五字借恩光鄙人出牧姑蘇舍人草制汝海崆峒秀溱

流芍藥芳風行能偃草境靜不爭桑鄙人轉臨汝州舍人牧滎陽轉旆趨關

右頰條匝渭陽病吟猶有思老醉已無狂塵滿鴻溝道沙

驚白狄鄉佇聞黃紙詔促召紫微郎

奉和裴令公夜宴

天下蒼生望不休東山雖有但時遊從來海上仙桃樹肯
逐人間風露秋

洛濱病卧李侍郎見惠藥物謔以文星之句

隱几支頤對落暉故人書信到柴扉周南留滯商山老星
象如今屬少微

酬留守牛相公宮城早秋寓言見寄

曉月映宮樹秋光起天津涼風稍動葉宿露未生塵景氣
尚芳麗曠望感心神揮毫成逸韻開閣遲來賓擺去將相
印漸爲逍遙身如招後房宴却要白頭人

牛相公留守見示城外新墅有溪竹秋月親情多

往宿遊恨不得去因成四韻兼簡洛中親故之

什兼命同作

別墅洛城外月明村徑通光輝滿池上絲管發舟中堤豔
菊花露島涼松葉風高情限清禁寒漏滴深宮

和僕射牛相公追感韋裴六相登庸皆四十餘未

五十薨歿豈早榮早枯之義今年將六十猶粗
強健因親故勸酒率爾成篇并見寄之作

坐鎮清朝獨殷然閑徵故事數前賢用材同踐鈞衡地稟
氣終分大小年威鳳本池思泛泳仙槎舊路望迴旋猶憐
綺季深山裏唯有松風與石田

和僕射牛相公以離闕庭七年班行親故亡歿十
無一人再覩龍顏喜慶雖極感歎風燭能不愴
然因成四韻并示集賢中書二相公所和

久辭龍闕擁紅旗喜見天顏拜赤墀三省英寮非舊侶萬
年芳樹長新枝文明接武居仙院幕客追風入鳳池雲母
屏風即施設可憐榮耀冠當時

和僕射牛相公見示長句

靜得天和興自濃不緣宦達性靈慵
大鵬六月有閑意仙鶴千年無躁容
流輩盡來多歎息官班高後少過從
唯應加築露臺上賸見終南雲外峰

和牛相公雨後寓懷見示

金火交爭正抑揚蕭蕭飛雨助清商
曉看紈扇恩情薄夜覺紗燈刻數長
樹上早蟬纔發響庭中百草已無光
當年富貴亦惆悵何沉悲翁髮似霜

牛相公林亭雨後偶成

飛雨過池閣浮光生草樹新竹開粉奩
初蓮蕤香炷野花無時節水鳥自來去
若問知境人人間第一處

和牛相公題姑蘇所寄太湖石兼寄李蘇州

震澤生竒石沉潛得地靈初辭水府出
猶帶龍宮腥發自

江湖國來榮卿相庭從風夏雲勢上漢
古槎形拂拭魚鱗見鏗鏘玉韻聆煙波
含宿潤苔蘚助新青嵌穴胡雛貌纖鋸
蟲篆銘孱顏傲林薄飛動向雷霆煩熱
近還散餘醒見便醒凡禽不敢息浮盞
莫能停靜稱垂松蓋鮮宜映鶴翎忘憂
常目擊素尚與心冥眇小欺湘燕團圓
笑落星徒然想融結安可測年齡採取
詢鄉耆搜求按舊經垂鈎入空隙隔浪
動晶熒有獲人爭賀歡謠衆共聽一州
驚閱寶千里遠揚舫覩物洛陽陌懷人
吳御亭寄言垂天翼早晚起滄溟

和陳許王尚書酬白少傅侍郎長句因通簡汝洛

舊遊之什

寥廓高翔不可追風雲失路暫相隨
方同洛下書生詠又

見軍前大將旗雪裏命賓開玉帳飲中請號駐金卮竹林
一自王戎去嵇阮雖貧興未衰

和僕射牛相公寓言二首

兩度竿頭立定誇迴眸舉袖拂青霞盡拋今日貴人樣復
振前朝名相家御史定來休直宿尚書依舊趁參衙具瞻
尊重誠無敵猶憶洛陽千樹花

心如止水鑒常明見盡人間萬物情鷓鴣騰空猶逞俊驂
騮齒足自無驚時來未覺權爲祟貴了方知退是榮只恐
重重世緣在事須三度副蒼生

和牛相公南溪醉歌見寄

脫屣將相守冲謙唯於山水獨不廉枕伊背洛得勝地鳴
臯少室來軒簷相聲形面勢默指畫言下變化隨顧瞻清

池曲榭人所致野趣幽芳天與添有時轉入潭島間珍木
如幄藤爲簾忽然便有江湖思沙礫平淺草纖纖怪石鈞
出太湖底珠樹移自天台尖崇蘭迎風綠泛豔拆蓮含露
紅襜褕脩廊架空遠岫入弱柳覆檻流波霑渚蒲抽莢劍
脊動岸荻迸笋錐頭銛攜觴命侶極永日此會雖數心無
厭人皆置莊身不到富貴難與逍遙兼唯公出處得自在
決就放曠辭炎炎座賓盡歡恣談謔愧我掉頭還奮髯能
令商於多病客亦覺自適非沉潛

酬僕射牛相公晉國池上別後至甘棠館忽夢同

遊因成口號見寄

已嗟池上別魂驚忽報夢中攜手行此夜獨歸還乞夢老
人無睡到天明

裴侍郎大尹雪中遺酒一壺兼示喜眼疾平一絕

有閑行把酒之句斐然仰酬

捲盡輕雲月更明金篦不用且閑行若傾家釀招來客何必池塘春草生

酬太原狄尚書見寄

家聲烜赫冠前賢時望穹崇鎮北邊身上官銜如座主幕中談笑取同年幽并俠少趨鞭弭燕趙佳人奉管絃仍把天兵書號筆遠題長句寄山川

酬宣州崔大夫見寄

白衣曾拜漢尚書今日恩光到敝廬再入龍樓稱綺季應緣狗監說相如中郎南鎮權方重內史高齋興有餘遙想敬亭春欲暮百花飛盡柳花初

酬皇甫十少尹暮秋久雨喜晴有懷見示

雨餘獨坐捲簾帷便得詩人喜霽詩搖落從來長年感慘舒偏是病身知掃開雲霧呈光景流盡潢汙見路岐何況菊香新酒熟神州司馬好狂時

劉賓客外集卷第六

劉賓客外集卷第七

律詩

和浙西李大夫霜夜對月聽小童吹觱篥歌依本韻

海門雙青暮煙歇萬頃金波湧明月侯家小兒能觱篥對
此清光天性發長江凝練樹無風測慄一聲霄漢中涵糊
畫角怨邊草蕭瑟清蟬吟野叢冲融頓挫心使指雄吼如
風轉如水思婦多情珠淚垂仙禽欲舞雙翅起郡人寂聽
衣滿霜江城月斜樓影長纔驚指下繁韻息已見樹杪明
星光謝公高齋吟激楚戀闕心同在羈旅一奏荆人白雪
歌如聞洛客扶風塢吳門水驛接山陰文字殷勤寄意深
欲識陽陶能絕處少年榮貴道傷心

浙西李大夫示述夢四十韻并浙東元相公酬和

斐然繼聲

位是才能取時因際會遭羽儀呈鸞鷲銚刃試豪曹洛下
 推年少山東許地高門承金鉉鼎家有玉璜韜呂侯海浪扶
 鵬翅天風引驥髦便知蓬閣閱不識魯衣褒興發春塘草
 魂交益部刀形開猶抱膝燭盡遽揮毫昔仕當初筮逢時
 詠載橐懷鉛辨蟲蠹染素學鸞毛車騎方休汝歸來欲效
 陶大夫罷太原從事歸京師南臺資謬諤內署選風騷羽化如乘鯉樓居
 舊冠黿美香焚濕麝名果賜乾葛議赦蠅棲筆邀歌蟻泛
 醪代言無所戲謝表自稱叨蘭燄凝芳澤芝泥瑩玉膏對
 頻聲價出直久夢魂芳草詔令歸馬批章荅獻葵幽冀歸閣西戎乞盟
 事並真銀花懸院榜翠羽映簾條諷諫欣然納竒觚率爾操
 禁中時諤諤天下免怵怵左顧龜成印雙飛鵠織袍謝賓

緣地密潔已是心豪五日思歸沐三春羨衆遨茶爐依綠
 笋碁局就紅桃溟海桑潛變陰陽炭暗熬仙成脫屣去臣
 戀捧弓號建節辭烏栢宣風看鷺濤土山京口峻鐵甕郡
 城牢舊說潤州城如鐵甕事見歸浣南征記曲島花千樹官池水一篙鶯來和絲
 管鴈起拂麾旄宛轉傾羅扇迴旋墮玉搔罰籌長豎燾觥
 盞樣如舫山是千重障江為四面濠卧龍曾得雨浙孤鶴
 尚鳴臯浙劍用雄開匣公弓閑蟄受弢韻鳳姿常在竹公鷄
 羽不離蒿韻吳越分雙鎮東西接萬艘今朝比潘陸江海
 更滔滔

和浙西李大夫晚下北固山喜徑松成陰悵然懷

古偶題臨江亭并浙東元相公所和依本韻

一辭温室樹幾見武昌柳荀謝年何少韋平望已久種松

夾石道紆組臨沙阜目覽帝王州心存股肱守葉動驚彩
翰波澄見頽首晉宋齊梁都千山萬江口煙散隋宮出濤
來海門吼風俗泰伯餘衣冠永嘉後江長天作限山固壤
無朽自古稱佳麗非賢誰奄有八元邦族盛萬石門風厚
天柱揭東溟文星照北斗高亭一騁望舉酒共爲壽因賦
詠懷詩遠寄同心友禁中晨夜直江左東西偶筆手握兵
符儒腰盤貴綬頒條風有自立事言無苟農野間讓耕軍
人不使酒用材當構厦知道寧窺牖誰謂青雲高鵬飛終
背負

和浙西李大夫伊川卜居

早入八元數嘗承三接恩飛鳴天上路鎮壓海西門清望
寰中許高情物外存時來誠不讓歸去每形言洛下思招

隱江干厭作藩按經脩道具依樣買山村

馬葛堂爲御史大夫時置宅命畫工圖其

狀戒所使曰開鑿隨人化幽陰爲律暄遠移難得樹立變舊

依此樣求之

荒園絕塞通潛徑平泉占上原煙霞遙在想簿領益爲繁
丹禁虛東閣蒼生望北轅徒令雙白鶴五里自翩翻

和滑州李尚書上巳憶江南禊事

白馬津頭春日遲沙洲歸鴈拂旌旗柳營唯有軍中戲不
似江南三月時

酬滑州李尚書秋日見寄

一入石渠署三聞宮樹蟬丹霄未得路白髮又添年雙節
外臺賁洞簫中禁傳徵黃在旦夕早晚發南燕

吐綬鳥詞并序

滑州牧尚書李公以吐綬鳥詞見示兼命繼聲蓋尚書前

爲御史時所作有翰林二學士同賦之今所謂追和也鳥之所異具於首篇

越山有鳥翔寥廓嗟中天綬光若若越人偶見而竒之因名吐綬江南知四明天姥神仙地朱鳥星精鍾異氣赤玉雕成彪炳毛紅綃翦出玲瓏翅湖煙始開山日高迎風吐綬盤花條臨波似染琅邪草映葉疑開阿母桃花紅草綠人間事未若靈禽自然貴鶴吐明珠鴈報恩鵲銜金印空爲瑞春和秋霽野花開翫景尋芳處處來翠幕雕籠非所慕珠丸拓彈莫相猜棲月啼煙凌縹緲高林先見金霞曉三山仙路寄遙情刷羽揚翹欲上征不學碧雞依井絡願隨青鳥向層城太液池中有黃鵠憐君長向高枝宿如何一借羊角風來聽簫韶九成曲

和西川李尚書漢川微月遊房太尉西湖

木落漢川夜西湖懸玉鈎旌旗環水次舟楫泛中流目極想前事神交如共遊瑤琴久已絕松韻自悲秋

和重題

林端落照盡湖上遠嵐清水榭芝蘭室仙舟魚鳥情人琴久寂寞煙月若平生一泛釣璜處再吟鏘玉聲

和遊房公舊竹亭聞琴絕句

尚有竹間路永無綦下塵一聞流水曲重憶滄霞人

西川李尚書知愚與元武昌有舊遠示二篇吟之

泣然因以繼和二首

來詩云元公令陳從事求蜀琴將以爲寄而武昌之計聞因陳生會葬

如何贈琴日已是絕絃時無復雙金報空餘掛劍悲寶匣從此閉朱絃誰復調祇應隨玉樹同向上中銷

和西川李尚書傷韋令孔雀及薛濤之什

玉兒已逐金環葬翠羽先隨秋草萎唯見芙蓉含曉露數
行紅淚滴清池

後魏元樹南陽王禧之子南奔到建業數年後北歸愛姬朱玉兒脫金指環為贈樹至魏却以指環寄玉兒亦有還意

酬李相公喜歸鄉國自鞏縣夜泛洛水見寄

鞏樹煙月上清光含碧流且無三已色猶泛五湖舟鵬息
風還起鳳歸林正秋雖攀小山桂此地不淹留

和李相公平泉潭上喜見初月

家山見初月林壑悄無塵幽境此何夕清光如為人潭空
破鏡風動翠蛾頰會向瑣窓望追思伊洛濱

和李相公初歸平泉過龍門南嶺遙望山居即事

暫別明庭去初隨優詔還曾為鵬鳥賦喜過鑿龍山新墅
煙火起野程泉石間巖廊人望在只得片時閑

和李相公以平泉新墅獲方外之名因為詩以報

洛中士君子兼見寄之什

業繼韋平後家依崑閬間恩華辭北第蕭灑愛東山滿室
圖書在入門松菊閑華天雖暫息一舉出人寰

酬柳柳州家雞之贈

日日臨池弄小雛還思寫論付官奴柳家新樣元和脚且
盡薑牙劍手徒

答前篇

小兒弄筆不能嗔浣壁書窓且賞勤聞彼夢熊猶未兆女
中誰是衛夫人

答後篇

昔日傭工記姓名遠勞辛苦寫西京近來漸有臨池興為

報元常欲抗行

再授連州至衡陽酬柳州贈別

去國十年同赴召，渡湘千里又分岐。
重臨事異黃丞相，三黜名慙柳士師。
歸目併隨迴鴈盡，愁腸正遇斷猿時。
桂江東過連山下，相望長吟有所思。

重別

二十年來萬事同，今朝岐路忽西東。
皇恩若許歸田去，歲晚當爲隣舍翁。

三贈

信書誠自誤，經事漸知非。
今日臨湘別，何年沐汝歸。

題淳于髡墓

生爲齊贅壻，死作楚先賢。
應以客卿葬，故臨官道邊。
寓言

本多興放意，能合權我有一石酒置君墳樹前

懷妓四首

玉釵重合兩無緣，魚在深潭鶴在天。
得意紫鸞休舞鏡，能言青鳥罷銜牋。
金盆已覆難收水，玉軫長拋不續絃。
若向蘼蕪山下過，遙將紅淚灑窮泉。

鸞飛遠樹棲何處，鳳得新巢有去心。
紅壁尚留香漠漠，碧雲初斷信沉沉。
情知點污投泥玉，猶自經營買笑金。
從此山頭似人石，丈夫形狀淚痕深。

舊曾行處遍尋看，雖是生離死一般。
買笑樹邊花已老，畫眉窻下月猶殘。
雲藏巫峽音容斷，路隔星橋過往難。
莫怪詩成無淚滴，盡傾東海也須乾。

三山不見海沉沉，豈有仙蹤更可尋。
青鳥去時雲路斷，姮

娥歸處月宮深
紗窓遙想春相憶
書幌誰憐夜獨吟
料得夜來天上鏡
只應偏照兩人心

登清暉樓

送前四句
爲江州

潯陽江色潮添滿
彭蠡秋聲鴈送來
南望廬山千萬仞
共誇新出棟梁材

省試風光草際浮

熙熙春景霽
草綠春光麗
的歷亂相鮮
葳蕤互虧蔽
乍疑芊綿裏
稍動丰茸際
影碎翻崇蘭
香浮轉叢蕙
含煙絢碧彩
帶露如珠綴
幸因採掇日
沉此臨芳歲

赴和州於武昌縣再遇毛仙翁十八兄因成一絕

武昌山下蜀江東
重向仙舟見葛洪
又得案前親禮拜
大羅天訣玉函封

劉賓客外集卷第八

律詩

寄毗陵楊給事三首

揮毫起制來東省
躡足脩名謁外臺
好看橐鞬莫惆悵
出文入武是全才

曾主魚書輕刺史
今朝自請左魚來
青雲直上無多地
却要斜飛取勢迴

東城南陌昔同遊
座上無人第二流
屈指如今已零落
且須歡喜作隣州

巫山神女廟

巫峰十二鬱蒼蒼
片石亭亭號女郎
曉霧乍開疑捲幔
山花欲謝似殘粧
星河好夜聞清佩
雲雨歸時帶異香
何事

神仙九天上人間來就楚襄王

柳絮

飄颺南陌起東隣
漠漠濛濛好度春
花巷暖隨輕舞蝶
玉樓晴拂豔粧人
縈迴謝女題詩筆
點綴陶公漉酒巾
何處好風偏似雪
隋河堤上古江津

陪崔大尚書及諸閣老宴杏園

更將何面上春臺
百事無成老又催
唯有落花無俗態
不嫌憔悴滿頭來

曹剛

大絃嘈噴小絃清
噴雪含風意思生
一聽曹剛彈薄媚
人生不合出京城

發蘇州後登武丘寺望海樓

獨宿望海樓夜深珍木冷
僧房已閉戶山月方出嶺
碧池涵劍彩寶刹搖星影
却憶郡齋中虛眠此時景

別蘇州二首

三載爲吳郡臨期祖帳開
雖非謝桀黠且爲一徘徊
流水閶門外秋風吹柳條
從來送客處今日自魂銷

松江送處州奚使君

吳越古今路滄波朝夕流
從來別離地能使管絃愁
江草帶煙暮海雲含雨秋
知君五陵客不樂石門遊

題報恩寺

雲外支硎寺名聲敵虎丘
石文留馬跡峰勢聳牛頭
泉眼潛通海松門預帶秋
遲迴好風景王謝昔曾遊

罷郡姑蘇北歸渡楊子津

幾歲悲南國今朝賦北征歸心渡江勇病體得秋輕海濶
石門小城高粉堞明金山舊遊寺過岸聽鐘聲

館娃宮在舊郡西南硯石山上前瞰姑蘇臺傍有

採香徑梁天監中置佛寺曰靈岳即故宮也信

爲絕境因賦二章

宮館貯嬌娃當時意太誇豔傾吳國盡笑入楚王家月殿
移椒壁天花代舜華唯餘採香徑一帶入山斜

姑蘇臺

故國荒臺在前臨震澤波綺羅隨世盡麋鹿古時多築用
金鎚力推因石鼠窠昔年雕輦路唯有採樵歌

贈同年陳長史員外石

明州長史外臺郎憶昔同年翰墨場一自分襟多歲月相

逢滿眼是淒涼推賢有愧韓安國論舊唯存盛孝章所歎
謬遊東閣下看君無計出悽惶

寄湖州韓中丞

老郎日日憂蒼鬢遠守年年厭白蘋終日相思不相見長
頻相見是何人

有感

死且不自覺其餘安可論昨宵鳳池客今日雀羅門騎吏
塵未息銘旌風已翻平生紅粉愛唯解哭黃昏

楊柳枝

揚子江頭煙景迷隋家宮樹拂金堤嵯峨猶是當時色半
蘸波中水鳥棲

海陽十詠并引

元次山始作海陽湖後之人或立亭榭率無指名及予而大備每疏鑿構置必揣稱以標之人咸曰有旨異日遷官裴侍御爲十詠以示予頗明麗而不虛美因拮拾裴詩所未道者從而和之

一云予爲吏隱亭述言海陽之所從來詳矣異日下與此同

吏隱亭

結構得奇勢朱門交碧潯外來始一望寫盡平生心日軒漾波影月砌鏤松陰幾度欲歸去迴眸情更深

切雲亭

迴破林煙出俯窺石潭空波搖杏梁日松韻碧窓風隔水生別島帶橋如斷虹九疑南面事盡入寸眸中

雲英潭

芳幄覆雲屏石奩開碧鏡支流日飛灑深處身疑瑩潛去

不見迹清音常滿聽有時病朝醒來此心神醒

玄覽亭

蕭灑青林際黃綠碧潭隈淙流冒石下輕波逐砌迴香風逼人度幽花覆水開故令無四壁清夜月光來

裴溪

時御史已遇新恩

楚客憶關中疏溪想汾水縈紆非一曲意態如千里倒影羅文動微波笑顏起君今賜環歸何人承玉趾

飛練瀑

晶晶擲巖端潔光如可把瓊枝曲不折雪片晴猶下石堅激清響葉動承餘灑前時明月中見是銀河瀉

蒙池

滌滄幽壁下深靜如無力風起不成文月來同一色地靈

草木瘦人遠煙霞逼徃徃疑列仙園基在巖側

焚絲瀑

飛流透嵌隙噴灑如絲焚含暈迎初旭翻光破夕曛餘波繞石去碎響隔溪聞却望瓊沙際逶迤見脈分

雙溪

流水繞雙島碧溪相並深浮花擁曲處遠影落中心閑鷺久獨立曝龜驚復沉蘋風有時起滿谷簫韶音

月窟

濺濺漱幽石注入團圓處有如常滿盃承彼清夜露巖曲月斜照林寒春晚煦遊人不敢觸恐有蛟龍護

送同魯儒赴舉詩

并引

晝居外次晨門曰有九疑生持一刺來謁立西階以須生

危冠方袂淺拱舒拜且前致詞稱贊其文頗涉獵前言居五六月復衷來益引古事以相劇切與之言能言其得姓因家之所自暨縣道鄉亭之風俗望山名水之槩狀羅含所未記朱顛之未條咸得之於生由是始列於賓籍臨觴而司斟觀博而竄言有日矣初邑中人聞有生來而二千石客之駢然來觀遷客裴御史遇生於座抵掌曰人固有貌類而族殊者周生疑羅玠也衆咸驟然而熟視生疑也愈甚夫形似古所有也優孟似叔敖而楚君欲以爲相人殊而貌肖猶或欲用之玠生於衡山而生生於九疑其似誠匹也無乃躡其武昇俊造仕甸服佐君藩爲御史乎古之人無避事即有而書之尚實也行李之貺則徵夫詩曰宋日營陽內史孫因家占得九疑村童心便有愛書癖手

指今餘把筆痕自握蛇珠辭白屋欲憑雞卜謁金門若逢
廣知問羊酪從此知名在一言

送曹璩歸越中舊隱詩

予爲連州諸生以進士書刺者浩不可紀獨曹生崖然自
稱爲山夫及與語以徵其實則曰所嗜者名嘗遠遊以索
之抗喉舌胘胝晦以干東諸侯見之日率莞然曰秀才者
天下是不禮庸何傷今方依名山以揚其聲將掛幘於南
嶽生之言未及休予遽曰在已不在山若子之言依山而
爲高是練神叩寂捐日月而不顧名聞而老至持是焉用
生聞言愀然如悔色見於眉睫因留止道士院從予求書
以觀居三時而功倍一歲讀史書自皇帝至吳魏間班班
能言之然而絕口不敢言衡山知山夫不販而贏也十一

月告予歸隱於會稽且曰知求名之自矣乞詞以發之遂
賦七言詩以鑒其志詩曰

行盡瀟湘萬里餘少逢知己憶吾廬數間茅屋閑臨水一
盞秋燈夜讀書地遠何當隨計吏策成終自詣公車剡中
若問連州事唯有千山畫不如

尋汪道士不遇

仙子東南秀冷然善馭風笙歌五雲裏天地一壺中受錄
金華洞焚香玉帝宮我來君閉戶應是向崆峒

八月十五日夜桃源翫月

塵中見月心亦閑况是清秋仙府間凝光悠悠塞露墜此
時云在最高山碧虛無雲風不起山上長松山下水羣動
脩然一顧中天高地平千萬里少君引我昇玉壇禮空遙

請真仙官雲駟欲下星斗動天樂一聲肌骨寒金霞昕昕
漸東上輪歌影促猶頻望絕景良時難再逢他年此日應
惆悵

叔父元和中取昔事爲桃源行後貶官武陵復爲翫月
作並題於觀壁爾來星紀再周蕪牽故此郡仰見文字
閣缺伏慮他年轉將塵沒故鐫在貞石以期不朽太和
四年蕪謹記

罷和州遊建康

秋水清無力寒山暮多思官閑不計程徧上南朝寺

田順郎歌

清歌不是世間音玉殿嘗聞稱主心唯有順郎全學得一
聲飛出九重深

米嘉榮

一別嘉榮三十載忽聞舊曲尚依然如今世俗輕前輩好
染髭鬚事少年

自江陵沿流道中

三千三百西江水自古如今要路津月夜歌謠有漁父風
天氣色屬商人沙村好處多逢寺山葉紅時覺勝春行到
南朝征戰地古來名將盡爲神

別夔州官吏

三年楚國巴城守一去揚州楊子津青帳聯延喧驛步白
頭俯偃到江濱巫山暮色常含雨峽水秋來不恐人唯有
九歌詞數首里中留與賽蠻神

夜聞商人船中箏

大編高船一百尺新聲促柱十三絃揚州市裏商人女來
占江西明月天

聞道士彈思歸引

仙翁一奏思歸引逐客初聞自泫然莫怪殷勤悲此曲越
聲長苦已三年

喜康將軍見訪

謫居愁寂似幽棲百草當門茅舍低夜月將軍忽過訪鷓
鴒驚起繞籬啼

贈劉景擢第

湘中才子是劉郎望在長沙住桂陽昨日鴻都新上第五
陵年少讓清光

赴連山途次德宗山陵寄張員外

當時並冕奉天顏委佩低簪綵仗間今日獨來張樂地萬
重雲水望橋山

嘗茶

生拍芳叢鷹觜牙老郎封寄謫仙家今宵更有湘江月照
出霏霏滿盃花

梁國祠

梁國三郎威德尊女巫簫鼓走鄉村萬家長見空山上雨
氣蒼茫生廟門

九日登高

世路山河險君門煙霧深年年上高處未省不傷心

謝柳子厚寄疊石硯

常時同硯席寄此感離羣清越敲寒玉參差疊碧雲煙嵐

餘斐疊水墨兩氛氲好與陶貞白松窓寫紫文

元日感懷

振蟄春潛至湘南人未歸身加一日長心覺去年非燎火
委虛燼兒童銜綵衣異鄉無舊識車馬到門稀

謝宣州崔相公賜馬

浮雲金絡膝昨日別朱輪銜草如懷戀嘶風尚意頻曾將
比君子不是換佳人從此西歸路應容躡後塵

南中書來

君書問風俗此地接炎州淫祀多青鬼居人少白頭旅情
偏在夜鄉思豈唯秋每羨朝宗水門前盡日流

題招隱寺

隱士遺塵在高僧精舍開地形臨渚斷江勢觸山迴楚野

花多思南禽聲例哀殷勤最高頂閑却望鄉來

思歸寄山中友人

蕭條對秋色相憶在雲泉木落病身死潮平歸思懸涼鐘
山頂寺暝火渡頭船此地非吾土閑留又一年

望洞庭

湖光秋月兩相和潭面無風鏡未磨遙望洞庭山翠水白
銀盤裏一青螺

魚復江中

扁舟盡室貧相逐白髮藏冠鑷更加遠水自澄終日綠晴
林長落過春花客情浩蕩逢鄉語詩意留連重物華風檣
好住貪程去斜日青帘背酒家

歷陽書事七十韻

長慶四年八月予自夔州轉歷陽浮岷山觀洞庭歷夏口涉潯陽而東友人崔敦詩罷丞相鎮宛陵緘書來抵曰必我覲而之藩不十日飲不置子故予自池州道宛陵如其素敦詩出祖於敬亭祠下由姑孰西渡江乃吾園也至則考圖經參見事爲之詩俟採之夜諷者

一夕爲湖地千年列郡名霸王迷路處亞父所封城漢置

東南尉梁分肘腋兵本吳風俗剽兼楚語音愴涕井今無

湧烏江舊有名土臺遊柱史石室隱彭鏗

老君適楚有臺在馬彭鏗石室在含山縣

曹操祠猶在濡須塢未平海潮隨月大江水應春生一昨深山裏終朝看火耕魚書來北闕鷁首下南荆雲雨巫山暗蕙蘭湘水清章華樹已失鄂渚草來迎廬嶺香爐出淦城粉堞明鴈飛彭蠡暮鴉噪大雷晴平野分風使恬和趁

夜程貴池登陸峻春穀渡橋鳴絡繹主人問悲歡故舊情

幾年方一面卜晝便三更助喜盃盤盛忘機笑語旬管清

疑警鶴絃巧似嬌鶯熾炭烘蹲獸華裯織鬪鯨迴裾飄霧

雨急節墮瓊英斂黛凝愁色 鈿耀翠晶容華本南國粧

梳學西京日落方收鼓天寒更炙笙促筵交履烏痛飲倒

簪纓謔浪容優孟嬌憐許智瓊蔽明添翠帟命燭挂金莖

坐久羅衣皺盃傾粉面驂興來從請曲意墮即飛觥令急

重須改歡憑醉盡呈詰朝還選勝來日又尋盟道別殷勤

惜邀筵次第爭唯聞嗟短景不復有餘醒衆散局朱戶相

攜話素誠晤言猶疊疊殘漏自丁丁出祖千夫擁行厨五

熟烹離亭臨野水別思入哀箏接境人情洽方冬饌具精

中流爲界道隔岸數飛甍沙浦王渾鎮滄洲謝逸二望夫

人化石夢帝日環營半渡趨津吏緣堤簇郡忙場黃堆晚
稻籬碧見冬菁里社爭來獻壺漿各自擊鴟夷傾底舄
杵妝鬪成采石風傳柝新林暮擊鉦繭綸牽撥刺犀
燄照澄泓露冕觀原野前驅抗旂旌分庭展賓王望闕拜恩榮
比屋惇嫠輩連年水旱并遐思常後已下令必先庚遠岫
低屏列支流曲帶縈湖魚香勝肉官酒重於錫憶昔泉源
變斯須地軸傾雞籠爲石顆龜眼入泥坑事繫人風重官
從物論輕江春俄澹蕩樓月幾虧盈柳長千絲宛田塍一
線緝遊魚將婢從野雉見媒驚波淨攢鳧鵲洲香發杜蘅
一鍾孤葑米千里水葵羹受譴時方久分憂政未成比瓊
雖碌碌於鐵尚錚錚早忝曹三署曾聞奏六英無能甘負
弩不慎在騎衡口語成中構毛衣阻上征時聞關利鈍智

亦有聾盲昔愧山東妙今慙海內兄後來登甲乙早已在
蓬瀛心託秦明鏡才非楚白珩齒衰親藥物宦薄傲公卿
捧日皆元老宣風盡大彭好今朝集使結束赴新正

劉賓客外集卷第九 雜著

論西戎表

謝上連州刺史表

含輝洞述

吏隱亭述

傳信方述

彭陽唱和集引

彭陽唱和集後引

吳蜀集引

汝洛集引

子劉子自傳

王公神道碑

爲淮南杜相公論西戎表

臣某言臣一辭闕庭已僅二載官當重任身受重恩既懷
子牟戀闕之心又負臧文竊位之責思所以歌頌聖德裨
補箴規塵露至微不任懇迫臣遠祖詩顯名漢代出牧南
陽謹言善策隨事獻納忠醇之至聞於中外遺風可襲有

激愚衷臣是以輒竭聞見粗陳梗槩雖不盡陛下聖明萬分之一然臣子之心有直必獻伏惟皇帝陛下德合天地道躋文武弛張普博事法陰陽氣均生成人寰亭育凡是氛沴覆以春和銷除容納比皆如聖意寬宥肆赦實賴皇明河中誅鋤不勞兵革淮右底定不戮一人慶浹萬邦事出千古近又西戎背約寇犯王師陛下弘貸豺狼矜其兇悍布以恩澤果此知慙功因德成不以兵制故詩云獫狁孔熾書稱蠻夷猾夏臣觀自古帝王不忍小忿以貽大患故竭耗中國盡力邊陲至如滅昆明之城平大宛之種豈足發輝皇猷增榮簡冊故聖哲之論薄衛霍之功陛下鏡歷代無益之端脩大君文德之教遂得北狄深藏五城晏閉百蠻向化四海無虞唯此小蕃尚迷聲教陛下示之大信弘以

舊恩雖關防暫驚而烽燧旋罷臣負恩方鎮初懼寇戎正於憂迫之時果聞仁聖之諭攘却兇孽不勞干戈臣靜思遠圖久計莫若存信施惠以愧其心歲通玉帛待以客禮昭宣聖德擇奉義之臣恢拓皇威選謹邊之將積粟塞下坐甲關中以逸待勞以高御下重其金玉之贈結以舅甥之歡小來則慰安大至則嚴備明其斥候不撓不侵則戎狄爲可封之人沙場無戰死之骨若天下無事人安歲稔然後訓兵命將破虜摧衡原州營田靈武盡復舊地通使安西國家長筭悉在於此計熟事定舉必有功苟未可圖豈宜容易此皆陛下朝夕倦談之前後立驗之謀臣質性頑疎籌畫庸近受恩非據敢忘獻忠犬馬之心實所罄盡謹遣某官某奉表

謝上連州刺史表

臣某言伏奉去三月七日制授臣使持節連州刺史恭承
睿旨跪奉詔書皇恩重於丘山聖澤深於雨露抃舞失次
神魂再揚臣某中謝臣性愚拙謬學文詞幸遇休明累登
科第出身入仕並不因人德宗臨御之時臣忝御史陛下
龍飛之日臣忝郎官恭守章程勤脩職業權臣奏用蓋聞
虛名實非曲求可以覆視跡卑易枉無路自明亦緣臣有
微才所以嫉臣者衆競生口語廣肆加誣伏賴陛下至仁
時從寬典舉以緣坐貶佐遐藩屢變星霜頻經恩赦犬馬
懷戀寢興匪寧唯讀佛經願延聖壽昨蒙詔命追赴上都
隨例授官俾居遠郡在臣之分榮幸已多伏荷陛下孝理
弘深皇明照燭哀臣老母羸疾憫臣一身零丁特降殊恩

得移善部光榮廣被母子再生凡在人臣皆感聖德凡爲
人子皆荷聖慈豈唯賤臣獨受恩造不覺喜極至於涕零
昔殷王俯念於前禽且聞解網漢帝有感於少女爰命罷
刑方之聖朝不足多尚感召和氣慰安羣生非臣隕越所
能上報伏以南方癘疾多在夏中臣自發柳州便染瘴瘧
扶策在道不敢停留即以今月十一日到州上訖謹宣聖
旨以示遠人恭述詔條所期富庶無任云

含輝洞述

河東薛公景晦以文無害爲尚書刑部郎中以訕爲道州
刺史居郡大理至於無事清機羨溢盡付山水一旦以書
來誇曰吾得異境於近郊自城西門並南山俯江水有石
穹然如夏屋其左右前後又如迴廊曲房藻繡雕彤之象

雲生日入怪狀迭發水石卉木杳非人寰意其當爲食霞御氣者之所遊息委蛻而去不知其幾千百年逮今得諸黃冠野夫及請而往因名其地曰含輝洞蓋詩家流所謂山水含清輝者是已吾子常以詞雄於世盍爲我誌焉愚得書退而深惟若薛公者少居江湖間遊名山東探禹穴上四明句曲金華陽羨南過九江薄匡廬以涉彭蠡天下山水之籍存乎胸中第其高下銖兩不失及是而口舌不能名顧謂竒信矣若江華者九疑三湘之佳麗地也前此二千石御史中執法河南元次山諫大夫北平陽亢宗司刑大夫東平呂和叔皆碩人也考槃招隱之致恒汲汲然卒使茲境貴於異日豈地愛其實有時而發耶顧謂異信矣夫物之有作俟言而遠故逮焉以書於洞陰曰

營陽鬱鬱山水第一洞有含輝遊人忘歸 孔樂請言
其略先是斯境翳於榛薄天姿孤絕凡目所忽闕其清光有待而發公之來思探異翫竒羨野憇林而民悅之既悅其至益知其嗜捫陁歷峴來適公志偶得竒絕聿來告公駕言從之谷岸溟濛有石如門又如垣墉膠蔓交木似綸似組乃芟乃治乃可布武伸脰掉臂空洞無阻左右迴環儼若廊廡飛泉出竇練縷花吐觸石吹沙珮搖絃撫側徑黃緣豁然見天有石如堂度之五筵東西二門與日明昏奧者如室宣者如軒因其高下爰構亭榭匠生於心隨指如化開山翦木後以私屬結構暨茨子來嬉嬉無事而就邦人不知淑清之辰休澣之時雅步幅巾琴壺以隨前無俗人與白雲期年日盡適形神不羈元氣顛然觀吾朶願

導渚之鴻有時而飛石門之下可以棲遲此谷而盈彼丘
而夷維公之跡 永在斯

吏隱亭述

元和十五年再牧於連州作吏隱亭海陽湖壩入自外間
不知藏山歷級東望恍非人寰前有四榭隔水相鮮凝靄
蒼蒼深流布懸架險通蹊有梁如霓輕泳徐轉有舟如翰
澄霞漾月若在天漢視彼廣輪千畝之半翠麗於是與世
殊貫激明峭絕藿靡葱蒨景有宜昏且迭變疑昔神鼇
負山而抃摧其別島置此高岸海陽之名自元先生先生
元結有銘其碣元維假符予維左遷其間相距五十餘年
封境服人其猶比肩天下山水非無美人地偏人遠空樂
魚鳥謝公開山涉月忘還豈曰無娛伊險且艱溪山風物

城池爲伍却倚佛寺左聯仙府勢拱臺殿光含廂廡窈如
壺中別見天宇石堅不老水流不腐不知何人爲今爲古
堅焉終 流焉終竭不知何時再融再結

傳信方述

予爲連州四年江華守河東薛景晦以所著古今集驗方
十通爲贈其志在於拯物予故申之以書異日景晦復寄
聲相謝且咨所以補前方之闕醫拯道貴廣庸可以學淺
爲辭遂於篋中得已試者五十餘方用塞長者之問皆有
所自故以傳信爲目云元和十三年六月八日中山劉禹
錫述

彭陽唱和集引

丞相彭陽公始由貢士以文章爲羽翼怒飛於冥冥及貴

爲元老以篇詠佐琴壺取適乎閑宴鏘然如朱絃玉磬故名聞於世間鄙人少時亦嘗以詞藝梯而航之中途見險流落不試而曾中之氣伊鬱蜿蜒泄爲章句以遣愁沮悽然如焦桐孤竹亦名聞於世間雖窮達異趣而音英同域故相遇甚歡其會面必抒懷其離居必寄興重酬累贈體備今古好事者多傳布之今年公在并州予守吳門相去迴遠而音徽如近且有書來抵曰三川守白君編錄與吾子贈荅緘縹囊以遺予白君爲詞以冠其前號曰劉白集悠悠思與所賦亦盈於巾箱盍次第之以塞三川之請於是緝綴凡百有餘篇以彭陽唱和集爲目勒成兩軸爾後繼賦附於左方太和七年二月五日中山劉禹錫述

彭陽唱和集後引

貞元中予爲御史彭陽公從事於太原以文章相往來有日矣無何予受譴南遷十餘年間公登用至宰相出爲衡州方獲會面輸寫蘊積相視泣然爾後或雜賦詩贈荅編成兩軸太和五年予領吳郡公鎮太原常發函寓書必有章句絡繹於數千里內無曠旬時八年公爲吏部尚書予牧臨汝有詩歎七年之別署其後云集卷自此爲第三未幾予轉左馮公登左揆每恨近而不見形於詠言開成元年公鎮南梁予以太子賓客分司東都新韻繼至率云三軸成矣二年冬忽寄一章詞調悽切似有永訣之旨伸紙悽歎居數日果承訃書嗚呼聆風相悅者四十年會面交歡者十九年以詩見投凡七十九首勒成三卷以副平生之言

吳蜀集引

長慶四年予爲歷陽守今丞相趙郡李公時鎮南徐州每賦詩飛函相示且命同作爾後出處乖遠亦如隣封凡酬唱始於江南而終於劍外故以吳蜀爲目云

汝洛集引

太和八年予自姑蘇轉臨汝樂天罷三川守復以賓客分司東都未幾有詔領馮翊辭不拜職授太子少傅分務以遂其高時予代居左馮明年予罷郡以賓客入洛日以章句交歡因而編之命爲汝洛集

子劉子自傳

子劉子名禹錫字夢得其先漢景帝賈夫人子勝封中山王謚曰靖子孫因封爲中山人也七代祖亮事北朝爲冀

州刺史散騎常侍遇遷都洛陽爲北部都昌里人世爲儒而仕墳墓在洛陽北山其後也陋不可依乃葬滎陽之檀山原田大王父已還一昭一穆如平生曾祖凱官至博州刺史祖鏗由洛陽主簿察視行馬外事歲滿轉殿中丞侍御史贈尚書祠部郎中父諱緒亦以儒學天寶末應進士遂及大亂舉族東遷以違患難因爲東諸侯所用後爲浙西從事本府就加鹽鐵副使遂轉殿中主務於埭橋其後罷歸浙右至揚州遇疾不諱小子承夙訓稟遺教眇然一身奉尊夫人不敢殞滅後忝登朝或領郡蒙恩澤先府君累贈至吏部尚書先太君盧氏由彭城縣太君贈至范陽郡太夫人初禹錫既冠舉進士一幸而中試間歲又以文登吏部取士科授太子校書官司門曠得以請告奉溫清

是時年少名浮於實士林榮之及丁先尚書憂迫禮不死因成痼疾既免喪相國揚州節度使杜公領徐泗素相知遂請爲掌書記捧檄入告太夫人曰吾不樂江淮間汝宜謀之於始因白丞相以請曰諾居數月而罷徐泗而河路猶艱難遂改爲揚州掌書記涉二年而道無虞前約乃行調補京兆渭南主簿明年冬擢爲監察御史貞元二十一年春德宗新棄天下東宮即位時有寒雋王叔文以善奕棊得通籍博望因間隙得言及時事上大竒之如是者積久衆未知之至是起蘇州掾超拜起居舍人充翰林學士遂陰薦丞相杜公爲度支鹽鐵等使翊日叔文以本官及內職兼充副使未幾特遷戶部侍郎賜紫貴振一時愚前已爲杜丞相奏署崇陵使判官居月餘日至是改屯田員

外郎判度支鹽鐵等按初叔文北海人自言猛之後有遠祖風唯東平呂溫隴西李景儉河東柳宗元以爲言然三子者皆與予厚苦日夕遇言其能叔文實工言治道能以口辨移人既得用自春至秋其所施爲人不以爲當非時上素被疾至是尤劇詔下內禪自爲太上皇後謚曰順宗東宮即皇帝位是時太上久寢疾宰臣及用事者都不得召對宮掖事秘而建桓立順功歸貴臣於是叔文首貶渝州後命終死宰相貶崖州予出爲連州途至荆南又貶朗州司馬居九年詔徵復授連州自連歷夔和二郡又除主客郎中分司東都明年追入充集賢殿學士轉蘇州刺史賜金紫移汝州兼御史中丞又遷同州充本州防禦長春宮使後被足疾改太子賓客分司東都又改秘書監分司

一年加檢校禮部尚書兼太子賓客行年七十有一身病之日自爲銘曰

不天不賤天之棋兮重屯累厄數之奇兮天與所長不使施兮人或加訕心無疵兮寢於北牖盡所期兮葬近大墓如生時兮魂無不之庸詎知兮

唐故監察御史贈尚書右僕射王公神道碑銘

公諱倭字真長其先葉黃帝夫聖人之後與庶姓不同如河出崑崙潛於厚地歟焉振起奮爲

自天非衆

川也故自黃帝八代而生舜武王克殷求有媯之亂滿封於陳是爲胡公十三葉生完自以公子國難不得立乃抱樂器奔齊桓公以卿禮接之下又十一葉和以久爲政陰浹於人遂有齊國三代稱王至建爲秦所滅項羽入秦封

建孫安爲濟北王漢興失國齊人謂之王家因以爲氏安子涓仕漢爲鎮東將軍青州牧封劇縣伯自涓至彤凡一十九代兩漢公卿牧守如家牒然十代祖猛字景略符秦尚書令佐秦成霸業興孔明佐蜀同功故時人謂之王葛史云北海劇人遂著爲族望九代祖休儀曹尚書八代祖鎮惡佐命宋長安擒姚泓至北齊五代祖昕七兵尚書兄弟九人時號王氏九龍於齊史有傳高祖顓字君粹北齊著作郎燕郡太守曾祖敬忠成州刺史大父上客高宗封嶽進士及第歷侍御史主客兵部員外郎累遷兵右金吾衛將軍冀州刺史靈州都督朔方道總管見職官儀及衣闕烈考瞰宣州宣城縣令贈工部郎中娶河東裴氏乃生僕射季睦餘力工爲文始以崇文生應深謀秘策考入上

第拜監察御史天之賦予莫能兩大既揚令名而不以景福享齡五十五葬於河南府偃師縣亳邑鄉後以子貴累贈禮部尚書至右僕射夫人江夏李氏祔焉李門多奇才父暄起居舍人暄子鄘門下侍郎平章事高叔祖善蘭臺郎崇文館學士注文選行於時善子邕北海郡太守有重名四方之士求爲碑誌者傾天下故夫人於盛宗禮範可法累贈至江夏郡夫人僕射有三子長子早終次子處玄少嬰沉恙慕道士養生之術高尚其趣強仕而沒積善不試後來果大焉季子彥威字子美始以五經登甲科歷太常博士祠部員外郎遷屯田郎中轉戶部司封並充禮儀使判官弘文館學士京兆少尹諫議大夫史館脩撰以直諫出爲河南少尹入爲少府監司農卿改淄青節度使徵

拜戶部侍郎判度支勢逼生患出爲衛尉卿分司東都尋起爲陳許節度使檢校禮部尚書充汴宋亳等州節度觀察處置等使北海縣開國子食邑五百戶娶潁川韓氏主客員外郎衢之女國子祭酒楊頊之外孫夫人有三弟皆材無子早謝已如禮祔葬於亳邑原僕射厚德覆露之尚書丕承之以早孤銳意嚮學嘗閱詩至蓼莪篇感激流涕故其志如刃始淬及學成立朝爲鴻儒入用爲能臣參定儀制財成經費起書生擁旌節今又領全師鎮上游握神符垂三組皆嚮時感發之所激也志就而學成名聞而身達欲報無所外榮中悲人子之孝在乎揚其先德以耀於遠乃俾學古者書本系所自且銘於龜趺螭首云銘曰山積而高澤積而長聖人之後必大而昌由聖與賢或爲

霸強建不克嗣濟北疏疆齊人德之其族稱王佐於符秦
北海重光僕射之生負材而起策於萬乘擢爲御史同時
條對千目仰視桂林一枝拾芥相似名動海內夫豈不偉
種德而芽迺生令子出入鼎貴理財統師流根之澤密印
纍纍峻其追崇幽顯有輝孝嗣之志歎然弗怡春露秋霜
感傷履之時久能慕祿豐益悲明發不寢永懷孝思攄之
無窮曷若豐碑景毫之原佳城在斯乃金石刻揭於道陲
松耶栢耶有洛之湄過者必下來觀信詞

劉賓客外集卷第九

劉賓客外集卷第十

墓誌祭文

故董府君墓誌

絕編生墓表

祭柳員外文

重祭柳員外文

代祭柳員外文

祭韓吏部文

祭李司空文

代祭李司空文

代祭王相國文

祭桂尚書文

祭楊庶子文

故荆南節度推官董府君墓誌

元和七年夏四月某日前荆州部從事董府君以疾終於
故府私第年若干其孤泣書前人之爵里耿光求我以銘
於幽且先志也故重爲之董姓出於豢龍氏至辛有而分
在晉爲良史在趙佐簡子爲能臣項羽主盟爲翟王高皇

帝舉兵漢中劫其兵衆不克其土後裔遂爲隴西人凡稱
事不稱名不待事而彰也始予謫於武陵人多中之賢有
董生爲守令客既而以士相見之禮成與之言能言墳典
數旁摭百氏之學弱年嗜屬詩工奕棊用是索合干貴遊
多所慰 中年奉浮圖說三乘用是貢誠於清賢多被辟
書脫巾爲弘文館校書郎再遷至大理評事咸視真秩而
不累其章職繫於外故也晚節尚道故投劾於幕府治扁
舟浮江泛洞庭登熊耳訪浮丘以探異賦枉渚以寄傲
居數歲投老於南荆迷邦縱性委和從化逮夫寢巨室也
自含禭至於卜窆皆仁人之賻焉是歲五月十二日卜葬
於龍山之某岡外姻至矣君名佺字庶中大父曰思簡位
至汝南太守父承祖歿於試守太子舍人始爲君求婦於

鄭之里生嗣子夏卿既立而夭今未之從其後又娶於閻
氏生二子曰周卿雲卿嫠也總裳髻首有正家之道嗚呼
道愈富而室愈貧志甚脩而知甚寡士以隴西爲貴將在
今名與銘曰
學待問而文藻身藝不試兮名孰聞大道甚夷兮此我辰
何生不茂兮非我春脩門之達兮連岡撫膺蔓草如 兮
新墳若斧吁嗟董生兮於焉終古

絕編生墓表

顧彖吳郡人食力於武陵沅水上以讀易聞病且死飭其
子曰吾年十有五而授易於師積六十三年於茲未嘗一
日不吟乎繫象里中兒從吾讀其文多矣死則必葬我於
黨庠之側尚其有知且聞吾書君子曰若彖者可謂志篤

於學矣因以絕編生諡之且表其墓後之讀功令者或採
焉予既謫居是邦始至之日問能道古語可與言者邑子
以生爲對既而執贄請見之生危冠大袂潤視雅拜及門
知讓候肅而後入又肅而躋階心存聖言潤徹眉睫有野
態而無苟容問其所執曰幼學易老而尤嗜問安學曰始
聞於師晚熟於心自尼父兼三才絀八索繫詞焉以通微
言與伏羲文王並行猶天三辰同麗太極秦脫大患完文
顯行漢之田丁京劉而東京有馬鄭魏之何荀兩王而吳
有韋陸前者導源後者灑之溷融混合百派奔湊唐興沙
門一行方洩天機以探古人神交造物智斟人事制動也
有柅變道也無方嚮之支流委輸於我其他紬繹祖述三
十有餘家朱藍之櫟斲之爲羽翼爲鼓吹疇咨天人之際

旁魄上下驚精於擴據匱巧於穿鑿猶制氏之於樂鏗鏘
而已徐氏之於禮善容而已然而前脩之盡心也得以味
腴寡芳焉手胝於運管目矐於臨燭而氣耗於詠呻家居
無貲不能與計偕地偏且遠無有能晤語者心愈苦而跡
愈卑寒膚嗛腹以至於耄老微夫子之問持是安施乎他
日予造其室廬簞瓢在左汗樽在右有龜枵然有筴甚澤
予擻著指骨而訊之曰是疊疊者曾不予欺乎生攸爾而
對云古先聖人知道之妙不可搏而得也故設象以致意
梯有以取無取當其粗用當其精夫權衡所以揣輕重不
爲捶鈎者設也尋尺所以商遠邇不爲運斤者設也龜筴
所以決羣疑不爲知幾者設也幾存乎人是則以天時爲
卦體以地理爲爻位外附人事以象焉內取諸身以彖焉

得樞於寰中迎數於象外自然之理不知其然雖欲強名措說無地彼枯莖朽殼安能與於此乎今夫搢之以至刑灼之以殆盡徒與夫蚩蚩者問歎穰占熊虺起訟需食亡羊喪牛之間耳資其握粟以糊予口烏足爲夫子道哉予以斯言遽於易故書之噫國有太學學有館以延專門若生者苦形役志如其專也茹經於腹湮滅糞壤壁水湯湯不聞其聲摧藏樸遯與山木同朽豈地遠然耶彼文甲絳毛剝筋壽革嶺嶠之華實炎溘之蜃蝦飛苞驛篚所至而貴夫豈貴邇也哉悅者衆故也生之死在元和七年秋七月由死之日推而上求直治生之辰得四百有七十甲子葬在征渚西石磯上其墳可隱東望里塾尚行其志云

祭柳員外文

維元和十五年歲次庚子正月戊戌朔日孤子劉禹錫銜哀扶力謹遣所使黃孟萇具清酌庶羞之奠敬祭於亡友柳君之靈嗚呼子厚我有一言君其聞否惟君平昔聰明絕人今雖化去夫豈無物意君所死乃形質耳魂氣何託聽予哀詞嗚呼痛哉嗟予不天甫遭閔凶未離所部三使來弔憂我哀病諭以苦言情深禮至款密重複期以中路更申願言途次衡陽云有柳使謂復前約忽承訃書驚號大叫如得狂病良久問故百哀攻中涕洟迸落魂魄震越伸紙窮竟得君遺書絕絃之音悽愴徹骨初託遺嗣知其不孤末言歸轡從祔先域凡此數事職在吾徒永言素交索居多遠鄂渚差近表臣分深想其聞訃必勇於義已命所使持書徑行友道尚終當必加厚退之承命改牧宜陽

亦馳一函候於便道勒石垂後屬於伊人安平宣英會有
還使悉已如禮形於其書嗚呼子厚此是何事朋友凋落
從古所悲不圖此言乃爲君發自君失意沉伏遠郡近遇
國士方伸眉頭亦見遺草恭辭舊府志氣相感必踰常倫
顧予負釁營奉萬里猶冀前路望君銘旌古之達人朋友
製服今有所厭其禮莫申朝晡臨後出就別次南望桂水
哭我故人孰云宿草此慟何極嗚呼子厚卿真死矣終我
此生無相見矣何人不達使君終否何人不老使君夭死
皇天后土胡寧忍此知悲無益奈恨無已子之不聞予心
不理含酸執筆輒復中止誓使周六同於已子魂兮來思
知我深旨嗚呼哀哉尚饗

重祭柳員外文

嗚呼自君之沒行已八月每一念至忽忽猶疑今以喪來
使我臨哭安知世上真有一事既不可贖翻哀獨生嗚呼
出人之才竟無施爲炯炯之氣戢於一木形與人等今既
如斯識與人殊今復何託生有高名沒爲衆悲異服同志
異音同歡唯我之哭非弔非傷來與君言不言成哭千哀
萬恨寄以一聲唯識真者乃相知耳庶幾儻聞君儻聞乎
嗚呼痛哉君有遺美其事多梗桂林舊府感激生持俾君
內弟得以義勝平昔所念今則無違旅魂克歸崔生實主
幼稚甬上故人撫之敦詩退之各展其分安平來賻禮成
而歸其他赴告咸復於素一以誠告君儻聞乎嗚呼痛哉
君爲已矣予爲苟生何以言別長號數聲冀乎異日展我
哀誠嗚呼痛哉尚饗

爲鄂州李大夫祭柳員外文

嗚呼至人以在生爲傳舍以軒冕爲僕來達於理者未嘗
惑此昔予與君論之詳熟孔氏四科罕能相備惟公特立
秀出幾於全器才之何豐運之何否大川未濟乃失巨艦
長途始半而喪良驥縉紳之倫孰不墮淚昔者與君交臂
相得一言一笑未始有極馳聲日下驚名天衢射策差池
高科齊驅攜手書殿分曹藍曲心志諧同追歡相續或秋
月銜觴或春日馳轂旬服載暮同升憲府察視之列斯焉
接武君遷外郎予侍內闈出處雖間音塵不虧勢變時移
遭罹多故中復賜環上京良遇曾不逾月君又即路遠持
郡符柳江之孺居陋行道疲人歌焉予來夏口忽復三年
離索則久音貺屢傳篋盈草隸架滿文篇鍾索繼美班揚

差肩賈誼賦鵬屈原問天自古有死奚論後先痛君未老
美志莫宣遭迴世路奄忽下泉嗚呼哀哉令妻早謝稚子
四歲天喪斯文而君永逝翩翩丹旌來自遐裔聞君旅櫬
既及岳陽寢門一慟貫裂衷腸執紼禮乖出疆路阻故人
奠觴莫克親舉馳神假夢冀獲寤語平生密懷願君遣吐
遺孤之才與不才敢同已子之相許嗚呼哀哉尚饗

祭韓吏部文

高山無窮太華削成人文無窮夫子挺生典訓爲徒百家
抗行當時勅者皆出其下古人中求爲敵蓋寡貞元之中
帝鼓薰琴奕奕金馬文章如林君自幽谷升於高岑鸞鳳
一鳴蜩蟬革音手持文柄高視寰海權衡低昂瞻我所在
三十餘年聲名塞天公鼎侯碑志隧表阡一字之價輦金

如山權豪來侮人虎我鼠然諾洞開人金我灰親親尚舊
丹其壽考天人之學可與論道二者不至至者其誰豈天
與人好惡背馳昔遇夫子聰明勇奮常操利刃開我混沌
子長在筆予長在論持矛舉楯卒不能困時唯子厚竄言
其間贊詞愉愉 顏顏磅礴上下義農以還會於有極
服之言逸數 岐山

威鳳不復鳴華亭別鶴中夜驚畏簡書兮拘印綬思臨慟
兮志莫就生芻一束酒一盃故人故人歆此來

祭興元李司空文

維太和四年月日禮部郎中集賢殿直學士劉禹錫謹以
清酌之奠敬祭於故相國山南西道節度使贈司空李公
之靈嗚呼龜靈而刳龍智而屠古今同之天不可呼公之

挺生德與位并如瞻日月豈贊其明何以致之姑話平生
追懷周旋彌四十年射策校文接武聯翩旬服同邑明庭
比肩公乘迅颯凌厲非煙愚觸駭機迸落深泉一持化權
一謫海壖本同末異如矢別弦雲龍井蛙勢不相見二紀
迴泊一朝會面公爲故相愚似悲翁契濶相遇淒涼萬重
復以郎吏交歡上公披襟道舊劇談小酒清洛泛舟鑿龍
攜手公西入關愚亦徵還削去苛禮招邀清閑廣陌聯鑣
高臺看山尋春適野醉舞花間忽復登壇揔戎於外子午
危棧巴梁古岸夷風傖儻俗惶害陰謀密備兇黨千輩
如噬羣犬以逼騶虞如縱炎火以焚瑾瑜時耶命耶不慮
不圖物理神道安知有無嗚呼痛哉玄天甚高上訴何時
長夜無曉斯焉永歸風淒日昏鼓咽簫悲沉埋玉樹誰不

霑衣平生故人零落已稀委化而盡然猶怨咨如何國楨
有此遭罹投災賦命孰主張之有肴在筵有酒盈卮神其
來歆已矣長辭尚饗

代裴相公祭李司空文

四年月日特進守司空兼門下侍郎平章事裴度謹以清
酌少牢之奠敬祭於故相國魏郡公之靈嗚呼玉貞而折
不能瓦合鸞鍛而萎不同雞羣生兮若浮守道不屈惟公
之生福自維嵩金石高韻珪璋德容元和之初左右憲宗
以才視草以望登庸振起直聲激揚清風實有正氣號爲
名公名成身退猶係人望入爲羽儀出領藩方既師百辟
又副丞相道冠搢紳事參翼亮某與公遊四十餘年風期
合契祿位相先某忝司言公持化權應同宮徵馥若蘭荃

猥以姓名稱於上前發迹從微芳 獲宣某爲免相待罪
梁山公拜右揆來從東川極其歡娛著在詩篇某忝三入
公亦東還里門相邇賓閣常閑退朝休澣道舊開顏嗟乎
山川間之忽在旦夕豈意倉卒遂成今昔衣冠喪氣風物
含戚強魂訴天冤血成碧嗚呼哀哉某在病中訃書始至
無力以哭不言垂淚今聞襚輅首路而歸隱几臨風其心
孔悲嘉肴百籩旨酒一卮寄此情素神其來思嗚呼哀哉

代諸郎中祭王相國文

維太和四年月日某官等敬祭於故相國贈太尉太原王
公之靈嗚呼天以和氣鍾於貴人含光不曜煦物如春發
自貢士驟爲庭臣鴻鴈聯行其凌青雲既操利權兼秉國
鈞食祿甚厚奉身如貧井絡之隅益部爲大斗牛之下揚

州繁會受社臨戎油幢曲蓋印綬重疊恩華滂霈簿領如山處之若閑摧筦之權往而復還炎炎暉暉出入二紀未曾傷物屢有薦士急難友弟謹厚訓子顏間熙熙不形愠喜處已無咎得君如此若木方高商飗歛起三台之氣變現在時五福之來盛衰有期曉下黃閣車騎威遲夕歸華堂言笑嘻怡詰朝愀然有志求醫未撤琴瑟俄懸素旂宸衷震悼朝右悽悲詔下褒崇恩殊等夷靈輜既駕真宅將歸笳蕭咽而復揚風日慘而無輝玄亮等或早挹清塵或晚承汎愛昔脩禮於門閭今纏悲於祖載幽顯雖異音徽未昧神之格思歆此誠酌尚饗

祭福建桂尚書文

維太和六年月日蘇州刺史劉禹錫謹以清酌之奠敬祭

於故福建團練使桂公之靈鷗化鵬征孽波冲天士逢其時捨笈乘軒始識尚書貞元季年詣我南省袖文一編便座接語其容溫然星歲未幾鄙夫南遷滯留江湘魚鳥周旋尚書遇知變化如蟬秉憲朝右剖符江壖交趾化行容州績宣凡曰循吏莫居我先太和之初再遂良覲分務東

洛門里同陌予復郎位公爲賓客蔚然貴臣綬紫鬚白俄俱西還列於清班來訪書殿登樓看山見領八屯循街九關賀遷閩越紅旆雙殷克有淑聲摺紳之間惇整鼓舞強悍低跽筵平古津峭壁孱顏豈意龍劍沉晶不還復魄侯堂歸舟建浦雙表何在虎丘之下恭承嘉命來牧吾土言念昔遊忽成千古哀哀孝嗣率禮無違言奉几席歸乎洛師敬陳奠筵泣對靈帷平生不忘歆此一卮嗚呼哀哉

祭虢州楊庶子文

維太和六年月日蘇州刺史劉禹錫謹遣軍吏某乙具少
牢清酌之奠敬祭於故虢州楊公之靈嗚呼利劍多缺真
玉喜折俊人不壽爲氣所啗子之少孤率性自然早有名
字結交世賢席勢馳聲龍秋鳥公試文再售毛翮愈鮮歷
佐侯藩拾遺君前伏閣論事侵內權克揚直聲不愠左
遷一斤於外君門邈然五剖竹符皆有聲績南湘潛化巴
人啞啞比陽布和戰地盡闢壽春武斷姦吏奪魄榮波砥
平士庶同適朝典陟明俾臨本州錫以貴綬腰金晝遊輿
疾而來風煙爲愁靜治三載卧分主憂直氣潛銷頽几不
留九天難問萬化同休嗚呼惜哉與君交歡已過三紀維
私之愛與衆無比乃命長嗣爲君半子誰無外姻君實知

已昔與君遊俱爲壯年怒人言命笑人言天閱事未多信
書太堅方階尺木已墜九泉誦易年深潛病難痊不見南
楚方知北軒嗚呼嗟哉見幾不早追悔已晚猶希耆老容
或宣展以閑相期以晦相勉一丘可樂萬累皆遣翫圖散
帙婆娑京輦天命不長願言莫展嗚呼痛哉君卧弘農予
來姑蘇飛書要約言念鼎湖我車載脂爲子疾驅入境聞
寂唯逢素書發函驚視翰不自濡相去一舍豈無肩輿君
爲病嬰我爲吏拘兩不如意嗟哉命夫君今往矣無復可
道我今泛然一委玄造平生親友零落太早無望拔茅盡
悲宿草到郡浹辰君不起聞寢門一慟哀如焚彭彭轉
車來葬洛濱敬脩賻禮泣送行人萬夫之羞薦君明魂三
赤之版寫予哀文淒涼山河慘淡風雲已矣長別嗟哉楊

